

Profet Aisaia go Po Aşei Buku Hasia nedebo tau sabo po

Aisaia te profet me deli te Jerusalemde bidali sogo, te Asiria dabego te kantri tş Israel te not badu bidali hani dolainu yali, tama pade augwaligo te saut badu bidali Juda dabe me dolagasainu yali. (Te şe yali po te buku 2 King, Daş 17, tede suo.) Dago te buku Aisaia sela badu pedaiba pedebaso, usu da. (1) Daş 1-39. Tede elalubo po e tiwai dao. Aisaia go te aşani po te Asiria ami bidi dabe te paba yagaselama, te augwaligo Juda hani dolainu ebo sogo te po Aisaia go aşani. Aisaia go agade digi po bega selama, dwasianu po pusali te po te Daş 1-12 tede elalubao.

Juda we bidi hauwa te sogo augwali wi umagi mu yali, tama Aisaia go po augwaliba te pedalubo şeşede po page bula selama, pusalio. Agai te tiwai po wali, te şeş pedalubo da, te Asiria dabego homude niga selama ebeo. Menio. Te page Juda dabe augwade digi elalubao, magi baso meni, augwaligo God tudiba muanio, tama tibaso, Godigo augwaliba te dene mabo şeş yaibao, wali. Aisaia go po hanilama pusuyu, te tiwai po wali, te Juda hani dabe augwa gegunai bidi dabe dali, augwali te Genuai Bidigo po dologoba pelama, te doloba pai kolesaga naga wali pişo, wali. Augwaligo te tiwai kolesaga ebaso, te augwali bugagia bidaibao. Tiali goli, augwaligo te tiwai dwai kolesaga me wali pidubaso da, teda Godigo augwali dolaibao.

Aisaia go po daş wabo po pusuyu, te tama po wali, te nosali wiegi yai sogo me pedelaibao, wali. Te king Devitde bulali waş nõş me delide te king pedelama, te tigidali we bidi bidibo page wiegi yai pemenede bidaibao po wali.

(2) Daj 40-55. Tede e tiwai po wai elalubao. Te buku pedai badu wali po, te Juda dabe te Babilonde kalabusi bidali sogo wali po, te se yali po te bobage sogo bidilama, te buku hasia pedai badu te po wai. Te Juda dabe haliga sege elalubadi, tama profetgo te po hanilama pusuyu, te augwali wiegi yai pemene elama bidabo sogo pedelabo po pusalio. God aga te tigidali nai nigali aga Aya dao, tama agai te king Sairus te kantri to pedai Persia bidi daj ilali, te agai se emainogo, tama te Juda dabe augwa page buluba ma pomainogo yali. Te boi bidi dabego augwa buludu te gasa digibulu buluba odasa solama, bidigi soali, tiali goli Godigo augwali homu kone ebo gegeda palobeo. Menio. Agai augwali dali polobadu daj wali bomo yai pode homu kone me elaludalio. Tama me profetgo te tama po me wali, te Israel dabego nogode Godigo te tigidali to pedai we bidi hani dali wiegi yai bugagia ilaibao po wai dao. Te buku pedai badu te po hauwa me weyu, te po wali, “Genuai Bidigo se bidi,” te pedelama, te dene selama, te we bidi augwali tau saibao po wali. Te Godigo po odobo we bidi hauwago konealubo po te tiwai daj wai, te Genuai Bidigo se bidi da wali, te Jisasbolo tama wali dao.

(3) Daj 56-66. Tede wali po e tiwai, te badu pedai badu bukude, te profetgo te Jerusalemba ma aselama, bidagasali hani dabebolo pusali po elalubao. Me badu po e tiwai wali, Godigo aga daj wali po homu kone elalubao, tama te pogo te Juda hani dabego haliga bomo ilalio. Te bukude me badu wali pogo augwalibolo e tiwai po wali, te augwali God dologode bidiyu, tama te lotu wabo doloba pai kolesaga wali pelama, te Godiba gedu haluasa po weyu, te agaba ofa mayu yao. Augwaligo te magi nai walu doado bage meni yai we bidi dabe tau sabo se yao wali. Wiegi yai po me deli te Daj 61:1-2 tede elalubao, te po Jisargo agai se gagalama yainu, te we bidi hani augwaliba te po

nedali. Me te buku Luk 4:16-21, tede elalubo suao. Te Aisaiaگو buku pedai hauwa badu te Godigo we bidi dabe augwali tau selama, haliga dua elama bidabo po wai, magi baso meni, te po dage pedaigo te Godigo bomo elalubo po hanilama pusali. Te we bidi augwaligo suali, te haniani sege ebadi goli, te tagalao, God te augwa Aya mu da, te agai augwali tonaluali. Te Godigo po odobo we bidi dago te tiwai koneabo elalubao, Godigo te profet po waliba mu usu nanio, te Jisasgo bidibo ulade me isalide te po mu usu nai dao.

Aisaiaگو Godigo po te Juda de Jerusalem bulu side bidibo we bidi augwaliba te po pusali

(Dqi 1-12)

¹ E bukude te profet Aisaiaگو po elalubo, aga te Emosgo ogwa dao. Te nade ebo tiwai Genuai Bidi God agai po te Aisaiabolo mani, te Aisaiaگو te Juda we bidibolo, me Jerusalem we bidibolo pusa momainu. Aisaiaگو te po te tuni bidi king Usia, me Jotam, me Ahas, me Hesia, tama bage deli deli te Juda dabe tuni bidi bididubadi pusai dao.
*

Genuai Bidi aga we bidi dali wado po wali

² Dagalو, olo saganama, odao. Tq, nago me odao. Magi baso meni, Genuai Bidigo te po wai dao,
“Te wai dabe eno tonaluama, genuai yali.
Eno augwali bugagia negali.

Tiali goli, augwali da, augwaligo eno po sela saibo dao.

³ Te kau kibu dabego augwa aya konebo dao,
me te donki kibu dabego

* 1:1: 2 Kin 15:1-7, 32-38; 16:1-20; 18:1-20:21; 2 Sto 26:1-23; 27:1-9; 28:1-27; 29:1-32:33

augwa ayago nai mabo pesage konebo dao.
 Tiali goli, eno Israel we bidigo kolesaga menio.
 Te kau kibu de donki kibu sigo kolesagago augwaligo
 kolesaga edelalio,” wali.

⁴ Tega, te we bidi dage dolama,
 dagego kolesaga me mu doali.

Tigidali sogo dagego dwai seḡeḡe sabo dao.
 Te duga dwai seḡeḡe dage aiyaba kegebo dao.
 Dage Israel dabego duga Genuai Bidi tagalai dao,
 aga te Dwagi Yai Doloba Pai Kolesaga
 Naga Ebo God dao.

Tama dagego aga tudi ola manio.

⁵ Magi baso dagego Godigo po me sela saḡubawe?
 Dage tigidali sogo dene sabo hagela meniwe?
 Israel, nage te bidi me bidi dabego elai bidi tiwai dao,
 te agai tigi sese mu dolama, bomo mu meni yai.

Agai tobolu keni kenigo paḡaḡa pai.

⁶ Te kenigo agai toboludu gagalama,
 saḡaba usu nigi pali,
 tama agai tigiwali olo me elalubeo.
 Te haniani kenigo agai tigide paḡaḡama,
 tama agai tigi deda pali.

Augwaligo agai tigi penama agai keni siḡibeo.

Te augwaligo madasin me pilibeo.

⁷ Awe, te boi bidi dabego dagego bulu
 polo dola silai dao.

Tama augwaligo dagego hanu dabe ulali dao.

Te dagego tonalubadi, augwaligo
 dagego gi nai dabe sai dao.

Te gasa bulu bidi dabego bulu mu dolama,
 tama dagego tḡ olo mu elalubao.

⁸ Hobedagia! Jerusalem deli naga augwaligo tagalali.
 Agaduba deli naga elaluyu, tama bomo mu meni.

Aga te bidi dabego olo gi be sę yai ąę elalubao,
te bobi gide sę yani dwasianu be tiwai naga
elalubao.

Aga te boi bidi dabe bagua sai hanu ąę elalubao.

⁹ Ma, Genuai Bidi Tigidali Bomo

Elalubo Bidigo da meba

bidimainu sula tagalisąma menigi sogo da,

mu tama, teda da polo dolama siligi dao,

te hanu Sodom de Gomora si dolali
yali tiwai gilama, polo dologi dao.*

¹⁰ Dage tobolu bidi dabe,

me dage Jerusalem we bidi dabe,

dage te bidi dwai dabe te hanu

Sodom de Gomora side

polobadu bidali bidi dabe tiwai mu tama dao.

Megi da, dagego olo bugagia munama,

tama Godigo bomai po odao, dago Genuai Bidi.

Agai dabolo mawainu ebo po bugagia odao.

¹¹ Genuai Bidigo te po odu gebao,

“Dagego homugo, dagego haniani ofa enabolo mabo

te eno godolo ebawe, homu ebowe? Mu menio.

Dagego te sipsip kibu dabe hauwa dagego seselama,

te isigo ula silabo ofa yainogo ebo dao.

Tiali goli, ena mu hagela mu yali.

Tama eno dagego dwagi yai genuai

dagego sesebo hasa ili dabe eno godolo ebeo.

Ena te kau kibu omai kaneme me,

me te sipsip kibu gųęo kaneme,

me meme kibu omai kaneme dabego

enabolo usu yai dao.

¹² Magi baso meni. Te dage lotuba asobo sogo,

* 1:9: Gag 19:24; Rom 9:29

dage dua aselama,
 eno obo tomoba asobo menio. Menio.
 Dage asobo yaide, duga olo bilagasu,
 kulukulu genuai wainu asobo dao.
¹³ Dage odolali bomai sę elama,
 ofa nai dabe enaba sesigimio.
 Magi baso meni. Eno augwalibolo hagela yai dao.
 Tama me, dagego ulubo pauda denami
 eno gunide dwai denami pedalobo dao.
 Eno dagego gesi poluade, me Sabatde,
 me gasa lotu dabe dagego wabo
 eno me subo, hagela ebo.
 Magi baso meni. Duga dwai sęęęo
 duga lotu dabe dolali.
¹⁴ Eno dagego te gesi poluade lotu wabo,
 me gasa bodolu mani lotu dabe dagego
 wabo eno godolo mu menio.
 Te nai dabe tigidaligo enabolo sęęę mabo. *
 Tama eno tolobo mu hagela ebo.
¹⁵ Te dagego nogo ugwa selama,
 gedu haluasa po enabolo wabo si da,
 teda eno dage sugobeo.
 Tagala, dagego gedu haluasa po hauwa sogo obadi,
 me teda ena olo palia saibao.
 Magi baso meni.
 Te bidi dabe dagego elali bidi dabego
 kaneme dagego nogode me daganalubao.
¹⁶ Eno dage suali mu doali.
 Dage wę paugi pja, tama duga digi duga pęnama,
 tama dwai sęęę dage elalubo sela sayao.
 Tama dwai sę ma igio.
¹⁷ Te dwagi yai doloba pai

* 1:14: Amo 5:21-22

kolesaga ebo kolesaga konea sao.
 Tama te tobage dwagi yai kolesaga ugwa
 ela holomainu yao.
 Tama eyu, te gasa bidi dabego
 aiyaba elaluali bidi dabe tau mao.
 Te po tų ebode te tiana wai dabe bugagia tau sao.
 Tama me te wilawe we dabe te po tų ebode tau sao.
 Te tama bidi dabego augwali dali dwai sę ebaso da,
 dagego augwali tau sao.”

¹⁸ “Odao. Da deliba sisinama, po mimainao.
 Dagego sęę hauwa elalubadi me, tagala.
 Te dage te nala ugwa tiwai bidai goli,
 hoda naigo polo dolai dao.
 Ena Genuai Bidi, eno te po obao,
 eno te dage te tedela ais tiwai ma ilaibao.
 Awe, te hoda nai mu daų wai goli,
 eno dage te tedela yai
 sipsip kibu nisi tiwai ma ilaibao.
¹⁹ Ma, dagego eno po mu odama,
 tama te homu kolesaga wali peyu da,
 teda dage bidibo me bugagia bidiyu,
 me duga gide bulubo wiegi yai nai
 dagego tuyu, bidaibao.
²⁰ Tiali goli, dagego hagela elama,
 eno po sela sayani da,
 teda boi bidi dabego dage ela muagasaibao.
 Ena Genuai Bidi, eno po polo wali.”

*Genuai Bidigo Jerusalem bagego kolesaga dodolabo homu
 yali*

²¹ Mena tama te pedalaliwe?
 Hanu Jerusalem, polobadu nago eno po

wali dolo pai dao.

Tiali goli, megi da, nage penani we gaga wali.
Tega! Polobadu nagede bidali bidi dabego
te po tu dodolobo kolesaga dolo yai dao.

Awe, polobadu nage te dwagi yai
doloba pai kolesaga ebo
bidi dabego pağawai dao.

Tiali goli, megi da, nage bidi ela mabo
bidigo pağayani.

²² Polobadu nage dwagi yai silva tiwai da.

Tiali goli, megi da, nage yaba yai kapa tiwai dao.
Polobadu da, nage pusai wain tiwai goli da.

Tiali goli, megi da, nage olo we tiwai dao.

²³ Jerusalem, nage genuai bidi me, tobolu bidi me,
augwali te po odisiğawai dabe bidiyu,
tama nai wi sabo bidi dabego abagi dao.

Tigidali sogo augwaligo te mone pesa eyu,
augwaligo te bidi dabe augwali dali
mone dabe sainogo ili po wabo
bidi dabe tau sabo homu ebo dao.

Tama te po tu odobo sogo,
augwali te tiana wai dabe tau sabo
homu ebo menio.

Tama me, augwaligo
te wilawe we dabego homu seğe ebo
dodolobo odama, dodolabo homu ebo menio.

²⁴ Tama tibaso, Jerusalem,
Godigo po dabe megi odao.

Tigidali Bomo Elalubo Genuai Bidi
te Israel dabego boma pai God dao.

Agai te po wali, “Ena Genuai Bidi,
eno te ena boi bidi dabebolo dwai dene
wei ponaibao.

Usu dao. Tama augwaligo enabolo seḡe ma magobeo.

²⁵ Jerusalem, eno bomai seḡ me deli nagede yaibao,
te nago dwai seḡ yali dodoliyu,
eno nage posolai isigo ulaibao.

Te bidi dabego te kapa nogi silva iside ulama,
tama dwai pobele bage dagana saibaso,
te sela saḡwainu isi ulubo tiwai yaibao,
te posolai iside.

²⁶ Tama eno dwagi yai tobolu bidi me,
po tuḡ dodola mu odabo bidi dabe
ena digi daḡ ilaibao,
te polobadu nago bidali bidi dabe yali gilama.

Tama bidi dabego nage nogi
te doloba pai kolesaga ebo hanu dao waibao.
Tama Godigo po dolo wali pabo hanu dao waibao.”

²⁷ “Genuai Bidigo Jerusalem bugagia
doloba pai kolesaga dali aselama,
tama te bulu ma dobola saibao.
Tama te dwagi yai kolesagade naga
agai Jerusalem we bidi ma oda saibao,
te augwaligo augwa yali te dwai seḡde
ge neyu, homu begelama,
tama augwa yali dwai seḡde hobede ebaso.

²⁸ Tiali goli, te we bidi dabego po sela saḡnama,
dwai seḡ elama, God tudi ola mabo
we bidi, agai augwali dolama,
tama agai augwali mu silaibao.”

²⁹ “Magi baso meni, dagego genuai
ni silide te tibo god dabeba
lotu olama, tama tede dwagi yai
homu eyu bidai dao.

Tama me te gi elama, tama lotu

wabo digi dao olama, hage yai dao.
 Tiali goli, dage te yali kolesaga dabede hobede elama,
 tama hale genuai mu yaibao.
³⁰ Te dage te genuai ni kali sasilama,
 mobia pabo tiwai yaibao.
 Tama dage te gi wẹ meni yai gi tiwai dage tama tiaibao.
³¹ Te kala sasia pai da,
 te isi deli sogo tama dela pabo dao.
 Tama te tiwai sẹ te doado bage hauwa
 elalubo bomai bidi dabede yaibao.
 Augwa digi dwai kolesaga ebogo
 augwali deli sogo tama dolaibao, sia saibao.
 Tama te sogo augwali tau sabo bidi meni yaibao.”

Genuai Bidigo te po wali.

2

*Genuai Bidigo we bidi hani bugagia bidibo kolesaga
 mawaibao*

(Mai 4:1-3)

¹ Te Aisaiago nade ebadi tiwai, Genuai Bidigo agai po
 Aisaiabolo mani, te Emosgo ogwabolo, te agai te Juda de
 Jerusalem we bidi dabebolo pusa momainu. Te po e tama
 dao.

² Te me sogo nosali, te Genuai Bidigo
 be dolalubo te bulu du,
 te genuai ugwanu ma dolaluyu,
 tama gasa bulu du dabe aiyaba elaluai elaluaibao.
 Tama tigidali we bidi hani teba sisinagasaibao.

³ Te tigidali bulu badu we bidi hanigo te po waibao,
 “Asiaqo. Da bulu du Saionba pinao,
 Genuai Bidigo bulu duba.

Te Israel dabego Godigo beba pinao.
Te agai dabolo dago emaina homu ebo
te kolesaga ola momainu.

Tama da aga digi sa muani sunumidu pogo o.”
Augwaligo te tama po waibao. Magi baso meni,
Genuai Bidigo bomai po te bulu du Saionde gagalasa,
tama tigidali buluba paibao.
Awe, Jerusalem te Genuai Bidi agai bulu elaluama,
tama agai po we bidibolo ola mabo digi elaluaibao.

⁴ Genuai Bidigo tigidali hani we bidigo po tų dodolama,
tama augwali bugagia deliba bidaibao.

Tama augwali hwjbo bainat
te gi tų elebo ain tiwai gagawaibao.
Tama augwa hwą gagawai sesemone te hamago elama,
gi sę yabo hwą tiwai pedalaibao.
Tama tigidali we bidi hanigo me hwigobeo.
Tama augwaligo te boi hwjbo kolesaga
munu ma konea sagobeo. *

⁵ Asao, Jekopgo wąj dabe dage,
da Genuai Bidigo da mani uladu pinao.

God aga genuai nogi haninaibao

⁶ Genuai Bidi, nago naga we bidi
tudi ola mawai dao.
Nago augwali Jekopgo wąj dabe tagalali.
Magi baso meni. Augwaligo tų haniani
pobigo pągana pali, te Filistia bagego tų
tiwai yali gilama.
Augwaligo te dwai kolesaga dabe
sia asobo badu sai dao.
Megi da, nago we bidi hanigo gasa

* 2:4: Jol 3:10

we bidi hanigo kolesaga wali pabo.

⁷ Te Israel dabego t̄o te silva, me gol, me hos, me karis
dabego mu paḡana pali.

Tama bidigo nedebo usu egobeo.

⁸ Tama me ma, augwaligo t̄o tibo
god dabego piksago paḡana pali.

Tama augwaligo augwa te nogogo
nigali nai dabeba lotu po wabo dao.

⁹ Tama tibaso, Genuai Bidi,
nago tigidali we bidi aiyaba elaluama,
tama tigidali we bidi hale dwai mu yaibao.
Genuai Bidi, nago augwaligo seḡe sela saḡio.

¹⁰ Te we bidi dabe, dage wi pelama,
masigi dudulaweba dabe duala sigi piḡo.

Dage t̄ode dedage nigilama, duala siḡo.
Tiyu, dage Genuai Bidi aga ula me bomo dali asobaso,
dage wi elama, dolabuo, Genuai Bidi asobode.

¹¹ Te Genuai Bidi sabalobo sogode da,
agai te dene mabo kolesaga elama,
augwa nogi ugwa sabo bidi dabe
aiyaba elaluaibao. *

Tama augwali hale mu yaibao.

Tama te sogo Genuai Bidi deli naga genuai nogi saibao.

¹² Genuai Bidi Tigidali Bomo Elalubo
Bidigo bodolu elalubo,
te augwa nogi ugwa sabo bidi dabe
aiyaba elaluabo sogo.

Tama te sogo agai te bidi dabego genuai
nai dabe me augwaligo godolo
elama, gawebo nai dabe dolaibao.

¹³ Te agai te Lebanon bulude elalubo
dwagi yai bobobage ni b̄o dolaibao.

* 2:11: 2 Te 1:9; Ped 6:15

Me, te Basande bomai ni dabe me.

¹⁴ Te agai genuai bulu du dabe me agai dolaibao.

¹⁵ Me, te bobobage taua dabe, me te
tigidali hanugo bomai obo dabe me.

¹⁶ Te agai te genuai dwagi yai
sawi sip dabe me dolaibao.

¹⁷⁻¹⁸ Te Genuai Bidi sabalobo sogo da,
agai te dene mabo kolesaga elama,
augwa nogi ugwa sabo bidi dabego
nogi aiyaba elaluaibao.

Tama augwali hale mu yaibao.

Tama me te tibo god dabe mu sia saibao.

Tama te sogo Genuai Bidi aga deli naga
te sogo genuai nogi saibao.

¹⁹ Tama te sogo Genuai Bidigo te t̄ mali iliyu,
tama e t̄de nai dabe wi mu ilaibao.

Tama te we bidi dabe me wi mu elama,
tama masigi dudulawebe me, t̄ dudulawebe me,
wi duala sigi paibao.

Te augwaligo Genuai Bidi aga bomo dali,
genuai ula dali, asobo augwaligo suidali weyu.

²⁰ Tama te sogo te we bidi dabego te tibo god dabe
augwa lotu wabo god dabe saibao,
te augwaligo silva de gol sigo nigali nai dabe.

Tama augwaligo te bologo buluba me
bogw̄ bidibo buluba dabe tama şawaibao.

²¹ Tama te sogo da, Genuai Bidigo te t̄ mali iliyu,
tama t̄de wi mu yabo ş̄ dabe yaibao.

Tama te we bidi dabe me wi mu elama,
te masigi ola beba me,
bulu du dologode elalubo masigi dedageba dabe
wi duala sigi paibao.

Te augwaligo te Genuai Bidi aga ula dali,

bomo dali, asobo augwaligo suidali weyu.
²² Dagego homugo bidi mego da
 tau saiba homu elamuo. Mu menio.
 Da bidi da olo nai mu dao. Magi baso meni.
 Da pęwådage sogo bididama, tama da isaibao.

3

Jerusalem bulu we bidi bidibo page dwaibao

- ¹ Odao. Tamadi tama God, Tigidali Bomo Elalubo
 Bidigo
 te we bidi dabe ugwaba sagonalu
 tonalubo nai dabe sela sęwaibao.
 Te Jerusalem me Juda bulu we bidi dabe
 bidibo wiegi yai ilibo nai dabe,
 te agai tigidali nai me, wę me, sese silaibao.
- ² Agai te hwıbo bomai bidi dabe,
 me olo ami bidi dabe, me po tų odobo bidi dabe,
 me profet bidi dabe, me sogo yesi bidi dabe,
 me hanude genuai bidi dabe, agai sela sęwaibao.
- ³ Tama me, agai te ami ofisa,
 me gavman ofisa bidi dabe,
 me tuni bidibolo wiegi yai kolesaga
 mabo bidi dabe me, agai sela sęwaibao.
 Tama me, agai te bidi dabe haniani
 nai dabe nigibo koneai bidi dabe me
 agai sela sęwaibao, me te bidi dabe te haniani sogo
 yesi pobi koneai bidi dabe me, agai sela
 sęwaibao.
- ⁴ Tama Genuai Bidigo te olo ogwa dabe
 te Juda bulu me Jerusalem bulude
 genuai bidi dabe nigimainu sula tagalaibao.
 Awe, te wai dabe augwa homugo digi
 te bulu tonaluaibao.

Tama haniani kolesaga dabe yaibao.

⁵ Te tigidali bidi dabego aga hasi me
aiyaba elaluainu se bomo yaibao.

Te gesi ogomani wegi manigo
te augwa bolo monu dabego
po obaso, sela sanama, daga waibao.

Tama dwai kolesaga homu pagana pai bidi dabego
te dwagi yai homu kolesaga yai
bidi dabego po sela sawaibao.

⁶ Tama te sogo bidi dabe augwali
augwa ama mu deli me bidibo digi pelama,
tama agabolo te po waibao,

“Nago deli naga te gudabo ugwa te elalubao.

Te nage dago genuai bidi nigilama,
tama da e dwai sogo nago tau sao,” waibao.

⁷ Tiali goli, agai te po waibao,
“Eno dage tau sabo sunumi menio.
Ena me ena nai me ugwa menio.

Dagego ena dagego genuai bidi nigimainu dagego
ena sa mugimio,” te po waibao.

⁸ Jerusalem de Juda si te dwai sogoba
sabolama, tulalubo gagalali.

Magi baso meni. Augwaligo tigidali pogo me, sego me,
augwaligo Genuai Bidigo nogi aiyaba elalubo dao.

Augwaligo te dwai kolesaga agai gedude ma ebo dao.

⁹ Te po tu odobode augwaligo augwa
godolo ebo bidi dabe naga tau sabo dao,
tama gasa bidi dabe aiyaba elalubo dao.

Tama te kolesagago augwa digi augwa
ma po tu ela mabo dao.

Augwali te we bidi dabego gedude

dwai sę ebode augwali hale me ebo,
te Sodom bagego polobadu yali gilama.
Augwali dolaibao. Augwa dagede augwa dolaibao.

¹⁰ Te dwagi yai doloba pai kolesaga ebo we bidibolo
te dwagi yai homu yao po walao.

Magi baso meni, augwali dwagi yai
pe saibao, augwa yali dwagi yai sęde.

¹¹ Tiali goli, dwai bidi dabe da, dolaibao.
Augwali te dwai pe te augwa yali dwai sęde saibao.

¹² Hobede mu da, dage eno we bidi dabe.
Te gesi we bidigo dage te tonalubao.

Te tobolu bidi dabego dage halubaso,
tama dagego augwaligo dwai
sunumidu dage wali te pobao.

¹³ Genuai Bidigo tigidali we bidigo
po tų odainu no sealuba.

¹⁴ Agai aga we bidi dabego tobolu bidi
me genuai bidi dabe po tų ela mani.

Tama agai te po wali, “Te we bidi dabe
te eno wain gi tiwai dao.

Tiali goli, dage da, dagego tama te gi dolama,
tama te gide elaluali nai dabe dagego wi salio.

Dagego bidi nai dabe habuge yai
bidi dabe dagego hobede ebo menio.

Mu menio. Dagego augwaligo
dwasianu nai dabe kegelama,
tama duga bede pesage holobo dao.

¹⁵ Dego dagebolo obaso, dagego eno we bidi agalama,
tama nai meni yai bidi dabe dolaliwe?

Ena Genuai Tigidali Bomo Elalubo Bidi,
eno dagebolo dolo obao.

Dagego dwai kolesaga mu yali.”

Te Jerusalemde dwai kolesaga ebo we dabe dwai dene saibao
¹⁶ Genuai Bidigo te po wali,

“Jerusalem we dabe, suiꝯo.
 Augwaligo homugo augwali dwagi yai
 mu dao homu eyu, hagoma homu ebao.
 Te augwali bilibo sogo, augwaligo augwa saꝯa aulama,
 tama augwa saꝯade hꝯa omainu ebo dao.
 Augwaligo augwa tobolu sagolama,
 augwa dogoni dodolobo dao.
 Tama augwaligo gedu subigila bidi gedu tonobo dao.
¹⁷ Tama tibaso, ena Genuai Bidi eno
 te Saion hanu we dabe dene mawaibao.
 Eno augwaligo tobolude keni paꝯana pomainu yaibao.
 Tama augwaligo tobolu nisi ma menia saibao,” wali.

¹⁸⁻¹⁹ Tama te sogo Genuai Bidigo te Jerusalem we
 dabego dwagi yai aubo nai dabe sela saꝯaibao. Agai te
 saꝯade, me nogode, me dogonide, me olode aubo nai
 dabe agai sela saꝯaibao. Me te tobolu aubo nai dabe me,
 me te tobolu halubo ugwa dage dabe me sela saꝯaibao.
²⁰ Agai te tobolu nisi duꝯbo moꝯ, me tobolu nisi tomagebo
 name ugwa, me te ugwa pedai te kukulu gudubo aꝯo ebo
 nai, me te dwasianu paus augwaligo sanda wel me te
 pobi nai dabe te dogonide kebo nai agai sela saꝯaibao.
²¹ Agai te nogo danide me gunide mubo ring agai sela
 saꝯaibao. ²²⁻²³ Agai te sawi yai ugwa dabe sela saꝯu,
 me agai augwaligo haniani dwagi yai ugwa dabego nigai
 gudubo ugwa dabe me, paus dabe me, hankasip dabe me,
 agai sela saꝯaibao.

²⁴ Tama te sogo te Jerusalem
 we dabego polobadu auwali tiaꝯ me egobeo.
 Te augwaligo sanda wel meniama,

tama augwaligo tigi kugumini dwai mu yaibao.
 Te augwaligo sawi yai ugwa me,
 ugwa name me augwaligo kukulu
 gudabo ugwa name menia saibao.
 Tama tibaso, augwali dwai ugwa dabe gudama,
 tama dwai bonogo augwaligo ugwa daꞑ walaibao,
 te bono te kukulu gudubo aꞑ yaibao.
 Te augwaligo augwa tobolu au me
 iligobeo. Magi baso meni.
 Te boi bidi dabego augwaligo tobolu nisi
 sese poala saꞑnama,
 tama augwaligo tobolu wane yaibao.
 Tama me augwaligo sawi gesabidide da,
 te boi bidi dabego kalabus bagego
 magi augwaligo gesabidide togaibao.
²⁵ Jerusalem, boi bidi dabego nago
 bomai ami bidi dabe hwɨbode ela muaibao,
 me gasa olo bidi dabe ela silaibao.
²⁶ Tama augwaligo nago nai tigidali saibao.
 Nage te we me augwaligo agai ugwa
 dabe sese sela saꞑwai tiwai yaibao.
 Tama aga tɔde habu olo dulalubo tiwai yaibao.
 Tama te obo sunumi dabego te nai dabe
 nage tigide pedalobo sulama,
 tama augwali hobede elama, gela waibao.

4

¹ Tama te sogo te nogo a naga olama, me badu
 nogo si we dabego
 bidi me deli tola selama, te waibao,
 “Da dena digi nai me ugwa dabe da
 dena digi sela tuyu yaibao.
 Tiali goli, dago bidi mu menio.

Tama da hale mu ebo.
Tama tibaso, te hale silimainu eyu,
nage dago bidi bidibo aḡ yaibao,” te po waibao.

Jerusalem dwagi yai noma yai bulu ma gagawaibao

² Te me sogo nosali pedalaibao, Genuai Bidigo te ni me deligo gesi nologo ma kolimainu yaibao. Tama tḡgo dwagi dwagi yai nai dabe holiyu yaibao. Tama te Israel we bidi dabe dolisama me bidibo bage, augwaligo te nai dabe wiegi yai holobo sulama, augwali dwagi yai homu ela paibao. ³ Te Saion hanude bidibo we bidi dabe, augwali te Jerusalemde me bidibo we bidi dabe da, Genuai Bidigo augwali bugagia bidimainu sa polo muai dao, augwali bugagia bidimainu. Tama agai augwali nogi agai bukude asai dao. Tama megı da, agai augwali aga we bidi mu dao waibao.

⁴ Genuai Bidigo bomai homu kolesaga mu yali, te Jerusalem bulu dolama, tama nosali ma te Jerusalem bulu ma usu ma ilama, wiegi yai bulu ma ilainu. Te aga genuai bomogo agai te Jerusalem bulu we tedalama, tama tıgidali meda elalubo sela sawaibao, te hanude daganaluali meda dabe. Agai te we dabego yali dwai kolesaga dabe sese sela sawaibao. Me te bidi dabego gasa bidi dabe dolainu yali dwai kolesaga dabe me sela sawaibao, te Jerusalem wiegi yai pedalobo si da. ⁵ Tama Genuai Bidigo bobobage yai pḡ me deli te bulu du Saionde elalumainu elama, me te we bidi lotu wabo pesageba sisinalubo madi. Te giligade Genuai Bidigo te pḡ elalumainu yaibao. Tama hulide da, agai bobobage yai hano dali, genuai isi bogoli dali elalumainu yaibao. Te pḡ me, hano me, isi me, Genuai Bidigo bogwa wali yali gilama, aga te bulu dude me aga dwagi yai nai dabede ugwadu walaluaibao. * ⁶ Te bogwa

* 4:5: Sai 13:21; 24:16

waligo te Jerusalem bulu haluama, tama bomai giliga posolo palialuaibao. Tama me, agai Jerusalem te mone tulubage sogo bugagia bidimainu yaibao.

5

Wain gi balia po

¹ Eno ena abagi me delide balia po waibao.

Te baliago aga wain gi po pusali.

Te ugwadu bulu du dwasianu

mede t̄o ili hauwa me elaluali.

Tede eno abagigo wain gi tede yali.

² Agai t̄o elama, tama masigi tigidali sela s̄awai dao.

Tama dwagi dwagi yai wain nologo bulali.

Te gi tomode agai be s̄ani,

te aga tede bidiyu, te gi tonaluainu.

Tama te masigi pesage me delide agai

te wain du mimiabo digi te nai

nigali, t̄o dedage nigali.

Tigidali s̄e silibo si, agai te homu yali,

‘Eno ni wain du bugagia mu walaibao,’ homu yali.

‘Tama wain du pusu mu yaibao.’ Tiali goli, meni.

Te ni dabe du bugagia me walobeo.

Tama te du dabe dwasianu mu elama,

tama pedauwalide ha yali. *

³ Tama tibaso, eno abagigo te po wali,

“Dage Juda we bidi, me Jerusalem hanu

we bidi, dagego enabolo walao.

Te dego tiabo s̄e yaliwe? Enawe?

Ma, eno wain gigo dawe?

⁴ Eno koneani. Eno dwagi yai s̄e yali,

* 5:2: Mat 21:33; Mak 12:1; Luk 20:9

te gide dwagi yai wain du walaiba weyu,
 tiali goli magi baso mu te wain du
 dwasianu mu walama,
 tama pedauwalide ha yaliwe?

Te gi tonalubo sę me deli te eno bugagia dolo ebewe?

⁵ Megi da, dagebolo ena wain gide yaiba homu yali po
 dagebolo eno pusa mawaibao.

Te eno wain gi obo huęia sęwaibao.

Awe, te obo dolama, tama te bulu hasa dabe te gi
 tomoba pelama,
 tama te wain ni tulama, dolomainu yaibao.

⁶ Te eno te tų dolama, tama busi holama, nosai holiyu,
 tama te sesane ni dabe holama,
 te gi halua somainu yaibao.

Tama eno te wain ni ma tonalubo sę ma egobeo.

Te me eno te gi tųba tulubage me
 tulamo olama, habu selaibao,”
 eno abagigo te po wali.

⁷ Te Juda we bidi, me Israel we bidi,
 te Genuai Bidigo Tigidali Bomo Elalubo Bidigo
 wain gi tiwai dao.

Agai godolo mu elama, agai augwali
 bugagia mu tonalubo dao.

Te we bidi dabego wiegi yai doloba pai
 kolesaga naga emaina homu ebo dao.

Tiali goli, augwaligo dwai kolesaga ebo dao.

Agai homugo augwaligo gasa
 we bidi dabe dali wiegi yai kolesaga
 emai homu ebo dao.

Tiali goli, augwaligo gasa we bidi aiyaba elaluama,
 tama augwaligo augwali dali boi bidi
 homu kolesaga ebo dao.

Tama te aiyaba elaluali we bidi dabego i wabo agai odali.

Te dwai dwai haniani kolesaga ebo we bidi dolaibao

⁸ Dage te t̄o dabe, be dabe hauwa
 abelama, duga naga pesage
 hola sabo bage, dage dolaibao.

Te tamadi tama dagego tigidali t̄o me,
 bulu me, sese sela silaibao.
 Tama gasa bidi dabe meba bidabo bulu menia saibao.
 Tama dage naga tama bidaibao.

⁹ Eno odali, Genuai Bidi Tigidali Bomo Elalubo Bidigo
 te po wabo eno odali,
 “Mu tama, te genuai dwagi yai be dabe
 dolama, te olo elaluaibao.

Awe, bidi dabe te wiegi yai be dabe me bidigobeo.

¹⁰ Tagala, augwaligo wain gi hauwa bulu badi goli,
 me wain du dabe hauwa me walogobeo.

Tama augwaligo dwasianu wain āi naga nigaibao.

Tagala me, augwaligo nogo si begi
 te wit ge augwaligo te gide bulai.

Tama te wit ininama, augwaligo
 togolama, te begi deli digi bueibao,”

Genuai Bidigo te po wabo eno odali.

¹¹ Dage dolaibao.

Dage te kigamu hulide hodalooama,
 wain w̄e tuyu, te haniani bomai
 w̄e tubo bage, dage dolaibao.

Dagego te w̄e tulama, polodubadi be
 huli sesabi edelebo dao.

¹² Te nai daa tuyu, wain w̄e tuyu,
 me haniani musik gitago eliyu, genagego eliyu,
 ḥ̄bidigo eliyu ebo, te dagego mu koneani.

Tiali goli, Genuai Bidigo yainu ebo,
 te s̄e dabe dagego munu me konebeo.

Dagego te s̄e dabe te olo nai dabe da homu ebo dao.

¹³ Tama tibaso, Genuai Bidigo te po wali,

“Mu tama, eno we bidi dabe dagego
ena konebo hagela yali.

Tama tibaso, boi bidi dabego dage gasa buluba me
kalabus elama, odasa paibao.

Te genuai bidi dabe nai menia saibao.

Te olo we bidi dabe te ʻā nōgone eyu bidaibao.

Tama augwali mu dolaibao.

¹⁴ Megi dage wiegi yai homu elama,
gana paide dagego daa hauwa mu te tubao.

Tiali goli, mu tama, te gu pagede te kele ʻā olama,

tama te Jerusalem bulu genuai bidi dabe,

me olo we bidi dabe dalainu polo no munalubao,”

Genuai Bidigo te po wali.

¹⁵ Te tigidali we bidi hale mu yaibao.

Tama te we bidi augwa digi augwa nogi

ugwa sabo we bidi dabe

augwali nogi mu menia saibao.

¹⁶ Te agai doloba pai kolesagago Genuai Bidi Tigidali
Bomo Elalubo Bidigo

te we bidi dabego bomo aiyaba elaluaibao.

Tama aga deli naga genuai nogi saibao.

Tama agai te dwagi yai doloba pai kolesaga naga ebogo

agai te we bidibolo ola mawaibao,

aga te tedali gasagi yai mu dao.

¹⁷ Te hanu dabe sese dolaibao.

Tama nosai dabego bulu mesega saibao.

Tama sipsip kibu de meme kibu sigo

te mone hauwa elaluali bidi dabego

be elaluali pesageba nosai tuagasaibao.

¹⁸ Te dage dolaibao.

Dagego te gasa bidi dabe ili po walama, seḡe te soba.

Te seḡe dabe dage tigi dagana selama,
tama dagego sela saḡo usu egobeo.

¹⁹ Dagego te po wabo dao,
“Dago odobo Israel dabego God,
aga te Dwagi Yai Doloba Pai Kolesaga Naga Ebo
God dao.

Ma, agai dabolo magi se me yabo homu
ebaso da, teda agai polo emainao.

Tama tibaso, dago sulama, tama dago
aga homu kolesaga koneaibao.

Awe, agai te se polo emainao,” wabo.

²⁰ Dage dolaibao.

Te dagego haniani nai hasegelama,
tama te po wabo dao,

“Dwai kolesaga te wiegi yai dao,
te wiegi yai kolesaga te dwai dao,” wabo dao.

Me, dagego te po wabo dao, “Te hulua sali te ula dao.

Me, te ula ebo te ma huli sali dao,” wabo dao.

Tama me dagego te po wabo dao,

“Te ha ebo nai te pusu ebo, ma te pusu ebo nai te keleda
ha ebo,” po wabo dao.

²¹ Dage dolaibao.

Te dage bidi duga homugo dagego
kolesagago gasa bidi dabego kolesaga aiyaba
elaluali dao homu ebo bidi dabe, dage.

²² Dage te bomai we tubode genuai
nogi elalubo bidi dabe, dage dolaibao,
te dagego bomo de kolesaga si da,
te haniani we sḡiḡibo delide naga dao.

²³ Te dagego po tu odobo sogo da,
dagego te augwaligo nogode te ili po wabo

po tu abelebo masigi dagego selama,
 tama te dwai se yali bage olo taga palobo dao.
 Tiali goli, dagego te po sege
 meni yai bidi dabego po bugagia osola subo menio.
²⁴ Tama tibaso, dage te ni sasia pabo
 tiwai elama, tama te ni pedali mobia pelama,
 tama te ni yabe dabe tau elama,
 tegalubo tiwai yaibao.
 Te dwai se dage tigiba polo tama pedalaibao,
 te isigo nosai delama, silibo tiwai tama yaibao.
 Magi baso meni.
 Dagego te Genuai Bidi Tigidali Bomo Elalubo Bidigo
 bomai po sela sabaso,
 dagego Israel dabego God tudi ola mabo.
 Aga te Dwagi Yai Doloba Pai Kolesaga
 Naga Ebo God dao.
²⁵ Tama tibaso, Genuai Bidi agai
 aga we bidi dabe dali sebe eyu,
 te sebe posolo mu ebao.
 Tama megida, agai nogo ugwa
 sagua selama, dolainu no munalubao.
 Agai nogogo deli sogo elebaso,
 te tigidali to dabe bulu du dabe
 elebaso, memenege elama,
 bulu du dabe aluasa dulaibao.
 Tama we bidi hauwa isila paibao.
 Tama augwaligo tigi dabe te hanu sunumi dabede
 olo pobele bage dabe munalua pabo aq yaibao.
 Genuai Bidi agai tama tiaibao.
 Tiali goli, te tama tibogo Genuai Bidi agai sebe
 siligobeo.
 Menio. Agai nogo me ugwaba me dodolalubao.
²⁶ Genuai Bidigo te digibulu

ami bidi dabe aga we bidi dolagasomainu i wabo
sa muaibao.

Awe, te digibulu mu bidibo bage
asomainu eyu, agai ho bomonama waibao.

Tama te ami bidi dabe bomona togwa asaibao.

²⁷ Te ami bagego bidi dabe da,
te bomai bidi dabe naga dao.

Te augwali me deli saḡa dili telega
elama, tulaluainu yai me menio,
o te agai gedu godege magana pai me menio.

Augwaligo kibu waligo te gudali ugwa
bugagia kenama, asaibao.

Augwaligo bomai su saḡa sendol guda sesa paibao.

Te togwa pabo aḡ isawai me gudugobeo.

²⁸ Augwaligo ene da, mu poa pai.

Tama augwaligo enesigi dolama,
tama enabo no sealubuo.

Augwaligo hos dabe da, boma pai mu dao.

Tama te hos dabego saḡade kapa dabe
te dila pai masigi tiwai, tama togwa pogobeo.

Augwaligo karis dabe bomona mu pabo dao.

Tama te karis wili dabe da, te wali ebo aḡ ebo dao.

²⁹ Te ami bidi dabego te hai wabo te
laion yowigo bulu hasa ela munama,
daḡa wabo tiwai waibao.

Augwaligo boi bidi dabe toulama, tama sela paibao,
te laion yowigo bulu hasa elama,
sela pabo tiwai yaibao.

Tama bidi mego augwali ma sogobeo.

³⁰ Tama te sogo boi bidi dabe aselama,
Juda bulu dolagasaibao.

Tama augwaligo kulukulu genuai mu waibao,

te tamu wẹ holama, wẹ kemi saneba
 asiyu, u wabo tiwai yaibao.
 Tama te bidi dabego te buluba tonagasobo si da,
 teda augwaligo te bulu sisi pogo mesega
 selama, giliga ula sininai suaibao.
 Tama te bulu mu hulua sai suaibao.

6

Godigo Aisaia profet bidi nigimainu i wali

¹ Te king tuni bidi Usia isali kibu bede, eno Genuai Bidi aga tuni bidi saide dualalubo suali. Agai tuni bidi sia ugwanu mu elaluali. Tama tuni bidigo ugwa agai gudali da, moni bobobage mu elama, aga be mu usu nai suali.

* ² Tama geninama ensel sibigo aga bagua sai elaluali. Te tigidali deli deli ensel dabego bogo a naga olama, me badu nogi deli naga elaluali. Tama deli deligo augwa bogo me sigo augwa gesabidi halua siyu, ela pai suali. Tama gasa bogo me sigo augwa tigi mesega siyu yai yali. Tama gasa bogo me sigo da, augwali bola peyu yali. Te ensel sibi da, te isi ula tiwai. * ³ Tama augwa digi augwa hasi ma i weyu, te po wali, “Genuai Bidi aga tedali gasagi yai mu dao. Aga tedali gasagi yai mu dao. Aga tedali gasagi yai mu dao. Genuai Bidi Tigidali Bomo Elalubo Bidi aga tedali gasagi yai mu tama dao. Agai genuai ula de bomo sigo tɔ tigidali mu usu nani,” te po wali. * ⁴ Ena yaide be sunumide bidali, tama tigidali sogo augwali deli mego hae wabo sogo da, eno suali, te moni masigi me augwaligo

* 6:1: 2 Kin 15:7; 2 Sto 26:23 * 6:2: Te tobage mobo bidi enselgo bogo dabe te a naga me badu deli elalubo, augwali te gasa me badu ensel bogo nigai bidi dabe tiwai me elalubeo. Te tobage ensel dabe augwali nogi e tiwai “Serafim” te Hibru pogo nogi da, tama augwaligo po me te buku Baibel Aisaia pedai delide naga elalubao. * 6:3: Ped 4:8

be seŋ yali, te masigi tigidali mobodo yali. Tama eno suali, hano bede paŋana pabo suali. * ⁵ Tama tibaso, ena wi ebaso, te po wali. “Mu tamao, ena mu dolaibao. Tigidali sogo eno pedauwalidu dwai po wabo dao. Tama ena dwai po wabo we bidi dabe tomode bidibo dao. Ena dwai seŋe wa abibo bidi dao. Tama megi da, eno te tuni bidi polo suali, aga Genuai Bidi Tigidali Bomo Elalubo Bidi. Tama tibaso, ena isaibao,” eno te po wali.

⁶ Tama te ensel dabe me deligo ala gagawai naide isi dage tolasa, ena pageba bola asali. Agai te isi dage te altade sali. ⁷ Agai te isi eno pedauwalide munama, agai te po wali, “Eno te isi nago pedauwalide muani dao. Tama nago dwai seŋe sia selama, tama megi Genuai Bidigo nago yali dwai seŋ sela saŋwai dao,” wali. ⁸ Tama eno Genuai Bidigo ensel sibi hanaluyu, te po wabo odali, “Dago de tagala palaibawe? Dego eno po sela paibawe?” Tama eno te po wali, “Nago ena tagala palao.” ⁹ Tama tibaso, Genuai Bidigo enabolo te po we bidibolo pusugi pao po wali,

“Dagego po hauwa sogo odaibao.
 Tiali goli, dagego te page kuna konegobeo.
 Dagego gedugo hauwa sogo tonono bilaibao.
 Tiali goli, dagego magi seŋ pedelali me konea sogobeo.
¹⁰ Magi baso meni.
 E we bidi hanigo homu kolesaga te puna pai dao.
 Tama augwaligo odogo po odobo hagela eyu,
 tama augwaligo augwa gedu palia sai.
 Tiyu, augwaligo gedugo te magi nai
 me deli suidali weyu tiali,
 tama augwaligo odogo po odidali weyu tiali,
 tama augwaligo homude te po page

* 6:4: Ped 4:8

ma koneama, tama augwali begasa,
 enaba ma aselama, tama eno augwali usu ma
 ilidali weyu, augwaligo
 tama kolesaga yai dao,” wali.*

¹¹ Tama tibaso, eno aga e tama po hanalu wali, “Genuai Bidi, eno te sē ela pelama, mena sogoba usu nigi paibawe?” Tama agai po wei ponoyu, te po wali,
 “Te tigidali hanu dabe, me t̄ dabe,
 me be dabe sese dola silama,
 be dabe olo elalua pabo sogode.
 Tama bidi dabe te bede dabe bidi me
 bidisama ebo sogoba usu nigi paibao.

¹² Ena Genuai Bidi.
 Eno te we bidi tigidali augwali augwa
 bulu pade eno augwali
 te digibulu buluba sela sawaibao.
 Tama te bulu we bidi menia saibao.

¹³ Tama ma dwasianu we bidi hani
 te t̄de me bidibaso da, augwali me silaibao.
 Tiali goli, tagala, te bulude we bidi meni baso me,
 te nosali ena we bidi me ma pedalaibao,
 te ni age te bidigo polo gelai ni tanede age
 ma dalasa holobo tiwai ma yaibao,” wali.

7

Godigo tuni bidi Ahasbolo tau sabo po wali

¹ Te Ahas te Jotango ogwa, aga w̄aj Usia, aga te Juda dabego tuni bidi bidibadi, hw̄ibo sogo pedalali. Resin, Siria bulu tuni bidi, me Peka, te Ramaliago ogwa, Israel dabego tuni bidi, augwali sigo Jerusalemba hw̄igi pali. Tiali goli, augwali sigo te hanu sabo usu ebe.

* 6:10: Mat 13:14-15; Mak 4:12; Luk 8:10; Jon 12:40; Tpi 28:26-27

Te hwĩbo Jerusalemba sabolisama ebadi da, * 2 te Juda dabego tuni bidigo te e tama po odali, te Siria ami bidi dabe te Israel bagego t̄ba polo asai dao wabo po odali. Tama tuni bidi aga we bidi hani dali augwali wi mu eyu, haliga midigi sali, te bomai waligo te ni silide elalubo ni yabe dabe memenege ilibo tiwai yali. 3 Tama Genuai Bidigo Aisaiabolo te po walali, “Naga ogwa Searjasup* oda selama, tuni bidi Ahas sugi pao. Dage te w̄ sabo w̄ gamia Jerusalem ugwa badu pīo. Tama dage sigo te tuni bidi te name ugwa w̄ telabo pesageba pabo genuai sunumide te tuni bidi tība pao. 4 Te tuni bidibolo aga homu dāu olama bidao, tama te haniani po dabego agai homu elalumainu elamo dao po walao. Aga yaide dua bidama, tama te tuni bidi Resin aga hani dali, me te Israel dabego tuni bidi dabe dali, wi igio po wao. Te tuni bidi sigo s̄b̄ te isi pāde sula sainu dabo tiwai ebao. Te sula sainu hano naga holobo tiwai te ebao. 5 Te mu tama, te Siria dabe augwaligo te Israel dabego tuni bidi dali augwaligo po mia sali, te Ahas aiyaba elaluaio olama, 6 augwaligo te po wali, augwali te Juda buluba hw̄gasaibao po wali. Tama we bidi wi ilama, tama te bulu selama, tama te bidi Tabelgo ogwa tuni bidi bidimainu sa muaibao, augwaligo te po mia sali,” wali. †

7 “Tiali goli, ena God, Genuai Bidi, eno te po te obao, te nai dabe te me pedalogobeo. Mu tama, augwaligo te s̄ ebo usugobeo. 8-9 Magi baso meni. Te tobolu bidi Resin agai bomogo naga te genuai hano Damaskus tonalubo dao. Tama Damaskusgo bomogo te Siria t̄ kantri tonalubo dao. Tiali goli, te Resin da, te aga bidi naga

* 7:1: 2 Kin 16:5; 2 Sto 28:5-6 * 7:3: Te Hibru pode te nogi Searjasup te tobage po tiwai si elalubao, “Dwasianu hani we bidi te augwa page buluba ma asaibao,” wai dao. † 7:6: Dago te nogi yali bidigo nogi konebeo, “te bidi Tabelgo ogwa,” tiali goli te kolesaga koneai bidi dabego homugo aga te Siria bulu bidi hani me deli da homu yai.

dao. Te tiwai me, Ramaliago ogwa Peka agai bomogo naga te Israelgo genuai hanu Samaria tonalubo dao. Tama te Samaria hanugo bomogo te Israel tō pedai kantri tonalubo dao. Tiali goli, te Peka da, aga bidi naga dao. Te 65 kibu be tomode te Israel bulu dolama, tama te we bidi sese besela pelama, tama augwaligo nogi mu tama sia saibao. Tama ma, te Juda dabe dagego eno pode homu daꝯ wasiꝯma yali da, teda dage me bobobage sogo me bidigobeo,” Genuai Bidigo te po wali.

Godigo tuni bidi Ahasbolo bomo yai sę ola mani

¹⁰ Tama Genuai Bidigo Ahasbolo gasa po me wali.

¹¹ Agai Aisaiabolo te Ahasbolo te po wao po wali, “God naga Genuai Bidibolo hanalu wao, te nagebolo bidigo gedugo susiꝯwai bomai sę me ola momainu. Nago agabolo mena tama bomai sę, me nago suabo homu ebo sę me, nago agabolo hanalu wao. Ma, nago te bomo yai sę te bidi gꝯ pagede suabo homu ebaso me, o ma nago dagalude bomai sę pedalobo suabo homu ebaso, o ma menade me naga homugo godolo me ebo digi te tobage sę suabo homu ebaso da, nago Godibolo hanalu wao, tama Godigo nage ola mawaibao,” wali. ¹² Tiali goli, Ahasgo te po wali, “Menio. Te eno agabolo bomai sę me suainu me hanalugobeo. Eno Genuai Bidigo bomo usu sabo hagela ebo,” wali.

¹³ Teda Aisaiago po wei ponoyu, te po wali, “Dage tuni bidi Devitgo wꝯ dabe, dagego bugagia odao. Dagego ebo kolesagade da te bidi dabego dage hagela mu yali. Tama megı ma eno Godigo tonalubo kolesaga te dagego usu sogowe? ¹⁴ Teda Genuai Bidi aga digi dage bomo yai sę me deli ola mawaibao. Te sę da e tama tiwai dao. Te gesi wegı me tabı elama, tama agai ogwa ame naibao, tama agai nogi

Emanuel poaibao. † * 15 Tama nosali te ogwa aga te homu kolesaga elama, te mena kolesaga dwai yaliwe, ma mena kolesaga wiegi yai yaliwe wabo sogode, tama te sogo agai hani bunu aḡ, me sis augwaligo kau kibu ame peḡo, me sipsip kibu ame peḡo nigai nai, tuaibao,” wali. §

16 “Ahas, megi da, nago te tuni bidi side nage wi ebo dao. Tiali goli, augwali sigo bulu dolama, tama augwaligo tḡ olo elaluaibao. Tama te nai seḡ da, te ogwa wai boḡo mena kolesaga dwai yaliwe, ma mena kolesaga wiegi yai yali homu konesiabadi, te seḡ yaibao. 17 Tama Genuai Bidigo dwai sogo taga palama, tama nage me, naga we bidi me, naga ayago togali seseba taga palaibao. Te seḡeḡo da, te polobadu yali te seḡeḡ mu edelama, mu yaibao, te Israel dabego Juda tagalama, taga palidu gagalasa, megiba usu nagasali. Te seḡeḡ e dao, Genuai Bidigo Asiria tuni bidi Juda buluba sela asaibao,” Aisaiaḡo te po wali.

18 Tama te sogo Genuai Bidigo Isip dabeba ho obaso, augwali augwa bulu tagalama, tama augwali te dinai sibi asobo aḡ yaibao. Tama agai te Asiria haniba ho wabo

† 7:14: Te Hibru pogo te nogi Emanuel te page da te elama dao, “God da dali bidibao,” wali. * 7:14: Mat 1:23 § 7:15: Te Israel dabe augwali te tḡ wa pai bulude bidali sogo, augwaligo te nai hauwa elalubeo. Tama augwaligo odali, te Kenan tḡde te nai hani me hasago ame peḡ hauwa elalubo po odali, tama te wiegi yai nai mu da augwaligo te homu yali. Te buku Ma Dobola Sali, Daḡi 3.8, tede te po elalubao. Tiali goli, nosali da, augwali te Kenan tḡba sabolama, bidali sogo da, augwaligo te tobage nai hauwa mu elaluali, te nai hani me hasago ame peḡ te tubo nai si naga me elalubeo. Tama tialima, bidi mebago homugo te hanigo te po wali, te wai dabego te wiegi yai nai naga tuabo po wali da homu yali, te nai hani me sis. Tama bidi mebago homugo te po page te gasagi yai tedali wali da homu yalio. Augwaligo homugo te hanigo te gide nai dabe tigidali dolaibao po olama, wali da, te homu yali. Te wali po te ves 21-25 tede suo. Te tobage nai si naga elalueibao, te bulude elalubo hani dali te tubo ame peḡ, ma te sis nigabo, te nai si naga elaluabo po olama, wai dao.

si, tama augwali te mano sibi isidigi asobo tiwai asaibao. ¹⁹ Tama augwali te bulu Juda tode mu paga yaibao. Tama augwali te tigidali dwai pesage me, masigi dedage me, dwagi yai nosai elalubo pesage me, sesane yai bono elalubo pesage me, mu usu naibao.

²⁰ Tama te sogo Genuai Bidigo te Asiria tuni bidi te we Yufretis u badu oda saibao. Aga te Genuai Bidigo nisa tiwai elama, dagego nisi poawaibao, te dage Juda dabego tigi nisi. Agai dagego penane nisi me, tobolu nisi me, tigi nisi me, tigidali agai poawaibao.

²¹ Tama te sogo da, te boi bidi dabego dagego kibu bulmakau dabe, sipsip kibu dabe sese ela silaibao. Tiali goli, bidi me deligo kau kibu deli bidiyu, me meme kibu si me bidibaso da, ²² augwaligo ame pe hauwa mu nigilaibao. Tama agai te ame pe selama, tama te tubo nai sis geselaibao. Tama te dwasianu we bidi bidibo bage augwaligo te sis dali, hani bunu ai dali si tuyu yaibao.

²³⁻²⁴ Te sogo da, dagego gi dabe dola silaibao. Megi te dagego dwagi yai wain ni gi deli delide te 1,000 wain ni bono elalubo, tama te ni dude dagego masigi 1,000 kina te sabao. Tiali goli, te dwai sesane ni me, sesane bono si holama, te ni mesegelaibao, te dwagi yai gi dabe, tama bidi dabe olo bilibo wi yaibao. Ma, bidi dabe augwali teba poloba painu da, teda augwaligo enesigi me selama, hasa kegegi paibao. ²⁵ Megi da, bidi dabego te dwasianu bulu dude dabe te augwa gide nai sabo dao. Tiali goli, te ni sesane yai ni dabe holiyu, bono dabe holiyu elama, te gi mesegelaibao. Te bidi dabe augwali te sesane dabe wi ebaso, teba pelama, gi dabe ma egobeo. Menio. Te da, augwaligo te kau kibu de sipsip kibu naga te pesageba bilama, nai teba kegegi pomainu sula tagalaibao.

8

Polo wi sa, polo sela pa

¹ Genuai Bidigo enabolo walali, “Te po tede asẽabo genuai nai me sao, tama ugwadu nago te po asẽao, ‘Polo wi sa, polo sela pa.’ Nago bugagia asẽao, tama te bidi dabego bugagia nedebo usu yaibao. ² Tama te po sagoa maiabo bidi si nago sao, te dwagi yai bidi pris Uria, me Sekaraia, te Jeberekiago ogwa,” wali. Tama eno te tama yali. ³ Nosali ena ena we dali piali. * Tama aga haliga elama, ogwa ame nani. Tama Genuai Bidi enabolo te po wali, “Nago te nogi agabolo mao, ‘Polo wi sa, polo sela pa’.” ⁴ Tama te waigo ida aya wabo gagalisiɓbadi da, te Asiria bagego te Damaskus de Samaria sigo wiegi yai nai dabe tigidali wi sagasaibao, tama augwa tuni bidiba sela paibao,” wali.

Asiria tuni bidigo Juda dabe aiyaba elaluainu yai goli, God augwali dali bidali

⁵ Genuai Bidigo enabolo te po ma wali,
⁶ “Ena Genuai Bidi, ena te wẹ
 Jerusalemde gebo dabo tiwai dao.
 Aga tigidali sogo dua soabo dao.
 Tiali goli, te Juda we bidi dabego
 homugo eno bomo meni da homu ebo.
 Tama augwaligo homugo te Aram tuni bidi Resin dali,
 te Israel dabego tuni bidi Peka,
 augwali sigo bomo te genuai mu dao homu ebo.
⁷⁻⁸ Tama tibaso, ena Genuai Bidi, te eno te wẹ Yufretis
 genuai mu ilama, tama te wẹ gisigiluyu,
 tigidali pesage mesega sigi pomainu yaibao.
 Te wẹgo tigidali bulu mesega saibao.
 Te wẹ Yufretisdu galalama, tama Juda

* 8:3: Bidi mebago te homu ebao, te profet bidi Aisaia go we, aga me te profet we me dao homu ebo.

buluba sabolagasaibao.
 Tama te wẹ gebo dabo te bidigo dogoni ɗaj yagasaibao.
 Te wẹ Yufretis te Asiria tuni bidigo piksa tiwai dao,
 te aga ami bidi dabe dali sigo tiwai.
 Te bage augwali aselama, te Emanuel
 nago tɔ usu nagasaibao.” † Godigo te po wali.
 9 Bugagia odao, dage te we bidi
 digibulu bidibo me, pade bidibo me,
 dage Israel hani isawai bage.
 Dagego hwjabo no muyu, bomo selama elalubo se yao.
 Tiali goli, dagego bomo da, toga paibao.
 Tama dage noma selama, kone tuɗa pebela waibao.
 10 Duga homugo mena se yabo
 homu yali po duga maiɗo.
 Tiali goli, dagego te se ebo usu egobeo.
 Dagego te po da, aga nai meni yaibao.
 Magi baso meni. God da dali bidibao. ‡

Aisaia aga hani dali, augwaligo God deli naga wi yao

11 Eno Genuai Bidigo bomo enaba asobo gagama yali.
 Tama agai enabolo te po wali, “Nago te we bidi dabego
 homu dali deli igio. Tama nago augwaligo ebo kolesaga
 wali pigio,” wali.

12 “Te we bidi dabego te po obaso da, ‘Bidi hani mebago
 Juda bulu dolaibao po mia salio,’ po obaso, nage dali, naga
 hani dali, dagego te po mu dao homu igimio. Tama me,

† 8:7-8: Te Hibru pode te nogi Emanuel wali, te page te tobage tiwai si elaluali, “God da dali bidibao,” wai. Te Aisaia 7:14, tede Aisaiago te po weyu, te wai me deli ame nobaso, te augwaligo aga nogi te Emanuel nogi yaibao po wali. Aisaiago agai te waide homu kone elama, tama agai te Juda hanigo tɔ nogi e poali, “Emanuel, nago tɔ dao,” wali. ‡ 8:10: Te Hibru pogo, te po dage e tiwai, “God da dali bidibao” wai, te tobage po tiwai wai te nogi Emanuel wali. Te Aisaia, ɗaj 7:13-15 me ɗaj 8:7-8, tede te po suo.

te we bidi wi elama, noma sobaso da, dage augwali ebo gilama wi elama, noma selamuo. ¹³ Dagego e tama koneao. Ena Genuai Bidi Tigidali Bomo Elalubo Bidi, ena te wiegi yai doloba pai kolesaga naga tigidali sogo ebo God dao. Dagego ena deli naga wi elama, noma sao. * ¹⁴⁻¹⁵ Ena te we bidigo geme duala sabo bomai pesage dao. Tiali goli, ena te Israel de Juda sigo we bidigo sunumide masigi tiwai bidibao. Tama augwali te masigide saḡa dani tuḡ palama, tama tulaluama, tama augwali dolaibao. Tama te Jerusalem we bidide da, te ena te keḡ tiwai, augwali tola sabo bidibao. Tama augwali hauwa te keḡde tola saibao,” wali. *

Aisaiago Genuai Bidigo yaibao wali te seḡ tonaluali

¹⁶ Te ena skul ogomani gesabidide eno te Genuai Bidigo enabolo mani po mesegelama, haluali. Tama eno aseḡnama, tama eno daḡi tede ilali. § ¹⁷ Megi da, eno te Genuai Bidi agai yaibao wali te seḡ ebo deli naga tonaluaibao. Agai Israel we bidiba polo tudi ola mawai dao. Tama agai augwaliba te begela ma tonogobeo. Tiali goli, eno agai bomo deli naga konealuaibao. * ¹⁸ Genuai Bidi Tigidali Bomo Elalubo Bidi aga te Saion bulu dude bidibao. Agai

* 8:13: 1 Pi 3:14-15 * 8:14-15: 1 Pi 2:8 § 8:16: Godigo te po wali, te we bidi augwaligo agai po wali piḡbaso da, teda haniani seḡ nosali pedelaibao wali. Tama Aisaiago te yabo seḡ po aseḡani. Te agai te aseḡani po keḡnama, daḡi ilali, te niwai bidi mego agai te aseḡani po hasegelabo usu me egobeo. Tialima, nosali da, te po wali seḡ dabe pedalubo si da, te we bidi augwaligo te duani buku yabe dagalama, tama agai te aseḡani po nedama, tama augwaligo te tiwai konemainogo, te Aisaiago wali po dabe te mu po wai yabo homu yaibao te po wai. * 8:17: Hib 2:13

ena te wai dabe mawai dao. Tama agai da te Israel we bidide yabo sę ɗaj tiwai ilali. ** *

God agaduba deli naga we bidibolo dwagi yai sogo mabo usu yaibao

¹⁹ Te we bidi dabego dagebolo te isai bidi dabego noma dali po wabo we bidiba pao po waibao, tama augwaligo homu kolesaga sigi pao po waibao. Te isai bidi dabego noma dali po wabo bagego augwaligo pedauwalidu pomu po weyu, keledude haniani dwasianu po waibao. Tiali goli, te isai we bidi dabego te bidibo we bidi dabe homu kolesaga mabo usu egobeo. Te tama tiali goli, magi baso mu augwali te isai we bidiba udalama, tama augwalide te kolesaga sabo dawe? Augwali augwa Godiba pomainao. ²⁰ Te augwaligo te augwa Godiba pelama, tama agai homu kolesaga siyu, agai bomai po sigi peyu eyao. Ma, augwaligo tama tisama yali da, teda augwali hulua sai madi me bididuaibao. Tama wiegi yai sogo me sugobeo. ²¹ Menio. Augwali dwai dene mu saibao. Te augwali genuai homu sege mu elama, nasi elama, tama augwali subigila te bulude bilaibao. Nasigo augwaligo haliga sebe mu elama, tama augwaligo augwa tuni bidibolo, me augwa Godibolo dwai po waibao. Te augwaligo dagaluba tonoyu, ²² toba tonoyu yaibao. Tiali goli, augwaligo dwagi yai nai dabe me sugobeo. Menio. Te augwaligo te dwai sege, me dwai segego augwali tigidali bulude bilibo digi te hulua saigo

**

8:18: Aisaia Godigo po pusali silagasobao wali. Megi da, te aga dua digi bididu, te Godigo mena se ebo te suainogo tonalu bidali. Tialima, te we bidi dabego aga sulama, tama augwaligo agai wai dabego nogi pagede homu kone kone ebo sogo, augwaligo te agai augwaliba pusali pode homu kone palaibao. Te Aisaia wai dabego nogi page koneainogo da, te buku Aisaia, ɗaj 7:3; 8:3-4, tede suo. Te ves 17 me 18 tede wali po, “te Israel we bidi dabego wali po,” te to kantri Israel me Juda dali te to kantri pedai side te po wai dao. * 8:18:

Hib 2:13

augwali mesegasa bilibo tiwai yaibao. Tama augwali wi pelama, te dwai seḡḡ gedelabo sunumi mu meni yaibao.

9

Godigo we bidi wiegi yai homu elama, bidabo tuni bidi mani

¹ Polobadu Genuai Bidigo te Naptaligo hanigo bulu pesage, me Sebulungo hanigo bulu dolai dao. Tama augwali hale dali mu bidai dao. * Tiali goli, me sogo nosali da, te badu dabe te tamu wɛba pabo sunumide bida bida pabo bulu, me te wɛ Jordan ugwa bulu badu bulu dabe, me te Galili distrik bulu tigidali, me te Israel hani isaḡwai bidi dabe hauwa bidibo madi, te bulu dabe sese genuai nogi saibao. Tama augwaligo dwai sogo sia saibao. *

² Te we bidi augwali moni hulua sai madi bilai goli,
megi augwali genuai ula suali.
Augwali hulua sai madi bidai goli,
megi da, augwaliba genuai ula pedalali.*

³ Genuai Bidi, nago naga we bidi
genuai hani pedalomai yalio.
Tama nago augwali wiegi yai homu emainu geninanio.
Augwali naga gedude wiegi yai homu yalio.
Te augwaligo augwa gi nai hasia inawai
siyu ebo homu tiwai yalio.
Tama me, te ami bidi dabego wɛbi hwɛnama,
gasa bidi dabe aiyaba elaluama,
te augwaligo sali nai dabe dobyu

* 9:1: Te Asiria dabego boi hwɛḡaselama, Sebulun me Naptali hani sigo tɔ dabe sobadi, te gasa te pɛde elaluali bulu dabe, me distrik dabe, te kantri Israel te not badu elaluali bulu dabe me salio. Te buku 2 King, Daḡ 15:29, tede suo. Galili tɔ te gasa nogi te tɔ pedai badu kantri nogi me dao. * 9:1: Mat

4:15 * 9:2: Mat 4:16; Luk 1:79

ebo homu tiwai yalio.

⁴⁻⁵ Te we bidi dabe wiegi yai homu yali.

Magi baso meni.

Nago augwaligo boi bidi dabego bomo

polo toga sayai da weyu,

te polobadu nago Midian hanigo bomo toga

sayani yali gilama. †

Te boi bidi dabego naga we bidi tonaluama,

tama augwali genuai sege tolalumainu yai dao,

te bidigo sega pai ni name kau kibu

dogoniba munama,

tama te kau kibugo se emainu wabi dagego elama,

tonalubo tiwai yai dao.

Tiali goli, nago te ni name dabe, me te wabi dage dabe,

nago polo toga sayai dao.

Te boi bidi dabego nai tama,

te boi bidi dabego nago we bidi dabe

dali dwai se megi me egobeo.

Te boi bidi dabego gudama, hwigi pabo

nai dabe sese isigo dela silaibao.

Te augwaligo moni su dabe, me hwiyu gudubo ugwa

te bidi kaneme dagana sali, te isigo delama, silaibao.

Te tigidali sege dabe sese silaibao.

Tama wiegi yai sogo ma asaibao.

⁶ Magi baso meni. Ogwa me ame neyu,

daba polo sabolali.

Te wai me deli Godigo dabolo mani.

Aga dago tuni bidi bidaibao.

Tama agai tama nogi dabe elaluaibao,

† 9:4-5: Polobadu te Midian dabego te Israel dabeba dwai se ebaso, tama te bidi Gideongo nogode Genuai Bidigo augwaligo bomo togwaluai dao. Te buku nogi Tobolu Bidi, Daj 6:16; 7:9-25, tede te po dabe elalubo suao.

te Dwagi Yai Kolesaga Mu Mabo Bidi dao,
 tama God Tigidali Bom o Elalubo Bidi,
 tama Tigidali Sogo Bida Bida Pidu Bidibo Aya,
 tama Bugagia Bidibo Page Sela Mayu,
 me Tabi Nagame Ilibo Tuni Bidi.
 Agai te tobage nogi dabe elaluaibao.
⁷ Te tuni bidi te tuni bidi Devit hasegelama, bidaibao.
 Tama aga te Devitgo tuni bidi siade dualaluyu,
 te we bidi dabe tonaluaibao.
 Te agai gavmanigo bomo tigidali sogo
 genuai holudaibao.
 Tama hwıbo me menia pelama,
 bugagia tigidali sogo bidaibao. Magi baso meni.
 Te tuni bidi aga te tigidali sogo
 dwagi yai doloba pai kolesaga naga ebo dao.
 Tama agai te kolesagago aga
 te bomai tuni bidi bidaibao,
 te megı me, tigidali sogo nosali me.
 Genuai Bidi Tigidali Bomo Elalubo Bidigo homugo
 bomo mu elama,
 we bidi dabe dali wiegi yai se yabo homu ebao.
 Tama tibaso, agai te se dabe me elama, pedalaibao.*

Genuai Bidigo Israel dabe dene mani

⁸ Genuai Bidigo polo wali, te agai
 te Israel bulu dolaibao wai dao.
 Te Jekopgo wai hani dabe,
 tama te dwai sogo augwaliba pedalobo sogo da.
⁹ Te genuai hanu Samaria we bidigo,
 me gasa tigidali Efraim hani
 bidi dabe, augwaligo koneaibao,
 Genuai Bidigo te se augwaliba te yali dao po waibao.
 Te megı da, augwaligo homugo augwali

* 9:7: Luk 1:32-33

geninama mu dao olama,
 augwa nogi ugwaba te sobao.

Augwaligo te po wali,

¹⁰ “Te boi bidi dabego dago brikigo
 sɛani be augwaligo huɣiyu,
 me dago fik ni geliyu yali goli,
 te dago tede moni homu egobeo.

Te olo nai dao.

Dago masigi togolama, wiegi yai
 bomai be dabe sɛ yaibao.

Tama dago wiegi yai ni bɔ wai bulaibao,
 te ni fikigo pesage hasegeleyu,” te po wali.

¹¹⁻¹² Genuai Bidigo Israel dabe dali sɛbɛ yali.

Tama tibaso, agai te boi bidi dabego homu hodolali,
 te augwaliba wɔbi hwɔagasomainu.

Agai te Siria dabe te giliga asobo badu
 bidigo homu hodolali, te tuni bidi Resingo hani,
 tama me agai giliga dega
 sabo badu bulu Filistia hanigo homu me
 hogodolama, hwɔagasomainu yali,
 Israel dabe aiyaba elalumainu.

Genuai Bidigo te tama tiali goli,
 tego agai sɛbɛ siligobeo.

Menio. Agai nogo me dodalubao.

¹³ Te Israel we bidi homu begelebeo.

Genuai Bidi Tigidali Bomo Elalubo Bidigo
 augwali dene mani.

Tiali goli, augwali agaba ma asobeo.

¹⁴ Tama tibaso, Genuai Bidigo
 te bulu Israel dene mawaibao.
 Te deli sogo tama agai Israel dabego
 tobolu dali, danu dali, si togaibao.

Me po begelama weyu, agai te wiegi yai
ni pam nologo dali, te olo sigi dali si togaibao.

¹⁵ Tobolu te polo monu dabe de genuai
nogi yai bidi sibolo wali.

Te danu te tibo po we bidibolo pusali
profet bidi dabebolo wali.

¹⁶ Te tobolu bidi dabego we bidi dabebolo
wiegi yai sunumi dali kolesaga si
ola mawai menio.

Tama tibaso, we bidi polo hagawali.

¹⁷ Tigidali we bidi God tagalama,
God dologode bidisaḅo bidi polo gagawai dao.

Augwaligo tigidali po dabe,
kolesaga dabe mu dwai mu dao.

Tama tibaso, Genuai Bidigo tigidali mu dolaibao.

Agai te gesi bidi me bidimainu me sula tagalogobeo.

Tama agai te we sibi me hobede me egobeo.

Wilawe we dabe, me te tiana wai dabe,
agai hobede me egobeo.

Genuai Bidi agai te tama tiaibao.

Tiali goli, tego agai seḅe siligobeo.

Menio. Agai nogo me balalubao.

¹⁸ Te we bidi augwa haniani dwai
kolesagago augwa ma dolali.

Te dwai nosaide isi dola selama,
te genuai nide dela selama,
moni busi dabo tiwai yali.

Tama genuai hano ugwaba holali.

¹⁹ Genuai Bidi Tigidali Bomo Elalubo Bidigo seḅe
genuai mu elama,

tama agai tḅe we bidi tigidali dene mani.

Tama augwali silali, te isigo mone busi delama,
tigidali nai dabe dela silibo tiwai yali.

Te deli deli we bidigo homu kolesagago da,
 gasa we bidi aiyaba elaluabo homu elalubo.
²⁰ Tama augwaligo nai anoma elama, sabo sɛ ebo dao.
 Tiali goli, tego augwaligo homu kolesaga paḡaḡabeo.
 Augwali te bidi nai hauwa tuai goli,
 augwali tabia piṣama ebo tiwai dao.
 Tama augwaligo te kolesaga augwa deli
 hani dali me ebo dao.
²¹ Te Manase hanigo Efraim hani
 aiyaba elaluainu yaibao.
 Tama Efraimgo Manase hani aiyaba
 elaluabo homu yaibao.
 Tama te hani sigo Juda dabe aiyaba
 elaluabo homu yaibao.
 Genuai Bidigo augwa digi augwa hasi
 ma dolomainu yaibao.
 Tiali goli, tego agai sɛbɛ ebo siligobeo.
 Menio. Agai nogo me balalubao.

10

¹⁻² Dage te gesi gesi bomai po mubo bage,
 dage dolaibao.
 Te gesi bomai pogo te po tɔ ebode
 gasa bidi dabe aiyaba elaluama,
 tama nai meni yai bidi dabego nai sainu.
 Tama tiyu, te nai meni yai bidi dabe
 po tɔ ebo sogo asobaso da, te bomai pogo augwali
 tau sabo meni.
 Tama augwali po tɔ ebode geda mubo dao.
 Tama te dolo meni yai kolesagago
 dagego Genuai Bidigo we bidi dabe aiyaba elaluama,
 tama dagego te wilawe we dabe,
 me tiana wai dabego nai dabe dagego wi sabo dao.

³ Te Godigo dagego dwai kolesaga
 wei ponabo sogo bodolu muani,
 te sogoba sabalobo si, dagego magi sę yaibawe?
 Te agai gasa bulu me te bomai wali tiwai aselama,
 dage dolomainu ebaso, dagego magi sę yaibawe?
 Dage te deba udalama, dage tau somainu yaibawe?
 Tama te nai dabe hauwa dagego sali,
 te nai dabe dagego menade mugi paibawe?
⁴ Dagego magi sę me ebo usu egobeo. Mu menio.
 Te boi bidi dabego dage ela wialobo,
 o dage deli deli pibia sidubadi,
 augwaligo dage sela pelama,
 kalabusiba tagaligi pabo sę yaibao.
 Genuai Bidigo sę dabe dageba pedalumainu yaibao.
 Tiali goli, tego agai sębę siligobeo.
 Menio. Agai nogo me balaluaibao.

Te bulu tọ kantri Asiria dolaibao

⁵ “Ena Genuai Bidi, eno te po obao,
 te bulu tọ kantri Asiria dolaibao.
 Megi da, te Asiria te wabi tiwai nigilama,
 tama eno we bidigo ena sębę ilibo
 we bidi te elebao.
⁶ Te we bidi dabego ena tagalama,
 tama God dologode bidisabo bidi gagawali.
 Tama augwaligo ena sębę ilali.
 Tama tibaso, eno Asiria bage
 taga palama, augwali elama,
 tama augwaligo nai dabe selama, tama augwali
 aiyaba elaluama,
 agalama, tagalomainu yai dao,
 te bidi dabe tọ nageamea pai
 pudu pabo tiwai emainu yai dao.”

7 “Tiali goli, Asiria tuni bidigo homu
 kolesaga, eno kolesaga dali side gasa me tali.
 Agai te gasa bulu hauwa me dolabo homu elalubao.
 Tama augwali sese silabo homu ebo.

8-9 Agai dwai homu tali eyu, te po wali, ‘Eno bulu
 hauwa me elaluama,
 tama augwaligo genuai hanu dabe
 eno polo sai dao,’ po wali.
 ‘Tama me, te tuni bidi dabe eno augwali aiyaba elaluali,
 te bidi dabe augwali eno ami bidi
 tomode ofisa bidi bidimainu,
 eno augwali te sę mani.

Te eno te hanu dabe aiyaba elaluali
 hanu dabe te Karkemis, me hanu Kalno, me Arpat,
 me Hamat, me Damaskus, me Samaria, tama dao.

10 Eno te bulu dabe dolama, elama, tagalai dao.
 Te bulu dabede te tibo god dabe piksa hauwa mu elalubo
 hanu dabe augwaligo elaluali.

Tama augwa te tibo god dabego augwali tau sabeo.
 Te tibo god dabego te Jerusalem me Samaria sigo
 tibo god dabe aiyaba elaluali.

11 Eno te Samaria dabe augwa
 tibo god dabe dali eno dolai dao.
 Tama tibaso, eno te kolesaga tiwai te Jerusalem augwa
 tibo god dabe dali me yaibao,
 te Asiria tuni bidigo te homu ebao.”

12 “Te tuni bidigo te po wali.
 Tiali goli, ena Genuai Bidi eno te po obao.
 Te Asiria dabe tuni bidigo eno agabolo
 te bulu du Saion me Jerusalem side
 yao wali sę ela silibo si da,
 teda aga tigide eno sę yaibao. Magi baso meni.
 Agai homugo aga genina mu dao homu elama,

tama aga nogi ugwaba mu sabo.

¹³ Agai tobolu tali eyu, agai te po tama wali,
‘Ena bomo de ena homu kolesaga sigo
eno te sę dabe yalio,’ po wali.

‘Magi baso meni. Eno dwagi yai
homu kolesaga mu elaluali, te sę dabe yabo.
Eno te bulu dabe ɗaj ilali, eno polo sela sɗawani dao.
Tama tigidali ena dologode naga bidibo.
Tama eno augwaligo wiegi wiegi yai nai dabe
augwaligo sisiniduali nai dabe eno sai dao.

Ena bomai bidi mu dao.

Tama tiyu, eno te bulu we bidi dali,
me augwaligo king bidi dabe dali agalama,
tama eno augwali aiyaba mesegelai dao.

¹⁴ Te e ɗode kantri dabe tigidali te ba be tiwai dao.

Tama augwaligo wiegi yai nai dabe eno sali,
bidigo te ba ge sabo tiwai yalio.
Awe, te ba kimi dabego augwa ge dabe tagalama,
tama bidigo olo sabo tiwai gilama,
eno te kantri dabe sisinani.

Tama te ge tagalali ba kimigo
te ge sabo bidibolo hwa wasiɗawai tiwai eyu,
te kantri dabego bomo elaluali
bidi dabego enabolo
tagala po me wabeo. Mu menio.’

Te tuni bidigo te po wali.”

¹⁵ “Tuni bidigo te po tama wali.

Tiali goli, ena Genuai Bidi eno hanalu waibao,
‘Te sigi hwa me deligo te po waibawe,
“Te ena genuai dao, tama bidigo nogo toulama,
nigilibo te enaduba bomogo edelalio,” po waibawe?
Te so mego “Ena te bidigo nogo toulama,
ni togobo bomo te eno edelalio,” po waibawe?

Te hwıbo ni dage dabego bidi nogo
 toulama, hwıgi pabo meni.
 Menio. Te bidigo te ni dage dabe nogo
 toulama, hwıgi pabo dao.’”
 Genuai Bidigo te po wali.

¹⁶ Megi da, Genuai Bidi
 Tigidali Bomo Elalubo Bidigo
 te Asiria dabebolo genuai gasi me deli
 augwalibolo menama,
 tama augwali bomo sia somainu yaibao.
 Tama me ma, bidigo magi nai dolainu
 sia nogebo tiwai eyu,
 agai te Asiria bagego bomo me,
 genuai nogi dali, mu dolaibao.

¹⁷ Genuai Bidi aga te Tigidali
 Wiegi Yai Doloba Pai Kolesaga Naga Ebo God dao.
 Tama aga te Israel dabego ula dao.
 Tiali goli, Asiria dabe dali da, aga te isi gagalama,
 augwaligo bulu isi ulaibao.
 Te deli bubagade naga agai te tigidali
 dwai nosai dabe isi ulaibao.

¹⁸ Tama bogi peyu, moni genuai genuai
 ni dabe dela pelama,
 tama gi yabo wiegi yai tɔ me dela paibao.
 Genuai Bidigo Asiria dabe dolama,
 tama augwali mu tama silaibao,
 te gasigo bidi me deligo tigi bomo doloyu,
 ela silibo tiwai yaibao.

¹⁹ Te Asiria bulude tigidali nai dabe mu silaibao,
 tama deli deli ni naga dolaluaibao,
 te dwasianu wai bɔɔ dabego me nedabo usu
 nama.

Dwasianu Israel we bidi hani naga ma asaibao

²⁰ Genuai Bidigo bodolu me polo muai
 dao wali, te Israel hani dwasianu
 te Jekopgo waj̄ tomode bidibo
 hanigo i agabolo omainu.
 Te Israel dabe augwali augwa boi
 bidi dabede wi ebaso,
 tama augwaligo gasa bulu
 bidi dabego augwali tau somainu i wali.
 Tama te bulu bidigo augwali tau somainu tonaluali.
 Tiali goli, te bulu bidigo begelama,
 augwali ma dolaibao.

Tama te sogo augwaligo te Israel dabego
 Genuai Bidiba i waibao.
 Aga te Wiegi Yai Doloba Pai Kolesaga
 Naga Ebo God dao.

Tama augwaligo agai tau somainao
 olama, tonaluaibao.

²¹ Tama te dwasianu Israel we bidi
 bidibo dabe augwali te God

Tigidali Bomo Elalubo Bidi pageba ma asaibao. *

²²⁻²³ Megi da, te Israel we bidi hauwa mu te bidibao,
 te tamu w̄ede kemi sane tiwai dao.

Tiali goli, augwali dolaibao,
 tama dwasianu we bidi naga ma pedalaibao.

Genuai Bidi Tigidali Bomo Elalubo Bidigo te bulu sese
 tama dolabo po polo wai dao.

Tama da agai dolaibao.

Tama agai doloba pai kolesaga genina
 mu ma haninaibao,

* 10:21: Te Hiburowe, te po weyu “Dwasianu hani naga te ma begasa asaibao,” wai. Te tiwai po te Aisaiago wai me deli nogi wabo tiwai si yali dao. Te buku Aisaia, Daj̄ 7:3, tede te tiwai po elalubo suao.

tama te we bidi dabego sueibao. *

Genuai Bidigo Asiria dabe dolaibao

²⁴ God, Genuai Bidi Tigidali Bomo

Elalubo Bidigo te po wali,

“Eno we bidi dage Saionde bidibo,

dage te Asiria dabede wi igimio.

Augwaligo dage te wąbigo elama,

dage dali dwai sę ebadi me tagalao.

Te Isip bagego polobadu yali tiwai ebadi goli.

²⁵ Megi da, eno dage Asiria dabego

dage dolomainu sula tagalobao. Magi baso meni.

Eno sębę dage dali me ebaso.

Tama tamadi tama ena ma begelama,

Asiria dabe dolaibao.

²⁶ Ena, Genuai Bidi, Tigidali Bomo

Elalubo Bidi, eno augwali bįgo elaibao,

eno te Midian dabe te Orepgo Masigi

nogi wabo bulude dali tiwai elali.

Eno nogo ugwa selama, tama elaibao,

te polobadu eno Isip dabe

te tamu węde elali tiwai yaibao.

²⁷ Megi da, dage te Asiria dabego

dage tonaluyu, te kau kibu

magede ni name munama,

tama sę emainu selebo tiwai te ebao.

Tama te Asiria dabe bugagia dualalubao.

Tama augwaligo te ebo kolesagago

ena sębę te ilibao.

Tama tibaso, te eno bodolu muani

sogode da, te eno te Asiria dabego

bomo silama ebode da,

te bagego dage sęę ma mayu egobeo.

*

10:22-23: Rom 9:27

Awe, dage te boma pai hani pedalubaso,
dagego te tolobo seḡḡ mu tagalaibao.”

Te boi bidi dabe Jerusalemba hwi yagasainu asali

28 Te boi bidi dabe bolo hanu Aiba sabolagasali. †

Augwali te hanu Miklondu sa asali.

Tama augwaligo nai dabe meba
te hanu Mikmasde osogo muani.

29 Augwali aiya dulama, we odogo nogegi pali.

Tama augwali ugwaba holama, hanu Gebaba pigi pali.

Te Rama hanu we bidi wi genuai mu eyu, midigi sali.

Tama te hanu Gibeaa, te tuni bidi Solgo hanu,
augwali hanu tagalama, wi pepelawali.

30 Te hanu Galim we bidi dagego i bomonama wao.

Olo saganama, odao, te Laisa be nani
we bidi, dagego odao.

Hobede mu dao, dage te hanu Anatot we bidi.

31 Te bulu Matmena we bidi,
me te hanu Gebim we bidi,
wi pepelawali, te duala sabo pesage gegegi pali.

32 Megi da, te boi bidi dabe
te hanu Nopba polo sabolali.

Augwaligo te bulu du Saionba edaba tonagasali.

Tama augwaligo nogo sugunani,
te hanu Jerusalem dolabo polo
no muanio olama, ola mobao.

33 Te agai genuai bomogo da, God,
Tigidali Bomo Elalubo Genuai Bidigo
agai te genuai bomai genuai

† 10:28: Te not badu boi bidi dabe aselama, te Jerusalem dolabo homu elama asiyu da, augwali asobo te taun Ai te badu suani aselama, te gasa taun dabe te nogi me badu te ves 28-32 tede nogi elalubo taun dabe sabolaibao. Magi baso meni, te taun dabe te Jerusalem pa badu te not badu elaluai.

nogi elalubo bidi dabego nogi aiyaba elaluaibao.
 Megi augwali te genuai bobobage ni dolalubo tiwai ebao.
 Tiali goli, agai augwali gelama, degelaibao.

³⁴ Tagala augwali te Lebanonde
 genuai bobobage ni tiwai,
 me te buside genuai bobobage ni tiwai me.
 Agai augwali gelama, t̄ba degelaibao.*

11

Gesi noma tuni bidigo bugagia bidabo page dodolaibao

¹ Te Jesigo hani te ni bidi dabego gelai ni tane
 tiwai biduali.

Tiali goli, gesi age te ni tanede ma
 kolibo tiwai yaibao. *

Awe, te ni tanedu te gesi ni tigi holama,
 tama nologo me deligo du walaibao. *

² Te Genuai Bidigo Spirit Mobo Bidi
 aga dali bidagaselama,
 tama aga te wiegi yai homu kolesaga dabe
 magasaibao.

Tama agai aga we bidi tonalubo homu
 kolesaga wiegi yai mu saibao.

Tama aga bomai tuni bidi bidiyu,
 tama agai aga we bidi tonalubo kolesaga wiegi yai
 mu elaluaibao.

Agai te Genuai Bidigo homu kolesaga koneaibao.
 Tigidali sogo aga te Genuai Bidi dologode naga bidaibao.

³ Tama te kolesagago aga wiegi yai

* 10:34: Ais 14:24-27; Nah 1:1-3:19; Sef 2:13-15 * 11:1: Jesi te king
 Devitgo aya dao, te po te buku 1Samuel, D̄aj̄ 16:10-13, tede elalubo suo. Te
 nide gesi ni hogodo pedalubo tiwai yaibao, agai te d̄aj̄ ilali po te gesi king te
 Devitgo hanide pedelabo po olama, wai dao. * 11:1: Ped 5:5; 22:16

homu ilibo geninaibao.
 Tama agai te po tų odobode da,
 agai te bidi dabego po wabode naga
 o gedugo suali pode naga osola suyu
 egobeo. Menio.
⁴ Te po tų odobo dolo naga agai
 te nai meni yai bidi dabego
 homu seęę elalubo po odama, te bagenu tau saibao.
 Te gasa bidi dabego augwali aiyaba
 elaluama, augwali dolama,
 dwai se yali dabede agai pode
 te tiabo se yali we bidi dabe dene saibao.
 Tama te dwai se ebo bidi dabe da isaibao. *
⁵ Te tama doloba pai kolesagago
 tama aga we bidi tonaluaibao.
 Aga bomo elama bidiyu, aga se bugagia yaibao. *
⁶ Te bulu yowi de sipsip kibu goų si
 aga bugagia deliba bilaibao.
 Tama te lepat moni hasa dabe
 te meme kibu goų dali piyu yaibao.
 Te kau kibu goų dabe,
 me te laion yowi goų dabe dali,
 deli hodobo nai tudu bilaibao.
 Tama dwasianu wai dabego augwali tonaluaibao.
⁷ Te kibu bulmakau de te bulu hasa bea
 aga si nai deliba tuaibao.
 Tama augwa wai dabe augwa hasi deliba piaibao.
 Tama te laion dabego te bulmakau kibugo nosai tubo
 tiwai yaibao.
⁸ Te wai boų dwasianu ame tubo dabe
 augwali te dwai gula manego
 tų dedage pađe gagali yaibao.

* 11:4: 2 Te 2:8 * 11:5: Ef 6:14

Awe, te waigo aga nogo te bidi gaꝝ kelebo hasamanigo
 pibo madiba muaibao,
 tiali goli te hasamanigo aga gaꝝ kelegobeo.

⁹ Te Genuai Bidigo bulu du ugwadu
 te tigidali nai dabe augwa hasi
 bugagia deliba bidaibao.

Te mego me dali dwai se me egobeo. Magi baso meni.

Te tigidali toꝛde nai dabe sesego
 Genuai Bidi mu konea pela silaibao.

Te kolesaga te tigidali toꝛ mu usu nigi paibao,
 te tamu aꝛigo aga daꝛba usu nani tiwai yaibao.*

Genuai Bidigo aga we bidi ma sisinaibao

¹⁰ Tama te sogo Genuai Bidigo gesi tuni bidi me sa
 muaibao, te Jesigo hani bidi me deli dao. Agai te tigidali
 we bidi deliba ma sisinabo daꝛ tiwai bidaibao. Augwali
 te tigidali toꝛ pedai kantri tedu augwali agaba asaibao, te
 Israel hani isaꝛwai bage. Tama agai hanu da, genuai nogi
 mu elaluaibao.*

¹¹ Tama te sogo Genuai Bidi agai bomo te si wabo
 sogo ma ola mayu, tama aga we bidi hani augwa buluba
 ma odasa asaibao. Te we bidi dabe te bulu Asiria, me
 Isip, me Sudan, me Elam, me Babilon, me Hamat, me te
 Mediterenian tamu aꝛde ailande bidibo dabe me dao.

¹² Te Genuai Bidigo daꝛ me deli dodolaibao
 te tigidali toꝛ pedai kantri we bidigo sumainogo.
 Tama agai te Israel me Juda we bidi dabe ma sisinaibao,
 te boi bidi dabe kalabus elama
 odasa pali we bidi dabe.

Megi augwali tigidali toꝛde bida bida pabo.
 Tiali goli, Genuai Bidigo augwali ma odasa asaibao.

* 11:9: Ais 65:25; Hab 2:14 * 11:10: Rom 15:12

¹³ Te bulu Israelgo te bulu Juda dali
 dwai homu me egobeo.
 Tama Juda dabego Israel dabe dali
 boi bidi homu me egobeo. Menio.
¹⁴ Augwali si talua selama,
 tama augwaligo te giliga pabo badu
 buluba hwiği peyu,
 te Filistia dabe dali hwiği yaibao.
 Tama me, augwali sigo te giliga
 asobo badu we bidi dabego
 nai dabe hwiği pelama, augwaligo nai dabe saibao.
 Te augwali sigo te bulu Idom we bidi, me Moap,
 me Amon we bidi dabe
 augwali sigo elaluaibao.
 Tama augwali sigo te bulu dabe tonaluaibao.
¹⁵⁻¹⁶ Genuai Bidigo tamu wę Retsi
 sula somainu yaibao.
 Tama agai bomai posolai wali pedalomainu yaibao.
 Tama te waligo te wę Yufretis
 sula selama, dwasianu emainu yaibao.
 Te wę te a naga olama, me badu nogo si
 wę gamiadu pomainu yaibao.
 Tama tibaso, we bidigo te wę nogebo usu yaibao.
 Tama tiali, te sogo te sunumi genuai bage mu yaibao,
 te we bidi dabe te Asiria tagalama, asela yabo.
 Te yaide te Genuai Bidigo te Israel dabe Isip tagalama,
 asomainu sunumi genuai yali tiwai yaibao.*

12

Te buba hwi wabo balia po

¹ Tama te sogo dage Israel dabego te balia po waibao.

* 11:15-16: Ped 16:12

“Genuai Bidi, eno nago nogi ugwabo sobao.
 Nago ena dali sẹbẹ yali, tiali goli nago sẹbẹ silalio,
 tama nago ena wiegi yai sẹ ilalio.
 Tama megi da, eno homu bugagia bidibao.
² Mu tama, Godigo ena ma oda sai dao.
 Tama megi da, eno agaba homu ɗaɗ ola saibao.
 Tama ena wi me egobeo.
 God, Genuai Bidigo ena bomo ilibo dao,
 tama tibaso, eno balia po obao,
 te agai nogi ugwaba sainogo. Magi baso meni.
 Agai ena ma oda salio.” *

³ Tɔ dedagede wẹ sia sabo menio. Agai te wẹ te nai
 dabebolo mabo dao. Tama augwali bugagia bidibo dao.
 Genuai Bidi te sia sisabo wẹ tiwai dao. Tigidali sogo agai
 dage tau sabode dage bugagia ɗaɗ olama, bidimainu ebo
 dao. Tama tibaso, dage agaba wiegi yai homu dali pelama,
 tama Genuai Bidibolo dage tau somainu hanalugi paibao.
⁴ Tama te sogo dagego balia weyu e tama waibao,

“Genuai Bidigo nogi wao.
 Tama agaba i weyu, tama agabolo buba hwi wao.
 Te tigidali we bidi hani dabebolo pusao,
 te genuai sẹ dabe agai yalide.
 Tama augwalibolo pusao, aga genuai nogi elalubao.

⁵ Te tẹabi po weyu, Genuai Bidigo nogi ugwaba sao.
 Magi baso meni, aga genuai nogi salio,

 te agai yali wiegi wiegi yai sẹ yalide.
 Agai wiegi wiegi yai sẹ yali po tigidali
 tɔde we bidibolo pusao.

* 12:2: Sai 15:2; Tib 118:14

⁶ Israel dabego God aga te Wiegi Yai
 Doloba Pai Kolesaga Naga Ebo God dao.
 Aga genuai nogi elalubo.
 Tama aga dage Saion we bidi dabe dali bidibao.
 Tama tibaso, dage wiegi yai homu iyāo.
 Tama i bomona weyu, agaba balia po wao.”

Te aga hani we bidi ma sisinibo sogo dagego te balia po waibao.

Aisaiago Godigo po te t̄o kantri dabeba pususu bilali

13

(*D̄aj̄ 13-23*)

Godigo te bulu Babilon dene mawaibao

¹ Godigo Babilon bulu dolabo homu yali, tama te po te nade ebo tiwai agai te po Aisaiabolo walalio, te Amosgo ogwabolo. * ² Genuai Bidigo e tama po wali,

“Dagego te ni meni yai bulu dude te plak me dodolao.
 Tama te ami bidi dabego sulama, sisinagasomainao.
 Teba augwali polo asomainu i wao.
 Nogo t̄u elama, te Babilon hanugo sunumi magi yao.
 Tama augwali te hw̄igi pomainu taga palao.
³ Eno Babilon dabe dali s̄eḅe mu ebao.
 Tama eno ena digi ena bomai ami bidi dabe d̄aj̄ ilali.
 Tama eno augwali i olama,
 te Babilon dabe dolomainu i wali.
 Te ami bidi dabe augwali Babilon dabeba
 hw̄igi pabo wiegi yai homu mu yali,
 magi baso meni, augwaligo koneani,

* 13:1: Ais 47:1-15; Jer 50:1-51:64

eno te hwiḅode ugwa ela holaibao,” te po wali.
⁴ Dagego odao, te kulukulu
 te bulu dude dabe wabo oḅiḅo.
 Te geninama bidi dabego kulukulu te obao.
 Te tigidali bulu hauwa badu
 ami bidi dabe te sisinagasali dao.
 Tigidali Bomo Elalubo Genuai Bidigo
 aga bomai ami bidi dabe sisinagasali dao,
 te hwiḅabo bidi dabe.
⁵ Augwali te digibulu bulu dabe te asalio,
 tama augwali te Genuai Bidigo
 enesigi de ene si tiwai dao.
 Genuai Bidi aga seḅe mu elama,
 tama augwali sabolama,
 te tḅde bulu dabe sese dolama, silimainu yaibao.
⁶ Dage gela bomonama wao. Magi baso meni.
 Te Genuai Bidigo aga tigidali
 we bidi po tḅde dodolabo bodolu paḅa
 polo yagasalio.
 Tama te sogo God Tigidali Bomo
 Elalubo Bidigo te genuai dolabo seḅ taga palaibao.*
⁷ Tama tibaso, tigidali we bidigo dili naga mialuaibao.
 Tama augwaligo bomo mu menia saibao.
⁸ Tigidali wi mu yaibao.
 Tama augwali genuai dene mu saibao,
 te wego wai sainu dene ebo tiwai yaibao.
 Te tigidali bagego gesabidi augwali
 tigidali dene ebaḅo wabo gesabidi ola mawaibao.
 Tama augwaligo gasa bidi dabego
 gesabidiba tonobo sogo da, augwali wi mu yaibao.
⁹ Mu tama, te dwai sogo megi te pedalobao.
 Te da te Genuai Bidigo polo bodolu muani,

* 13:6: Jol 1:15

te sogo te agai genuai sẹ̀bẹ̀ dali asiyu,
 tigidali tọ̀ dabe doliyu,

tama te dwai sẹ̀ ebo we bidi dolama, silaibao.

¹⁰ Te sogo te tigidali họ̀ dabego ula sula saibao.

Tama giliga pedalaibao, tiali goli agai
 ula hulía sigi paibao.

Tama polua munu me nanogobeo.*

¹¹ Genuai Bidigo te po wali, “E tọ̀ te we bidigo
 dwai sẹ̀gẹ̀go pağana pali.

Tama tibaso, eno augwali dene mawaibao,
 te augwaligo dwai sẹ̀ yali wei ponoyu yaibao.

Te bidi dabe augwa digi augwa nogi
 ugwaba sabo bidi dabego nogieno aiyaba elaluaibao.

Me, homu dene isiayü, te augwaligo gasa bidi dabe
 aiyaba elalubo bidi dabe me.

¹² We bidi hauwa mu isaibao.

Tama eno deli deli naga bidimainu talagalo paibao.

Tama augwali hauwa mu ma sugobeo,
 te Ofir bulude sabo wiegi yai gol
 susiğbo tiwai yaibao.

¹³ Tama te sogo

ena Tigidali Bomo Elalubo Genuai Bidi,
 ena te eno genuai posolai sẹ̀bẹ̀ dali mu asaibao.

Tama eno dagalu dali, tọ̀ dali si mali ilaibao.

Tama tọ̀ iba kila selama, tama aga pesage taga paibao.”

¹⁴ “Tama te sogo we bidi dabe wi pabo
 te bulu hasa dabe bidigo enainu
 ebaso, wi pabo tiwai yaibao.

Me, te sipsip kibu dabe augwa tonalubo bidi meniama,
 gegede bilibo tiwai yaibao.

Te augwali augwa bulu muba dabe wi ma paibao.

* 13:10: Ese 32:7; Mat 24:29; Mak 13:24-25; Luk 21:25; Ped 6:12-13; 8:12

Awe, augwali augwa page buluba dabe polo wi soaibao.

¹⁵ Tiali goli, mena bidi me boi bidi dabego touwali,
teda augwaligo hwaḡ bainatgo enama, isilaibao.

Mu tama, te boi bidi dabego augwali
bobobage hwaḡo elaibao.

¹⁶ Me, te boi bidi dabego te dwasianu
wai boḡ dabe augwa idago nogode kega selama,
tama augwa ida aya sigo tonalubadi,
augwaligo te wai boḡ dabe tḡba
saḡbo side, te wai dabe isaibao.

Tama boi bidi dabego augwaligo be
dolama, augwaligo nai dabe wi saibao.

Tama me, augwali we dabe me penani seḡ yaibao.”

¹⁷ Genuai Bidigo te po wali, “Suao!
Eno te Midia dabego homu hogodolama,
Babilon dabeba hwaḡagasomainu yaibao.

Augwaligo Babilon bagego silva de
gol si homu kone elama,
te buluba waḡbi hwaḡagasobeo. Menio.

¹⁸ Augwaligo te Babilon dabe mu
sia sayabo homu bomu mu yalio.

Augwali gesi bidi dabe augwaligo
enesigigo elama, isilaibao.

Tama me augwaligo genuai me dwasianu wai boḡ dabe
augwaligo elama, isilaibao.

Augwaligo augwali dali homu dene mu egobeo,” wali.

¹⁹ Genuai hanu Babilon te genuai mu
elama, tama sawi mu elama,
tama tigidali gasa hanu dabe aiyaba elaluali.

Te Babilon bulu we bidi dabego
augwa hanugo wiegi yai nogide mu

gana pabo dao.
 Tiali goli, Godigo Babilon dolaibao,
 te agai Sodom de Gomora si
 dolali tiwai dolaibao. *
 20 Te bulude bidi munu me ma bidigobeo.
 Tama me ma, te Arap dabe augwaligo
 sel be teba se yagasogobeo.
 Tama te sipsip kibu tonalubo bidi dabego
 te sipsip kibu teba nosai tumainu
 teba me tonaluagasogobeo.
 21 Te bulu te olo bulu gagalama,
 tama te bulu hasa dabe naga teba bidagasaibao.
 Te hulide bilibo ba dabe te bede dabe bidaibao.
 Te haniani dwai ba dabe me bidaibao.
 Tama bulu meme dabe te dolali hanude
 ugwaba samanuyu,
 edaba samanuyu, ela bilaibao. *
 22 Tama me, te tuni bidigo bede,
 me genuai bidi dabego bede dabe
 te bulu yowi dabe bidagaselama, go weyu yaibao.
 Mu tama mu, te Babilon dolabo sogo
 bodolu paba polo yagasalio.

14

Genuai Bidigo aga we bidi ma oda saibao

1 Genuai Bidigo aga Israel we bidi hobede ma
 elama,
 augwali tau siyu, tama augwali aga
 we bidi tiwai daj ma ilaibao.
 Tama agai augwali augwa toba ma odasa paibao.
 Tama gasa hani we bidi augwali dali bidagaselama,
 tama augwali te Jekopgo hani dali taluama,

* 13:19: Gag 19:24 * 13:21: Ped 18:2

augwali Israel we bidi mu pedelaibao.

² Awe, Genuai Bidigo te Israel hani isawai we bidigo
te Israel dabe augwa buluba
ma asomainu tau somainu ilaibao,
te Genuai Bidigo augwalibolo sa muani tɔ̄ dao.

Tama te we bidi dabe te Israel dabego
olo sɛ̄ ebo we bidi tiwai pedelaibao.

Te bidi hani polobadu Israel dabe kalabus elaluali bage,
megi da augwali Israel dabego
kalabus bidi dabe bidaibao.

Te polobadu te Israel dabe
aiyaba elaluama, augwali dali dwai sɛ̄ yali.

Tiali goli, megi da, Israel dabego augwali tonaluaibao.

Te bomai tuni bidi tulaluai wabo balia po

³ Genuai Bidigo dage Israel dabego dene me dwai sogo
silama, tama dage Israel dabe bugagia bidaibao. Te
gasa bagego dage aiyaba elaluama, tama augwaligo dage
tonaluai dao. Tama dage bomai sɛ̄ mu yai dao. Tiali goli,
te tigidali sɛ̄gɛ̄ dabe sia saibao. ⁴⁻⁵ Tama Genuai Bidigo te
tama tibo si da, dagego te Babilon tuni bidide elalubo po
page hanilama waibao. Te hanilabo po da, e tama dao.

“Suao. Bomai tuni bidi polo tulalualio.

Mena tama tibaso te tobage bomai
sɛ̄ ebo bidi dolaliwe?

Genuai Bidigo tama te we bidi dabe
dwai sɛ̄ ilali bagego bomo silalio.

Tama te augwali wi mu ilali bidi dolalio.

⁶ Te tuni bidigo gasa we bidi dali
odolali genuai sɛ̄bɛ̄ eyu,
tama dwai sɛ̄ elama, tama augwali dolai dao.
Tama agai gasa bulu dabe dolobo sɛ̄ me
hodo me dolobeo.

Agai te se mu tagalobeo.

⁷ Tiali goli, megì da, tigidali bulu
tò dabe bugagia ma bidaibao.

Tama tigidali we bidi wiegi yai homugo
i weyu, balia po obao.”

⁸ “Te ni pain de sida si te Lebanon bulu du ni dabe
augwaligo me te wiegi yai homu
yaibao, te Babilon tuni bidi aga isalide.

Augwaligo te po obao, ‘Te da gelagasabo bidi me menio,
agai da ma gelagasogobeo.’ ”

⁹ “Te isai bidi dabego bulude augwaligo
te homu pemene ebo po wainogo dodalubao,
magi baso meni, te tuni bidi asobao.

Te gu pagego tede bidibo bagebolo te po waibao,
‘Te genuai bidi dage hodaloao.

Me, dage tuni bidi dabe duga tuni bidi sia sai
tagalao.

Dage tigidali aselama, e bidi asobo
suagasiào, tiàba asiào, waibao.

¹⁰ Babilon king, augwali tigidaligo
nage dali te tobage po naga waibao,

‘Tegoba, dago homugo tiai dao,
nago bomogo da tigidaligo bomo
aiyaba elaluai dao homu yai dao.

Tiali goli, megì da, nago bomo sia selama,
tama nage da tiwai te pedalali dao.

¹¹ Polobadu nago haniani aubo nai dabe muai dao.

Tama te we bidigo gita dabe eliyu,
nago genuai nogi ugwaba sainu yai dao.

Tiali goli, megì da,
te sawede nago pibo sai tiwai dao.

Tama te osogane dabego nage tigi

bolama, tama te ugwa banunobo aꝝ yaibao,
te gũ pagede bidibo bagego te po waibao.”

- 12 “Nage genuai nogi mu elalui dao.
Te tigidali tꝝde we bidi dabego gedude
nage te kigamu dagalude nanebo hꝝ tiwai bidai dao.
Tiali goli, megi da, Godigo nage polo tꝝba sꝝwai dao.
Nage boma pai hwꝝbo bidi dao,
nage tꝝ pedai kantri hauwa aiyaba elaluali bidi dao.
Tiali goli, megi da, mu menio. *
- 13 Nago te tama homu elalui dao,
‘Eno te hꝝ dabe ela pelama,
tama ena dagaluba mu paibao,’ homu yai dao.
‘Tama eno tuni bidi sia te Godigo hꝝ daide muaibao.
Tama me ma, ena te god dabe
sisinagasabo not badu bulu dude dualaluaibao.
- 14 Te ena te pꝝ dabeba ugwaba mu
holama, tama ena God tiwai ogwade mu bidaibao,
nago te homu yai dao.”
- 15 “Tiali goli, hobede mu dao.
Nage polo tulaluali, tama nage aiyaba aba mu tulaluama,
tama isai bidi dabego bulu paibao.
Tama nage dologode mu bidaibao. *
- 16 Te isai bidigo bulude,
te isai bidi dabe noma mu saibao, te nage subode.
Tama augwaligo nage dolo si mu tonaluama,
tama augwaligo augwa hasi nagede hanalu waibao,
‘Aga tama te bidi da, agawe, te tꝝ mali ilali bidi,
me te gasa bulu tuni bidi dabe wi elama,
noma selali bidi aga dawe?
- 17 Aga tama dawe, te hanu dabe

* 14:12: Ped 8:10; 9:1 * 14:15: Mat 11:23; Luk 10:15

dolama, tama te bulu dabe olo bulu nigilali bidi dawe?

Te tama dao, te bidi agai te aga kalabus
 ilali bidi dabe hobede elama,
 tama agai augwa buluba
 ma pomainu sula tagalai menio,
 augwaligo te tobage po augwa hasi hanalu waibao.”

¹⁸ “Te gasa tuni bidi dabe isibo sogo,
 te we bidi dabego wiegi yai sę elama,
 tama augwaligo te wiegi yai
 gų pageba pubaligi pabo dao.

¹⁹ Tiali goli, nage da, menio.

Augwaligo nage sayani,
 te bidi dabego ni nologo togalama,
 damumainu sębo tiwai mu yalio.

Nago tigi te masigi elalubo tų dedagede munalubo,
 te meba bidi dabego tigi dologode munalubo,
 te wębi hwęani sogo isali bidi dabe tigi dologode.

Tama bidi dabego agayu ebo,
 te augwali ugwa eda udula bilibode.

²⁰ Te augwaligo nago tigi wiegi yai
 sę elama, pubalogobeo,
 te meba tuni bidi dabego tigi yali
 gilama. Magi baso meni.

Naga digi naga bulu dolama,
 tama naga we bidi naga digi ela silai dao.”

“Te wiegi yai mu dao, te tuni bidi dwaigo hani sese
 e tųde sia siyu da, usu dao.

²¹ Tama tibaso, agai wai bų dabe
 odasa aselama, ela muagasao,
 te aga ayago yali dwai sę, me augwa wę dabe
 yali dwai sę wei ponoyu tama yao.

Tama augwali deli me bidama, tama tuni bidi nigilama,

tama bulu dabe tonaluyu,
tama hanu dabe tigidali bulude dabe ma nigilamuo.”

Genuai Bidigo Babilon dabe dolaibao

²² Tigidali Bomo Elalubo Genuai Bidigo te po wali,
“Ena Genuai Bidi, ena digi te Babilon
dabe dali hwɨnama, tama eno augwali sese mu
dola silaibao.

Te eno augwali me deli bidimainu me
sula tagalogobeo. Mu menio.

Te tigidali we me bidi me, wai dabe me,
sese mu tama silaibao.

²³ Te eno te Babilon eno te hogomu
poabo naigo poabo tiwai yaibao,
te tigidali nai dola silibo hogomu poabo nai dao.

Tama eno te Babilon sele pu bulu nigilaibao.

Tama te dwai ba dabe naga bidagasaibao.

Ena Tigidali Bomo Elalubo Genuai Bidi,
eno po polo walio,” wali.

Genuai Bidigo Asiria dabe dolaibao

²⁴ Tigidali Bomo Elalubo Genuai Bidigo bomai po
me deli e tama wali,
“Mu tamao. Sɛ me eno yabo homu yali,
te sɛ eno yaibao.

Sɛ me eno pedalaibo homu yali, te sɛ mu pedalaibao.

²⁵ Te Asiria dabe eno tɔba aselama,
tama eno we bidi sɛɣɛ tolomainu yaibao.

Te Israel dabe te bulmakau kibu tiwai bidibao.

Te bidigo sɛgai ni name magede munama,
tama sɛ emainu tonalubo tiwai yaibao.

Tiali goli, te Asiria dabe Israel dabego

bulu dude dabe bidibadi yaide,

teda eno augwali agalama, mimieibao.

Tama te genuai seḡe Israel dabego tolali,
te seḡe dabe sese mu tama silaibao,” wali.

²⁶ Te tobage kolesaga naga
Genuai Bidigo tigidali tḡde elalubo
kantride yabo homu yalio.

Tama tibaso, agai nogo ugwa sagulama,
tama augwali dolabo no sealubao.

²⁷ Magi baso meni.

Tigidali Bomo Elalubo Genuai Bidigo
te tama seḡ yabo homu kolesaga polo yali.

Tama dego aga paliaibawe?
Agai nogo dolalubao.

Tama mego agai nogo aiyaba mubo usu egobeo.*

Genuai Bidigo Filistia dabe dolaibao

²⁸ Te tuni bidi king Ahas isali kibu
bede, Genuai Bidigo po me mani.

Te po da e tama dao. *

²⁹ “Te Filistia bage, dage tigidaligo odiḡo.

Te dage elali wḡbi dage polo toga pali dao.

Tiali goli, dagego homugo dage bugagia
bidaibao homu igimio.

Te dwai gula mane me isibosi, te gasa
dwai gula mego agai pesage sabo dao.

Tama te gula manego gasa dwai
gula mane mu me ame nabo dao.

* 14:27: Ais 10:5-34; Nah 1:1-3:19; Sef 2:13-15 * 14:28: 2 Kin 16:20; 2 Sto 28:27

Aga te iba, eda bola bilibo bogo yai gula mane dao. *

³⁰ Te nai meni yai Israel bidi dabe augwaligo nai selama,

bugagia homu tegaluama, bidaibao.

Tiali goli, dage Filistia dabe da, ena Genuai Bidi eno dagebolo dwai nasi si taga palaibao.

Tama te nasigo dage elama, dage mu silaibao,” wali.

³¹ “Dage te genuai Filistia dabego hanu, me dage te hanu dabede bidibo we bidi, dage sese wi dwai mu elama,

gela dwai olama, i bomona waiào.

Magi baso meni. Te ami hani me deli te not badu asobao.

Tama augwali nosali badu hano holobao.

Te ami bidi dabe augwali tigidali

hwı̄bode boma pai bidi dabe mu da weyu,

tama augwali deli me nosali me dua dua asobeo.”*

³² Te dago mena po wei ponaibawe, te Filistia dabe augwaligo dago

augwali tau somainu hanaluagasobaso?

Te dago augwaligo po wei e tama ponaibao,

“Te hanu Saion te dago Genuai Bidigo

digi duala sabo bulu tiwai nigilai dao.

Tama aga we bidigo genuai seğe elaluyu,

me seğe yai seğ eyu ebaso da,

augwali teba pelama, tama augwali

* 14:29: Te profetgo ede pusali po te agai te Asiria king me deli isibaso, te tiwai po pusali. Agai po digi begelama, e tiwai po wali, te gasa king dabego agai bidali pesage hasegelama, sabo po wali, tama augwaligo te gasa t̄pedai kantriba seğe mabo seğ te genuai mu uganu igulu, te polasa bidali kingo kolesaga aiyaba elalueibao, te po olama, wali. * 14:31: Jer 47:1-7; Ese 25:15-17; Jol 3:4-8; Amo 1:6-8; Sef 2:4-7; Sek 9:5-7

bugagia bidaibao,” wali.

15

Genuai Bidigo te Moap dabe dolaibao

¹ Te bulu Moap polo dolalio. Tama Genuai Bidigo te po mani.

Te hulide boi bidi dabe aselama,
te hanu Ar me hanu Kir dolagasali,
tama megida, Moap mu tama sese dolalio.*

² Tama tibaso, te genuai hanu Dibon
we bidi augwali te augwa tibo god dabeba
lotu wabo pesageba dabe pelama,
tama gela wagi pali.

Te Moap dabego te hanu Nebo,
me hanu Medeba polo dolai yaibaso, gela wali.
Augwali hobede mu elama, tama augwa tobolu nisi me
penane nisi poala sayanio.

³ Tama augwaligo hobede yai ugwa dabe
gudama, tama te hanu sunumi dabede bilaluali.
Tagala, augwali augwa be pedude
bidibo me, o deliba sisinibo pesagede bidibo me.
Tigidali gela genuai mu wali.

Tama gela uga hauwa mu augwaligo gedudu tulalualio.

⁴ Te hanu Hesbon we bidi, me hanu
Eleale we bidi, augwali me moni gela mu wali.

Tama te hanu Jahasde bidibo we bidi
augwaligo te bage augwaligo gela wabo odali.

Te bomai ami bidi dabe me gela olama, i hae wali.

Te Moap dabego bomo sese sia sali.

⁵ Eno Moap dabe hobede ebaso, gela obao.

Magi baso meni. Augwali augwa bulu tagalama,

* 15:1: Ais 25:10-12; Jer 48:1-47; Ese 25:8-11; Amo 2:1-3; Sef 2:8-11

wi te hanu Soarba peyu, te hanu
 Eklat Selisia wi peyu ebaso.
 Augwali gela genina mu olama,
 tama augwali te sunumidu ugwa
 hanu Luhitba holobao.
 Tama me, augwali gela elali
 te Holonaimba pabo sunumidu
 ugwaba holoyu, tama augwaligo
 gedu genuai mu obao.
⁶ Magi baso meni, te wẹ Nimlim sese mu sula selama,
 tama te nosai da, te wẹ sesegede
 elaluali me sasia pali.
 Tama te pesagede tonali, te nosai me, ni dabe me,
 me holabo badi tonobo aḡ ebeo.
⁷ Tama tibaso, te Moap dabe augwa
 wiegi yai nai dabe augwa hanude saboduali nai
 dabe augwaligo sela,
 te nai dabe dali wi pali.
 Augwali te ni sili bulu aiya dulai sunumidu pelama,
 te bulu Moap taga pali.
⁸ Te hanu Ekclaimde bidibo we bidi,
 me te hanu Bedelimde bidibo
 we bidi, me te bulu Moap tomode
 bidibo we bidi, augwali gela obao.
 Tama augwaligo gela genuai pedalali.
⁹ Te mu tama, te wẹ Dimon
 te Moap dabego kanemego paḡana pali.
 Tiali goli, Genuai Bidigo te po wali,
 agai te Moap dabe dene genuai genina mu ma
 mawaibao, wali.
 Agai te bulu yowi laionbolo polo
 walai dao, te Moap dabe wi pali,
 me te Moap dabe meba te bulude bidibo bage
 dola silimainu agai polo wali dao.

16

- ¹ Da te Moap we bidi da,
 te Idom dabe genuai hanu nogi Selade
 bidibo bage, dago te kibu sipsip gōꝝ
 te Juda dabego tuni bidi pageba
 Jerusalemba tolinao.
 Te sipsip kibu te agabolo te takis ma mawainu gagaliyu,
 ola mabo tiwai eyu, te bidi dabego te sipsip kibu
 sela pomainao.
 Augwali te wa pai buludu pelama,
 tama te Saion bulu duba saboligi paibao.
- ² Tama augwaligo tuni bidibolo elama, po omainu yao,
 “Tuni bidi, te boi bidi dabego da dena
 hanu dabede, me dena bulu dabede pobeasa bilibaso,
 tama da wi pelama, te wē Arnon
 sesegeba bidigi pali.
 Tama da dodola mu bidibao.
 Da te bulude te ba gōꝝ aga bedede tulaluama,
 tama subigila bilibo tiwai, da subigila bilibao,
 te ba buside bilibo tiwai ebao.
 Te da gela dali biliyu, tama tibao.
- ³ Tama tibaso, dago homugo dagego
 homu dago po osola sulama, tama da tau sao.
 Tama da dagego buluba pelama,
 tama te bidi dabego te posolai giligade te tiwai digi
 duala sigi pabo tiwai,
 nago buluba duala sagasaio.
 Te boi bidi dabego da dena buludu pobeasa bilama,
 tama da te adalalubo bidi bidibao.
 Tama tibaso, nago augwaligo da
 ma dolagasomainu me tagalamuo.
- ⁴ Da nago tōba bidagasomainu sula tagalao.
 Nago da tonaluama, tama te boi bidi dabego da

dolagasogobeo,” te Moap bage augwaligo te po obao.

Dago koneani, te seḡe dabe daba pedalali,
 te seḡe dabe sia selama,
 tama boi bidi dabego dago bulu tagalama,
 tama da dali dwai se me isama ebaso da,
⁵ teda te sogo te Devitgo hani me deli
 me tuni bidi pedalaibao.

Tama agai aga we bidi godolo mu elama,
 tama agai aga we bidi te doloba pai
 kolesagago naga tonaluaibao.

Agai aga we bidigo homu seḡe elalubo
 po odama, tama agai polo dodolaibao.

Tama agai wiegi yai kolesaga ebo bomo mu yaibao.

⁶ Te Juda dabe augwaligo
 te Moap dabego po odobo si da,
 augwaligo augwa hasi tomode po weyu, e tama po wali,
 “Dago te Moap dabego dwai kolesaga
 ebo po dago polo odai dao.

Augwaligo haniani po olama, augwaligo augwa nogi
 ugwaba sabo dao.

Augwaligo homugo augwali wiegi yai
 mu dao homu elama,
 tama augwaligo gasa we bidi aiyaba
 elalubo po olama,
 tama gasa we bidi posobo po wabo dao.

Tiali goli, te Moap dabe augwali ili po wabo bage dao.

Te augwaligo po mu dao homu igimio,”
 Juda dabego te po wali.

⁷ Te Moap we bidi dabego augwali te dene sali dali,
 te seḡe sali dali side gela obao.

Polobadu augwali Kirheres hanude
 bidiyu, augwaligo te wain augwaligo olai te wain du
 tuyu, yai dao.

Tama megi augwaligo te wiegi yai nai homu kone palali.

Tama augwali augwa ma hobede mu
 elama, augwali gela obao.

Magi baso meni. Augwaligo wiegi yai
 nai dabe sese dola silai dao.

⁸ Augwaligo wain gi me,
 te hanu Hesbonde elaluali wiegi yai wain gi me,
 te hanu Sipmade elaluali
 wiegi yai wain gi me, kone palali.

Tama augwali hobede genuai mu ebao.

Te polobadu te gasa bulu tuni bidi dabego
 te gide wain dabe tubo godolo mu yai dao.

Tama te wain tulama, augwali poloyu yai dao.

Tiali goli, megi da, te gi dabe sese mu dola silai dao.

Augwaligo wain gi hauwa mu elaluai dao.

Te hanu Hesbondu me Sipmadu gagalama,
 tama hanu Jaserba usu nigi pelama,
 tama te not usu nigi pelama,
 me te wa pai bulu te giliga asoboba usu nigi pai
 elaluai dao, te wę Detsiba saboligi pelama,
 tama giliga paboba usu nigi pai dao.

⁹ Ena te hanu Jaser de Sipma si wain
 gi hagede gela obao.

Tama me eno gela ęga te hanu Hesbon
 me Eleale buluba tulalubao.

Magi baso meni, dage sese dola silalio.

Tama dagego we bidi augwa wain giba pelama,
 tama augwali te wain du tau yali
 sainu wiegi yai homu elama,

hai dali iba, eda egobeo.

¹⁰ Te wain gi dabe augwaligo
wain du dabe hauwa mu walai dao.
Tama te we bidi dabe augwaligo sabo sogo da,
augwali wiegi yai homu elama gana pai dao.

Tiali goli, megi te wiegi yai homu elama,
hai wabo kolesaga sia sali dao.

Tama te we bidi dabego te wiegi yai
homu ebo tɛɛbi me wabeo.

Tama me te bidi dabego te wain nigibo
madide te wain du te saɣaɣo me agagobeo.

Genuai Bidigo tama augwaligo penane paninama,
tama augwaligo hai wabo silalio.

¹¹ Tama tibaso, ena te Moap dabe
me hanu Kirheres we bidide
haliga dene genuai mu ebao.

Ena hobede e tama tibo, te bidigo hobede
ebaso, gita eliyu, te hobedai balia wabo tiwai ebao.

¹² Te Moap we bidi augwali te tibo
god dabeba te bulu duba holama,
lotu po wagi pabo dao.

Tama augwaligo te tibo godiba aga lotu
bede gedu haluasa po odu gebo dao.

Augwaligo te bage augwaligo te sɛ dabe
yabo bomo dabe silai dao.

Tiali goli, augwa te kolesagago augwali
tau me sai menio.

¹³ Te Moap dolaibao wabo po te Genuai Bidigo polobadu
digi wai dao. ¹⁴ Tiali goli, megi Genuai Bidigo po genina
ma weyu, e tama obao, “Kibu be sela digi mu elalubao,
te Moap dabe augwa wiegi yai nai dabe dali dolabo. Eno
te sela kibu bego deli deli bubuga me polua bugagia mu
nedebao. Tama te kibu be selago dei dolo mu tama eno

te yaibao wali se eno yaibao. Te we bidi hauwa mu meg
te Moapde bidibao. Tiali goli, te bulu dolobo side, te
bidi hani dwasianu naga te bulude bidaibao, tama augwali
bomo mu meni yaibao,” wali.

17

Genuai Bidigo te Siria dabe me Israel dabe si dolaibao po wali

¹ Genuai Bidigo te hanu Damaskus dolaibao po mani.

Agai e tama po wali,

“Te boi bidi dabego te Damaskus dolaibao,
te Siria dabego genuai hanu,
tama olo pobele bage pesage naga
pesage holaluaibao.

² Te Aroer dabego hanu dabede
we bidi me bidigobeo.

Tama tibaso, te bulu dabe te olo sipsip
kibu dabego bulu pesage gagawaibao.
Tama te sipsip kibu dabe bugagia bidaibao.
Magi baso meni. Te augwali wi ilabo
bidi mu menia saibao.

³ Te boi bidi dabego te Israel dabego
bomai hanu dabe dolaibao.

Tama me ma, augwaligo te Damaskus
we bidi tonaluaibao.

Megi da, Israel de Siria si genuai nogi
elama, genuai we bidi hani hauwa te bidibao.

Tiali goli, te bulu si dolama,
tama dwasianu we bidi hani naga tede bidaibao.

Ena Tigidali Bomo Elalubo Genuai Bidigo
eno po polo wai dao,” wali.*

* 17:3: Jer 49:23-27; Amo 1:3-5; Sek 9:1

⁴ “Te sogo te Israel dabego genuai nogi sia saibao.

Tama augwaligo wiegi yai nai dabe me
 augwaligo we bidi hauwa sia selama,
 tama te bulu dwai mu bidaibao.

Te gasigo te tigi genuai yai bidi gegelama,
 tama te bidi nomona selama,
 dili pulu ha ebo tiwai yaibao.

⁵ Megi te Israel dabe te wit nai hauwa
 te odogo malu Refaimde bulubo
 wit hauwa holobo aq te ebao.

Tiali goli, augwali boi bidigo dabego elebo si da,
 teda augwali te wit dili bidigo togai
 deli deli dolalua pabo tiwai yaibao, te wit gide.

⁶ Te we bidi deli deli naga me elaluaibao,
 te ni oliv du bidigo wabi dagego elama,
 tama sai digi te nedu du deli deli ni abude walalubo,
 me si sela te nologode dabe walalubo tiwai yaibao,
 te hauwa bidigo siyu tagalai dabe.

Ena Genuai Bidi, Israel dabego God,
 eno po polo wai dao,” wali.

⁷ Tama te sogo te we bidi dabe homu begelama,
 tama Israel dabego Godiba lotu po waibao,
 te aga te augwali nigali God dao.

Tama aga da te Israel dabego Dwagi
 Yai Doloba Pai Kolesaga Naga Ebo God dao.

⁸ Tama augwaligo te alta augwa digi
 nigali teba lotu weyu,
 me augwaligo we piksa tibo god
 Aseraba lotu weyu, me egobeo.

Me, augwaligo te wiegi yai denami ebo
 pauda altade lotu po me wagobeo.
 Te augwaligo augwa digi augwa nogogo

nigai naiba lotu wabo sia saibao.

⁹ Tama te Godigo te Israel bulu dolobo
sogo da, te augwaligo

bomai hanu dabe dola silama,
tama augwali olo bidaibao.

Te hasia te tɔde bidali bidi hanigo hanu tiwai yaibao.

Te hani augwali Israel dabego hwɔagasainu asobaso,
augwali augwa hanu taga peyu, augwali wi pai dao.

Tama te hanu dabe olo te bulu dude dabe
elaluyu ebadi, te busi hola paibao.

¹⁰⁻¹¹ Magi baso meni. Israel dabe,
nago te God nage ma oda sabo God
nago homu kone ebeo.

Agate genuai masigi te dwai sogo duala
sigi pabo masigi tiwai dao.

Tiali goli, mu tama, nago aga mu gegeda pali.

Tama nago gasa hanigo godiba lotu po wali.

Tama nago homugo tibo te god dabego nage tau selama,
tama nage bugagia bidiba homu ebo.

Tiali goli, nage dolama, tama nage usu ma yabo sunumi
mu menia saibao.

Te naga gide ni wain wai bulama,
tama kulubi polo holama, tama aga
du walainu duduli ebo sulama
nage wiegi yai homu ebo tiwai dao.

Tiali goli, nago agai du sogobeo. Menio.

Deli sogo polo tama te wain ni dolama,
sasi elama, te wain gi dolaibao.

Godigo bomai bulu dabe aiyaba elaluali

¹² Tega, te kulukulu genuai wabo odao.

Te tigidali bulu ami bidi dabe

sisinagasabo kulukulu dao.
 Tama augwaligo kulukulu te tamu wẹ holama,
 degeyu wabo kulukulu tiwai dao, te tamu wẹ saneba.
¹³ Te boi bidi dabe asali,
 te tamu wẹ aluasa asobo tiwai yali.
 Tiali goli, Godigo augwali sesanobaso,
 tama augwali augwa buluba ma wi pela wali.
 Te Godigo augwali sela sayani,
 te waligo ni yabe dabe subigila sela sɔbo tiwai eyu,
 me te hogabo waligo
 te hogomu dabe pobele bage ugwaba
 sela holobo tiwai yaibao.
¹⁴ Polo tama te boi bidi dabego te bulu
 pio bagua sagasobo si da,
 te we bidi dabe wi dwai mu ebo dao.
 Tiali goli, kigamu da, boi bidi dabe menia saibao.
 Tama te tobage kolesagago Godigo
 te boi bidi dabego da dolama,
 dago nai dabe wi sela pai badi
 te sunumi palibo dao.

18

Genuai Bidigo te bulu Sudande po elaluali

¹ Te Sudan bulu wẹ u badu bidibo we bidi
 hobede mu dao,
 te haniani mano dabe hauwa ugwaba,
 edaba bola biliyu ebo tɔde.
² Augwaligo augwa po sabilibo bidi
 dabe taga palama,
 tama augwali te wẹ Nail dulu te augwaligo
 wẹ sesegede holobo nosaigo nigai geba tiwai nai,
 te naidu ibaba dulubo dao.

Dage Sudan dabego po sabilibo bage,
 dage te po polo sela asobo bage dao,
 dage duga bomai buluba ma piaõ,
 te wẹ hauwa elalubo bulu dao.
 Te bulu we bidi dabe augwali bobobage
 elama, tama augwaligo tigi sawi yai mu elalubo dao.
 Tama dagego te bulu te wabi hwibode
 genuai nogi elaluyu,
 tama gasa bulu dabego dage mu wi ebo dao.

³ Dage te tigidali tõe bidibo we bidi,
 dagego odao.
 Te dagego bulu dude magi me dodolai
 yaibaso da, dagego bugagia suiõ.
 Tama bu wabo nai biugel po wai da
 wabo si da, dagego olo saganama, bugagia odiõ.

⁴ Magi baso meni, Genuai Bidigo
 enabolo e tama po walali,
 “Ena Genuai Bidi, ena ena bulu dagalude
 bidiyu, tama eno we bidi dabego
 ebo kolesaga subo sogo da,
 ena haliga nagame elama, tama eno olo
 tama tonaluaibao.
 Eno homu polo hogodama,
 augwali polo dolabo homu ebo menio. Meni.
 Eno dua tonaluyu, tama te giliga
 nanama, tama masigi sanede
 bomona nanebo tiwai elama,
 tama te agai posolo ugwaba dua holobo aõ ebo dao.
 Tiali goli, isi mu dadala sabe.
 Tama me ma, ena te hulide te nai ininama,
 sabo magade te tulubo u meni yai
 tulubage tulubo tiwai ebo dao.”

- ⁵ Te mu tama, megi te bulu *
 te ni wain bomona holama,
 tama dudili elama, tama telega pelama,
 te wain du tau yabo magã ebo tiwai dao.
 Tialigo Genuai Bidigo te bulu dolaibao,
 te bidigo sẹbẹ elama,
 te ni wain nologo te wain du
 tau isãbadi toga sabo tiwai yaibao,
 te nedu du sabo magã isãbadi
 toga sabo tiwai yaibao.
- ⁶ Genuai Bidigo te gasa bulu
 bidi dabego te bulu dolagasomainu
 elama, tama te bulu ami bidi dabego
 tigi dabe te tõe dabe olo munalua paibao.
 Tama giligade da, te ba kemodage
 dabego tuagasaibao, ma te kedau ebo sogo da,
 te bulu hasa dabego tuagasaibao, te tigi pulu dabe.
- ⁷ Te sogo augwaligo te Tigidali Bomo
 Elalubo Genuai Bidibolo
 te olo maiabo wiegi yai nai
 sela asaibao, te boma pai kantridu.
 Te bulu te wẹ hauwa elalubo bulu dao.
 Te bulu we bidi dabe augwali bobobage mu elama,
 tama augwaligo sawi yai tigi mu elalubo.
 Tama te bulu te wabi hwibode
 genuai nogi mu elalubaso,
 te gasa bulu dabego agade wi mu ebo dao.
 Te bage augwaligo augwa olo maiabo
 nai dabe te bulu du Saionba sesaibao,
 te Genuai Bidigo te we bidi aga pãba aselama,

* 18:5: Bidi mebago homugo te kantri Sudan po olama wali homu yali. Tiali goli, gasa bidi dabego homugo te kantri Asiria po olama wali da, homu ebao.

tama agaba lotu weyu emainu daj ilai pesage dao.*

19

Genuai Bidigo Isip dabe dolaibao

¹ Genuai Bidigo te Isip bulu dolaibao wabo po mani. Te po e dao. *

Suao. Genuai Bidi te pøde ugwadu dualaluyu, tama te bulu tō kantri Isipba polo sabolaibao.

Tama te sogo pedalobo si da,
te Isip dabego tibo god dabe noma genuai mu saibao,
tama te Isip we bidi noma selama,
tama augwali wi mu elama,
tama augwaligo bomo mu sia saibao.

² Tama Genuai Bidigo te po wali,
“Te eno te Isip dabego homu
hogodolama, tama Isip dabe augwa
hasi ma hwjaibao.

Te ama hasi ma hwjyu, tama yaibao.
Te Isip hanu dabe aga hasi ma hwjyu, tama yaibao.
Tama te provins dabe aga hasi tomode
ma hwjyu, tama yaibao.

³ Te eno te Isip we bidigo homu kolesaga paninama,
tama augwaligo bomo sia sanama,
tama augwaligo yainu yali sē dabe
augwaligo egobeo.

Te augwaligo augwa tibo god dabebolo
augwali tau somainu hanaluyu yaibao.

Tama augwaligo te isai bidi dabego
noma dali po wabo bidi dabe dali po wagi paibao.

* 18:7; Sef 2:12 * 19:1; Jer 46:2-26; Ese 29:1-32:32

Tama augwaligo homu kolesaga
hanaluyu, mena sę augwaligo yagawe waibao.

⁴ Eno te Isip dabe te tuni bidi dwai me
dologode tagalaibao.

Aga te sesena pai bidi mu, tama agai
augwali bomona mu tonaluaibao.

Ena God Genuai Bidi, Tigidali Bomo Elalubo Bidi, eno
po polo walio.”

⁵ Te wę Nail sula selama, aiya dulama,
tama tọ pedalama, tama mu sula saibao.

Te tọ te gebo pai tọ pedalaibao.

⁶ Te ą ę gamiade te wę dua dua sula sesa duludubadi da,
te dwai denami holaibao.

Tama te nosai, me te sigi dili dabe
węde elaluali nai dabe sese mobia paibao.

⁷ Tama me ma, augwaligo te wę
sesegede bulali nai dabe me sese sasilama,
tama waligo sela paibao,
te nai dabe me elalugobeo.

⁸ Tama te wę Nailde sųę sabo
bidi dabe augwali homu dwai elama,
tama augwali gela waibao.

Te augwaligo huk dabede me umben wa
dabego siyu yabo sųę menia saibao.

Tama te bidi dabe homu sęę dali bidaibao.

⁹ Tama me, te name ugwa nigibo
hobi nigibo we bidi augwali me homu sęę mu
yaibao. Magi baso meni.

Te hobi nigibo nai dabe me te gide me holisąma ebaso.

¹⁰ Te hobi meni baso, te name ugwa
nigibo sę ebo bidi dabe dolama bidaibao.

¹¹ Te hanu Goan genuai bidi dabe

te kolesaga meni yai bidi dabe naga dao.
 Tama te Isip tuni bidibolo wiegi yai
 kolesaga mabo bidi dabe
 augwa geda muai kolesaga agabolo mani.
 Isip tuni bidi, augwali te kolesaga sai
 bidi dabego nagebolo te tama
 po wabo dao, augwali te polobadu
 kolesaga sai bidi dabe,
 me te wiegi yai kolesaga hauwa
 elalui bidi dabego hanidu asai dao po waibao.
¹² Tiali goli, augwaligo kolesaga menade dualaliwe?
 Te Tigidali Bomo Elalubo Bidi Godigo
 te Isip dabe dali yabo sę po geme dualaliwe,
 te agai nage dali yabo sę po wabewe?

¹³ Te hanu Soan, me genuai hanu
 Mempis genuai bidi dabe,
 augwali te kolesaga meni yai bidi dabe naga dao.
 Tama me ma, te Isip bulu tobolu we bidi dabe augwaligo
 te bulu bugagia tolasa sę ebeo.

¹⁴ Genuai Bidigo te Isip dabego
 homu kolesaga polo dolai dao.
 Te pagede te Isip dabego ebo sę dabe dolo me pabeo,
 te geda mubao, te polobo bidigo aga bogu agalama,
 tulaluainu ebo tiwai te ebao.
¹⁵ Te bulu Isip bugagia bidimainu
 tau sabo bidi menio, tagala,
 aga te genuai bidi, o aga olo bidi.

*Genuai Bidigo Isip dabe mu dolama, tama augwali homu
 begelaibao*

¹⁶ Tama te sogo te bulu Isipgo te tama sęę tolalubaso
 da, augwaligo suaibao. Te Tigidali Bomo Elalubo Genuai

Bidigo augwali dolainu nogo dolalubo sueibao. Tama augwali te we dabe wi elama, noma sabo tiwai yaibao. ¹⁷ Tama te Isip we bidi dabe augwaligo te bulu Juda nogi ebo si da, tego augwali te Tigidali Bomo Elalubo Genuai Bidiba homu kone yaibao. Me, te augwaligo agai augwalibolo yai ebo sę dabe kone yaibao. Tama augwali wi genuai mu yaibao.

¹⁸ Te sogo te Isip dabego a naga hanu we bidi dabego te Hibru pogo po waibao. Tama te hanu we bidi dabego te Tigidali Bomo Elalubo Genuai Bidigo nogide augwali te aga dologode bidai olama, augwaligo mu po waibao. Te hanu me deligo nogi augwaligo te nogi nogi yaiba, Giligago Hanu. * ¹⁹ Tama te sogo te Genuai Bidigo te alta me te bulu Isip hanude elaluaibao. Tama me te masigi pos me elaluaibao. Augwaligo Genuai Bidigo mu ɖaj ilama, elaluaibao. Te bulu Isip ɖaj side elaluaibao. ²⁰ Te alta de masigi pos si te we bidigo Tigidali Bomo Elalubo Genuai Bidi sulama, homugo konebo te ɖaj tiwai elaluaibao. Tama te boi bidi dabego augwali dolainu asobaso da, teda augwaligo Genuai Bidiba i olama, tama Genuai Bidigo augwali tau somainu bidi me augwaliba taga palaibao, te augwali tau selama, augwali ma somainu. ²¹ Tama Genuai Bidigo te Isip dabego aga deli naga te Genuai Bidi dao olama, konemainu tagalaibao. Tama agai tama tibo sogo da, te Isip dabego bugagia mu koneama, agaba lotu po weyu, agaba ofa nai dabe sela peyu yaibao. Tama augwaligo agaba bomu yai pogo ɖaj olama, tama augwaligo yaibao wali sę dolo tama augwaligo yaibao. ²² Te mu tama, Genuai Bidigo Isip dabe dene mawaibao. Tiali goli, agai te ebo kolesagago da, teda augwaligo dwai

* 19:18: Te meba poloba Hibru pogo asęani bukude te nogi elalubao, "Giligago Hanu," da wali. Tama te po mebade te tiwai nogi elaluali "Dolabo Taun," da wai dao.

kolesaga ebo dodolaibao. Tama augwali homu begelama, tama augwali agaba ma paibao. Tama agai augwaligo gedu haluasa po wabo odama, tama augwali bugagia tau saibao.

²³ Tama te sogo da, te mone sunumi te Isip dali Asiria si tomode elaluaibao. Tama te Asiria dabe Isip buluba peyu, me te Isip dabe te Asiria buluba asiyu yaibao. Tama te bulu si we bidi dabe augwali te Genuai Bidi deliba naga lotu waibao. ²⁴ Tama te sogo te Israel dabe, me te bulu Isip, me Asiria sigo hai namu si pedalaibao. Tama te we bidigo te gasa tōde we bidigo dabebolo dwagi yai mobo mawainu da, augwaligo te tama po waibao, “Eno homugo Godigo te sela bulu bidi dabe dali yali sę tiwai dage dali me emainao, te Isip ebadi, me Asiria ebadi, me Israel, te tama sela bulu yali gilama.” ²⁵ Tigidali Bomo Elalubo Genuai Bidigo dwagi yai mobo po mayu, te po waibao, “Dage Isip dabe, ena we bidi dabe dage dali eno wiegi yai sę yaibao. Tama eno te Asiria dabe dage dali me eno wiegi yai sę yaibao. Tama me eno dage Israel dabe dali me, eno wiegi yai sę yaibao. Te Israel we bidi da, ena we bidi bidimainu yali we bidi.”

20

Asiria dabego ebo kolesaga te Godigo yabo homu ebo kolesaga ola mobao

¹ Te Asiria tuni bidigo pode te aga polalubo ami ofisa bidigo aga ami bidi dabe selama, te hanu Asdotba me bulu Filistiaba hwigi pali. ² Te kibu be sela polasa, te Asiria dabego te Filistia hanu dabe sabode, Genuai Bidigo Aisaiabolo hasia po wai dao, te Amosgo ogwabolo te kolesaga yabo po. Aisaia aga hobedai ugwa me aga sağa nadoba me gudubo tagalama, olo bilao po wali. Tama Aisaiago Genuai Bidigo po odama, tama tiai dao. ³ Tama te Asiria dabego te hanu Asdot polo sabo sogo da, Genuai

Bidigo te po wali, “Te kibu be sela tama, Aisaia eno sę bidi aga ugwa me saęa nadoba gudisama olo bilai dao. Teda te dwai sę te Isip dali Sudan side pedalabo sę daį tiwai aga bidali dao. ⁴ Te Asiria tuni bidigo te Isip dali Sudan bulu siba hwıgi paibao. Tama agai te bulu sigo gesi bidi me, monu dabe me, kalabus elama, gasa buluba sela paibao. Tama augwali pabo sogo da, augwali ugwa me, saęa nadoba me, me gudasa pogobeo, mu meni yaibao. Augwali habu olo bidiyu, augwali hale mu yaibao. ⁵ Te Filistia we bidi dabego te Sudan dabego augwali hwıbode tau siyu, me te augwaligo genuai nogi ugwaba sabo Isip dabe, te augwaligo te sę sulama, tama augwali noma selama, tama augwali homu dwai yaibao. ⁶ Tama te sogo, te nambis we bidi, te Filistia dabe, augwali augwa hasi tomode po miyu, te po waibao, ‘Iya, tegoba! Dago te bomai bulu bidi dabebolo da tau somainu no munaluao po hanalu wai goli dama, tiyu Asiria dabego da dolagaidali weyu. Tiali goli, suao, augwa digi dolalio. Te da te Asiria dabego bainat hwę geda muabo sunumi menio,’ te po waibao.”

21

Babilon bulu dolaibao

¹ Genuai Bidigo Babilon * bulu dolaibao wabo po mani.

Te genuai sęę me, dene me,
 te nai meni yai wa pai bulude pedalaibao,
 te tų te bidi dabe wi elama, paęa pisama ebo bulude.
 Agai te polo asaibao, te nai menia pai
 madi pobegebo wali tiwai bomai wali.

* 21:1: Te Hibu pogo te nogi Babilon me elalubeo. Agai te po olama wai, “te wa pai bulu te nambis paęe elalubao,” wai. Tiali goli, te po wali te Babilonde po digi po begelama wali da, homu ebao.

² Eno te sę te God ena mani na me deli dwaide suali.
 Eno Godigo te po wabo odali,
 “Te Babilon dabe te ili po olama, geagano bilibo sę eyu,
 tama gasa we bidi hani dali dwai sę ebo bage dao.
 Tama augwaligo te kolesaga genuai mu
 pedalomainu ebo.
 Tama tibaso, te Elam ami bidi dabe,
 dagego te Babilon buluba hwıagasao.
 Tama Midia ami bidi dabe, dagego
 te hanu bobegela sagasiąo.
 Eno te Babilon dabego gasa
 we bidi dabebolo mani sęęę silaibao,” wali.

³ Te nade suali naigo ena wi ilama, didibili ilali.
 Tama eno tigide dene genuai me yali,
 te we sibigo wai sainu dene ebo tiwai yali.
 Eno wi mu elama, eno homu mu doali.
 Tama eno magi nai me suyu, me po
 me odoyu yabo homu me ebe.
⁴ Eno tobolu gęę elama, tama wigo
 eno tigi didibili yali.
 Eno te pio giliga iba dega siyu, hulıa sagasabode,
 eno godolo mu ebo dao.
 Tiali goli, te sogo hulide te naigo ena wi mu ilalio.

⁵ Eno te bidi dabego genuai nai sisi ebo suali.
 Tama augwaligo moni ugwa name tıba mubo suali.
 Tama bidi dabe dualama,
 nai tuyu, wę tuyu ebo suali.
 Tiali goli, deli sogo tama bidi mego
 hąı olo e tama po wagasali,
 “Te genuai bidi dabe, te boi bidi dabe polo asalio.
 Te duga hwıbo awa name polo selama, no muao,” wali.

⁶ Tama Genuai Bidigo enabolo te po walali,
 “Nago bidi me nage tonalumainu tama,
 nago daꞑ ilao, agai tonalumainu.
 Tama agai te mena tama nai agai suali
 agai nagebolo omainao.

⁷ Te agai te bidi dabe hos dabede
 dualama si si asobo sulama,
 me agai te bidi dabe te donkidu,
 me kameldu dabe dulasa asobo sulama,
 teda agai olo saganama, bugagia mu odama,
 mena seꞑ egowe bugagia odaibao.
 Tama agai bugagia sumainao,” wali.

⁸ Tama te tonalubo bidigo laion yowigo
 wabo tiwai iyu,
 agai te po bomona wali,
 “Genuai bidi, ena te boi bidi dabe
 tonalubo pesagede tede bidama,
 tama ulade me, hulide me,
 eno bugagia tonaluai dao.

⁹ Tama eno te bidi dabe te hosde
 dulama si si asobo suali.”
 Tama tonalubo bidigo te po wali,
 “Babilon polo dolalio, aga polo dolalio.
 Tama augwaligo tibo god dabego
 piksa dabe tulaluama, tologa palio,” wali.*

¹⁰ Eno we bidi dabe, hobede ya,
 te boi bidi dabego dage
 te bidi dabego wit elebo tiwai yalio.
 Tiali goli, megi da,
 eno te God Tigidali Bomo Elalubo Bidigo mani po
 dagebolo pusubao.

* 21:9: Ped 14:8; 18:2

Aga te Israel dabego God dao.

Te profet bidigo Idom dabego hanalu wali po wei ponani

¹¹ Te Genuai Bidigo te nai dabe me te
hanu Dumade pedalabo po mani. †

Te bulu Idomde bidibo bage augwaligo
i olama, hanaluyu, te po wali,
“Tonalubo bidi, me sogo te hulialubo silaibawe?
Mena sogo mu aga silaibawe?”

¹² Tama eno te po wei ponoyu, te po wali,
“Te be da posaiba, tiali goli hulua siyu me yaibao.
Tama dagego ma hanaluabo
homu ebaso da, teda dage ma aselama,
ma hanaluagasiqo,” wali.

Genuai Bidigo Arebia dabe dolaibao

¹³ Genuai Bidigo te Arebia dolaibao wabo po mani.

Te Dedan dabe dage, te dage biliyu,
nai abelama dobu si eyu ebo bidi dabe dao.
Dage pelama, te Arebia dabego nai
meni yai wa pai buluba duala sigi pabo dao.

¹⁴ Te teba wi asali we bidi augwali
we nogonego mu isibao,
tama tibaso, dagego nai magasao.
Tama te t̄ Tema we bidi dagego
te nai me augwaliba sela piqo.

† 21:11: Te lain 11 me 13 tede wali po page kuna konebeo. Me badu bidigo homugo te taun Duma te Arebia dabego taun yali bogo homu ebao. Te buku Page Galalali, Daj 25:13-15, tede te tiwai wali te nogi Duma te nogi Tema dali elalu, me Kedar dali elalubao, te po te Daj 21de te ves 14 me 16, tede suo. Tiali goli, te ves 11de te kantri t̄ Idom po olama me walio, tama tiyu, me badu bidigo homugo te vesde wali nogi Duma te t̄ kantri Idom po olama wali dao, te homu ebao.

¹⁵ Augwali wi pai dao.

Magi baso meni, te boi bidi dabe hwɔbo
 bainat hwɔ me enesigi enego
 augwali dali bomo elama, hwɔbaso.

¹⁶ Genuai Bidigo enabolo e tama po wali, “Te kibu be deli elalubao, te hanu Kedar we bidi dabe dali augwaligo wiegi yai nai dabe dolama silabo. Te kibu be bubuga deli deli sogo eno bugagia nedebao. Tama te kibu bego bubuga dolo mu sia sigi pabo si da, teda eno augwali dali yaibao wali sɛ dabe eno yaibao. ¹⁷ Te Kedar dabe augwali bomai ami bidi dabe augwali enesigi dali hwɔbo bugagia mu koneai dao. Tiali goli, augwali dolaibao. Tama dwasianu bidi hani ami dabe naga bidaibao. Ena Genuai Bidi, Israel dabego God, eno po polo wali.”

22

Genuai Bidigo Jerusalem we bidi dabe dali wado po wali

¹⁻² Genuai Bidigo te Na Yabo Odogo Bulu tede
 na dabe pedalabo po mani.

Te genuai hanu Jerusalem we bidi dabe,
 dagego mena homu mu eyu, dagego hai olama,
 wiegi yai homu ebawe?

Tama dage duga be peduba hola pelama,
 tama hai bomona mu olama,
 tama te kulukulu tigidali te hanu usu nubao.

Naga te bidi dabe isali da.

Augwali te bomai ami bidi dabe tiwai
 e hwɔnama, isai menio.

Te boi bidi dabego augwali moni hwɔgo elebeo.

Menio. *

³ Dagego genuai bidi dabe augwali
digibulu mu wi peyu, tedela pai dao.
Tiali goli, boi bidi dabego augwali sulama,
tama augwali dua dua tola sai dao.
Magi baso meni, te genuai bidi dabego
ene dabe me te hwjabo nai dabe meni baso.
Te boi bidi dabe dali hwjabo nai dabe meni yaide.

⁴ Tama tibaso, eno dagebolo te walobao.
Dagego eno haliga nagame elama bidimainu igimio.
Dagego enaduba deli naga bidimainu
tagalao. Magi baso meni.
Eno we bidi mu dolai baso, ena homu seḡe elama,
ena gela weyu ebao.

⁵ Magi baso meni.
God, Tigidali Bomo Elalubo Genuai Bidi,
agai te haniani seḡe dabe dage
te Na Yabo Odogo Bulu pedalabo sogo me
polo bodolu muai dao.
Te boi bidi dabe hauwa mu aselama,
tama augwaligo hae dali iba,
oba bomona ela bilaibao, te udula biliyu.
Tama dage noma selama, gegede bilaibao.
Augwaligo te hanu obo dabe hūgiyu yaibao.
Tama dage wi yaibao.
Tama dagego i wabo da, digibulu mu paibao,

* 22:1-2: Te Asiria boi bidi dabe aselama, te taun hanu Jerusalem bagua sagasali sogo, te Jerusalem bidi augwali te bidi dabe wi eyu, te augwali bomo elalu dolaluabo homu isama, te Asiria ami bidi dabe dali hwjabo usu meni yai. Te Jerusalem bidi dabe meba te wi pelabo si da, te Asiria dabego augwali pageabi elama, te augwali ela muani. Tama meba te taun tomode bidaludubadi, te augwali gasi selama isiyu, ma nasi elama isiyu yalio.

te tigidali bulu du usu naibao.

- ⁶ Te bulu Elam ami bidi dabego enesigi
dali, ene dali si tolasa asaibao.
Tama augwali te hwıbo kibu hos,
me te hwıbo awa dali tama asaibao.
Tama te hanu Kir ami bidi dabe da,
augwali te hwıbo sabili dabe dali asaibao.
- ⁷ Te hwıbo nai o awa da dagego
sawi yai odogo bulu paḡaıwaibao.
Tama te hos kibude duabo ami bidi dabe
augwali te hanu sunumide
doligi pelama, tama hwıabo no munaluaibao.
- ⁸ Te boi bidi dabego te se dabe yaibao.
Magi baso meni, Genuai Bidigo te bulu
Juda me tonalusiḡama ebaso.
- Tama te sogo dagego koneama,
te boi bidi dabego dageba
hwıgasaibao homu ebaso da,
teda dagego te hwıbo nai dabe
te Moni Ni Sili Lebanon Be nogi ebo
tede munalubao homu eyu da,
teda dage agai bugagia bidibo tau saibao.
- ⁹⁻¹⁰ Tama dagego suai dao,
te hanu Jerusalem obo hauwa dolai
elalubo suai dao.
Tama tibaso, dagego Jerusalemde
be dabe tigidali nedai dao,
te tuni bidi Devitgo hanu.
Tama dagego te be dabe huḡilama,
te be dabego masigi dabe te obo se
ma yainogo sai dao.
Tama dagego to dedagede we sainu,

te wẹ gamia dabe geselai dao.

¹¹ Tama dagego genuai dedage deli
te hanu bobegelali obo si tomode nigai dao,
te tigidali uludu asobo wẹ ge bo ɗaj elalumainogo.

Dagego te tama sẹ dabe yai dao.

Tiali goli, dagego God me kone me ebeo.

Agai deligo naga te nai dabe dageba
pedalabo po polobadu digi bodolu muai dao.

¹² Tama te sogo God, Tigidali Bomo Elalubo Bidigo
homugo dage homu dene

elama, gela omaina homu ebao.

Tama dage duga tobolu nisi gudama,
tama hobede ebo ugwa gudumainu homu ebao.

¹³ Tiali goli, dagego te hobede yabo
sẹ yai menio. Meni.

Dage gisugu olama, gana pelama bidalio.

Tama dagego bulmakau kibu me sipsip kibu elama,
tama moni daa mu tuai dao.

Tama dagego wain wẹ dabe tama tuali.

Tama dagego e tama po wai dao, “Asao.

Da wẹ dali nai dali tuinao,” wali.

“Magi baso meni, do da isaibao,”

tama po wali. *

¹⁴ Tigidali Bomo Elalubo Genuai Bidi aga digi ena
pageba mu aselama, eno olode te po mu tama walio, “Eno
dagego te dwai sẹgẹ gegeda sẹgobeo, te dage isiboba usu
nigi paibao,” wali. Te da, te Godigo po dao, Tigidali Bomo
Elalubo Genuai Bidigo po.

Genuai Bidigo Sepna aga sẹde sela sẹwaibao

* 22:13: 1 Ko 15:32

¹⁵ Tigidali Bomo Elalubo Genuai Bidigo enabolo Sepna sugi pao po wali. Te bidigo te tuni bidigo bede tigidali nai tonalubo dao. Tama eno te po agabolo pusa mawaibao,

¹⁶ “Sepna, nago naga hani me nago tɔ ede menio.
Te nago homugo nage de dao homu eyu,
nago te bidi dabebolo te bulu du dologode dilai
masigi dedage dogwao po waliwe?
Tama te masigi dedage nago dwagi yai
gɔ page tiwai elaluaibawe?

¹⁷⁻¹⁸ Nago homugo nage bomai
bidi dao homu ebawe? Mu menio.
Genuai Bidigo nage tola selama, gosegelama, miminama,
tama dwasianu kiki tiwai yaibao.
Tama agai nage tɔ me genuai digibulu
me elalubo madi digibulu mu sɔwaibao.
Tama nage te bulude isaibao.
Tama nago te tagalobo sawi yai karis tagalaibao.
Nage da, te tuni bidigo sɛ ebo bidi dao,
tiali goli nago tuni bidigo haniba
nago hale sela asobo bidi dao.

¹⁹ Genuai Bidigo nage nago ebo sɛde
sela sɔnama, tagalaibao.
Tama nage nai meni yai bidi bidama,
tama nage dwai mu bidaibao.
Tama nage nagi meni yai bidi mu bidaibao,” wali.

²⁰ “Genuai Bidigo Sepna nagebolo te tama po wali, ‘Te nai dabe pedalobo sogo da, teda eno sɛ bidi i olama, asaibao. Aga te Eliakim dao, te Hilkiago ogwa dao. ²¹ Tama eno te nago te tuni bidigo ofisa bidigo gudubo wiegi yai ugwa me kibu wali selama, te Eliakim gudulaibao. Tama agai nago megɛ ebo sɛ saibao. Tama agai te Jerusalem we

bidi, me te Juda we bidi, tigidali tonaluaibao. Tama aga augwaligo aya tiwai bidaibao. ²² Tama eno agai nogoba te tuni bidi Devitgo be ki agai nogoba muaibao. Tama mena nai agai dabo si da, teda bidi dabego ma palibo usu egobeo. Tama me tama nai dabe agai paliali da, bidi dabego dabo usu egobeo. * ²³ Te eno aga te seḏe bomo elama, mu bidimainu ilaibao, te huk augwaligo be tomode daḡ walai tiwai yaibao. Tama agade aga hani tigidaligo genuai nogi sela silaibao.’ ”

²⁴ “ Tama aga hani tigidali aga pageba sisagaselama, tama agabolo augwali tau sao po waibao. Te augwali te sene dabe, me meba nai dabe te hukude walalubo tiwai yaibao. ²⁵ Ena Tigidali Bomo Elalubo Genuai Bidi, eno te tama po wali. Tama te seḡ pedalobo sogo da, te si wali huk hala pelama, tulaluaibao. Tama agade walaluyu, aga seḡḡ mani hani dolama, tulaluaibao. Ena Genuai Bidi, eno polo wai dao.’ ”

23

Genuai Bidigo hanu Tair dolaibao

¹ Genuai Bidigo te hanu Tairde pedalabo seḡ dabe po mani. *

Te genuai sip dabe, dage tamu weḏe
 bilibo sip dabe, dage hobede elama,
 gela waiḡo. Magi baso meni.
 Dagego bulu Tair sese tigidali polo dolai dao.
 Tama tede be me dolalubeo, te bulude.
 Me, te sip dabe tubo pesage tede dolai dao.
 Nago te seḡ te ailan Saiprus tagalama,
 ma asobode dagego koneaibao.

* 22:22: Ped 3:7 * 23:1: Ese 26:1–28:19; Jol 3:4–8; Amo 1:9–10; Sek 9:1–4; Mat 11:21–22; Luk 10:13–14

² Te dage Tair bage, te tamu wẹ
 sesegede bidibo Tair bidi dabe, dage,
 me te hanu Saidonde bisnis
 bidi dabe, dage hobede elama,
 po wasiayū, dua bidiāo.

Hanu Saidon, te sip dabego haniani dabe
 hauwa mu nageba sela asai dao.

³ Tama nage te nai abeliyu,
 te nai maketde muyu ebo genuai
 nogi sabo bulu tiwai yai dao.

Te sip dabe te Isipba, te wẹ Nail elalubo badu pelama,
 tama te wit nai dabe nageba sesai dao.

Tama nago te nai dabede bisnis sẹ elama,
 te naide mone hauwa sai dao.

⁴ Hanu Saidon, nage hale yao. Magi baso meni.
 Te bomai hanu te tamu aǰde elaluali hanu polo dolalio.

Tama te tamu aǰgo te po walio,
 “Hobede mu dao.

Eno wai dabe ame nabe.

Tama ena te wego wai ame nainu dene isaɰwai aǰo yalio.

Tama eno sawi ogwa wegi ame nisɰwai
 aǰo elama, negisɰwai aǰo yalio,” wali.

⁵ Tama te Isip dabego te sẹ dabe
 te hanu Tairde pedalali po odobosi da,
 teda augwali wi mu elama,
 augwaligo bomo mu sia saibao.

⁶ Dage te tamu wẹ sesegede bidibo
 we bidi dabe, dage hobede elama,
 gela olama, te Tarsis buluba poloba tama wi pao.

⁷ Magi nai mu te Tairde pedalaliwe?
 Te polobadu bomai hanu mu,
 te dage tigidali wiegi yai
 homu elama gana pai madi dao.

Polobadu te hanude we bidi dabe meba
 te gasa digibulu buluba taga palama,
 te gasa gesi hanu geseligi pomainu yai dao.
 Tiali goli, magi baso te hanu dolama elalubawe?

⁸ Dego pode mu te hanu Tair dolaliwe?

Te hanugo te gasa hanu dabe
 tonalumainu sa muai hanu dao.

Tama agai bisnis bidi dabe
 te genuai bidi mu tiwai bidama,
 tama te tɔde we bidi dabego augwali
 nogi ugwaba siyu,
 genuai nogi mu mabo dao.

⁹ Te da te Tigidali Bomo Elalubo Genuai Bidigo pode
 te bulu tama dolai dao.

Genuai Bidigo te tama tiali da. Magi baso meni.

Agai te bidi hani augwa bomo de
 augwa genuai nogi dabe ugwa siyu,
 me augwa homu gana peyu ebo
 bidi dabego nogi aiyaba elalubo dao.

Tama me, agai te bidi dabe
 genuai nogi yai bidi dabe me agai
 aiyaba elalubo dao.

¹⁰ Dage te Tarsis badu bidibo we bidi,
 dage duga homu duga haniani
 sɛ dabe iyao. Magi baso meni.

Te hanu Tair bidi dabego dagego
 homu kolesaga tolalugobeo.

¹¹ Genuai Bidigo nogi
 te tamu wɛ daide balalubao,
 te tamu wɛ sesegede elalubo bulu dabe dolainu.

Tama tibaso, te bulu we bidi dabe
 augwali didibili dwai mu ebao.

Agai te Fonisia bulude bomai hanu dabe
dolainu po polo mawai dao.

¹² Agai e tama po wali, “Sawi yai hanu Saidon,
nage wiegi yai homu me ma elama,
bidigobeo. Magi baso meni.

Nage dolama, mu dolama elaluaibao.

Tama tibaso, dage hanu Saidon we bidi, dage hogodama,
te ailan Saiprusba piào.

Tama tiali goli, tede me dage bugagia
me bidigobeo,” wali.

¹³ Te Babilon dabego tọ suiào,
te bidi dabe me tede bidibeo. Magi baso meni.

Te Asiria dabego augwaligo bulu dolai dao.

Tama augwaligo bulu te bulu
hasa dabego bulu gagalai dao.

Te Asiria dabego te augwaligo hanu obo
bobegelama, sai ela pai dao.

Tama augwali te sai dabede dolaluyu,
tama augwali dali hwı̄ yai dao.

Tama augwaligo te hanu dabego bomai
obo dabe hı̄giai dao.

Tama te hanu dabe sese tama dolai dao.

¹⁴ Te genuai sip dabe, dage tamu wẹ̄de
bilalubo sip dabe,
dage hobede elama, gela waiào.

Magi baso meni. Dagego te bomai hanu polo dolai dao.

¹⁵ Tama te sẹ̄ dabe pedalobo sogo da, te we bidi dabego
te hanu Tair te kibu be 70 tama gegeda pelama, bidaibao.
Te hanu Tair te penani sẹ̄ ebo we te bidi dabego te we
tagalama tẹ̄ąbi wabo we tiwai bidaibao. Te tẹ̄ąbi wabo po
e tama edao,

¹⁶ O penani sę ebo we.
 Augwaligo nage homu kone gegeda palalio.
 Tama tibaso, nage gita selama, hanuba biligi pao.
 Tama nago te tęabi po wao.
 Tama wiegi yai musik elao.
 Tama te bidi dabego nage ma koneaibao.

¹⁷ Tama te 70 kibu be silibo si da, Genuai Bidigo te hanu Tair te we bidigo nai dabe abeliyu, nai maketde muyu ebo bulu ma emainu sula tagalaibao. Tama te hanu Tairgo te gasa tęde bulu dabe sese aga dali bisnis sę yagasomainu kegaibao, te penani sę ebo wego agaba asomainu kegebo tiwai yaibao. ¹⁸ Tiali goli, te mone dabe agai sabo da, aga sabo sabogobeo. Menio. Te nai dabe te God Genuai Bidigo nai dabe tiwai pedalaibao. Tama te Genuai Bidigo we bidigo te hanu Tairgo sisinani nai dabe saibao. Tama augwaligo tuabo nai hauwa mu elaluaibao. Tama wiegi, wiegi yai gudubo ugwa me elaluaibao.

Genuai Bidi te Saion bulu dude bidiyu, te tigidali we bidi hani tonaluaibao

24

(Dqi 24-27)

Genuai Bidigo tę dolama, tama aga digi te we bidi tonaluaibao

¹ Genuai Bidigo tę mu dolama, tama tę olo mu elaluaibao.

Agai te tę agalama, tama tę bebegelama,
 tama te tę gasagi yai mu pedalaibao.

Tama agai te we bidi dabe subigila
 wi tedela pomainu yaibao.

² Tagala, augwali mena tiwai we bidi yaibaso me,

augwali deli sẹ tiwai naga suaibao.
 Te pris bidi dabe dali, me te olo we bidi dabe me,
 tama me te tonalubo bidi dabe me,
 olo sẹ bidi me, olo sẹ we dabe me.

Tama me te bisnis bidi dabe,
 me te augwalide nai dabe abelebo bidi dabe me,
 tama me te nai negeli sabo bidi dabe dali,
 te nai negeli mabo bidi dabe dali me.

Tama me te moni bidi dabe dali,
 me nai meni yai bidi dabe dali me.

Augwali tigidali sese tama te dwai dene saibao.

³ Tọ tigidali mu dolama,
 tama te tọ olo mu elaluaibao.

Genuai Bidigo te sẹ dabe yabo po polo walio.

⁴ Tọ wa pelama, tama agai bomo polo sia salio.

Tama aga hobedai gela obao.

Tama te genuai nogi elalubo we bidi
 augwaligo bomo me sia salio.

⁵ Te tọ te we bidigo dwai meda yai
 kolesagago meda ilalio.

Augwaligo te Godigo bomai habu selali
 poba tudi ola menama,

tama agai po sela sanama,

tama augwaligo God aga dali

daḡ walali po toga sayu yai dao.

Teda te aga dali tigidali sogo bidiabo

daḡ wali po augwaligo sela sawai dao.

⁶ Tama tibaso, Godigo pode

te dwai sogo mu te tọde pedalama,

te we bidi hauwa mu

dwai kolesagadu wali pao olama, i ola mawai dao.

Tama dwasianu we bidi hani naga bidaibao.

Agai tama tiali. Magi baso meni.

Te we bidi dabe augwa dwai kolesagago
 augwa sęęę tolaibao.

⁷ Te gesi ni wain du me walisiąbadi,
 te ni wain me sasia mobia pai dao.

Tama te we bidi te wain wę tubo bage
 augwali megı da homu sęęę mu yali.

⁸ Augwali wiegi yai homu elama,
 tama augwa te bagwa pai
 wiegi yai musik po wabo te temborin me elebeo.

Tama augwaligo haniani gitago
 wabo dabe sese mu tama sia sali.

⁹ Augwaligo te wain wę tubo sogo
 augwaligo te tęąbi po me wabeo.

Augwa sęęęo yali sęde augwaligo
 te wain augwaligo tubode
 augwaligo pedauwalide pusu me ebeo, te ha ebao.

¹⁰ Te genuai hanude nai dabe sese mu dola silalio.

Tama tıgidali be sunumi dabe palialua pali.

Te bidi me tomoba me pabo usu ebeo.

¹¹ Tama te we bidi dabego
 te tuabo wain wę menia salio.

Tama augwali te hanu sunumi dabede
 dolalua peyu,
 augwaligo te wain gogono bilibao.

Te we bidi dabego wiegi yai
 homu elama, gana pali dabe mu sia sali.

Tama homu sese elama, hobede
 ela pabo sę naga te tıgidali tęde ebao.

¹² Genuai hanu sese mu tama dolali,
 tama agai genuai obo sunumi tulaluama, tama
 pebeda pali.

¹³ Te tobage dwai sę naga te tıgidali
 tęde we bidide pedalaibao.

Tama dwasianu we bidi hani mu naga bidaibao.
 Te ni oliv du te bidigo sela silaide
 te deli deli walalua pabo tiwai elaluaibao.
 Me te ni wain du te bidigo siyu,
 deli deli tagalai te elalubo tiwai yaibao.

¹⁴ Tiali goli, te me bidibo dwasianu
 we bidi hani augwali wiegi yai
 homu elama, tẹąbi po waibao.

Te tamu wẹ sesegede bidalubo we bidi augwaligo
 te Genuai Bidigo bomode me genuai
 nogide augwaligo wiegi yai
 homu elama gana paibao.

¹⁵ Tama tialima, dage tigidali tọ
 habu badu bidalubo we bidi dabe,
 te giliga asobo badu,
 me te tamu ąi sesegede elalua pabo
 bulude bidalubo bage,
 dage tigidaligo te Genuai Bidigo nogi ugwanu sao,
 te Israel dabego Godiba genuai nogi maiąo.

¹⁶ Te we bidi te tọ sesegede digibulu
 bidibo bage augwali wiegi yai
 homu elama, tama augwaligo
 wiegi yai homu ebo tẹąbi po wabo.

Tama augwaligo te tẹąbi po da e tama dao,
 “Genuai Bidigo nogi ugwaba sao.

Agai tigidali sogo wiegi yai kolesaga mu ebo dao.”

Tiali goli, eno e tama po wali,
 “Hobede mu dao.

Ena wiegi yai homu mu egobeo.

Eno haligade moni sẹęę mu elama,
 eno olo dali mu sia sabo homu ebo.

Magi baso meni. Te eno suali,
 te dwai sẹ eyu, ili po weyu tama

ebo bidi dabego gasa bidi dabe ili po ola mani,
 augwali dali dwai se yali, eno te po wali.

17 Te tõe we bidi, dage hobede mu dao.

Te dwai sogo me, tõe dedage me,
 sugũ sabo wa tamago dage
 tonalubao, dage tola sainu.

18 Tama bidigo te dwai sogo te asobao
 wabo po odama, wi pobaso da,
 aga te tõe dedageba tulaluaibao.

Tama aga te tõe dedagede
 ma hola aselama, ma wi painu yali da, teda aga
 te sugũ sabo wade ma tola saibao.

Te dagalude sunumi dabe dala pelama,
 tama te wẽ e tõe gealuaibao.

Tama tõe pagede mali yaibao.

19 Te tõe mali genuai mu elama,
 tama te tõe tomode peda pelama,
 tama te tõe dedage olo dala pai elaluaibao.

20 Aga te polobo bidi ugwaba edaba ebo tiwai eyu,
 me te dwasianu be te bomai wali ebo
 sogo uba edaba ebo tiwai yaibao.

Te tõe we bidi dabe augwa dwai segego
 yaligo te tõe tolobo usu egobeo.

Tama tibaso, te tõe tulaluama, tama te tõe ma hodalobo
 usu me egobeo," eno te po wali.

21 Polobadu digi Genuai Bidi aga digi
 po bodolu muai dao.

Agai te dagalude bidibo bomo elalubo bage dene mayu,
 me te tõe tuni bidi dabe dali dene mawaibao.

22 Genuai Bidigo augwali sisinama,
 augwali kalabus ilaibao,
 te bidi dabego te kalabus bage
 tõe dedage deliba tagalobo tiwai mu yaibao.

Tama agai augwali kalabuside
 bobobage sogo tonaluaibao.
 Tama nosali augwaliba agai homugo
 yainu yali sę augwaliba yaibao.
²³ Tama te giliga ula de polua ula si,
 te olo nai tiwai yaibao.
 Magi baso meni. Tigidali Bomo Elalubo
 Genuai Bidi aga bomo dali,
 me aga bomai ula dali, asaibao.
 Tama aga te bulu du Saionde we bidi tonaluaibao.
 Tama te we bidi dabe augwa genuai
 bidi dabego aga suaibao.

25

Godigo nogi ugwaba siyu wabo balia po

¹ O Genuai Bidi, nage eno God dao.
 Tama eno nago nogi ugwaba saio.
 Magi baso meni.
 Nago te bidigo isawai bomai sę dabe mu ebo dao.
 Da tau sainogo, nago tigidali nai dabe mu usu nani,
 te polobadu digi nago yaibao po wali gilama.
² Nago te genuai hanu dabe
 te pobele bage pesage holai dao.
 Tama te bomai obo dabe elalui
 hanu dabe sese dola silai dao.
 Tama te Israel hani isawai bagego
 bomai hanu dabe te boi bidi dabego
 sese mu dola silai dao.
 Tama augwaligo ma hodolobo usu egobeo.
³ Te bomai bulu we bidi dabego
 nagebolo genuai nogi mawaibao.
 Te tų pedai kantri meba we bidi dabego
 gasa we bidi dali homu dene isawai goli,

te tobage kantrigo moni hanude bidibo we bidi
 dabego nage wi eyu, nage dologode bidaibao
⁴⁻⁵ Nage te nai meni yai bidi dabe
 duala sabo bulu tiwai nage bidai dao.
 Tama augwali seḡe ebo sogo augwali bugagia bidai dao.
 Te dwai bidi dabego homu seḡe
 te bomai waligo te be daga tigiba
 hudula palobo tiwai dao, me te sesana pai giliga
 te kemi tḡ wa pai bulude nanebo tiwai dao.
 Tiali goli, te tulubage sogo, me wali ebo sogo,
 nago augwali mesegelama, tonaluai dao.
 Te nai meni yai bage nago tonaluai dao.
 Tama bomai giligago augwali ulumainu
 sula tagalai menio.
 Genuai Bidi, nago te boi bidi dabego
 pedauwali paninama,
 tama te dwai bidi dabego i hae wabo
 tama sia sabo dao.
 Te pḡgo te sesana pai giliga dualobo tiwai ebo dao.
 Tama te bulu kedaua pabo dao.

Godigo genuai nai te bulu du Saionde sisi elama, muaibao

⁶ Te bulu du Saionde,
 Tigidali Bomo Elalubo Genuai Bidigo
 geninama nai mu sisi yaibao.
 Te wiegi wiegi yai hasa dabe me,
 tuabo wain aḡ dabe me elaluaibao.
 Tama tigidali bulu we bidi dabe
 te nai tuboba sisinagasaibao.
⁷ Megi da, te we bidi hani augwali
 homu seḡe elama bidibao,
 te augwali te isibo kolesagade
 homu dene elama, te bidibao.
 Tama augwali te seḡeḡo te ugwa tiwai

augwali mesega sai dao.
 Tiali goli, te Saion bulu dude da,
 Genuai Bidigo augwaligo homu seḡe me
 hobede ebo dabe sese sia saḡwaibao.
⁸ Agai te isibo me silama, tama augwali
 me isibo seḡ me egobeo.
 God Genuai Bidigo augwaligo gela uḡa
 sia saḡnama, tama augwaligo gedu aḡi wa saḡwaibao.
 Te we bidigo gedu aḡi menia saibao.
 Tama agai aga we bidi tigidali tḡde
 bidibo we bidigo hale me sia saḡwaibao.
 Genuai Bidigo te seḡ yabo po polo
 wai dao. *

⁹ Te seḡ dabe pedalobo sogo,
 te we bidi dabego te e tama po waibao,
 “Mu tama dao, Genuai Bidi dago God dao.
 Dago homu agade daḡ olama, tonaluai dao.
 Tama agai da ma oda sai dao.
 Aga deli naga Genuai Bidi dao.
 Tama agai da tau sai dao.
 Tama tibaso, da wiegi yai homu
 penene genina mu inao.
 Magi baso meni. Agai da polo ma
 oda sai dao,” te po waibao.

Genuai Bidigo bulu Moap dolaibao

¹⁰ Genuai Bidigo Saion bulu du bugagia tonaluaibao.
 Tiali goli, agai te Moap dabe mu dolaibao.
 Agai te boi bidi dabego augwali dolama, mesegelama,
 agayagasomainu yaibao.
 Te kau kibu dabego nosai augwa diba

* 25:8: 1 Ko 15:54; Ped 7:17; 21:4

agalama, ela bulubo tiwai yaibao.*

¹¹ Te Moap dabe te bidi moni tamu wẹ
tomode hagayabo ą̄ ebaso,
te wẹ saneba painu paulama,
nogo ą̄ togobo tiwai yaibao.

Te augwaligo dolidali weyu, haniani sẹ̄ mu yaibao,
te augwali dolobo side.

Tiali goli, Genuai Bidigo augwaligo
bomo dali kolesaga si aiyaba elaluaibao.

Tama mena sẹ̄ augwaligo yali
te sẹ̄ dabego augwali tau me sogobeo.

¹² Tama agai augwaligo hanu bomai
obo dabe hũgia s̄waibao.

Megi da, te obo dabe sigide ugwanu mu te elalubao.

Tiali goli, agai te obo dabe t̄ba mu tulalumainu yaibao.*

26

Juda dabego balia me deli waibao

¹ Te sogo nosali pedalobaso, te Juda t̄de bidalubo we
bidi dabego te balia po waibao.

Dago hanu mu boma pai mu dao.

God aga digi dago bomai obo bidalio.

Agai da ma polo oda sai dao,
tama tebogo agai da bugagia bagulali, te hanu me
deligo bomai obo tiwai yalio.

² Te homugo genuai sunumi dabe dayao.

Te doloba pai we bidi tomoba tula asomainao.

* 25:10: Matmena, te Moap dabego taun hanu me deli da. Tiali goli, te Hibu pogo te nogi Matmena te tiwai si page p̄de elalubao, “di tabo pesage da,” wabo. Te da, te profet bidigo te hanu te gagali po weyu, wabo ą̄ yali, te Moap dabego hanubolo. * 25:12: Ais 15:1-16:14; Jer 48:1-47; Ese 25:8-11; Amo 2:1-3; Sef 2:8-11

Tigidali sogo te bage augwali

Genuai Bidi dologode naga elalubo dao.

³ Genuai Bidi, augwali nage dologode naga bidibo dao,
tama augwaligo homu nage delide
naga daꝋ olama, elalubo dao.

Tama tibaso, nago augwali dali

homu nagame ebo kolesaga

augwali mu paꝋamainu ebo dao.

⁴ Tigidali sogo Genuai Bidi

dago bomai duala sabo pesage dao,

te moni dobo masigi tiwai dao.

Tama aga tigidali sogo tama bidada peyu, bididuaibao.

Tama tibaso, dago agade homu daꝋ mu olama,

tama aga dologode tigidali sogo bidinao.

⁵ Genuai Bidigo te we bidi genuai

nogi yali we bidigo nogi aiyaba elalubo dao.

Tama agai te bomai hanu dabe hugibo dao.

Tama augwali tɔba sese tama tulalubo dao,

te tɔ hogomude elalubo dao.

⁶ Te we bidi dabe augwaligo

te nai meni yai we bidi dabe dali dwai seꝋ mu yali.

Tama te bagenu augwali nai dabe mu menia pali.

Tiali goli, megi da, te nai meni yai

bidi dabe augwali te dolama,

tagalali hanu pobele bage daide agaga bilibao.

⁷ Te sunumi te doloba pai we bidi dabe

bilalubo sunumi da dolo naga te elalubao.

Genuai Bidi, nage doloba pai God dao.

Tama nago augwali bilibo sunumi dodolobo dao.

⁸ Awe, Genuai Bidi, da nago bomai po

wali peyu, bilibo dao.

Tama dago nage deli naga tonaluyu, tonalubo dao.

Dago nago genuai nogi godolo mu ebo dao.

⁹ Te hulide eno homu nage delide naga elalubo dao.
 Tama kigamude ena nage dali bidibo
 godolo mu ebo. Magi baso meni.
 Nago te t̄ode we bidi po t̄u ela mabo dao,
 te augwali nago doloba pai kolesaga
 ola mawainogo.

¹⁰ Tiali goli, nago dwai we bidi hobede igi sogo da,
 teda augwaligo te nago doloba pai
 kolesaga konea sigi menio.
 Augwali doloba pai we bidigo
 te t̄ode bidibo me tagala,
 augwaligo te dwai kolesaga me ebo s̄ yaibao.

Tama augwaligo nago
 genuai nogi koneyu, me augwaligo
 nago bomo me koneyu, me augwali
 nage dologode me elalugi menio.

¹¹ O Genuai Bidi, nago nogo polo balalubao,
 te dwai we bidi dene mawainogo.

Tiali goli, augwaligo subeo.
 Genuai Bidi, te nago naga we bidi godolo mu elama,
 tau sabo kolesaga te augwaligo sumainao.
 Tama te dwai bidi dabe augwali hale dwai mu yaibao.
 Tama nago naga boi bidi dabe ulabo isi,
 te isigo augwali mu ula silaganio. *

¹² Genuai Bidi, nago da tomode
 wiegi yai homu nagamea pai ebo
 sogo pedalomainu ilibo dao.
 Nago dago tigidali s̄ dabe dodolama,
 tama wiegi yai pedalumainu ilibo dao.

¹³ O Genuai Bidi, dago God,
 te gasa genuai bidi dabego da tonalubadi goli,

* 26:11: Hib 10:27

dago nage deliba naga genuai nogi mabo dao.

¹⁴ Megi da, te genuai bidi dabe polo isila palio.

Augwali me bidibeo,

tama augwali ma hodalobo usu me egobeo.

Nago augwaligo bomo aiyaba elaluama,

tama nago augwali dolama,

tama nago augwali mu dolai dao.

Tama te we bidi dabego

augwaligo nogi me kone ebeo.

¹⁵ Genuai Bidi, nago dago hani genina mu ilalio.

Awe, nago we bidi hani moni hani mu pedelalio.

Tama dago bulu genuai mu pedalumainu eyu,

nago dago tɔ daj ibanu mu kidilalio.

Tama te tialigo naga genuai nogi

genuai mu pedalumainogo yalio.

Awe, dago bulu genuai mu pedalomainu ilalio.

¹⁶ Genuai Bidi, nago naga we bidi

dodolomainogo eyu, dene mu mani,

tama augwaligo bomo mu sia salio.

Tiali goli, augwali moni homu dene dali

nage pageba aselama,

nageba gedu haluasa po walio.

¹⁷⁻¹⁸ Te nago gedude da

te wego wai ame nainu dene ebo

tiwai elama, bidai dao.

Da te genuai dene dali, seḡḡ dali tolama,

dago homugo tiali,

dago wiegi yai nai dago me sugowe homu yali.

Tiali goli, te menio.

Dago magi nai me haninibeo.

Dago te boi bidi dabe aiyaba elalubo

bomo mu meni sai dao.

Tama dago tɔde bugagia bidabo meni yai dao.

19 Tiali goli, naga te hani polo isila pali,
 tama augwali megì hulìa sai madi bidìbao.
 Te augwali ma hodaloama, te ula ma sueibao.
 Nago te isai bidi dabe bidìbo ula ma mabo dao,
 te hulide tulubage segeni elama,
 te t̄wa pai madi te gesi noma
 nosai hogonu ma holomainu ebo tiwai ebo dao.
 Dage te ḡp̄ pagede pila mubo bage, dage hodaloama,
 dage wiegi yai homu elama, po hae waiào.

*Genuai Bidi aga we bidibolo dene menama, tama augwali
 bugagia ma bidimainu ilali*

20 Eno we bidi dabe, dage duga be
 tomoba dabe pelama,
 duga be sunumi dabe palia siào.
 Dage p̄w̄dage sogo dualaluama,
 tama Genuai Bidigo s̄b̄ s̄libo side tagalao.
 21 Suao, Genuai Bidi aga bulu dagalu
 tagalama, e t̄ba te asobao,
 te e t̄de we bidi dene mawainu,
 tama augwa yali dwai s̄ wei ponainu.
 Tama t̄go te bidi dabego kaneme me geme dualogobeo,
 te gasa bidi dabego augwali
 ela wialali dabe. Menio.
 Agai te bidi dabego yali dwai kolesaga
 dabe sese tama haninaibao.

27

1 Te sogo te Genuai Bidigo agai genuai bomo olamayū, te Leviatan, te tamu w̄de bulu hw̄ bidigula mane elaiobao. Genuai Bidi agai aga poa pai genuaiboma pai ge hw̄ selama, tama te bulu hw̄ bidi gula, tegagela bilibo

gula mane toga s̄awaibao. ²⁻³ Tama te sogo Genuai Bidigo
balia po me e tama waibao, *

“Te wiegi yai wain gi balia po wao. Ena Genuai Bidi,
eno te gi bugagia tonalubo dao.

Tama tigidalı sogo eno aga w̄ mabo dao.

Eno aga te giligade me hulide bugagia tonalubo dao.

Tiyu, te bidi dabego dolagasidalı weyu.

⁴ Megi da, eno te wain gi hagede wado po me wabeo.

Ma, eno te gide te sesane yai nosai

me gasa dwai nosai dabe tede holobaso da,

teda eno augwali doliyu yaibao.

Teda eno isi tulama, augwali sese ula silaibao.

⁵ Tiali goli, te boi bidi dabe

augwaligo homugo augwali enaba

aselama, augwali eno tonalumainu

homu eyu da, teda augwaligo

ena dali bugagia bidainu po deli

d̄aḡ olama, asomainao.

Awe, augwaligo te boi pimainao

homu eyu, po deli d̄aḡ olama,

ena dali bidagasomainao,” wali.

⁶ Te me sogo nosali, te Israel dabe

te Jekopgo w̄aḡ auwa bidi dabe,

augwali te ni wain pedali t̄oba pelama,

dudili hauwa walama,

du hauwa walama, dili elama,

dolalubo tiwai yaibao.

Tama augwaligo nologode da,

Genuai Bidigo augwalibolo wiegi yai sogo me t̄ode

we bidibolo mawaibao.

*

27:2-3: Jop 41:1; Tib 74:14; 104:26

- 7 Genuai Bidigo te Israel dabebolo
 dene me mawai menio,
 te agai augwaligo boi bidi dabebolo
 mabo dene tiwai me mabeo.
 Tama me agai te gasa hani we bidi
 elama, isilali tiwai aga we bidi
 hauwa me elama, isilibeo. Menio.
- 8 Genuai Bidigo aga we bidi agai
 augwali kalabusiba tagala palali sogo,
 augwali dene mawai dao.
 Agai te bomai wali te giliga asobo badu
 asiyu, te haniani nai dabe
 selasa pabo tiwai yali gilama,
 agai aga we bidi aga bomai waligo
 augwali sela sayagasai dao.
- 9 Tiali goli, tebogo agai te Israel dabe
 augwa digi yali te sege mu tama sia sawainu da.
 Teda augwaligo te tibo godigo alta dabe
 sese toga sayao.
 Tama te alta masigi dabe te olo hogomu gagalao.
 Tama me, augwaligo te tibo god
 we Asera piksa elalubo ni pos
 gelama tagaliyu, me augwali
 te dwagi yai hano denami ebo pauda
 ulubo alta doliyu emainao.
- 10 Te hanu da, polobadu bomai obo elaluai dao.
 Tama meggi da, sese mu tama dolama, elalubao.
 Meggi da, olo kala sili bulu te we bidi
 te bulude me bidisawai bulu aq ebao.
 Te bulude we bidi me bidibeo.
 Tama te kau kibu dabe naga te buluba sisinagaselama,
 tama me te dwasianu ni yabe dabe
 tuyu, tede bidibao.
 Tama augwali tede toma tuyu bidibao.

¹¹ Tama te ni nologo dabe sasia
 pabo si da, te ni nologo dabe
 mobia pelama, t̄ba tulalubo si da,
 te we dabe sibigo isi nogainu gigila sagasobo dao.
 Te tobage dwai sogo pedalali. Magi baso meni.
 Te hanu we bidi augwali bidi po sela s̄bo we bidi mu.
 Tama tibaso, God, te aga te God augwali
 deli we bidi hani pedalomainu
 ilai goli, agai augwali godolo elama,
 augwali me hobede me yai menio.

¹² Tama te sogo Genuai Bidigo aga we bidi gasabulude
 dabe bidibo we bidi ma oda saibao. Te weYufretisdu
 gagalama, te Isip buluba usu nigi paibao. Agai augwali deli
 deli saibao, te bidigo aga wit dili dali bo dalisela sanama,
 te du naga elalubo tiwai yaibao. Tama tewiegi yai wit du
 selama, te t̄go nigai senede mubo tiwaiyaibao. ¹³ Tama
 te sogo te bu wabo nai biugel bu genuaimu waibao. Teda
 te Israel dabe i weyu, te boi bidi dabegoaugwali te bulu
 Asiriaba sela sayu, me te bulu Isipba selasayu yali bage
 dabe. Tama augwali Jerusalem buluba maaselama, tama
 augwaligo Godiba ma lotu po waibao, teaga tedali gasagi
 yai bulu dude.

Genuai Bidigo te Jerusalem we bidi augwaligo kolesaga dodolaibao wali

28

(*Dqj 28-35*)

Genuai Bidigo te sawi yai taun Samaria dolaibao

¹ Hobede mu dao, te Israel bagego sawi yai
 taun nage. *

* 28:1: Te vesde, Aisaigo te taun Samaria po olama wali, te kantri Israelgo genuai hanu taun te not badu elalualio.

Nage mu dolaibao.

Te naga genuai bidi dabego wain wẹ hauwa mu tulama,
poliyu, tama nago nogi ugwaba mu sabo dao.

Augwaligo te po wabo dao,

nage te bomai hanu mu dao, po wabo dao.

Nage te nai bula tuabo tọ wiegi yai

bulu dude te bidibao.

Tama nage te naga genuai bidi dabego

tobolude mubo plaua kula wai bono

elalubo ąq te elalubao.

Tiali goli, nage pąde tama te plaua bono sasia pelama,

dolobo tiwai nage dolaibao.

² Mu tamao. Genuai Bidigo te bomai

hani me deli polo nage elalumainu sa muanio.

Te hani te bomai wali tiwai asaibao,

tama me te tulubage te talua ge

tulubage tulubo tiwai yaibao,

tama augwaligo nage togolama, tọba tula palaibao.

³ Tama te hanigo nage agalama,

nage daidu augwali bilaibao,

nage te genuai bidi dabe poliyu,

nago nogi ugwaba sabo hanu dao.

⁴ Nage te nai wai bulabo tọde

te dwasianu bulu du elalubo madi nage te bidibao.

Tama nage sawi yai plaua bono tiwai elalubo ąq te ebao.

Tiali goli, nage te plaua bono mobia

pelama, dobo tiwai yaibao.

Tama nage deli sogo tama silaibao,

te ni fik du me deli hasia tau ebo

tiwai, tama bidi me deligo sulama,

polo sela tubo tiwai yaibao.

⁵ Te sogo te Godigo we bidi hani

dwasianu naga bidiyu da,

teda augwaligo Tigidali Bomo Elalubo Genuai
 Bidiba wiegi yai homu yaibao.
 Genuai Bidi aga digi aga wiegi yai
 tuni bidigo madi tobolude bulai,
 me te wiegi yai plaua bono
 augwaligo tobolude mubo tiwai bidaibao.

⁶ Genuai Bidigo te po tu odobo
 bidi dabebolo wiegi yai kolesaga
 menama, tama augwaligo
 po tu bugagia osola sueibao.
 Tama agai te hanude ami bidi dabe bomo mawaibao.
 Tama augwaligo te boi bidi dabe
 te hanu tomoba we bidi dabe dali
 hwjagasomainu sula tagalogbeo.

Te pris dabe dali, profet dabe dali sigo Aisaia posobo po wali

⁷ Te profet dabe, me pris dabe,
 augwaligo te wain we me bia we hauwa tulama,
 polobo homu yabo homu elama, dodolama,
 wa bilabo homu eyu, dodola bilabo homu ebo dao.
 Augwaligo homu kolesaga menia pabo dao.
 Tama augwaligo augwa se bugagia ebo menio.
 Tama me, te pris bidi dabe augwaligo
 te we bidi dabego sege bugagia dodolobo menio.

⁸ Augwa bogu te augwa bugulama,
 we tubo tebol saide pesage holobo dao.
 Tama dwasianu wiegi yai me elalubo menio.

⁹ Te augwaligo eno po odobo si da,
 augwaligo e tama po wabo dao,
 “Te bidigo homugo de mu agai skul
 ola mawainu homu eyu ebowe?
 Agai pogo de mu ola mawainu ebowe?
 Da dwasianu wai boju dabe meni.

Tamadi tama, da ame tubo tagalama bidibe.

¹⁰ Tigidali sogo agai dedeli po naga wabo,
te bidigo wai boꝝ dabe te leta dabe
dolo nogi eyu emainu,
me po dage deli me hani deli deli dolo nogimainu
ola mabo aꝝ ebo,”
augwaligo te tobage po enade wabo dao.

¹¹ Te we bidi dabe augwaligo
eno po odobo hagela mu ebo.

Tama tibaso, Genuai Bidigo augwalibolo
te gasa po wabo bagego
pedauwalidu augwali po ola momainu,
te gasa bidi dabebolo te agai po ola mawaibao.

¹² Aga digi aga we bidi te tꝝ badu
tagalai dao. *

Tama agai augwalibolo te po wai dao,
“Te bulude dage toma tuyu, bugagia dua bidiagianio.

Tama te bidi dabe, augwaligo tigi
boma pelama, augwaligo tigi hagela
pobaso da, augwali hodo doliyu,
te bulude dua bidagameo,” wai dao.

Tiali goli, augwaligo agai po odobo hagela mu yali.

¹³ Tama tibaso, Genuai Bidi aga digi
augwali deli deli leta dabe dolo
nogi ebo, me deli deli po nogi ebo, me deli deli lain
nogi ebo me,

te tiwai Genuai Bidi aga digi augwali ola mawaibao.

Te dwasianu wai dabe ola mabo tiwai aga digi yaibao.

Tama augwali homu kone tua pelama, dene mu saibao.

Tama te boi bidi dabego augwali nogo bono dunama,
augwali kalabus elama, odasa paibao.

* 28:12: 1 Ko 14:21

Godigo te dwagi yai boma pai masigi te bulu Saionde muaibao

¹⁴ Dage e Jerusalemde we bidi tonalubo we bidi,
dagego Genuai Bidigo po odiāo.

Dagego homugo Genuai Bidigo po
olo nai dao homu ebo.

¹⁵ Tama dagego e tama po wabo dao,
“Dago te isibo kolesaga dali dago polo po dāu ola selama,
tama dago te gū page dali dago
po polo dāu ola sai dao.

Tama tibaso, augwali sigo da me dologobeo.
Te dwai sē da dolo pedalubadi me tagala,
teda da geda muaibao.

Magi baso meni. Dago te ili po olama,
te hasegelu hasegelu ebogo
da tau siyu, tama da bugagia bidaibao,”
dagego te po wabo dao.

¹⁶ Tiali goli, God, Genuai Bidigo te po wali,
“Odao. Eno te be page dāu walabo
masigi dila pai deli me polo dāu ilai dao.
Te aga te dwagi yai boma pai mu dao.

Tama eno te masigi te bulu du Saionde muaibao. †
Te bidi dabego agaba homu dāu wabo bidi dabe da,
teda augwali wi elama, didibili me egobeo.*

¹⁷ Te ena te doloba pai skel
te dagego kolesaga skel ebo te skel tiwai bidaibao.
Tama te doloba pai kolesaga naga
te eno usu ni tiwai elaluyu,
tama tego eno dage usu saibao.

† 28:16: Bidi mebageo homu te e nosali wabo po te tiwai po wabo da, “Tama te masigi nogi te tiwai wali, “Te konealubo po mu dāu wabo bidi dabe da, augwali da te wi elama, midigi me egobeo,” te po wai dao. * 28:16: Tib 118:22-23; Rom 9:33; 10:11; 1 Pi 2:6

Dagego homugo te tibao, te dagego dwai kolesaga ebo
te kolesagago dage tau saibao homu te ebao.

Tiali goli, eno te dwai sogo dageba
pedalomainu yaibao.

Tama dage te bidi dabe te genuai
talua ge tulubage asiyu,
ela silibo te tiwai yaibao.

Tama dage pelama, duala sigi pabo
pesage mu menia saibao.

¹⁸ Tama eno dagego te isibo kolesaga dali,
me te isibo bidi dabego bulu dali,
dagego daꝝ olama yali po eno
tomode togolama, mu silaibao.

Tama te dwai kolesaga mu dagede
pedalama, tama dage mu isila paibao.

¹⁹ Te dwai kolesaga dabego dage
munu me taga pogobeo. Menio.

Te augwali geninama mu dageba tigidali sogo hulide
me ulade dageba me pedalidu geaibao,” wali.

Ma, dagego Godigo te wiegi yai po page
dagego bugagia mu koneyu da,
dage noma selama, wi mu yaibao.

²⁰ Dage te dwai dene mu saibao.

Te bidi pibode te dene dene hauwa ebo
tiwai dagego tigde yaibao. Magi baso meni.

Te pibo sai te pɛwɔdage mu elama,
agai saꝝa olo pobialuali.

Me, te banua pibo blanket te dwasianu mu elama,
agai banua pibo usu isaꝝbaso,
o agai tigi sese usu isaꝝbaso.

²¹ Genuai Bidi aga bomo dali
hogodasa asaibao, te agai polobadu
te bulu du Perasimde,

me te Gibeongo odogo malu bulude
 yali tiwai yaibao.
 Tama agai yainu yali sę agai yaibao.
 Tiali goli, dagego te sę ebo sulama,
 tama dagego te gasagi yai mu da, te homu yaibao.*
 22 Tama tiali, dagego te Genuai Bidigo
 po dolobo kolesaga tagaliąo.
 Ma, meniyu da, dagego sęę dabe
 genuai mu pedalaibao. Magi baso meni.
 Eno odali, God Tigidali Bomo Elalubo Bidigo te bomai
 po tama wabo suali.
 Agai e bulu tigidali pesage mu dola silaibao.

Bidi dabego wiegi yai kolesaga dabe Godigo naga manio
 23 Dagego olo saganama, eno po bugagia odiąo.
 24 Te bidi mego te nai wai bulainu agai
 te tų elebo sę naga ebo yali bogo,
 25 tama agai te nai wai dabe bulubo meniwe?
 Meni ma.
 Agai tų elama, silibo si, agai te ono ge tede bulubo dao.
 Agai te dola pai lainde agai te nai wit wai dabe bulama,
 tama me du dage badu agai
 te nai bali wai tede bulubo dao.
 Tama agai gasagi yai wit me agai te gi
 homu badu me bubula bilibo dao.
 26 Godigo digi aga te nai wai bulama,
 sela tubo kolesaga ola mani dao.
 27 Te ono ge dabe dwasianu sabo usu yai de da,
 te bidigo agai te ni name selama,
 tama te nai ono agabo menio.
 Tama agai te wit ge dabe sainu,
 te wilkar dabe me te nai wit ge sainu,

* 28:21: Jos 10:10-12; 2 Sml 5:20; 1 Sto 14:11

ugwadu kegebo yaligila ebo menio. Mu meni.
 Agai te dwasianu wabi dage dabe naga selama,
 tama te ono dabe elebo dao,
 te augwaligo dwasianu ge dabe sainu.

²⁸ Agai te nai wit ge dabe sabo
 kolesaga agai mu koneani, te agai te nai dwasianu
 ge dabego bret nigabo.

Te agai te hos dali, me te wilkar si agai
 te nai wit aga dilide sela sawainu da,
 teda agai te hos kibu dali,
 te wilkar sigo te wit dolama,
 mia saidali weyu agai bugagia tonalubo dao.

²⁹ Te tigidali se ebo kolesaga Godidu naga asalio.
 Tigidali Bomo Elalubo Genuai Bidi
 agaduba deli naga tigidali haniani wiegi yai
 kolesaga dali, homu kolesaga mu pagana pai dao.

29

*Genuai Bidi Jerusalemba wali dali, me to mali, me isi dali
 asaibao*

¹ Genuai Bidigo e tama po wali.

“Jerusalem, megida, nage eno
 alta tiwai bidibao.

Tiali goli, nage dolaibao.

Nage te genuai hanu polobadu tuni bidi
 Devit bidali madi, nage dolaibao.

Kibu be deli o si bolo pomainu yao,
 te tigidali lotu po wabo genuai sogo me.

² Tiali goli, ena Genuai Bidi,
 eno te sege nageba sela asaibao.

Nage eno alta tiwai bidali.

Tiali goli, nage gela olama, hwa dwai mu waibao.

Tama kaneme nagede pagana paibao,

te bidi dabego te alta saide te hasa dabe elama,
te kaneme alta saide paḡaḡbo tiwai yaibao. *

³ Eno boi bidi dabe odasa aselama,
nage bagua sagasomainu yaibao.

Tama augwaligo pu diganama, nago obo paḡe munama,
te tḡ unana pelama, te paḡaḡwai,
te daide doligiluama,
tama augwali nage dali hwḡabo yali gilama.

⁴ Tama nage mu tama tulaluama,
tama tḡogo nage mu mesega saibao.

Tama nago po dabe te isi bidigo po
te tḡ dologode dua dua wabo tiwai tḡdu pedalaibao.

⁵ Tiali goli, te gasa bidi dabe nageba
hwḡagasobo bage da, augwali te tḡ hogomu tiwai
hauwa mu yaibao.

Tama augwali sese polo tama gasaba
paibao, te bidigo te wit haluama,
agai nai sainu ebode te yabe dabe hauwa
bola bilibo tiwai yaibao,” wali.

Tiali goli, deli sogo tama,

⁶ Tigidali Bomo Elalubo Genuai Bidi te bomai wali dali,
tḡ mali dali asaibao.

Tama te be kulu weyu, te genuai
kulukulu dwai mu waibao.

Tama agai te tigidali nai dabe ulabo isi
dwai dali sesaibao.

⁷ Tama te gasa genuai bulu dabe
te Jerusalemba hwḡagasainu asali da,

* 29:2: Te ves 1 me 2de, HIBRU pogo te Jerusalem nogi Ariel wai. Te kolesaga konea pai bidi dabego te nogi page bugagiakonesiḡwai. Me badugo te tiwai homu ebao, “Godigo Laion da,” wali. Te me badugo homu te tiwai ebao, “Godigo buludu da” wai. Tiali goli, me badu hauwago te homu yali, “Godigo alta da,” wali, tama te ves side wali pogo te e wabo homukolesaga wali paiba homu ebao.

te Godigo altaba, teda augwali munu me bidigobeo.
 Tama augwaligo te hanu sainu yali sę
 olo dali hagawaibao.
 Te sę dabe sese sia saibao,
 te Jerusalengo nade suali tiwai yaibao.
⁸ Tama te tigidali bulu ami bidi dabe,
 te bulu du Saionba hwjagasali bidi dabe,
 augwaligo magi nai me sogobeo. Mu menio.
 Te bidi pila muyu, nade nasi ebaso,
 nai tubo tiwai yaibao.
 Tama ma hodalobode da, nasi me elaluaibao.
 Te nai tabi egobeo. Te tiwai yaibao.
 Tama me bidi agai wę nogonego mu isai,
 tama nade te wę ma tuali,
 tiali goli, aga ma hodalobode te wę
 nogone me elaluaibao.
 Te tibo tiwai yaibao.

Godigo we bidi wabo polomainu homu begelali

⁹ Te Juda we bidi, me Jerusalem
 we bidi, dage te gedu hwidai we bidi yali gilama,
 me tama subigila paliyu, me tama bidiagameo.
 Dage te bidi dabego wain wę tuyu, me bia wę tulama,
 subigila bilibo tiwai me tama bidiagameo.
 Tiali goli, dage te wain me bia tulama, polobeo. Menio.
¹⁰ Genuai Bidigo dagego gedu sęęę ilali.
 Tama dage te bidi godege mu pilama, isai tiwai bidali.
 Tama Genuai Bidigo te profet bidi dabego
 augwaligo suabo nai dabe goli
 augwaligo susiainu yaibao. *

* 29:10: Rom 11:8

¹¹ Tama tibaso, Jerusalem, nago te Genuai Bidigonage ola mawainu ebo sę dabe page nago munu mekongobeo. Te da, te buku augwaligo bomonama haluaibuku nage nedao olama, mawai buku tiwai dao. Tamanagerobolo nedao po wali. Ma, nago te buku te nedebobidibolo menama, te bukude elalubo po nedao obaso da, teda agai te po waibao, “Eno usu ebeo. Buku me ɗaɗolalubo.”

¹² Tama ma, nago te buku nedisiɗawai bidibolo nago te bukude elalubo po dabe nedao obaso da, teda agai te po waibao, “Eno te buku nedebo konebeo.”

¹³ Genuai Bidigo te po wali,
 “Te we bidi hani dabe augwaligo
 eno nogi augwaligo pedauwalidu
 naga ugwaba sabo dao.

Tiali goli, augwaligo homu dali,
 homu kolesaga si enade digibulu mu elalubao.
 Augwaligo enaba mu lotu po wabo menio.
 Augwaligo te bidigo digi muai bomai po,
 te po naga augwali ola mani po,
 augwaligo te po naga wali pabo dao.*

¹⁴ Tama tibaso, eno gasa sę dabe mu
 te we bidiba pedalumainu yaibao.
 Tama augwali mu noma mu saibao.
 Eno te bidi dabego augwalibolo
 wiegi yai kolesaga mabo bidi dabego
 homu kolesaga sela sɗawaibao.

Tama eno augwaligo kolesaga sai
 bagego kolesaga eno mu silaibao,” wali. *

Genuai Bidigo tigidali haniani nai dabe hasegelaibao

¹⁵ Te we bidi dabego augwa

* 29:13: Mat 15:8-9; Mak 7:6-7 * 29:14: 1 Ko 1:19

dwai kolesaga dabe Genuai Bidigo
 gedude dualainu usu sabo dao.
 Te augwali da, mu dolaibao.
 Augwaligo te kolesaga dabe augwaligo sesawai madi,
 me hulua sai pesagede augwaligo
 te kolesaga dabe ebo dao.
 Tama augwaligo te po wabo dao,
 “Dego mu da sulama, dego mu koneaibawe?”
¹⁶ Augwaligo te tigidali nai dabe hasegelama,
 tigidali nai dabe dolobo dao.
 Te augwaligo wali po tiwai tama,
 “Te tō sene nigibo bidi te sene nigibo tō tiwai dao.”
 Mena tama tialiwe?
 Te olo nai mego te aga nigali bidibolo
 te tama po waibawe,
 “Nago ena nigai menia?”
 Ma, te tō senego te aga nigali bidibolo
 te tama po waibawe,
 “Nago mage nai me konebeo,” te po waibawe? *
¹⁷ Te pęwådage sogo tigidali nai dabe hasegelaibao.
 Te Lebanonde moni busi te gi yabo tō
 wiegi yai pedalaibao.
 Tama wiegi yai gi dabe te moni busi mu gagawaibao.
¹⁸ Tama te sogo da, te olo degai dabego
 te bidigo te bukude nedebo po augwaligo odaibao.
 Tama te gedu hwidai dabe megwi augwali
 moni hulua sai madi bidibo,
 te bidi dabe augwaligo ma gedu peda paibao, tama
 nai dabe ma suaibao.
¹⁹ Tama te we bidi augwa digi augwa
 aiyaba elalubo we bidi dabe
 augwali te Genuai Bidiba wiegi yai homu yaibao.

 *

29:16: Ais 45:9

Tama te nai habuge yai we bidi dabe
 augwali me te Israel Dabego
 te Dwagi Yai Doloba Pai Kolesaga Naga Ebo Godiba
 wiegi yai homu yaibao.

²⁰ Tiali goli, te gasa bidi dali
 homu dene isãbo dwai bidi dabe,
 me te Godigo po olo nai dao homu ebo bidi dabe,
 me te dwai kolesaga hauwa yabo homu ebo
 bidi dabe, augwali sese dolama, hagala silaibao.

²¹ Tama te deli tobage dene me te ili po olama,
 gasa bidi dabe po tų̄ ela mabo
 bidi dabe me, dene saibao.

Te gasa bidi dabe olo dali po tų̄ ela mabo
 bidi dabe tiaibao.

Te dwai sẽgẽ elalubo bidi dabe tau sela menama,
 te sẽgẽ meni yai bidi dabego po dolobo bidi dabe,
 te dedeli dene naga saibao.

Te augwaligo po tų̄ dolama,
 tama doloba pai bidi dabego te po tų̄ dolama,
 tama doloba pai bidi dabego
 te po tų̄ ugwa ela hologobeo.

²² Tama tibaso, te Genuai Bidi te polobadu Abraham te
 dwai sogo ma oda sali, te Godigo te tama po walio, te Israel
 we bidi dagebolo,

“Dage Jekopgo we bidi w̃j̃ hani, dage hale me elama,
 tama dage gesabidi huli me egobeo.

²³ Te dagego eno sẽ dabe dagego
 tomode te sẽ ebo subo si da,
 teda dagego ena mu koneaibao.

Ena te Dwagi Yai Doloba Pai Sẽ Ebo
 God dao homu koneaibao.

Tama dagego eno nogi ugwaba selama,

tama dage wi eyu, ena dologode naga bidaibao.
²⁴ Tama te bidi dabe homu kolesaga
 megi umuna pabo bidi dabe,
 augwali te wiegi yai homu kolesaga ma saibao.
 Tama te konila po dabe hauwa olama,
 tama po sela sãbo bidi dabe,
 augwali te wiegi yai homu elama,
 eno po ola mabo odaibao,” te po wali.

30

*Genuai Bidigo te po wali, te Isip dabego te Juda dabe tau
 sabo me usugobeo*

¹ Genuai Bidigo te po wali, “Te Juda hani, te
 da augwali

eno wai boꝝ hani dabe, augwali dolaibao.
 Magi baso meni.

Augwali bidi po odisiãwai hani mu dao.
 Augwaligo eno homu kolesaga wali me pabeo. Menio.
 Augwaligo augwa homu kolesaga wali naga peyu,
 augwaligo gasa bulu bidi dabe dali abagi
 me olama, bidibao.

Tama tiyu, augwaligo dwai seꝑe hauwa
 augwa hasi tigide pesage holalio.

² Augwaligo eno homu kolesaga hanalusãma,
 tama augwaligo Isip tuni bidi dali po wali pali dao.
 Te Isip dabe dolaluama, augwali tau selama,
 tama augwali me dolidali weyu.

³ Tiali goli, augwaligo homu kolesaga
 geda munama, tama augwali geda
 mubode augwali hale mu yaibao.

Te Isip tuni bidigo augwali te dolainu
 ebo me togologobeo.

⁴ Te mu tama. Te Isip tuni bidigo aga

po sabilibo bidi dabe,
 me aga ofisa bidi dabe aselama,
 tama Juda hani deliba sisinagasali.

Te hanu Soanba, me hanu Hanesba sisinagaselama,
 tama te teba asali Juda dabe dali po wagasalio.

⁵ Tiali goli, Juda dabego augwa hobede mu yaibao.

Magi baso meni. Te Isip dabego
 magi sę me elama, augwali tau me sogobeo.

Mu menio. Augwaligo moni hale mu
 te Juda dabeba sesaibao,”

Genuai Bidigo te po wali.

⁶ Genuai Bidigo te po te bulu hasa dabe te nai meni yai
 kemi sane bulu, te saut badu bulu nogi Negeb, tebolo te
 po wali. Genuai Bidigo te tama po wali,

“Te Juda dabego genuai bidi dabe
 te olo kemi sane yai saut badu bulu badu bilali.

Te da te dwai pesage badu mu,
 te bidi dabe te genuai sęę sabo pesage mu.

Te pesagede te laion dabe, me bidi
 gąę kelebo dwai gula mane,
 me bola bilibo gula mane,
 me gasa bulu hasa dabe me, te bulu badu bidibo.

Tiali goli, te genuai bidi dabego
 te wiegi yai homua pai nai dabe
 te augwa kibu kamel daide munama,
 me donki kibu daide munama,

tama bomai sę mu elama,
 te wiegi yai nai te gasa bulu
 te augwali tau sabo usu isayabo
 buluba sela pali dao.

⁷ Te Isip dabego te gasa bulu bidi dabe
 ili ili po olama, tau saibao po wabo dao.

Tiali goli, agai te sę ebo menio.
 Tama tibaso, te Isip te gesi nogi te nogi ebao,
 ‘Te Olo Dulalubo Gula Mane dao,’ wabo,” te po wai.

Te we bidigo Godigo po odobo hagela yali

⁸ Genuai Bidigo enabolo te we bidigo
 ebo kolesaga po te bukude aseao wali, me te po me
 te masigi togalama, aseao wali.

Te da te po te tigidali sogo mu elaluama,
 tama te we bidigo sulama,
 tama augwali te po sela sębo we bidi yabo omainu.

⁹ Magi baso meni. Augwali te bidi po
 mu sela sębo we bidi mu dao.

Tigidali sogo augwaligo Genuai Bidigo
 po sela sębo dao, te augwa Aya.

Te tigidali sogo augwaligo ili po olama,
 tama augwaligo agai po oda mabo
 po odobo hagela ebo dao.

¹⁰ Tama augwaligo Genuai Bidigo po
 ola mabo profet bidi dabe dali e tama po wabo dao,
 “Dage pedauwali pania sięo.

Dagego dabolo wiegi yai
 doloba pai kolesaga wali pomainu da ola magimio.

Te dago odainu ebo po naga pusa mao.

Teda te dwai nai dabe munu me pedalogobeo.

¹¹ Dage digibulu mu bidiyu,
 tama dago sunumi paligimio.

Dago te Israel dabego Godigo po odobo da hagela ebao.

Agate Wiegi Yai Doloba Pai Kolesaga
 Naga Ebo God dao,” wali.

¹² Tama tibaso, Israel dabego God
 te Wiegi Yai Doloba Pai Kolesaga Naga Ebo God,

agai e tama po wali,
 “Dagego eno dua dao wali po
 sela sanama, tudi ola manio.

Tama dagego te ili po olama,
 te dolobo kolesaga dage tau saiba homu ebo
 te mu dagego daꝝ walio.

¹³ Tama tibaso, dagego dwai kolesaga polo yalio.
 Tama te dwai kolesagago dage mu tama dolaibao.
 Te da te dwasianu dedage te obo ugwadu
 tobolude elaluamo,
 te genuai elasa pabo tiwai dao.

Tama deli sogo tama,
 te obo togwa pelama, degasa pali.

¹⁴ Mu tama, dage te tꝝ sene te alua pelama,
 tama olo genuai me elalusiama ebo tiwai yaibao.
 Te isi dage tomode muabo, o te weꝝ
 te tuabo tiwai genuai olo me elalugobeo,” wali.

¹⁵ God, Israel dabego Genuai Bidi, aga
 te Wiegí Yai Boma Pai Kolesaga Naga Ebo God dao.
 Agai e tama po wali,

“Dage bugagia bidabo sunumi da, e tama dao.
 Dage enaba ma aselama,
 tama dage bugagia homu nagame elama, bidião.

Tama dagego ena deli naga wali asião.

Tama eno deli naga dage tau saibao.

Tama eno dage ma aselama,
 tama dage bugagia tigidali sogo
 bomo elama, bidaibao.”

Godigo te tama po wali.

Tiali goli, dagego agai te po wali pabo hagela mu yali.

¹⁶ Tama dagego te po wali, “Tagalama,
 dago bomonama udabo kibu hos bidibao.

Tama da te kibu hosde dualama,
 tama da wi paibao," wali.
 Te dagego te boi bidi dabede wi paibao
 wabo po da, teda mu tama dao.
 Tiali goli, tagala, dagego kibu hos
 bomonama udabo da, tagalao.
 Te boi bidi dabego hos kibu bomonama
 mu dagego kibu hos nosali wali pobeasa asaibao.
¹⁷ Te dagego 1,000 ami bidi dabe
 augwali boi bidi me deli aselama,
 hwjaibao po wagasobo si da,
 teda augwali wi mu elama, augwali wi paibao.
 Tama ma, te boi bidi dabego ami bidi
 a naga aselama, hwjaibao hae
 wagasobo si da, teda dage hani tigidali wi ogodama,
 wi peyu, te hanu taga paibao.
 Tama te bidi me deli me bidigobeo.
 Tama te hanu te bidi dabego bulu dude
 plak ugwa walobo ni te bulu dude
 tula ma elalubo tiwai yali gilama
 tama agaduba elaluaibao.
¹⁸ Tiali goli, Genuai Bidi da,
 tigidali sogo doloba pai kolesaga naga ebo God dao.
 Tama tibaso, agai dage homu dene elama,
 agai hobede ebo dage ola mawainu te tonalubao.
 Te we bidi dabego Genuai Bidiba
 homu kolesaga daꝝ olama,
 tama agai augwali tau somainao olama,
 tonaluali we bidi dabe da,
 augwali wiegi yai homu pemene mu yaibao.

God aga we bidi dali wiegi yai se mu yaibao

¹⁹ Te Jerusalemde megì bidalubo we bidi, tega, dage
 hobede elama, gela me wagobeo. Megì te Genuai Bidigo

dage hobede elama, dage tau sabo deli naga no mu-nalubao. Te dagego aga i olama, gedu haluasa po wabo si da, polo tama agai dagego i wabo odama, dage olo mu tau saibao. ²⁰ Te mu tama, Genuai Bidigo dage moni sege somainogo yaibao. Tama dage te bidi nai me we meniana, habuge yai bidi tiwai bidaibao. Tiali goli, aga digi dage dali bidama, tama dage bugagia elama waibao. Tama dagego aga munu me gegogobeo. Menio. Dagego aga duga gedugo ma sueibao. ²¹ Tama dage peyu, te mena sunumide geda muainu ebaso da, te dolo nogo badu sunumi badu, o pobase nogo badu sunumi badu me, teda agai dage tudi badu bidama, tama mena sunumidu painu yali, agai dage ola mawaibao. ²² Tama da, dagego duga tibo godigo piksa dabe saibao. Te da te bidi dabego nigilama, silva dali, gol dali sigo haluai piksa. Tama dagego te piksa dabe te dwai damua pai nai tonobo tiwai tonama, e tama po waibao, "Gedao. Dago nage subo hagela ebo."

²³ Tama Godigo tulubage te dagego bulali nai wai dabeba mawaibao. Tama te wego dagego nai wai dabe bugagia mu holaibao. Tama dagego nai dabe hauwa mu elaluaibao. Tama te sogo dagego kau kibu dabego tuabo nosai dabe hauwa me elaluaibao. ²⁴ Tama me, dage duga gide nai selama, tama duga gi to elebo kau kibu dabe, me donki kibu dabe bugagia mawaibao. ²⁵ Te Genuai Bidigo te dwai sogo te dagego boi bidi dabeba pedalomainu ebode, teda augwali subigila isila paibao. Tama augwaligo bomai obo dabe sese dola silaibao. Tama te sogo te we dabe bulu dudu dabe asiyu, tama dage we me habuge me egobeo. ²⁶ Te sogo te polua te giliga tiwai bomo elama, mu nanaibao. Tama te sogo te giligago ula te bomo yai mu nanama, tama megii tama ula ebo edelama, mu nanaibao, te tigidali sogo ula ebo edelaibao. Te a naga olama, me badu nogo si sogo nanebo giliga deliba sisinama, deli

bubugade nanebo tiwai yaibao. Te seḡ dabe te Genuai Bidigo aga we bidibolo mani seḡe dabe, me dene dabe mani sela saḡbo sogo, te seḡ dabe yaibao. Tama agai augwali usu ma ilaibao.

Godigo te Asiria dabebolo dene mawaibao

²⁷ Suama. Genuai Bidi digibulu

hogodoma, aga bomo dali, ula dali te asobao.

Agai wado elama, tama moni isi dali,

hano si, te pedalobao, te agai seḡe ebo ola mayu,

te agai po wabo si da.

Te tigidali nai dabe ulubo isi agai keledu pedalobo.

²⁸ Agai mobogo tigidali nai dolobo dao,

te weḡ asiyu, tigidali nai dabe

mesegelama, bidigo dogoniba usu ni pabo tiwai dao.

Genuai Bidigo te tigidali bulu toḡ

kantri dabe agai nogogo toulama,

peḡeḡbo dao, te augwali dolomainu.

Tama agai augwaligo homu kolesaga

dolama, tama augwaligo pabo

hagela ebo buluba odasa pabo dao,

te bidigo hosgo kelede ain dage

mubo tiwai dao, te hos kibu bugagia

dolasa pomai ebo gilama.

²⁹ Tiali goli, Genuai Bidigo we bidi dagego da,

te seḡ dabe ebo subo sogo da,

teda dagego homu gana pabo balia te genuai lotu

wabo sogo wabo tiwai waibao.

Dagego te bidi dabe te Genuai Bidigo bulu duba holama,

tama wiegi yai homu eyu,

te genagego ona dabe elebo tiwai yaibao.

Genuai Bidi da, te genuai bomai masigi tiwai dao.

Tama aga te Israel dabego duala sabo pesage tiwai dao.

³⁰ Genuai Bidigo bomonama mu hae olama,
tama agai bomonama i hae wabo
aga we bidi tigidaligo odama,
augwaligo agai seḅe ebo mobo
augwaligo tigde dolomainu yaibao.
Aga te moni bomai isi te tigidali nai dabe
dabo isi, me moni genuai tulubage,
me wali, me talua ge tulubage dali,
tama aga asaibao.

Tama te be kulu obaso, te tigidali
we bidigo agai seḅe ebo sueibao.

³¹ Genuai Bidigo daḡa wabogo
te Asiria dabe wi mu ilaibao.

Tama agai aga kelo a toulama,
te Asiria dabe genina mu elaibao.

³² Tama te Genuai Bidigo
te Asiria dabe elebo sogo da,

te Genuai Bidigo we bidigo wiegi yai
homu gana pelama,
tama augwaligo haniani haḅidi me
gita dabe te Genuai Bidigo nogo toulama,
te Asiria dabe eliyu, poge wabo te wali pelama,
augwaligo te nai elaibao.

³³ Augwaligo te Asiria tuni bidi
ulabo isi tḡ dedage polo dodolama, elalubo.

Augwaligo te tḡ dedage genuai mu elama,
tama ayanu mu dulai mu nigali,
tama augwaligo isi dabe hauwa mu polo sela muani.

Tama Genuai Bidi agai mobogo pona palebo si da,
te polo tama isi bogoli dala saibao.

Magi baso meni. Genuai Bidigo mobo
te posolai isi tiwai dao.

31

*Genuai Bidi agai bomo ola mani digi, tama te bomai bulu tq
kantri dabe tulaluali*

¹ Dage te Isip buluba pelama,

tama augwaligo dage

tau somainu hanalugi pabo bage,

hobede ya, dage dene saibao.

Dage te Isip dabego hwıbo hos kibu hauwa elaluyu,

me karis dabe me hauwa, me te ami bidi dabe hosde

dualama hwıbo ami bidi dabe hauwa elalubo

sulama, tama dagego homugo Isip dabego dage

tau somaina homu ebao.

Tiali goli, dagego Israel dabego

Genuai Bidiba tonalubeo.

Aga te Wiegi Yai Doloba Pai Kolesaga

Naga Ebo God dao.

Tama dagego agai tau sao po hanalubeo

² Tiali goli, agai me wiegi yai homu kolesaga elalubao.

Tama agai dwai dene te dwai

we bidibolo me dene ilaibao.

Tigidali sogo Genuai Bidigo aga wali po

wali naga pabo dao, hasegelegobeo.

Agai te dwai bidi dabe dali,

me te bidi dabe te dwai kolesaga

ebo bidi dabe wali bilibo dabe dali, hwıaibao.

³ Tiali goli, te Isip dabe, augwali te god menio.

Augwali te olo bidi dabe dao.

Me augwaligo hos dabe me te hos mu naga dao,

te tigi mi dali, dili dali elalubao.

Tama te Genuai Bidi agai bomo ola mabo si da,

teda te bomai bulu tulaluaibao,

tama me te agai tau sali da,

te bulu dabe me tulaluaibao.

Tama si dali si tama, mu tama dolaibao.

⁴ Genuai Bidigo enabolo e tama po wali,

“Te bulu yowi laiongo sipsip kibu me
elama, tudubadi da, teda aga wi elama,
tama te sipsip taga peyu, wi me pogobeo.

Te sipsip kibu tonalubo bidi hauwa
aselama, aga tonaluyu,
hae mobadi goli, aga wi me egobeo.

Menio. Agai augwali dali wado elama,
tama te sipsip kibu bugagia tonaluaibao.

Te tama tiali goli, ena Tigidali Bomo
Elalubo Genuai Bidi, te eno te bulu du Saionba
hwjagasaibao, te Jerusalem bulude.

Tama magi nai dabe mego ena togolobo usu me egobeo.

⁵ Te ba dabe augwali ugwadu
bola biliyu, augwa wai dabe bugagia tonalubo dao.

Te tama tiali goli, ena Tigidali Bomo
Elalubo Genuai Bidigo da, teda eno Jerusalem
bugagia tonaluaibao.

Te tigidali sogo ena augwali pagede bidiyu,
tama eno augwali ma oda selama,
tama eno aga bugagia tonaluaibao.” *

Te po wali.

⁶ O dage Israel dabe, dagego
Genuai Bidigo po sela sãbo dao.

Tiali goli, dage mu begelama,
tama agaba ma asião.

⁷ Te Genuai Bidigo bodolu pãba yagasobo si da,
teda te sogo dagego te dwagi yai silva de gol sigo

* 31:5: Godigo te hanu taun Jerusalem tonaluali, aga taun da, te ves 5de wali po tiwai yali. Tiali goli, te hanu taunde bidibo we bidigo aga tudiba munama, te ves 1-3 tede wali tiwai ebaso da, teda agai te hanu Jerusalemba me boi hwjagasião da, te ves 4de wali po tiwai gilama igi dao.

nigali tibo god piksa dabe sawaibao.
 Te nai dabe duga nogogo digi nigai dao.
 Tama te kolesaga yaligo dage sege sai dao.

⁸ Genuai Bidigo te po wali,
 “Te hwıbo hwa bainat mego te bulu Asiria dolaibao.
 Tama te Asiria dabe mu silaibao.
 Te bainat hwa ena Genuai Bidi ena digi tagala palaibao,
 te bidi dabe mego menio.
 Te Asiria dabe te bainatde wi paibao,
 tama te Asiria dabe gesi bidi dabe da
 kalabus se yaibao.
⁹ Te Asiria dabede genuai wi mu pedalaibao.
 Tama augwaligo bomai
 genuai hanu tulaluaibao.
 Tama te augwaligo ami ofisa dabego eno
 hwıbo plak ugwa walai subaso,
 augwali noma selama, augwaligo
 dili nagamea pelama, tama augwali wi paibao.”
 Te da te Godigo po dao.
 Te agai bomai isi te bulu du Saion
 te Jerusalem bulude elalubao.

32

Te wiegi yai tuni bidigo te bulu tonaluaibao

¹ Odao, te tuni bidi me deli pedalaibao.
 Tama te tuni bidi dali, tigidali to pedai
 kantrigo genuai bidi dabe dali,
 augwaligo wiegi yai doloba pai kolesaga naga elama,
 te we bidi dabe tonaluaibao.
² Te deli deli genuai bidi dabego
 te we bidi dabe augwali tau somainu asali bidi dabe,
 augwaligo tau saibao.

Augwali da, te we bidi augwali te genuai
wali dali tulubage dabe ebo side,
augwali te duala sabo pesage tiwai dao.

Tama me, augwali te wẹ te hogomua pai
pesageba pabo tiwai, me te moni masigigo
te hogomua pai pesage
te masigigo seselalubo tiwai dao.

Tama te bidi dabe te tiwai madi duala selama,
toma tubo tiwai dao,
te boma pai giligade.

³ Tama megi e tibo sogo, te we bidi augwaligo gedugo
tigidali nai dabe subo usu mu yaibao.

Tama me augwaligo olo bugagia dala pelama,
tama augwaligo tigidali po bugagia odaibao.

⁴ Tama te bidi dabe te homu kone bugagia palisama,
te dwai dwai sẹ dabe yali bidi dabe,
te bage augwali wiegi yai homu kolesaga selama,
te sẹ dabe tama yaibao.

Tama te bidi dabe te augwa hasi
po wabo pedauwali sẹsẹ yali bidi dabe, augwali
bugagia po mu waibao.

⁵ Tama te dwai bidi dabebolo genuai nogi me
te dwai polobo kolesaga dabe yali da,
te sẹ dabe mu sia saibao.

⁶ Te polobo sẹ ebo bagego
te subigila po dabe wabo dao.

Tama tigidali sogo augwaligo
dwai polobo sẹ naga ebo dao.

Augwaligo Genuai Bidigo
godolo yabo sẹ dabe ebo menio.

Tama ili po hauwa Genuai Bidide ela palobo dao.

Tama augwaligo te nai meni yai
bidi dabebolo nai masiama eyu,

me augwaligo te wẹ nogone ebo
 bidi dabe wẹ mayu ebo menio.

⁷ Tama te dwai bidi dabego
 te dwai homu kolesaga hauwa
 augwaligo tobolude paḡana pabo dao.

Augwaligo homu kone palama,
 tama augwaligo haniani ili po wabo
 homu kolesaga dabe gegelama,
 tama augwaligo te nai meni yai
 we bidi dabego po tų ebode dolama,
 aiyaba elaluabo sunumi dabe gegebo dao.

⁸ Tiali goli, bidi wiegi yai dabe augwali
 genuai nogi elaluaibao.

Te tigidali sogo augwaligo doloba pai
 kolesaga naga ebo dao,
 tama augwaligo wiegi yai kolesaga naga
 yabo homu bomo ebo dao.

Te we sibi augwali hobedai gela omainao

⁹ Te Jerusalem we dabe,
 dagego homugo da, dage wiegi yai
 bidiba homu te ebao.

Tama dage tigidali sogo bugagia bidaiba homu te ebao.

Tiali goli, dagego olo saganama, eno po bugagia odiḡo.

¹⁰ Te usu, megi dage homu tegaluama bidiagameo.

Tiali goli, dage tonaluiḡo.

Te 13 o 14 polua bolo pomainao.

Teda dage wi elama, noma saibao. Magi baso meni.

Dagego te wain gi dabe te du me walogobeo.

¹¹ Megi da, dage wiegi yai te bidibao,
 tama dagego homugo dage wiegi yai
 te bidiba homu ebao.

Tiali goli, dage noma selama, wi elama,
 tama duga wiegi yai ugwa dabe

peda sanama, tama hobedai ugwa dabe gudiagameo.

¹² Dagego duga hagawiade nogo sawaligo elama,
tama dage hobedai gela duga wiegi wiegi yai gi dabe,
me duga wiegi yai sawi yai wain
gi hagede dage hobedai gela waiagameo.

¹³ Tama dagego eno we bidigo
tɔ hagede dage hobedai gela waiagameo.

Magi baso meni.

Te dwai sesane bono me dwai nosai dabe
te bulu tɔde koliaibao.

Awe, dagego duga te gana peyu ebo
te be dabe homu kone elama,
tama dage hobedai gela waiɔ.

Tama me, dage te duga te gawelama
bidibo te hanu dabede me hobeda gela waiɔ.

¹⁴ Magi baso meni.

Te tigidali we bidi dabe augwali te hanu taga pelama,
tama augwali te hanude ugwa
eda iyu, augwali te hanude sɛ dabe me egobeo.

Te tuni bidigo be, me te ami bagego
bomai obo, me te ami bidi dabe
bidama boi bidi dabe asobo tonalubo te bobobage
sigi be dabe,

sese olo elaluama, tama dolaibao.

Tama te bulu yowi donki dabe
tede biliyu, wiegi yai homu yaibao.

Tama me, te sipsip kibu dabe aselama,
teba nosai tuagasaibao.

Genuai Bidigo aga we bidi dwagi yai bidabo sogo mawaibao

¹⁵ Tiali goli, Genuai Bidi aga mobo
bidi daba ma tagala palaibao,
bidigo wɛ gelebo tiwai yaibao.

Tama te nai meni yai kemi sane nai

meni yai olo elalubo bulu
 wiegi yai bulu tɔ ma yaibao.
 Tama haniani nai dabe tede holaibao.
 Teda te mone buside te ni dabe
 olo holobo tiwai holaibao.
¹⁶ Te wiegi yai doloba pai kolesagago
 naga te tigidali tɔ dabe tonaluaibao.
 Te po tɔ dolo naga dodolobo kolesagago
 te we bidi dabe bugagia dodolaibao.
¹⁷ Tama te doloba pai kolesagago
 te bidi hasi godolo ebo kolesaga ilaibao.
 Tama te we bidi wi me isama elama,
 tama augwali tigidali sogo bugagia
 dili elama, dolaluaibao.
¹⁸ Tama Genuai Bidigo e tama po wali,
 agai we bidi dabe augwali bugagia bidiyu, augwali
 augwa bulude bugagia homu tegaluama,
 toma tuaibao.
 Tama augwali magi naide wi me egobeo.
¹⁹ Te genuai talua ge tulubage tulama,
 te mone buside moni ni dabe me
 dolobadi me, tagala.
 Tama tigidali hanude be dabe tɔde wiala pai goli,
²⁰ te Genuai Bidigo we bidi, dage bugagia bidaibao.
 Tama dagego te nai dabe te wɛ elalubo
 bulu badu dagego nai bulaibao.
 Tama dagego duga kibu bulmakau dabe,
 me donki kibu dabe, augwali augwa
 digi nai tumainu sula tagalaibao.

33

*Te we bidigo Genuai Bidigo augwali tonalumainu gedu
 haluasa po wali*

¹ Dage te gasa bulu dabe dolobo hani, dage

dolaibao.

Te mu tama, dage me dolobe dao.

Tiali goli, dagego gasa bulu dabe
dolobo bodolu sia saibao.

Tama duga digi duga dolaibao.

Dagego te gasa hani dabe ili po walama,
tama dagego te po mia selama,
tama dagego augwali te boi
bidi dabego nogoba mubo dao.

Te mu tama, te gasa hanigo da dage me
ili po me ola masiꝓbadi goli.

Tiali goli, dagego te gasa bidi dabe
ili po wabo sogo te sia saibao.

Tama te gasa bidi dabego dage ili po olama,
tama dage te boi bidi dabego nogoba muaibao.

² O Genuai Bidi, dago homu kolesaga
nage deliba naga elalubao.

Nago da hobede elama, tama tigidali
sogo da bugagia tonaluagameo.

Tame te seꝓe ebo sogo, nago da
ma selama, tama dago augwali
aiyaba elalumainu ilao.

³ Te bomai bulu bidi dabego nago
te be kulukulu tiwai i wabo odobo sogo, me nago
augwali dali hwꝓainu hogodasa asobo si da,
augwali we bidi sese wi paibao.

⁴ Tama augwaligo te taga pabo
nai dabe da, te gasa bidi hani dabego
polo sagsaibao.

Teda te gide mano dabego gide nai dabe
tula silibo tiwai yaibao.

⁵ Genuai Bidi aga genuai nogi mu
elaluyu, tama aga bulude ugwade mu bidibao.

Tama agai aga doloba pai kolesaga dali,
 agai po tų dolo naga ebo kolesaga dali, te tigidali
 Jerusalem tųde pağana paibao.

⁶ Tama tigidali sogo agai aga
 we bidi dage bugagia tonaluyu,
 tama agai dage bomo elama,
 tigidali sogo bidimainu yaibao.

Tama agai dagebolo dwagi yai homu kolesaga dabe,
 me kolesaga dabe hauwa mu mawaibao.

Tama dagego mu tobolu dja holai elalumainu yaibao.
 Te wi elama, Genuai Bidi dologode elalubo kolesagade,
 Genuai Bidi agai wiegi yai nai dabolo maiabo dao.

⁷ Suama, te Jerusalemde genuai bidi dabe
 te sunumi dabede bidiyu, gela dabe obao.

Tama te bidi dabego te boi pibo sogo pedalomai ebadi,
 augwali gela bomonama me oduali.

⁸ Te genuai sunumi dabe olo elalubao,
 te we bidi te sunumidu ugwa eda me bilibo menio.

Te boi bidi dabego augwa daų walali po bogi pelama,
 tama augwaligo gasa hani
 bidi dabego hanu dabe dolali.

Augwaligo gasa bidi dabe tonobo da,
 te olo nai dabe tonobo tiwai ebao.

⁹ Te tų hobodai gela weyu,
 tama aga bomo sia sali.

Tama te Lebanon genuai busi hale yali. Magi baso meni.
 Agai ni dabe sasiyu, ela pobaso.

Te Sarongo odogo malu bulu wiegi yai te tų wa pelama,
 tama wę meni yai kemi nai elalubo
 bulu tiwai yaibao.

Tama me, te ni yabe dabe te Basan
 distrikde holali, me te bulu du Karmelde holali dabe,
 augwali bogwa pelama, telega peyu yali.

Te we bidi dabego Genuai Bidigo bomo sueibao

- ¹⁰ Genuai Bidigo e tama po wali,
 “Megi da, ena hogodama, sę yaibao.
 Tama te we bidigo ena sulama,
 tama augwaligo eno genuai nogi
 ugwaba somainao.
- ¹¹ Te bidi hani dagego ena dali boi bidi elaluali bage,
 dage da te olodali bomai sę
 mu elama, masigi meni yai nai dabe
 dagego sabo dao.
 Te bidigo aga gide wit genina soba homu ebo tiwai dao.
 Tiali goli, agai olo nosai dabe salio.
 Tama duga bomai sęgo
 te isi bogoli tiwai pedalama,
 tama dage mu sia sęwaibao.
- ¹² Tama dage te augwaligo kambang
 isi ulai hogomu tiwai,
 me augwaligo sesane bono isi ulama,
 keli hogomu ebo tiwai yaibao.
- ¹³ Te dage pąde bidalubo we bidi,
 me dage digibulu bulu bidalubo
 we bidi, dagego eno bomai sę yali po odao,
 me dagego eno genuai nogi po pusa maiąo,” wali.
- ¹⁴ Te Saionde te dwai kolesaga ebo
 we bidi augwali wi elama, noma sali.
 Tama augwaligo e tama po obao,
 “Genuai Bidigo sębę da, te da te bomai
 isi tigidali sogo dabo isi tiwai,
 tama tigidali nai dabe dela silibo tiwai dao.
 Te da tomode de mu te isi dali bidaibawe?”
- ¹⁵ Te doloba pai kolesaga eyu, me mu po naga weyu,
 me gasa bidi dabego doado bage sabo homu isąyu,
 dwai kolesaga isąbo bidi dabe,

augwali te Genuai Bidi dali bidibo usu yaibao.
 Tama augwaligo te ili po wabo mone sisama eyu,
 me te dwai kolesaga ebo bidi dabe
 dali dagana sisama eyu,
 me te gasa bidi dabe ela mubo
 bidi dabe dali kisa selama ebo menio.

¹⁶ Augwali te tobage bidi dabe augwali
 bugagia bidaibao.

Augwali te bidi me te bugagia wiegi yai
 boma pai bulu dude geme dualalubo aꝓ yaibao.
 Tama nai dabe mego augwali aiyaba me elalugobeo.
 Tama tigidali sogo augwaligo tuabo
 nai elaluyu, wꝑ elaluyu yaibao.

*Genuai Bidigo wiegi yai sogo mu Jerusalem dabebo
 mawaibao*

¹⁷ Dagego duga tuni bidigo aga
 sawi yai tuni bidigo ugwa ma gudama, tama te bulu
 ma tonalubo sueibao.

Tama dagego duga bulu genuai ma pedalobo sueibao.

¹⁸ Tama dagego te dwai sogo dagede
 polobadu pedalali ma kone palama,
 tama dagego e tama ma hanalu waibao,

“Te boi bidi dabe aselama,
 te takis moni sali bidi dabe
 augwaligo tobolu bidi megi menadewe?

Tama me te boi bidi dabe aselama,
 te dago ami bidi dabego
 te boi bidi dabe asobowe weyu tonaluainu, te seꝓani
 bobobage bedede tonaluyu yali,
 te tobolu bidi menawe?

Augwali polobadu te dago hanu dabede elaluali bidi da.
 Megi augwali ede menio.” Te po waibao.

¹⁹ Dagego te tobolu gagea pelama,

augwa digi augwa nogi ugwaba siyu yali
 boi bidi dabe dagego gesabidi me sugobeo.
 Tama dagego augwaligo dwai augwa
 wabo po me odogobeo.
 Te bidi mego te dagego konesiawai po
 augwaligo wali po bidi mego me odogobeo.

²⁰ Dagego Jerusalemba toniaŋo.
 Te da dago genuai hanu,
 te da tigidali genuai lotu po wabo
 sogo dabe sisinagasabo hanu dao.
 Te da te da bugagia bidiyu, toma tuyu ebo bulu dao.
 Aga te sel ugwa be te bidi dabego bono
 togolama, ni dabe gudasa,
 piŋama yabo sel be tiwai dolaluaibao.

²¹ Genuai Bidi te dago boma pai
 polalubo bidi tede bidaibao.
 Tama agai te Jerusalem te wiegi yai
 sawi yai genuai wę me,
 dwasianu wę me elalubo bulu nigilaibao.
 Tiali goli, te dwasianu geba kanu me,
 genuai hwıbo sip dabe me,
 te wę dabedu me asogobeo.

²² Magi baso meni. Genuai Bidi
 aga digi dago tuni bidi bidama,
 tama po tu dabe dodolobo se elama,
 tama aga digi da bomai po dabe
 menama, da tonaluaibao.
 Tama agai da bugagia tonaluyu,
 tama da dwai dene me sogobeo.

²³ Ma, te boi bidi dabego te Jerusalem
 sabo homu yali da, teda augwali usu me egobeo.
 Augwali te sip boskru bage te sip

pomainu, te pobigisama ebo
 boskru dabe tiwai bidaibao.
 Magi baso meni. Te sip tobolu
 bugagia dolalusiamu eyu,
 me te bono dabe bugagia bomalusiamu eyu,
 me te sel dinigalusiamu eyu isama ebaso.
 Tama tibaso, boi bidi dabe wi peyu,
 te nai dabe hauwa tagalama paibao.
 Tama te Jerusalem dabe udala,
 te nai dabe sigi paibao.
 Tagala, te saḡa dwai bidi dabe me,
 augwali me te gasa bidi dabe nosali aselama,
 augwaligo me te nai dabe hauwa mu saibao.
²⁴ Tama te sogo te Jerusalemde bidibo
 we bidi dabego e tama po munu
 ma wagobeo, “Ena gasi ebo.”
 Tama Genuai Bidigo te Jerusalemde
 bidibo we bidigo dwai se yali seḡe sela saḡaibao.

34

Godigo te Idom to kantri dolaibao po

¹ Dage tigidali to habu we bidi dabe, asiḡo.
 Dage sisanagaselama, te po odagasiḡo.
 Toḡde me tigidali elalubo nai me,
 dagego me olo muiḡo wai.
² Genuai Bidigo te tigidali bulu to kantri dali haliga
 seḡe eyu,
 te augwa ami bidi dabe dali me seḡe yali.
 Tama aḡai te po weyu, te augwali tigidali isaibao po
 wai dao.
 Awe, aḡai augwali sese mu dola silaibao.
³ Te augwali tigi dabe te bidi dabego pubalubo
 usugobeo. Menio.

Te bulu tɔ dabede danamu pelayu,
 te bulude dwai kugumini mu yaibao wali.
 Te augwaligo kaneme dabe te bulu du dabede
 paḡanalueibao wai dao.

⁴ Giliga, me polua, me hɔ dabe hala pelama, te
 tutudulaluama,
 te mu tigidali silaibao.

Tama dagalu da, te bidi dabego 1pepa yabe bebe pelama,
 kɛkɛ pabo tiwai yaibao.

Te dagalu daide ula ebo hɔ dabe tigidali
 te ni wain yabe wa pai te tɔba tudulalubo tiwai eyu,
 te ni kaya fik yabe wa pai tudulalubo
 tiwai yaibao wai dao. *

⁵ Genuai Bidigo te tama po wai, “Eno haliga sɛbɛ yali,
 eno te ena bainat hwɔ sisi elama,
 tama te bainatgo hwawa mu weyu,
 te dagalu tagalama,
 te Idom dabe eligi painu yali,
 te eno augwali dolaibao po wali hani dao.

Te megɛ eno aga tagala palubo te augwali ela mugi
 pomainu yaibao,” wali.

⁶ Tialima, te Idom dabego kaneme me iligo te Genuai
 Bidigo bainat hwɔ halua saibao.

Te sipsip me meme dabe te bidi dabego te ofa yainu
 elama,
 te ofa yainu ebo bidi dabego nogode kaneme piliga
 pabo tiwai yaibao.

Genuai Bidigo te genuai hani we bidi dabe mu te taun
 Bosra te Idom bulu tɔ kantride elaibao wali,
 te aga digi genuai ofa ebo tiwai dao.

⁷ Genuai Bidigo te tobage bomai uni bulmakau dabe
 me elama,

* 34:4: Ped 6:13-14

te augwaligo kaneme me ili te gea paliyu, te Idom
bulu t̄o kantri mesegelaibao wali.

⁸ Te s̄e pedelaibao, magi baso meni,
Genuai Bidigo te boi bidi dabeba te aga taun Jerusalem
doliyu, aiyaba elalubo boi bidi dabebolo

te dene mabo bodolu mawai dao wai.

⁹ Te Idom bulu t̄o kantri w̄e dabe te kolta tiwai
pedelama,
te hogomu dabe te bomai masigi dabe tiwai
pedelaibao,
te Idom bulu kantri t̄o te kolta sia dabo tiwai yaibao.

¹⁰ Te sia dabo munu me sia sogobeo. Menio.
Te tigidali sogo ulade me hulide bomo elama, dedu,
te hano sesemane sogo pedaliduaibao wai.

Te Idom dabego t̄o olo sesemane sogo elalu,
te bidi teba munu ma biligi pogobeo. *

¹¹ Te bulu t̄o te dwai ba dabe, te ba kemodage dabe,
me sisi yai ba kotkot,
me hulide bilalubo ba dabego bulu naga pedelaibao.
Godigo te Idom dabego nai doado bage tigidali sia
somainu elama,
te Idom dabego t̄o olo elalumainu yaibao wali.

Te polobadu digi agai te t̄o nigilama,
te t̄o olo mu elaluali tiwai gilama pedelaibao wai
dao.

¹² Te tigidali genuai bidi dabe,
me tobolu bidi hetman dabe, te munu me bidigobeo,
tama te king mego te bulu t̄o kantri me tonalugobeo
wali.

¹³ Te sesane yai bono me nosai dabego te kingo be,
me gasa be dabe mesegelaibao.

Te bulu uni yowi dabe bidagaselama,

* 34:10: Ped 14:11; 19:3

te badu i wagasobaso, te uni ba dabe te beba
piagasaibao wali.

¹⁴ Te olo masigi bulu kemi tōde te bulu uni hasa dabe
teba sisinagasaibao wali.

Te bulu uni meme dabe me te bidagaselama,
i weyu, ga udaibao, te tobage hasamani dabe me,
te hulide bilalubo hasa me, te aselama,
te badu piabo pesage gegagasaibao wai dao.

¹⁵ Te hulide bilibo ba sibigo te be selama,
te augwa ge dabe tede sagonaibao,
te augwa bogo dinigilama, te augwa
gesi ogomani tonaluaeibao.

Tama te omai ba kemedage me,
so ba kemedage me, augwali aselama,
tonaluagasaibao walio.

¹⁶ Te Genuai Bidigo buku tomoba sulama, nago te nai
dabe elalubo po nedao.

Tigidali hasa me ba dabe te bukude po wali gilama,
te bulu Idomba bidagasaibao.

Te me deli augwali me bidigobeo.

Magi baso meni, Genuai Bidigo digi augwali asao wali.

Te aga Mobo Bidigo augwali sisinama,
te augwali odasa asaibao wali.

¹⁷ Te Genuai Bidigo digi te Idom tō pedaide deli delide
daj ilama,
te augwaliba dobawaibao.

Tama augwali te Genuai Bidigo daj ilama,
muani madi sesemane bidada paibao wai dao.

Godigo tigidali nai wiegi yai ma pedalumainu ilaibao*

* 34:17: Ais 63:1-6; Jer 49:7-22; Ese 25:12-14; 35:1-15; Amo 1:11-12; Oba 1-14;
Mal 1:2-5

35

- ¹ Te masigi kemi bulu me, t̄o wa pai bulu dali,
te augwali pemene wiegi yai mu yaibao,
magi baso meni, te sawi mu yai plaua pedelama,
te badu mesegelaibao.
- ² Te wa pai bulu t̄o tonobo te sawi wiegi yai mu yaibao.
Te aga genuai i hai dali weyu, genuai pemene yaibao.
Te wiegi yai sawi yai nai hauwa mu pedaliyu,
te bulu tonobo wiegi yai sawi me tedali eyu,
te Lebanon genuai busi tonobo tiwai eyu,
te Saron bulu odogo tonobo tiwai yaibao.
Te we bidi dabego bomonama tonoyu, te genuai nogi,
me te dago Genuai Bidi Godigo wiegi yai au dali
elalueibao.
- ³ Dagego te bomo meni yai bidi dabe daꞗ waliyu,
te haliga wi ebo bidi dabe,
me didibili ebo bidi te daꞗ waliyu yao po wai dao.*
- ⁴ Te tabi haliga homu kolesaga te bomo isaꞗwai bidi
dabebolo te tiwai po wao,
“Dage te bomonama dolalu, te wi me elamuo,” wao.
“Te dagego God ma asiyu, dage dobola ma selama,
te boi bidi dabe dwai dene mu mawaibao,” wali.
- ⁵ Tialima, te gedu widai bidi dabego gedu ma pedaibao,
te olo degai bagego po ma odaibao.
- ⁶ Te saꞗa dwai penelai bidi dabe gesa soyu, posoga
palaibao,
me te pedauwali pania sai bage te i weyu, pemene
yaibao.*
- Te weꞗ dabe te masigi kemi t̄ode pedaliyu,
te tigidali habuba usu nama paibao.
- ⁷ Te olo kemi t̄o bulude te sigi aꞗ tiwai pedelaibao.

* 35:3: Hib 12:12 * 35:6: Mat 11:5; Luk 7:22

Te wa pali tō dologode me wē ulu pedelaibao.
 Te polobadu te uni yowi dabe naga te wa pali tōde bidali.
 Tiali goli, te sogo te nosai,
 me awi hauwa tede pedelaibao.

⁸ Tama genuai sunumi me deli te badu elalueibao.
 Te genuai sunumi nogi e tiwai waibao,
 “Godigo Tedali Gasagi Yai Genuai Sunumi Digi Dao,”
 wai.

Te God gedude wiegi yai isaʻwani bidi dabe,
 augwali te sunumide me biligobeo. Mu menio.
 Te Godigo we bidi dabego sunumi naga elalueibao.
 Te homu kolesaga meni yai bidi dabe,
 te augwali te pāba me pogobeo.

⁹ Te dwai laion me, dwai hasa dabe me,
 te sunumidu me soagobeo. Menio.
 Te Godigo augwali ma sali we bidi dabe naga,
 augwali naga te sunumidu bilaibao.

¹⁰ Te Genuai Bidigo ma dobola sali we bidi dabe,
 te augwali wiegi yai pemene dali
 te Jerusalemba ma asaibao.

Te augwa genuai po daḡa weyu, balia weyu,
 te sunumidu aselawaibao.

Te augwa wiegi yai bugagia mu dugulalu, te augwa
 pemene umabo mu yaibao.

Augwa te wiegi yai pemene ebo munu me sia sogobeo.
 Te dene, me haliga seḡe, te augwalide munu ma me
 elalugobeo.

Asiria dabego te Jerusalem taun sagasainu
 yali

*Te Asiria augwaligo Jerusalem sagasainu yali po
(2 Kin 18:13-37; 2 Sto 32:1-19)*

¹ Te Hesekia king bidibadi, te kibu be nogo si olama, sagago me si me si, te14 yia elalubo sogo, te Asiria king Senakerip te aga ami dabe dali aselama, te Juda dabeba boi hwiagaselama, te augwali aiyaba elaluama, te tigidali bomai obo elalubo hanu sali. Tiali goli, te Jerusalem augwaligo sisabadi, te elalualio. ² Senakerip te Lakisde bidiyu, agai aga amide polalubo namba wan ofisa dali, te genuai ami hani dali tagala palali, te Jerusalemba pomainu yai. Augwali te Jerusalemba sabolama, tialima te ofisa te Jerusalemba pabo te Ugwadu Elalubo Ulu Wę nogi wabo sabo wę paba pelama, bidigi pali. Te ąi gamia te pelama, bidigi pali. Te ąi gamia te name ugwa nigibo madiba pabo genuai sunumi pade elaluai. ³ Tialima, te Israel ofisa bidi selago aga sugi palio. Augwaligo nogi e tiwai, Eliakim, te Hilkiago ogwa, te kingo be tonalubo bidi da, tama Sepna, te kingo kuskus, me Joa, te Asapgo ogwa, aga te kingo ebo sę po page tigidali asebo bidi dao. ⁴ Augwali sela bidi te Asiria ofisa bidiba sabalubo si da, agai po bomonama, augwaliba te tiwai po wali, “Dage pelama, Hesekiaba te kingo bomai po magi pao, aga te Asiria king dao. Agai te tiwai po wali, ‘Hesekia, nago mena tobage tiwai bomo elalu, tama nage ena dologode bidisayu ebawe? ⁵ Te odolali mibo pogo te boi hwiabo bomu usu elalueibao, agawe? Nago enade hagoma ebao. Nago homugo dego nage tau sagasaiba homu elama, te nago enade hagoma eba, agawe? ⁶ Eno koneani, nago te kantri Isipba tonaludu, te agai nago hwiabo tau sagasomainu tonalubao. Tiali goli, eno nagebolo obao, Isip te togwa pai awi dili tiwai elalubao. Te nago bilibo dono tiwai tola selama, pobaso da, teda te awi dili sagago nago nogode dolaibao. Te Isip king bidigo kolesaga te tobage tiwai

elalubao. Tama nago te boi hwɨbaso, te aga aselama, nage tau me sagasogobeo. * ⁷ Tialima, nago te po weyu, te dage Israel dabego konealubo homu te Genuai Bidiba mubaso, te duga God, te agai dage tau saibao po obaso, eno homugo te me usugobeo homu ebao. Magi baso meni. Hesekia, nago te agai lotu wabo pesage dabe, me te gasade elalua pali alta dabe, dolali. Nago te Juda dabeba me Jerusalemba te po weyu, augwali te Jerusalemba aselama, tama te alta deliba naga lotu wagasao po wai dao.’ ”

⁸ “Te eno kingo gasa po elalubao. Hesekia, eno kingo nageba te 2,000 hos mawaibao wali, nago te hosde dugulama, te hwɨabo ami bidi te 2,000 elalubaso da, te tama tiaibao. Tiali goli, eno koneani, nagede digi te tobage bidi tama me elalubeo. ⁹ Nago homugo te Isip ami bidi dabe te hosidu ma karisdu aselama, te nage boi hwɨbo tau sagasaibao homu ebao. Tiali goli, mu menio, augwali me asogobeo. Tama tialima, nago bomogo te dago dwasianu ami hani aiyaba elalueiba homu ebaso da, te usu me egobeo. ¹⁰ Eno kingo te po wali, ‘Nago homugo ena homugo digi aselama, te nago bulu tɔ kantriba hwɨgaselama, te dolagasali homu eba, agawe? Mu menio. God Genuai Bidigo digi enabolo te kantri dolagasao po obaso, ena asai dao,’ eno kingo te po wali.” ¹¹ Eliakim, me Sepna, me Joa, augwali selago te po odama, tialima augwaligo te Asiria ofisa bidiba te po wali, “Nago te po dabolo te Siria pogo wao, magi baso meni, dago te bulu po koneai dao. Nago te Hibu po me wagio, tiyu te taun obo daide dodolalu bidibo bidi hani dabego nago te wabo po odabuo,” wali.

¹² Tiali goli, te ofisago po wei ponoyu, te tiwai po wali, “Eno kingo ena tagala palali, te po dage dali, me dagego king dali naga omainu me tagala palobeo. Menio.

* 36:6: Ese 29:6, 7

Te obo daide dodolalubo hani bage, augwaligo me te po odomainao. Magi baso meni, te boi hwɔbaso, dago te Jerusalem bagua sagasobo si da, teda te dwai sɛ ebo si dage tigidaliba pedelaibao. Tama te obo banisde dodolalubo hani bage te nai mu sɔɔ paibao, tama augwa di ma tuyu, poi wɛ ma tuyu yaibao, te tiwai dage me yaibao,” wali.

¹³ Tialima, te Asiria ofisa bidigo te obo daide bidibo hani bidiba tonalu, te Hibru pogo genuai po daɔ olama, i weyu, te tiwai po wali, “Dagego te bomai kingo poba olo bugagia muiɔ, aga te Asiria king dao. ¹⁴ Agai te tama po wai, dage te Hesekiago dage tibo po ola momainu me elamuo. Hesekiago dage tau selama, te dage bugagia me bidigobeo, wali. ¹⁵ Dagego te Hesekiago dage homu bega sabo po me odigio, dagego konealubo homu te Genuai Bidiba daɔ wabo te agai dage tau selama, te da Asiria dabego dage aiyaba elaluama, te taun Jerusalem sogobeo wabo po, te po odogio. ¹⁶ Hesekiago po dagego odolama, te ena dali hwɔabo homu me egio. Te tobage homu ebo tagalama, te hanu eno somainu buluba teda solama, tama da dali te poi pibo ilibo po minao. Tama tibaso da, teda dage bugagia bidiyu, te duga elalubo ulu wɛde wɛ tuyu, te ni wain du, me te ni kaya fik du, te duga gide digi tuyu bidaibao. ¹⁷ Te dage bugagia bididubadi, te ena ma asiyu, te dage gasa bulu kantriba selasa peyu, te duga bulu tɔ kantri tiwai buluba paibao. Te bulu kantride te wain gi, me bret nigibo wit gi, te hauwa elalubo dao,” te po wai.

¹⁸ “Hesekiago dage tibo po ola mayu, te po obao, ‘Genuai Bidigo da tau sobaso, te dago augwali aiyaba elalueibao,’ po wai. Tiali goli, te Hesekiago tibo po wabo po odogio. Dagego homugo te gasa hani dabe augwa godigo te augwali tau selama, te boi hwɔani augwaligo da Asiria dabe aiyaba elaluali da, agawe? Mu menio.

¹⁹ Dago te taun Hamat, me Arpat, me Sefarvaim, teba boi

hwigi pali sogo, te augwa god menade bidiyu, te augwali tau sagasobewe? Te dago Samaria buluba boi hwigi pali sogo, te Samaria augwa godigo augwali tau selama, te da aiyaba elalualiwe? Mu menio. ²⁰ Dago te bulu t̄ kantri hauwaba boi hwigi pali, te augwa god hauwa elaluali. Tiali goli, te god me deligo te aga bulu t̄ kantri me tau selama, te da hwigi pali aiyaba me elalubeo. Tama tialima, magi baso dage Jerusalem bagego homugo te duga Genuai Bidigo dage tau saiba homu elama, te dago dage aiyaba me elalugobe da homu ebawe?" wali.

²¹ Te Asiria ami ofisago te aga wali po te siminani, tiali goli te genuai obo daide bidali hani bidi te augwa pedauwali pania selama, te po me deli wei me ponobeo, magi baso meni, king Hesekiago augwali habu seliyu, te augwaligo Asiria dabego po wei me ponamuo po wai dao. ²² Tiali goli, te Asiria ami ofisa bidigo wali pogo te Eliakim, me Sepna, me Joa te haliga seḡe mu ilali. Tama augwa gudali ugwa p̄silama, tama augwali pelama, te ofisago wali po tigidali te king Hesekiabolo pusigi palio.

37

Hesekiago te profet Aisaiabolo aga seḡe yai po pusali (2 Kin 19:1-7)

¹ Hesekiago te Asiria dabego po odobo si da, teda aga haliga seḡe mu elama, te aga ugwa p̄sawalio. Te agai homu dene ebo ugwa gudama, te Genuai Bidigo tempel be tomoba palio. ² Tama Hesekiago te Eliakim i wai, te kingo be tonalubo bidi dali, Sepna, te kingo kuskus bidi, te polalubo pris bidi dabe me i wai. Tama agai augwali tagala paliyu, te profet Aisaia sugi pomainu yali, te Amosgo ogwa dao. Te bidi dabego me te homu dene ebo ugwa gudasa pali. ³ Augwali pela sabolama, Aisaiabolo te tiwai po wagi pali, "Kingo te po walio, megi te genuai haliga

sege ebo sogo elalubao. Te Asiria dabego dabolo te da begela dolobo dwai posobo po hauwa waligo te da hale genuai elalubao. Da te haliga yai we me deli elalubo tiwai eyu, te wai ame nabo sogo pade pedelalio. Tiali goli, te wego wai ame nabo te bomo me elalubeo. ⁴Te Asiria kingo aga ofisa tagala palama, te dago God Genuai Bidiba dwai po wagasomai yalio, aga te sesemane sogo bidada pabo God dao. Dago homugo Genuai Bidigo te dwai posobo po dabe odama, tama agai te dwai po dabe pusagasali bidi dabeba te dwai dene ilaibao. Tama tiyu, dago homugo nago te Godiba gedu haluasa po weyu, te agai da dwasianu bidalubo hani bidi tau somainao,” po wali.

⁵ Te Aisaiago te Hesekiago po odobo si da, ⁶ tialima agai te po sela asali bidi dabeba te tiwai po wali, “Dage te kingba ma begasa pelama, te Genuai Bidigo po agaba pusugi pao. Genuai Bidigo te po wai, ‘Nage wi eyu, tama homu hauwa te wali dwai pode elamuo, te Asiria king bidigo olo se ebo bidi dabego enade te po wali dao. ⁷ Magi baso meni, ena Genuai Bidi dao, eno te Asiria kingo homu kolesaga bega palama, agai te po me deli odobo sogo, te agai dage mu tagalama, te aga bulu kantriba geasa paibao. Tama aga te Asiriade bididubadi, eno aga te bidi mebago te moni hwago ela mumainu yaibao,’ ” te po wai dao.

Te Asiria dabego Jerusalem dolaibao po ma wali

(2 Kin 19:8-19)

⁸ Te Asiria ami ofisa bidigo po odali, te king Senakeripgo te taun Lakis taga pali po odali. Tialima, te ami ofisago te Jerusalem taga peyu, ma begasa pelama, tama te king te taun Lipnade boi hwidubadi suali, tama aga pelama, aga sugi palio. ⁹ Te Asiria dabego boi hwidubadi, te bidi meba aselama, te king Senakeripbolo te tiwai po wagasali, “Te King Tirhaka te bulu kantri Itiopia bidi, te aga ami bidi

dabe dali, augwaligo te nageba boi hwjagasainu asobao,” wali. Senakeripgo te po odama, te agai bidi meba tagala paliyu, te agai pas te Juda dabego king bidi Hesekiaba selasa pomainu yali, magi baso meni, agai te Jerusalem sabo homu daꝝ weyu, bomo elaluai dao. ¹⁰ Te Senakeripgo pasde te tiwai po wali, “Eno koneani, nago konealubo homu te daꝝ wabo god, agai te po weyu, te agai eno dage aiyaba elaluama, te Jerusalem sogobeo po obao. Tiali goli, agai tibo po obao, tiyu nago agai poba daꝝ wabo homu me mugio. ¹¹ Naga digi nago te da Asiria king dabego ebo kolesaga koneai dao, te dago gasa bulu kantri hauwa mu dolali. Nago homugo eno nago bulu kantriba te tama tegobe da homu eba, agawe? ¹² Polobadu eno wꝝ dabego te taun Gosen, me taun Haran, me taun Resep dolama, te taun Telasarde bidali Beteden hani dabe ela muani. Te augwa god dabego te hani augwali tau sabo ususꝝbaso, te augwali bugagia me bidibeo. Mu menio. ¹³ Te taun Hamat, me Arpat, me Sefarvaim, me Hena, me Iva, te tama moni taun king dabe bidiba, agawe? Menio, dago te augwali tigidali ela silai dao,” wali.

¹⁴ King Hesekiago te pas te Senakeripgo tagala palali bidi dabego nogode salio. Te pasde po agai nedama, tialima agai te Genuai Bidigo tempel be tomoba sela palio. Tama agai te pas te Genuai Bidi bidibo gesabidi badu paꝝde muani, te agai dinigilama, bugagia dodolama, muai. ¹⁵ Tama Hesekiago gedu haluasa po Genuai Bidiba weyu, te tiwai wali, ¹⁶ “Genuai Bidi, Tigidali Bomo Elalubo Bidi, nage da Israelgo God, nage te ensel mobo bidi daide ugwadu bidiyu, te naga king sia saide dugulalubao. Tiali goli, nage naga God mu da, tama nago te tigidali bulu tꝝ habu tonalubao. Nago naga nago te tꝝ me dagalu nigai dao. * ¹⁷ Genuai Bidi, eno homugo nago olo eno

* [37:16](#): [Sai 25:22](#)

gedu haluasa po waboba bugagia munama, te eno gedu haluasa po odolama, tama nago daba te pedalubo dwai sę dabe bugagia suao. Tama eno homugo nago te tigidali dwai po wabo odomainu hagede ilali, Senakeripgo nageba te sę yai, God nage te sesemane sogo bidada pabo dao. ¹⁸ Genuai Bidi, dago koneanio, te Asiria king dabego te we bidi hani dabe hauwa dolama, te augwa bulu tų kantri dabe dali dolali. ¹⁹ Tama te king augwaligo te hani we bidi dabe augwa god dabe sela sayu, te tigidali siaba ulali. Te god dabe dolali, magi baso meni, augwali te tibo god naga dao. Te bidi augwa digi te ni me masigi selama, augwa nogogo nigai dao. ²⁰ Te Genuai Bidi, dena God, eno homugo te megı nago da tau somainu homu eyu, tama da te king Senakeripgo nogode ma dobola sao homu yai. Tama te tigidali tųde we bidi hanigo te tiwai bugagia koneyu, nage naga nage te Genuai Bidi da waibao,” po wai.

Profet Aisaiago Godigo po te kingba mawai

(2 Kin 19:20-37)

²¹ Tialima, profet Aisaiago Hesekiaba te tiwai po ola tolali, “Genuai Bidi, da Israel dabego Godigo te po wai, nago agabolo hanalu, dage te Asiria king nogode ma sao po wali. ²² Tama tialima, megı da, agai te Senakerip dali po elalubao, te Asiria king dao. Genuai Bidigo te tiwai po wali,

‘Senakerip, te Saion bulu dude bidibo we bidigo nageba gısugu mabo dwai mu eyu,
tama te Jerusalem bagego nageba posobo dwai weyu,
te nage begela dolobo dao.

²³ Senakerip, nago posobo po weyu, te po dwai weyu,
te naga digi naga nogi ugwaba siyu,
hagoma po wali sogo,
nago homugo te nago de dali yali da homu yaliwe?

Nago ena dali tama yalio, te Israelgo God,
 ena te Wiegi Yai Doloba Pai Kolesaga Ebo God dao.

²⁴ Nago po te naga ami tobolu bidi ofisabolo mayu,
 te augwaligo nago nogi ugwanu mu sali,
 tama te enaba posobo po wali.

Te eno augwaligo pedauwalide
 te tiwai po odali, nage Senakerip,
 nage te naga karisde dolugulama,
 te nage ugwanu mu igulama,
 te Lebanon genuai bulu du dabeba
 te nago tobolu usu nama,
 nage te Lebanon genuai busi tomoba mu pali,
 te bidi me pisabo buluba pali,
 tama nago te bobage bobage ni sida dabe,
 me te wiegi wiegi yai ni pain dabe togwali.

²⁵ Tama nage gasa biligi pabo sogo nage te wę są
 pabeo.

Te bulu tų tigidali wa pai madi,
 te wę ulu dabe nago nigali,
 te mu pağana pelama, te nago hani bidigo tumainu
 yali.

Te nage te Isip genuai wę elaluboba pobaso,
 te nago sąğago te wę dabe wa pomainu yai dao.’ ”

²⁶ “ Senakerip, nago konebeo,
 te polobadu digi eno te sę ebode homu kone palama,
 tama nage te sę emainogo sa muyu dąj ilali.

Eno nageba bomo menama,
 nago te bomai obo elalubo taun dolomainu yai.

Te nage peyu, nago te taun dabe alubaso,
 te augwali degasa pelama,
 te masigi pesage genuai holama,
 tama te pobele bage hogomu genuai pesage igulali.

²⁷ Te taunde we bidi dabe wi mu yali,

te augwa homu kolesaga umuna pelama, te augwa
bomo kimi menia pali.

Augwali te sasia pabo nosai tiwai elalu,
te posola pai wali asobo sogo dela pabo tiwai
elaluali.

Te be pedude holobo nosai dabe,
me te gasa madi holobo nosai dabe
te bomai wali pedalubo sogo te bugagia me
hologobeo.

²⁸ Tialima, eno nage bugagia mu koneanio.

Eno nago homu kolesaga,
me te eno nago ebo kolesaga te nage pabo bulu
tigidali me konea pali.

Tama nago enade genuai haliga sẹbẹ elalubo me,
te eno koneai dao.

²⁹ Eno te nago haliga sẹbẹ ebo po,
me te hagoma ebo po tigidali te tama kolesaga ebo
po odali,
te nago tama tiyu, naga digi naga nogi ugwaba sali.

Tiali goli, megi da, eno nagede bomai po elalubao.

Eno te huk te bisigi ebo nai selama,
te nago gunide munama,
te eno ain dage augwaligo te hos pedauwalide mubo
nai selama,
te nago pedauwalide muaibao.

Tama nosali eno nage te naga asali sunumidu ma kekasa
paibao, 'Genuai Bidigo te po wai.'

³⁰ Tama Aisaia te Hesekiaba po me deli mayu, te
Hesekiago te Genuai Bidigo yaibao wabo sẹ tigidali te
Senakeripba mu pedelaibao, Genuai Bidigo te wali po
daj ebo tiwai te Hesekiago sulama, konemainu te sẹ ola
mawai. Aisaia te po wai,

“Nago te tiwai daj ilama, pedalubo sueibao.

Te kibu bede, te nosali kibu bede me,
te dagego nai me bulugobeo.

Dagego gide te olo pedelai nai sela tueibao.

Tiali goli, te sela wabo kibu bede,
teda dagego te gide nai bulama,
sela tueibao wali.

Tama me, te dagego te ni wain bulama,
te wain du sela tueibao.

³¹ Te Juda we bidi dabe, te boi
bidi dabego augwali dolisawani bage,
te augwali bugagia bidiyu, te hauwa pedelama,
te gide wit waigo pedali to aba munama,
tama te nai ge hauwa walobo tiwai yaibao.

³² Te boi bidi dabego te Jerusalem
we bidi tigidali me dologobeo.

Menio. Te augwali dwasianu hani me bididuaibao.

Te Tigidali Bomo Elalubo Genuai Bidi,
agai bomai homu kolesagade
te se dabe pedalumainu yaibao.”

³³ “Tama Genuai Bidigo po ma weyu, te tiwai po wai,
‘Te Asiria king aga ami bidi dabe dali te Jerusalem
tomoba me asogobeo,

tama te ene deli te taun tomoba me enegobeo.

Te ami bidi dabego te hwibo sabele te taun paba me
tolasa asogobeo.

Te taun pade augwaligo te todu me holama,
augwa tede dolalu, hwjainu me tegobeo. Mu menio.

³⁴ Ena Genuai Bidi, eno te Asiria king te aga asali
sunumidu te begasa ma pomainu ilaibao.

Tama tibaso, aga te Jerusalem tomoba me asogobeo.

³⁵ Eno tama tiaibao, magi baso meni,
eno ena genuai nogi homu kone palama,

te polobadu eno daꝝ wabo po ena sę bidi Devit dali wali po koneyu, tama tiaibao, wali.”

³⁶ Tialima, te sogo hulide naga, te Genuai Bidigo ensel mobo bidi me deli te Asiria dabe bidalubo pesageba pelama, te umabo bidi sese hauwa 185,000 ami bidi ela muai. Te kigamu mu Senakerip hodaluama, te ami bidi dabe isai tigi munalua pabo sualio. ³⁷ Tialima, aga dali te meba bidibo ami bidi dali, augwali hogodama, te Asiria pabo sunumidu begasa wali palio. Tama Senakerip te moni hanu Niniveba pelama, bidigi pai dao. ³⁸ Me sogo side deli sogo aga te aga tibo godigo lotu beba pelama, te aga god Nisrokba lotu udubo sę yali. Te aga ogwa sigo digi, te Adramelek me Sareser sigo, te bainat hwą selama, te lotu be tomoba pelama, te aga ela muanio. Te nosali augwa si wi pelama, te bulu tꝝ kantri Araratba bidigi pai. Tialima, aga gasa ogwa me, aga nogi te Esarhadongo, te aga aya pesage hasegelama, te Asiria king pedelai dao.

38

*King Hesekia gasi sobaso, te Genuai Bidigo aga tau sali
(2 Kin 20:1-11; 2 Sto 32:24-26)*

¹ Te Asiria dabego te Juda dabeba dwai sę idu doludali sogo, king Hesekia te genuai gasi selama, te aga pade isainogo yai. Tialima, profet Aisaia, te Amosgo ogwago, aga sugi pelama, agaba te tiwai po wali, “Genuai Bidigo te po wali, nago gasi te me siligobeo, nage te isaibao wali. Tama nago te naga bede bidibo bidi dabebolo po olama, te nago sę tigidali dodolao po wao,” te po wai. ² Hesekiago te po odobo si da, teda aga gesabidi te be habu daga badu begegi sulama, gedu haluasa po te tiwai wali, ³ “Genuai Bidi, ena nage wali mu aselama, te nago sę yalio. Sesemane sogo eno te nago homu wali pai. Tama tialima,

nago eno te yali sę dabe homu kone palama, tama nago ena isimainu me elamuo.” Aga te gedu haluasa po ola silama da, te aga gela umabo mu walio.

⁴ Tialima, Genuai Bidigo Aisaiabolo te tiwai po ma wai, ⁵“Nago Hesekiabolo te tiwai po wagi pao, ena Genuai Bidi, te aga bulai wai Devitgo God, eno agai gedu haluasa po wali odolama, te aga gela genuagia wabo sualio. Tama tialima, eno aga te kibu be nogo si olama, sęgago a naga bidimainu yaibao wai dao. ⁶ Tama me, te eno aga te Asiria kingo aiyaba elalumainu elama, te taun Jerusalem somainogo me iligobeo. Mu menio. Ena digi te dage seselalubo bidi bidaibao. ⁷ Tama ena Genuai Bidi eno nageba te dąj ilibo sę me deli menama, te nageba eno te yaibao po dąj wali sę te nageba ola mawaibao. ⁸ Te dąj ilibo te tiwai yaibao. Nago suali, te togobili polobadu te king Ahasgo nigali, te togobili dagego te be posali ulade te aua nedebo togobili elalubao. Te eno giliga noma bidi te togobilide te asesa polo nogo si dąjba begasa somainu ilaibao,” wali.

Tama tibaso, te giliga nomago te polo asesa begasa ma pomainu ilama, te dąj nogo siba usu nigi pali.

⁹ Tialima, te Hesekia usu ma igulali sogo, agai te po asęani,

¹⁰ “Eno homugo tama tiali, hobede ya,
te megı tebogo ena gesi bidi tigi elalubadi,
te ena isiyu, te tų taga paibao homu yai.

Tama ena te isali bidigo bulu pesageba bidigi paibao.

¹¹ Ena te bidibo ula elalubo we bidi dali ma bidigobe da homu yali,
te eno Genuai Bidi ma sugobeo wali.
Ena te bidibo ula me elalusiąbo bulu pesageba bidigi paibao homu yai,

tama eno te bidibo ula elalubo we bidi ma sugobe homu
yai dao.

¹² Ena te isai bidi tiwai yalio.

Eno bidibo ula te sel ugwa be bidigo aluama,
dolasa pali tiwai yalio.

Te eno bidibo ula te bidigo tigi ugwa dinigilibo sę tiwai
yalio.

Eno homugo te bobobage igi paibao homu yali,
tiali goli polo tama augwaligo togolama,
te masinde ugwa hobolainu ebo tiwai yali.

God, polo tama nago eno bidibo ula silimainu yalio.

¹³ Eno kone palali, nago eno nogo saęa dili te hasa
laion dili tologobo sę ebo tiwai iduama,
te kigamuba usu nigi pabo tiwai yali.

Te polo tama nago eno bidibo ula silainu yai dao.

¹⁴ Ena dene genuai eyu, te ena gela weyu, i wali,
eno gela wali te ba higo po wabo tiwai yai.

Te eno dagaluba ugwa tonaludu, sesabia pai elalui,
te nago ena tau somainu yali,
te ena gedu dene elama,
te gedu aę paęana pai dao.”

¹⁵ “Te eno magi po wagowe?

Genuai Bidigo te ena tau sabo po daę wali,
te megi aga digi te sę dabe mu pedalubao wali.

Tama tibaso, enaba te pedelali genuai seęę te
homu kone palaibao,
te ena digi ena aiyaba elaluama, te dua digi bidiyu,
te ena isibo sogoba usu naibao wali.

¹⁶ Genuai Bidi, te tobage sę pedalubo
te we bidi dabego kolesaga hasegelama,
te gesi bidibo ula somainu yali.

Te enaba pedelali sę te gesi bidibo ula mawainu yai.
Nago eno gasi sia somainu elama,

te ena wiegi yai ma pedalumainu ilali dao.

¹⁷ Megi da, eno konebao, te seḡḡ dabe pedelali,
te ena tau sainogo naga yai.

Nago ena godolo mu elama,
te nago ena te isali bidi dabego
pesageba pomainu me ilibeo.

Te nago eno yali dwai seḡ seḡ dabede
homu kone me isayu, tagalai dao.”

¹⁸ “Te isali bidi dabego pesagede bidibo hani dabe,
augwaligo te nago nogi ugwaba me sogobeo.

Te nago naga we bidi dabe tau sabo wiegi yai seḡ ebo
te augwaligo me sugobeo.

¹⁹ Te bidibo ula elalubo bidi dabe,
augwaligo naga nago nogi ugwaba siyu,
te meg i eno ebo tiwai yaibao.

Te aya dabego te augwa wai dabeba
te nago wiegi yai seḡ sesemane sogo ebo po waibao.”

²⁰ “Genuai Bidigo ena usu ma ilali.

Te tigidali side da te Genuai Bidigo tempel beba pelama,
te balia po weyu, musik weyu,
te agai nogi ugwaba saibao.

Dago te tiwai seḡ te da bidibo ula
elalubo sogo tiwaibao,” te po wai.

²¹ Tama Hesekia te gasi me elaludubadi, Aisaiago te tiwai po wai dao, “Te kingo seḡ ebo bidi dabego te ni kaya fik du dabe te augwaligo olali te selama, te seselama, te Hesekiago bomai keniba magasao, te usu elama, ma pedelaibao,” wali. ²² Tama me, te sogo me Hesekiago Aisaiabolo te tiwai po hanalu wai dao, “Genuai Bidigo te magi daḡ ilibo seḡ enabolo ola mayu, te ena agai beba lotu ma wagasomainu egowe?” wali.

39

Te Babilon king Merodakgo te bidi meba Jerusalemba tagala palali

(2 Kin 20:12-19)

¹ Merodak Baladan, te Baladango ogwa, aga te Babilon king dao. Agai te tiwai po odali, Hesehia te genuai gasi elalubao po odali. Tiali goli, aga usu ma yali. Tama agai te pas asenama, te agai agaba tolabo, te wiegi yai homu ilabo nai me deli dodolama muani, te bidi mebabolo menama, te augwaligo sela pelama, Hesekiabolo magi pomainu yai.

² Hesekiago te bidi dabego po odolama, tialima megii da, agai te bidi dabeba te mone dabe, me te aga gasa nai dabe augwaliba ola mawai. Te agai mone mubo bede te tigidali silva me gol suali, te wiegi yai denami ebo pauda me sanda dabe, me te hwibo nai tigidali, te gasa nai tigidali te aga bakstuade munolubo me, te ola mena silalio. Hesekiago te nai deli me dualubeo. Menio. Agai augwaliba te kingo moni be tomode elalubo nai tigidali ola mawai, me te aga tonalubo bulu to kantri pedai tigidali ola mena silai dao.

³ Te Babilon bulu bidi dabe ma pela silai madi te sogo, teda te profet Aisaia aselama, te king Hesehia suagasali, te agaba te tiwai po hanalu wali, “Te aselawali bidi dabe, augwali te mena bulu bidi dawee? Te augwaligo mena po nageba waliwe?” Tama Hesekiago agaba te tiwai po wei ponani, “Augwaligo ena suagasu asali, augwali te digibulu buludu mu asalio, te bulu to kantri buludu mu asalio, te bulu to kantri Babilon dao.” ⁴ Tama Aisaiago te po wai, “Augwaligo te mena mena nai mu te nago genuai wiegi yai be tomode sualiwe?” Tama Hesekiago agaba po wei ponoyu, te tiwai po wali, “Eno te tigidali nai doado bage mu augwaliba ola mawai, te eno magi nai deli augwalide geme me dualubeo,” wali.

⁵ Tialima, Aisaiago Hesekiabolo te tiwai po wali, “Megi da, te eno nagebolo te Tigidali Bomo Elalubo Genuai Bidigo po obao. ⁶ Genuai Bidigo te po wali, te nosali sogo me sogo deli pedalubo si da, te Babilon dabe aselama, te kingo bede munalubo nai doado bage, te naga bulai waj dabego te bakstuaba sisinama muani nai saibao. Te nai me deli te augwaligo me sula tagalogobeo. Mu menio. Augwaligo te tigidali nai doado bage Babilonba selasa paibao. ⁷ Te nago hanide digi te augwaligo te ogwa meba selama, augwali te Babilonba odasa paibao. Tama augwaligo sogoli te augwaligo dinama, tama augwali te kingo bede olo mu se ebo bidi pedelama bidaibao,” Aisaiago te po wai. * ⁸ Hesekiago te po odolama, tama agai Aisaiabolo te tiwai po wali, “Te Genuai Bidigo po nago enaba pusubao, te wiegi yai po dao.” Hesekiago te po wali, magi baso meni, te aga homu kolesaga tomode, agai te tama homu elaluali, ‘Megi sogo ena te king bidibadi, te dwai se dabe me pedalugobeo,’ homu yalio. ‘Te da bugagia bididubadi, te me hwigobeo,’ wai dao.

Godigo aga we bidi dabe augwali ma dobola sabo homu yali

40

(Daj 40-55)

Te Godigo we bidiba wiegi yai sogo pedelaibao wali po

¹ Duga Godigo te po odubao, “Eno we bidigo
haliga daj walama,

te augwa haliga dua nagame ilibo po pusao.

² Te wiegi yai po te Jerusalem we bidi dabeba mao,”
wali.

“Augwaliba te tiwai po wao, te augwali kalabus bidali

* 39:7: Dan 1:1-7; 2 Kin 24:10-16; 2 Sto 36:10

sogo te silalio.

Ena Genuai Bidi, eno te augwaliba te augwa yali dwai
sęde wei ponoma, te dwai dene mawai dao.

Awe, eno augwaligo yali dwai sę dolo usu nama,
tama te tiwai si naga te dene mawai dao.

Tama tialima, megi da, eno augwaligo
dwai sęęę tigidali sela sęwai dao.”

³ Odao. Bidi me deligo te tiwai i wali,

“Te Genuai Bidigo sunumi te wa pai bulu tų pesagede
dodolao,” wali.

“Te bulude dena Godigo genuai sunumi pebeli diliba
ilao. *

⁴ Te tų odogo igulali pesage tigidali paęanıyu,
te bulu du tigidali pebela aiyaba tulao.

Te dolo si elalusięwani pesage te dolo si elama,
te du du yali pesage te malu tų naga pedelaibao.

⁵ Tama genuai ula me te Genuai Bidigo bomo te pebeli
diliba hanilama pedelaibao,
tama tųde we bidi tigidaligo sueibao.

Te po te Genuai Bidigo pedauwalidu digi asai dao,” wali.*

⁶ Bidi me deligo te tiwai i wali, “Po pusao.”

Te eno po me wali,

“Mena po eno pusagawe?”

Te agai te tiwai po wei ponani, “E po pusao.

Tigidali we bidi te tųde sesabi elama,
bobobage sogo mu me bidigobeo.

Augwali te nosai me plaua te polo tama wa pelama,
te sia sabo tiwai ebo dao.

⁷ Te Genuai Bidigo posolai wali augwaliba tagala
palobo si,
te nosai wa peyu, te plaua telegasa dulubao.

* 40:3: Mat 3:3; Mak 1:3; Jon 1:23 * 40:5: Luk 3:4-6

Mu tama, te we bidi dabe te nosai tiwai polo
sia sabo dao.

⁸ Te nosai wa pelama, te plaua dabe boga selama,
tulalueibao.

Tiali goli, te dena Godigo po da, te sesemane elalua pidu,
elalua paibao. Te po pusao,” wali.*

⁹ Jerusalem, nage te genuai bulu duba holama,
te bulude po pusao.

Saion, nago bomonama, i hai weyu, te bulude po pusao.

Nago po hanilama pusao, nage wi me igio.

Nago te tiwai po te Juda dabego taunba walao,
“Suao, te duga God asobao,” po wao.

¹⁰ Suao. Tigidali nai tonalubo Genuai Bidi aga bomo
dali asobao.

Agai te boi bidi dabe aiyaba elaluama,
te aga we bidi dabe ma dobola sali,
te aga boi hwɨnama, te wiegi yai nai sabo tiwai
yalio. * *

¹¹ Agai te aga we bidi dabe bugagia tonalubao,
te sipsip tonalubo bidi dabego te aga sipsip bugagia
tonalubo tiwai ebao.

Te tonalubo bidigo te sipsip wai dabe te hagawiade
pageasa bilaibao.

Te aga dua digi pidu, te dwasianu wai dabe elalubo
sipsipba te sunumi ola mayu, ela pidubo dao.*

Te Israel hanigo God te tedali polalubo mu dao

¹² Te me deli bidibo bidi agai nogode te tamu aɨ
tigidali sabua sabo bidi bidiba, agawe?

* 40:8: Jer 1:10-11; 1 Pi 1:24-25 * 40:10: Te po begelebo gasa sunumi me
da e tiwai elalubao, “Agai te boi bidi dabe aiyaba elaluai baso, te aga wiegi yai
doado bage dali sela asiyu, te aga we bidi dabe augwaliba mawainu yai dao.”

* 40:10: Ais 62:11; Ped 22:12 * 40:11: Jon 10:11

Te dagalu daide ugwadu usu siyu ebo bidi me deli
elaluba, agawe?

Te tọ tigidali kabude bubo bidi me deli elaluba, agawe?

Te bulu du dabe te skelba munama,
skel ebo bidi me deli bidibawe?

¹³ Dego te Genuai Bidiba te nai dabe nigibo kolesaga
ola mawai bawe?

Te agaba homu kolesaga ola maiabo usu elalubo
homu ebo bidi me deli bidiba, agawe? *

¹⁴ Tama dego agabolo te wiegi yai doloba pai kolesaga
ola mawai dawe?

Tama dego agaba te wiegi yai konea pabo homu
kolesaga tigidali ola mawai dawe?

Bidi deli me mu menio.

¹⁵ Genuai Bidigo te haniani kantri tọde we bidi suali,
te olo nai gagawai tiwai ebao.

Augwali te tọ hogomu tiwai elama,
te dwasianu ąi tedebo tudulalubo tiwai ąọ ebao.

Tama agai te tigidali bulu tọ ailango seęę usu selama,
te tọ hogomugo seęę tiwai elalubo dao.

¹⁶ Te we bidi dabego te tigidali kibu hasa elali,
me te Lebanon genuai ni silide te tigidali ni
togolama,

te augwaligo genuai sia nogolama,

te kibu hasa tigidali te ofa tiwai eyu,

te siago tigidali domainu igi da, te tagalao,

augwaligo te ofa te God gedude olo nai tiwai igi dao.

¹⁷ Te tigidali tọ pedai kantride bidibo we bidi augwali
te Genuai Bidi gedude olo bage tiwai elalubao.

Augwali te olo nai mu tiwai dao.

¹⁸ Tama tialima, God te de mu tiwai dawe?

Te elalubo nai me deli te God tonobo tiwai ebo da,
agawe?

* 40:13: Rom 11:34; 1 Ko 2:16

- 19 Aga te bidigo nogogo nigai tibo god piksa noma
 elalua pabo tiwai da homu ebawe?
 Te tibo god piksa noma dabe da,
 te se ebo koneai bidi dabego
 te piksa kapago nigilama, te golgo mesegelaibao.
 Te augwaligo silva selama, te sen dabe nigilama,
 te piksa nomaba daganainu ebo dao. † *
- 20 Ma, te doado bage meni yai bidi dabego te tibo god
 piksa nigainu te damua pisabo bomai ni selama,
 nigaibao.
 Tama augwaligo te ni dulubo mu koneai bidibolo
 olama,
 te augwa tibo god piksa nigao po waibao.
 Te bidigo te piksa bugagia dulaibao,
 tiyu te piksa tulaluidali weyu tiaibao.
- 21 Te dagego konebe, agawe?
 Te dagego odobe da, agawe?
 Te polobadu mu te bidi dabego dagebolo
 te tigidali nai mena tama pedelali
 te po wasiqwai meni da, agawe?
- 22 Te Genuai Bidi aga naga te dagalu daide te sia
 kingde dugulaluali, agai te tigidali nai nigai dao.
 Agai te dagalu te name ugwa tiwai dinigina palama,
 te aga sel ugwa be sejalubo tiwai elaluai.
 Te agai gedude, te tode we bidi te olo nai kuli mano
 tiwai dao.
- 23 Agai te king dabe te olo bidi tiwai pedalumainu
 ebo dao.
 Tama agai te bomai bidi dabe aiyaba elaluama,

† 40:19: Te koneai bidi mebago homugo te sen dabe olo au ilai nai tiwai
 naga da homu yali. Te meba koneai bidi dabego homugo te sen dabego te
 piksa tolalu, te augwali tulaluidali weyu day wabo nai da wali. * 40:19:
 Tpi 17:29

te augwa nogi me elalubo menio.

²⁴ Augwali te plaua dabe te bidigo tamadi tama bulama,
te augwa sele aiyaba dulusiawai tiwai elalubao.

Te Genuai Bidigo bomai posolai wali tagala palobo sogo,
augwali te deli sogo polo tama sasia pelama,
te baguasa pabo waligo augwali te hogomu sela
pabo tiwai ebo dao.

²⁵ “Ena Genuai Bidi,
ena te Wiegi Yai Doloba Pai Kolesaga Tigidali Ebo
God dao,

tama ena tiwai de dawē?

Te eno kolesaga ebo tobage kolesaga ebo bidi tiwai me
deli elalu, bidibawe?”

²⁶ Dagego te dagaluba ugwa tonama,
te ugwade elalubo hō dabe suiāo.

Dego augwali nigai dawē?

Te Genuai Bidigo naga nigali.

Te nai dabe te Genuai Bidigo ami hani tiwai elalubao.

Agai augwaligo namba koneani,
te agai augwali deli deli nogi koneama,
tama agai augwali nogi nogi yaibao.

Agai tigidali bomo mu elalubo, tama tibaso,
te nai dabe te augwalide me deli me hagagobeo.

²⁷ Dage Israel, dage te Jekopgo hani dabe,
magi baso dagego po hauwa dogia pobawe,
“Dago Genuai Bidigo te dago sēgē subeo,” po wai.

“Te dwai sē ebo sogogo da gegali,
tiali goli agai da tau sabo homu ebeo,” po wabo
dao.

²⁸ Te dagego konebe da, agawe?

Te dagego odobe da homu eba, agawe?

Genuai Bidi te sesemane bidada pabo God dao,
tama agai te e tō tigidali badu sese nigai bidi dao.

Te mena bidi mego agai homu kolesaga tigidali me

konea siligobeo.

Agai bomo kimi te meniama, te me sia sogobeo.

- ²⁹ Genuai Bidigo te bomo meni yai bidi dabe daꝝ
 walobaso,
 te dili bomo kimi silai digi,
 te agai augwali bomo selama, bidimainu ebo dao.
- ³⁰ Te gesi ogwa bidi dabego te bomai bomo elaluali,
 te kimi meniama sia sabo dao.
- ³¹ Tiali goli, te Genuai Bidiba konealubo homu daꝝ
 olama,
 te agai augwali tau sabo tonalubo we bidi dabe,
 augwali te bomo sesemane elalu bidaibao.

Tama augwali bomonama eyu,

te ba kemodage bola pabo tiwai yaibao.

Te augwali udalama, te augwali homu heꝝ me egobeo,
 te augwali bilidu, te bomo kimi me isigobeo.

41

Genuai Bidigo te Israel dabe ma saibao po wali

- ¹ Godigo te po wali, “Dage we bidi dabe,
 te paꝝde elalubo toꝝ kantri dabe,
 me te digibulu elalubo toꝝ kantri dabe me,
 dage tigidali pedauwali pania selama, eno po odiꝝo.
 Dagego po bugagia sisila dodola selama asiyu,
 te duga po te po tuꝝ eboba pusagasao.
 Te da deliba sisinama, te po dagalama sueibao,
 te dego po mu po yabowe naga konebo dao.
- ² Dego mu te giliga pedalubo badu king
 hodolama, * te aga pabo usu nama,
 tigidali habu badu te hwꝝbode

* 41:2: Te po page e tiwai dao. Te ves 2 tede e tiwai po wali, “Te giliga pedalubo badu bidali king,” wali. Te king Sairus te toꝝ kantri Persiade bidai dao. Te Daꝝ 44:28, Daꝝ 45:1; Daꝝ 46:11, te daꝝde te po elalubao.

aga ugwanu igulumainu yaliwe?
 Tama dego te bulu t̄ kantri aga nogoba munama,
 te agai te gasa king dabe aiyaba elalumainu ilaliwe?
 Te agai bainatgo me enesigi ene sesemonego te augwali
 mu silama,
 te augwali t̄ hogomu tiwai pedelali,
 te pobele bage waligo sela pabo tiwai yai dao.
³ Aga te deli sogo naga polo tama augwaliba pedelama,
 te augwali doliyu yali,
 tama augwaligo agaba magi s̄ yabo te usu meni
 yai.
 Te waligo digi aga sela pabo tiwai eyu,
 agai te t̄ me dwasianu dībeo.
⁴ Dego mu te s̄ dabe pedalumainu ilaliwe?
 Te Genuai Bidi, eno naga dao.
 Te eno t̄ gagalama pedalumainu yali sogo,
 sesemane sogo eno tigidali nai te t̄de
 pedalumainu dodoludalio.
 Ena Genuai Bidi ena hasia polasa mu bidali.
 Te ena nosali badu sogo me bidaibao.”
⁵ “Te tigidali t̄ kantri we bidi dabego
 te eno yali s̄ dabe sulama,
 te augwali wi elama, noma sali.
 Te augwali deliba sisinagaselama,
⁶ te augwade digi haliga d̄ w̄ walabo po dabe minama,
⁷ tama augwa te tibo godigo piksa nigalio.
 Te nigo piksa dulubo bidi dabego te golgo nai nigibo
 bidi dabeba te po wali,
 ‘Dagego te wiegi yai s̄ mu ebao.’
 Te gol haluama dodolobo bidi dabego te aingo nai
 nigibo bidi dabeba te po wali,
 ‘Iya, tegobao, dagego te nai bugagia mu d̄ w̄ walobao.’
 Te nosali augwaligo te piksa dabe bugagia enani,

tiyu te augwali tulaluidali weyu tiai dao.”

⁸ “Tialima, dage te Jekopgo hani da,
eno dage sa muyu, daꞓ ilama,
te dage eno seꞓ bidi bidibao.

Dage te bulai wai eno abagi Abrahamgo hani dao.*

⁹ Eno dage te digibulu bulude mu,
te to sesege badu mu selama,
tama dage odasa asali.

Te eno te tiwai po dagebolo wali,
dage eno seꞓ bidi bidibao wai.

Eno dage daꞓ iliyu, dage te ena dao wali,
te eno dage hagela eyu,
te dage tudiba me mubeo. Menio.

¹⁰ Dage wi igio, magi baso meni, ena duga God da,
ena dage dali bidibao.

Te eno dage boma pai pedalumainu ilama,
te dage eno tau saibao.

Te dage eno bugagia tonalu,
te eno genuai bomogo te eno dagego
boi bidi aiyaba elalueibao wali.

¹¹ Te dagede haliga seꞓbe elama,
te dage po tuꞓba odasa pobaso da,
te dage augwaligo aiyaba elalusiꞓbaso,
te augwali hale dwai mu yaibao.

Te augwali olo nai tiwai mu pedelama,
te augwali mu hagawaibao.

¹² Te dage dali hwꞓnama,
te dage dolainu homu yali hani dabe,
te augwali olo nai tiwai mu pedelama,
te augwali toꞓde mu hagawaibao.

¹³ Ena Genuai Bidi, te duga God dao,

* 41:8: 2 Sto 20:7; Jer 2:23

eno dage ugwaba sagualu tonalu,
 te eno te tiwai po dageba obao, dage wi me igio.
 Te eno dage tau saibao, te po wai dao.”

¹⁴ Genuai Bidigo te tama po wali,
 “Te dage Israel te dwasianu hani da,
 te dagego bomo meni da wagio,
 ena dage ma sabo bidi,
 te eno dage ugwaba sagualu tonalu, tau saibao.
 Ena dage Israelgo God dao,
 ena te Wiegi Yai Doloba Pai Kolesaga Mu Ebo God
 dao,
 eno te dage ma dobola saibao wali.

¹⁵ Te eno dage te wit agayabo te gesi ni nami tiwai
 pedalumainu ilama,
 te dageba seḡḡ mayu,
 te dage sunumi palialuali boi bidi dabe te dagego
 aiyaba elalueibao.

Te augwali te bulu du tiwai bidali goli,
 dagego te bulu du dabe pepedama,
 te wit bo yalala pai nai tiwai pedalubo bomo elalubo
 tiwai yaibao.

¹⁶ Dagego te seḡḡ elalusiayu,
 te bidigo te bo dabe ugwaba sanama,
 te waligo tolasa pabo tiwai yaibao.

Tialima, dagego wiegi yai pemene te Genuai Bidi enaba
 yaibao.

Te dagego ena nogi ugwaba saibao, te Israel God da,
 ena te Wiegi Yai Doloba Pai Kolesaga Ebo God dao,”
 wali.

¹⁷ “Te eno we bidi dabe te aḡ mu soḡ pelama,
 te augwali dogoni te aḡ tuabo wa pali sogo,
 te augwaligo ena i obaso, tialima ena, Genuai Bidi,
 te eno augwaligo gedu haluasa po wabo odaibao.

Ena, te Israelgo God, te eno dage
 homu kone me gegeda palogobeo.

18 Eno te wa pai bulu du dabede te ʻaj
 pedalumainu ilaibao,
 te ulu ʻaj te odogo malu tʻode pedelaibao.

Tama eno te sigi ʻaj te wa pai pesagede
 pedalumainu ilaibao.

Tama te ʻaj meni yai pesagede,
 te ʻaj hauwa elalueibao wali.

19 Tama eno te dwagi yai ni sida dabe,
 me ni wuli dabe, me te bulu ni oliv dabe,
 me te ni saipres dabe, te gasa tobage ni dabe,
 te olo masigi kemi tʻode pedalumainu yaibao.

20 Tama te we bidi dabego sulama,
 tama augwa te tiwai koneaibao,
 ena God, te Israelgo Genuai Bidi,
 ena te Wiegi Yai Doloba Pai Kolesaga Ebo God dao,
 ena digi eno te sɛ pedalumainu ebo dao,” te po wali.

Te tibo god dabe te augwali mu god menio

21 Genuai Bidi, te Israelgo king dao,
 agai te tama po wai,
 “Dage te gasa bulu tʻo kantri god dabe,
 dage te po tʻu eboba asiʻo,
 te po tʻu ebode dagego po odomainu yaibao.

Te dagego pusabo po bugagia dodolao,
 tama te po tʻu eboba asao.

22 Te po tʻude dagego te polobadu pedelali sɛ po weyu,
 te yali sɛ dabego po page dabolo pusao,
 te dago hania koneaibao.

Tama dagego te nosali badu pedelabo nai po me wao.

23 Tama te nai dabe pedalubo sogo, te dago koneyu,
 te dage god mu da te homu yaibao.

Dagego te da wi yabo sɛ me deli iyʻo

te wiegi yai nai, ma dwai nai, te sę yao.
Tama tialima, te dago dagego bomo sueibao.

²⁴ Tiali goli, menio. Iya, tegoba!

Dagego magi sę me deli yabo usu isąwai,
magi baso meni, dage tibo god dabe
te olo dwai nai naga dao.

Tama te dagebolo lotu po wabo we bidi,
augwali me eno gedude te dwai nai mu pedela silai
dao.”

²⁵ “Eno te giliga pedalubo badu bidi me deli hodolali.

Te bidigo enaba genuai nogi mobao,
tama megı eno te not badu sela aselama,
tama agai te king dabe aiyaba elaluama, agayu,
te togo sospen sene nigıbo bidigo te to agalama,
te sospen nigıbo tiwai ebao.

²⁶ Dage te gasa bulu to kantri god dabe,
te dage tomode dego te nai pedelaibao po waliwe?

Te dage tomode me deligo te tobage po wali wida,
teda dago te po weyu,
agai mu po wali da po waibao.

Tiali goli, dage me deligo te nai pedelaibao po me
wabeo.

Tama dage me deligo te po wabo bidigo me odobeo.

²⁷ Ena, Genuai Bidigo naga eno te bulu du Saionba
weyu,

te nai pedelaibao wai.

Tama megı da, suiąo, te nai dabe pedelalio.

Te megı me, eno te bidi me deli tagala palama,
te Jerusalemba wiegi yai po sela pomainu yai dao.”

²⁸ “Eno te tibo god dabe gegali sogo, te eno suali,
augwaligo te po deli me wasiąwai.

Augwaligo homude te wiegi yai homu kolesaga elalubo
po pusabo homu meni yai.

Te me deligo eno hanalubo po wei me ponabo usugobeo.
²⁹ Suao. Augwaligo te mena sę me deli ebaso usugobeo,
 magi baso meni, augwa digi te olo nai naga dao.
 Te tibo god dabe te olo piksa dabe naga elalubao.
 Augwaligo te magi sę me deli yabo bomomo me elalubeo,”
 te po wai dao.

42

Genuai Bidigo sę bidi e dao

¹ Genuai Bidigo e tiwai po wai, “Suao, eno sę
 bidi e dao.

Sesemane sogo eno aga daꞑ walobao.

Ena eno aga sa munama, daꞑ ilali,

tama sesemane sogo eno agade wiegi yai homu
 pemene geninama, idubao. *

Eno ena mobo noma bidi agaba muani,

tama agai te doloba pai kolesaga naga igidali te tõe
 we bidi haniba selasa asaibao wali.

² Te agai po wabo sogo, te genuai po daꞑ i hai olama,
 po me wagobeo.

Tama aga te sunumi dabede doligi pelama,

te agai po bomonama me pusugobe.

³ Tama te agai te bomomo meni yai,

te togwa painu ebo awi dili,

te agai tigidali me togwa saꞑobeo.

Tama agai te ula bugagia isiꞑbo lam sula somainu me
 iligobeo. Menio.

Agai te bomomo meni yai we bidi tau sabo kolesaga yaibao.

Agai te doloba pai kolesaga pedalumainu bomomo ilaibao,

agai te sę ebo me tagalogobeo.

⁴ Te aga haliga sęꞑ me isiꞑyu,

* 42:1: Mat 3:17; 17:5; Mak 1:11; Luk 3:22; 9:35

te segego aga aiyaba elalumainu me iligobeo.
 Agai se bomo elama eyu, agai doloba pai kolesaga ebogo
 te dwai kolesaga ebo kolesaga aiyaba elaluaibao,
 te tigidali to habu usu nama bomo elalumainu
 ilaibao.

Te digibulu bulu we bidi dabe te aga tonaluaibao,
 te agai augwali bugagia dugulalu bidabo kolesaga
 ola momainu yaibao.” *

⁵ God Genuai Bidigo te dagalu me to nigilama,
 te augwa pesageba munama, elalubao.

Tama agai te tode haniani nai ni me nosai pedalumainu
 ilali.

Tama agai te bidibo ula te tode we bidi dabeba mobo
 ponama, mawai.

Te Godigo aga se bidiba te tiwai po wali, *

⁶ “Ena Genuai Bidigo digi,
 eno nage i olama, te eno doloba pai kolesaga
 ola momainu yai.

Te nage eno ugwaba pogalu bugagia tonaluaeibao.
 Te nagede naga, te eno te Israel hani we bidi dali
 bomai po daŋ walaibao.

Tama nage eno te Israel hani isaŋwai hani dabego ula
 tiwai ilama, bidaibao. *

⁷ Te nago te gedu hwidai bage dabe te ma tonomainu
 ilaibao.

Nago te kalabuside bidibo bidi dabe,
 me te be hulide bidibo bage me,
 te magi naigo me tonalusiama,
 te olo mu bidimainu ilaibao,” te po wali.

⁸ “Ena naga ena Genuai Bidi.
 Genuai Bidi, te eno nogi dao,

* 42:4: Mat 12:18-21 * 42:5: Tpi 17:24-25 * 42:6: Ais 49:6; Luk 2:32;
 Tpi 13:47; 26:23

tama dagego genuai nogi ena deliba naga maiào.
 Dagego te tibo god dabego nogi ugwaba me sigio,
 te bidi dabe augwa digi nigai dao.

⁹ Dagego suiào.

Te polobadu eno po weyu,
 te pedelaibao wali nai dabe, megi augwali pedelalio.
 Te megi eno dagebolo te gasa nosali badu pedelabo nai
 po walobao,
 te augwali pedalisiabadi,
 te dagego konealumainogo te tiwai po obao,” wali.

Tigidali we bidigo te Genuai Bidigo nogi ugwaba sinao

¹⁰ Dage tõe we bidi tigidali,
 dagego gesi balia po weyu,
 te Genuai Bidi nogi ugwaba sinao.

Dage te sipidu bilibo bidi dabe,
 me te tamu aïde bidibo hasa dabe,
 dagego agai nogi ugwaba siyào.

Dage te digibulu tõe kantride bidibo we bidi dabe,
 dagego te gesi balia po waiyào.

¹¹ Dage te bulu taun wa pai pesagede
 bidalubo we bidi dabe,
 me dage te Kedar hani we bidi dabe,
 dagego te i bomo elama weyu,
 te aga nogi ugwaba siyào.

Dage te taun Sela we bidi dabe,
 dage te bulu du dabe bageba holama,
 te wiegi yai homu pemene dali i waiyào.

¹² Tama dage te pade bidibo we bidi dabe,
 me digibulu bidibo we bidi dabe,
 dage tigidaligo te Genuai Bidi nogi ugwaba selama,
 te agaba genuai nogi maiào.

¹³ Genuai Bidi te bomai ami bidi tiwai elalu,
 te megi agai hwigi painu paibao.

Agai te po daḡa genuai olama, i weyu,
 te ami dabego ebo kolesaga tiwai te aga haliga sębę
 hodolama,
 te hwiabo sisi elalubo tiwai yaibao.

Te agai aga boi bidi dabe dali hwiinama,
 te augwali aiyaba mu elaluaibao.

¹⁴ Genuai Bidigo te tama po wai,
 “Te bobobage sogode eno pedauwali
 pania selama, te ena dua digi bidali.

Eno ena haliga sębę te palia selama, te eno magi deli
 me ebeo.

Tiali goli, megi eno te gela bomonama weyu,
 te wego wai ame nainu dene ebo sogo gela wabo
 tiwai obao.

Ena te homu hę weyu, te homu hę wabo bomo elama,
 kekebo dao.

¹⁵ Te eno bulu du dabe dolama,
 te nosai dabe me ni dabe sasia pomainu ilaibao.

Tama eno te genuai soabo wę dabe dali,
 te sigi aji me, sula somainu ilaibao.

¹⁶ Te eno ena we bidi dabe te polobadu
 augwali bilisawai sunumidu odasa asaibao.

Megi augwali gedu halua sai hulide bidibao,
 tialima te be hulia sai elalubo te eno sela sanama,
 te augwaliba ula mawaibao.

Tama eno te dwai pesage elaluali te dodolama,
 te dolo yai pesage ilama,
 te augwali bilabo madi tiaibao.

Eno te sę dabe te mu pedalumainu yaibao,
 te eno te sę yaibao wali po tiwai gilama yaibao.

Te eno magi nai me delide homu kone ebo me kegeda
 palogobeo.

¹⁷ Tialima, te tibo god piksa dabeba lotu weyu,
 te nai augwa god dao tiwai po wabo we bidi dabe,

eno augwali sela saɔwaibao.
Tama augwali hale dwai mu yaibao,” wali.

Te Israel dabe te olo degai, me gedu widai tiwai bidali

¹⁸ Genuai Bidigo te po wai,

“Dage Israel te olo degelama, te gedu mu widalio.

Dagego olo dala pelama, po odoyu,
te gedu peda pelama, tonao.

¹⁹ Dage eno seɔ bidi tiwai bidimainu elama,

tama eno dage sa muyu, daɔ ilama, te dagego eno po
sela pomainu yali.

Tiali goli, dage te olo degelama, te gedu mu widali,
tama te olo degeyu, gedu widiyu yai bidi dabe,
te augwali aiyaba mu elalualio.

²⁰ Dagego te nai hauwa sulama, te po hauwa odali,

tiali goli, dagego te nai dabe bugagia tonosiayu,
te poba olo bugagia me mubeo,” wali.

²¹ Genuai Bidigo te doloba pai kolesaga naga eyu,

tama agai te we bidi dabe ma dobola sabo kolesaga
ebode dwagi yai homu ebao.

Tama tibaso, aga bomo yai po dageba mobao,

te gasa bage dabego sulama,
te tiwai konemainu ebao,

te bomo yai po te wiegi yai mu, te mu polalubo dao.

²² Tiali goli, megi dage Israel dwai mu bidibao.

Te boi bidi dabego dage dolagaselama,
te dagego doado bage wi sela palio.

Te augwaligo dage me sela pelama,

tama dage te be dabede,
me to dedage dabede kalabus elama, elaluali.

Te dage augwaligo nogode ma dobola sabo bidi deli me
meni yai elalubao.

²³ Tialima, dage tomode dego te poba olo muaibawe?

Megi gagalasa, te dagego eno po bugagia odaibawe?

²⁴ Dego mu te sę yao po obaso,
te boi bidi dabe aselama,
te da Israel dabego nai dolama, wi sagasaliwe?

Dego mu te da Jekopgo hani bage
te augwaligo nogoba muaniwe?

Te Genuai Bidigo naga dao.

Magi baso meni, dago aga tudiba munama,
te dwai sęęę sabo sę yai.

Dago te agai wei homu ebo kolesagade dolo bilisama,
tama dago agai bomo yai po sela sawai.

²⁵ Tama tibaso, agai te boi bidi dabego
daba hwiagasomainu tagalama,
te dago agai haliga sębę ebo page konemainu yali.

Agai haliga sębę te sia dabo tiwai elama,
te Israel mu ulali.

Tiali goli, dago tede kolesaga selama,
te dago kolesaga me hasegelebeo.

43

Godigo te aga we bidi dabe ma dobola sabo dao po wali

¹ Dage Israel dabe, dage Jekopgo hani,
Genuai Bidigo dage deli hani pedalumainu ilali,
agai te tiwai po wai,

“Dage wi igio, magi baso meni, eno dage ma sali dao.
Eno dageba nogi menama,
tama dage te ena da olama, sa muyu daj ilai dao.

² Dagego te aj gebo aiyanu dulai te nogebo sogo,
te ena dage dali bidaibao,
tama te ajigo dage me dologobeo.

Awe, dage te soabo aj nogebo si,
te ajigo dage mesegelegobeo.

Tama dage te posolo yai sia tomoba mu pabo sogo,

te siago dage me dogobeo.
 Te sia bogoligo dage dogobeo.
³ Magi baso meni, ena Genuai Bidi,
 ena te Israel dabe duga God, te eno dage tau saibao.
 Ena te Wiegi Yai Doloba Pai Kolesaga Ebo God dao,
 eno naga eno dage ma dobola sobao.
 Dage te boi bidi dabego nogode bidibo sogo,
 eno te Isip dabe, me Sudan dabe,
 me Seba dabe menama,
 dobu si eyu, dage Israel bage ma saibao.
⁴ Tama eno te gasa hani we bidi dabe me siyu,
 te dage ma dobu si yaibao,
 te dage bugagia bidimainu yaibao.
 Magi baso meni, dage eno godolo homu ebo
 umabo mu idu,
 te eno dageba genuai nogi mawainu ebao.
⁵ Ena dage dali bidibao, dage wi me igio.
 Dage hani dabe te giliga pedalubo badu,
 me giliga dega sabo badu bidibo,
 te augwali eno ma odasa asaibao.
⁶ Eno te bidi dabe te not badu,
 me saut badu bidibo bidi dabebolo olama,
 te dage ma asomainu ilao waibao.
 Te eno we bidi dabe te digibulu mu,
 te t̄o sesege badu bidali me,
 te augwali eno ma odasa asaibao.
⁷ Dage te eno nogi elalubo hani mu da,
 te ena digi eno dage nigali,
 te gasa hani dabego dage sulama,
 te enaba genuai nogi momainu ebo dao,” wali.

Te Israel dabe te Genuai Bidigo ebo s̄ sulama, koneani bage tiwai dao

⁸ Godigo te po wai,

“Te eno we bidi dabe i olama, sisinagasomainao.
 Te mu tama, augwaligo te nai subo gedu elalu,
 te po odobo olo elalubao.
 Tiali goli augwali gedu widai me olo degai tiwai bidibao.
⁹ Te gasa bulu tɔ kantri we bidi dabe
 te po tɔ yabo pesageba sisingasalio.
 Te augwaligo mena godigo te mena sɛ nosali pedelaibao
 wabo po hania pusaliwe?
 Te augwaligo mena godigo polobadu po weyu,
 te pedelaibao wali nai megɪ pedalubowe?
 Te augwaligo ebo sɛ suali mena bidi hani dolugulama,
 te tiwai po weyu, agai te god me deligo te nai me
 pedelaibao po wali,
 tama nosali agai suali, te wali sɛ mu pedalubo
 dawe?”
¹⁰ “Tialima, dage Israel, dage te eno po odolama,
 pusubo bage dao.
 Eno dage sa muyu, daɣɪ ilama,
 te ena sɛ bidi bidimainu yalio.
 Tama tiyu da, te dagego ena koneama,
 enaba homu daɣɪ weyu, tama te tiwai dagego
 bugagia koneyu,
 te ena deli naga te God mu da omainu ebao.
 Polobadu te god me deli me pedalisiaɲa,
 te aga polasa bidiyu,
 te ena nosali badu me elalubeo.
 Tama nosali me, te god me deligo ena bidali pesage
 me hasegelegobeo.
¹¹ Ena naga ena Genuai Bidi dao,
 tama sesemane sogo eno dage ma sabo dao.
 Te gasa god dage dali me bidiyu,
 te dage tau me sabeo. Menio.
¹² Eno naga enade po hanilama weyu,

eno dage ma dobola saibao,
 te eno dage ma saibao po wali gilama yaibao.
 Te dage eno po odolama, pusubo bage
 elalubao, tama dagego e po pusaibao,
 te ena deli naga ena God, Genuai Bidi dao.

¹³ Megi me, tigidali sogo, ena te God mu bidibao.
 Te eno we bidi me deli te bonogo kębo tiwai eyu da,
 te niwai bidi me deligo te eno bomo sela şanama,
 te augwali eno nogode ma dobola sogobeo.
 Te şę me deli eno ebaso da,
 te mena bidi me deligo eno te şę ebo
 me paligobe,” te po wai.

Godigo te Israel dabe Babilonde kalabus bidibo ma saibao

¹⁴ Genuai Bidi, aga te dage Israel Dabego te Wiegi Yai
 Doloba Pai Kolesaga Naga Mu Ebo God,
 te aga dage ugwaba sagoalu,
 te dage ma dobola sabo bidi, agai te po wali,
 “Te eno we bidi dabe dage tobade eno te ami bidi dabe
 te Babilonba hwjagasomainu tagala palaibao.
 Te Babilon dabe tigidali augwa te wiegi yai homu
 pemene ebo te sip dabe daiba holama,
 te augwa bidali bulu pesage tagalama, wi paibao.

¹⁵ Ena naga ena Genuai Bidi,
 ena dagego te Wiegi Yai Doloba Pai Kolesaga Naga
 Ebo God dao.
 Eno dage Israel dabe te deli hani we bidi pedalumainu
 ilama, te megı ena duga king bidibo dao.”

¹⁶ “Polobadu ena Genuai Bidi, eno te tamu ąı tomode
 sunumi nigai dao. Awe, eno te bomai ąıdu soabo tų nigai
 dao. ¹⁷ Tama eno te boi bidi hauwa dali, te augwa karis
 me hos dabe dali, augwa te tamu ąı sunumi tomodu wali
 asobadi, te augwali mu dolama, te munu ma hogodalubeo.

Augwali te polo tama mu isila pali, te lam sole bidigo pona palobode isibo tiwai yalio. ¹⁸ Tialima, megì eno te po obao, dagego eno te polobadu yali seḡe naga homu kone paligio. Menio. ¹⁹ Dagego te gesi seḡ eno eboba tonono yao. Te megì pedaludubo seḡ te dagego sube da, agawe? Te wa pai pesage badu te eno sunumi nigilama, tama eno te aḡi dabe tebadu pomainu ilaibao. ²⁰ Te bulu uni hasa dabe te uni yowi dabe tiwai, te ba uni dabe me, te augwaligo ena genuai nogi mawaibao, eno te aḡi te wa pai bulu pesageba asomainu ilama, pedalubo side, te ena digi eno sa muyu ḡaḡi ilali we bidi, augwa te aḡi tumainu tiaibao. ²¹ Eno te we bidi dabe te ena hani we bidi digi pedalumainu ilali, te augwa wiegi yai pemene eyu, te eno genuai nogi po pusumainu te tama tiaibao wali.” Genuai Bidigo te po wali.

Te Israel dabego dwai kolesagago te Godiba seḡe mawai

²² Genuai Bidigo te po wai, “Dage Israel dabe,
 dage te Jekopgo hani,
 eno dage te eno hani we bidi digi pedalumainu ilali
 goli,
 dagego eno nogi wasiayu, enaba lotu wabeo.
 Tama magi naigo tibaso, te dagego enaba hagela eyu,
 te dagego ena godolo mu isiayu ebawe?
²³⁻²⁴ Te dagego haliga homu kolesaga enaba beaga
 sisama,
 te dagego haniani ofa ebo sogo tama tibao.
 Te dagego te sipsip dabe te tigidali siaba mu uluyu,
 ofa tiwai ebo sogo,
 tama dagego te tobage awi te denami ebo nai abelama,
 te agaba ofa ebo sogo,
 te dagego te kibu hasa ili hauwa pesage holama,
 te ofa tiwai eyu ebo sogo,
 te dagego enaba homu kone palama, te ofa dabe ebeo.

Eno dageba te seḡe mayu, te dageba po bomo eyu,
 dagego te wit ofa me,
 te wiegi yai denami ebo hano
 ebo ofa me, sesao po wabe, tama te seḡe dene
 ebaso,
 te dagego enade hagela homu ebeo. Mu menio.

Tiali goli, dagego genuai seḡe enabolo menama,
 tama ena dagego te dwai seḡe ebode,
 me haniani dwai kolesaga ebode hagela mu ebo dao.

²⁵ Tialima, ena Genuai Bidi, ena genuai nogiba digi
 homu kone palama,
 te eno dagego dwai seḡe ebo seḡe tigidali sela saḡo
 dao.

Tama eno te dwai seḡe dabeba homu kone me palogobeo,”
 te po wali.

²⁶ “Tialima, dagego homu kone palao,
 te dagego dwai seḡe me ebe homu eba wida,
 teda dagego eno homu dodolama,
 te da tede po minao.

²⁷ Tiali goli, menio.

Te dagego hasia waḡi noḡo te dwai seḡe yali,*
 te dagego tobolu bidi dabego me eno
 po sela saḡwai dao.

²⁸ Tama tibaso, eno te het pris dabe eno gedude meda
 yai pedalumainu ilali.

Te eno dage Israel daḡi ilali, te Jekopgo hani dabe,
 te tigidali mu dolomainu yaibao.

Tama eno te gasa hani we bidigo te posobo po weyu,
 te dageba gisugu momainu yaibao,” wali.

* 43:27: Dago homu te “hasia waḡi noḡ” bidi da, te Jekop dao.

44

Genuai Bidigo aga we bidi dabe tonalubao

¹ Genuai Bidigo te po wali, “Awe, eno dage dolomainu yaibao.

Tiali goli, dage Israel dabe,
dage Jekopgo hani, dagego odião.

Ena digi eno dage ɖɛ̃ ilama,
te dage eno sɛ̃ bidi bidibao.

² Eno dage te deli hani we bidi pedalumainu ilali.

Eno dage sisi ilama, dage ɖɛ̃ iliyu,
te dage tɔ̃de pedalisiɛ̃badi,
te sogo te dage ena hani da olama,
ɖɛ̃ ilibo tiwai yali.

Te eno dage negeyu, tonalua asali,
te megi e sogoba usu nagasobao.

Ena digi eno dage ɖɛ̃ ilama,
tama dage eno doloba pai sɛ̃ bidi bidibao.

Tama tialima, ena Genuai Bidi, eno te po obao,
dage wi me elamu dao.

³ Te ɛ̃ sɔ̃ pabo tɔ̃ba eno te ɛ̃ gelaibao,
tama te wa pai tɔ̃de te ɛ̃ somainu ilaibao.

Te eno mobo bidi te dagego wai dabeba gelaibao.

Te eno dagego waigo ame nabo wai dabeba
wiegi yai bugagia ilaibao.

⁴ Tama augwali te wɛ̃ ili hauwa elalubo nosai
bugagia holobo tiwai yaibao,
te ɛ̃ sesegede ni dabe holobo tiwai puapi holaibao.

⁵ Te meba gasa Israel hani isɛ̃wai we bidigo
konealubo homu enaba ɖɛ̃ waibao.

Augwali mebago te tiwai po waibao,
‘Ena Genuai Bidigo bidi dao,’ waibao.

Te mebago te po weyu,

‘Ena te Jekopgo hani da,’ waibao.
 Te me badugo eno nogi te augwa nogode asēaibao.
 Te me badugo te po weyu, ‘Ena te Israel hani da,’
 po waibao,” wali.

*Te tibo god nigibo bidi dabe, augwali te kolesaga umuna sai
 bidi mu dao*

⁶ Tigidali Bomo Elalubo Genuai Bidi,
 aga te Israel king da,
 te dage tudibadu pogalu, te dage
 tau sabo bidi, agai te po wai,
 “Ena Genuai Bidi, ena hasia polasa mu bidali,
 tama ena nosali te sabi badu mu bidaibao.
 Te gasa god munu me bidibeo,
 enaduba deli naga bidibo dao.*

⁷ Te ena tiwai god me deli bidibawe?
 Te aga bidiba wida, teda aga digi te daba pedalubo
 sueibao.
 Tama agai me dabolo te aga polobadu polobadu mu
 yali sē po omainu yaibao, te eno gagalama,
 te we bidi pedelali po tiwai wabo odaibao.
 Tama agai te nosali pedelabo sē po me omainao.
 Awe, te aga hanilama pusao,
 te da tigidaligo te nosali yabo sē po
 hania pusubo odaibao.

⁸ Eno we bidi dabe, dage wi elama, dili tidibi igio.
 Polobadu digi eno dageba weyu,
 te sē pedelaibao po wali.
 Tama dage te eno ebo sē po te mu po da wabo bage
 dao.
 Te ena tiwai gasa god me bidiba homu eba, agawe?
 Eno te me deli munu me konebeo.
 Ena deli naga te dagego toma nabo bomai pesage tiwai

* 44:6: Ais 48:12; Ped 1:17; 22:13

elalubo dao.”

⁹ “Te tibo god piksa noma nigibo bidi dabe,
augwa digi te dwai mu ilibao.

Te sawi wiegi yai piksa augwa wiegi yai pemene ebo,
augwali te olo nai tiwai ebao.

Te tibo godiba lotu wabo bidi dabe, tiwai bidibao.

Tiali goli, te augwali hale mu yaibao, magi baso meni,
augwaligo te tibo godigo magi sę me deli ebo
me sugobeo.

Augwali te homu kolesaga mu umuna sai bidi tiwai dao.

¹⁰ Augwaligo mena tobage homu kolesaga elalubo,
augwaligo te tiwai tibo godigo piksa nigibawe?

Te tibo god dabego augwali dwasianu munu me
tau sogobeo. Mu menio.

¹¹ Te tibo godiba lotu wabo bidi dabe te hale dwai
mu yaibao,

magi baso meni, te bidi dabe augwa digi te tibo god
nigibao.

Eno homugo te augwa tigidali sisinagaselama,
te augwa dolugulama,

te augwa tibo godigo mena sę ebo po te pusumainu
yaibao.

Mu tama, te eno augwali wi mu ilibaso,

te augwali hale dwai mu yaibao.” Te po wai.

¹² “Te aingo nai nigibo koneai bidi dabego te ain
selama,

siaba munama, nagamea pabo si,

tama augwa te tibo god piksa nigibo dao.

Augwa te hama nogogo tulama, te ainba elibaso,

te augwa bomogo digi te piksa nigilama pedelali.

Te augwa sę ebo sogo, te augwa nai me wę tusiąwani
da,

te augwa bomo tigidali sia sabo dao.”

13 “Te nigo piksa noma nigibo koneai bidi dabego,
 augwa te wiegi yai ni dage selama, usu selama,
 te bugagia mu dodolama, te piksa nigainu ebo dao.

Tialima, te pensilgo te piksa noma aseñama,
 te piksa togwabo bugagia usu nama usu sali.

Nosali augwa te ni togobo nai sisel selama,
 te aseñani dañdu wali pelama,
 te piksa togoyu, sawi mu elama,
 te sawi gesi ogwa bidi me deli tonobo tiwai ebo dao.

Tialima, augwa te nigo dulama nigali tibo god,
 te augwa lotu be tomoba muyu ebo dao.

14 Augwa te se yainogo te dwagi yai ni sida togwali.

Tama augwa te busi tomoba pelama,
 te wiegi yai ni kali dabe gegegi pelama, habu
 selama,
 dañ ilali, augwa te ni genuai igulubo sogo togwainu
 tiali.

Te augwa te ni wuli wai me bulali,
 te tulubagego te ni genuai ilibo tonaluali,
 augwa te ni selama, te se yainu tiai dao.

15 Augwa te ni dabe togolama,
 te me badu togwa sabo ni dage te tigi posolo ilabo
 nogabo sia sali,

tama te togwa sabo delage me badu te bret ulabo sia
 sali.

Tiali goli, te ni dage me deli augwa selama,
 te augwa tibo god piksa nigilama,
 augwa lotu po teba wai dao.

16 Augwa te tama kolesaga te ni dabede yalio.

Augwa te sia nogolama,
 te nai me hasa ula tuainu yali,
 te augwa nai tulama, haliga pağanani.

Tama me, te augwa tigi posolo iliyu,

te po wali, 'Sia wiegi yai mu dao,
te eno tigi bugagia mu posolo ilibo dao,' wali.

¹⁷ Tama te ni dabego naga te augwa tibo god nigiyu
yali.

Te augwa kidu sugunama, te augwaliba lotu wabo dao.

Te augwa te tiwai gedu haluasa po weyu,
'Nago ena tau sao, magi baso meni,
nage eno god dao,' te po wabo dao."

¹⁸ "Mu tamao, te tobage we bidi dabe
te homu kolesaga mu umuna selama,
te augwa homu kolesaga mu meni yai.

Te magi nai me deligo augwa gedu paliama,
te augwa tonono bilibo usu isaḅo tiwai ebo dao.

Te magi nai me deligo augwa homu kone tuḅ palobaso,
tama augwa te homu kone tuḅ pabo kolesaga ebo
dao.

¹⁹ Te homu kolesaga elalubo bidigo da,
te kolesaga dagalama, te po weyu,

'Eno te ni delagego te sia me badu nogoyu,
te eno bret me kibu mi ulama tubao homu igi dao.

Magi elama eno te ni dagego me deli selama,
te piksa dwai nai me deli nigilama,
kidu sugunama, teba lotu oba, agawe?" te po wagi
dao.

Tiali goli, te homu kolesaga kone tuḅ pai
we bidigo homu kolesaga menisaḅu,
tama te tobage po augwaligo me wagobeo.

²⁰ Augwa homu kolesaga te mu kone tuḅ palio,
tama augwa te geda mubo homu kolesaga mu eyu,
te bidigo sia keli tubo tiwai yalio.

Te we bidi dabe me deligo homu kolesaga dolo ma siyu,
te po wabo sunumi deli me menio,

'Te eno dolo nogode tolalubo nai, te ni dage naga,

te god meni,' te po wagobeo.' ” Te po wai.

Te agai genuai bomogo Genuai Bidigo te Israel dabe ma sali

²¹ Genuai Bidigo te tama po wali,

“Dage Israel, dage te Jekopgo hani,

dage eno sę bidi dao, dagego ena homu kone gegeda paligio,

te eno dage deli hani we bidi pedalumainu ilama,

te dage eno sę ebo we bidi bidibao.

Tama eno dage homu kone me gegeda palogobeo.

²² Eno dagego dwai sę yali sęęę sela sawanio,

tama augwali te pọ waligo selasa pabo tiwai yalio.

Te dagego yali dwai sę te kigamu pọ te giliga

pedalubode sia sabo tiwai yalio.

Eno dage ma salio, tama tialima,

dage enaba ma asiąo,” wali.

²³ Dagal, nage wiegi yai pemene elama, i wao,

tama te tọ dologode aiyadu elalubo nai dabe,

dagego i waiąo.

Dage bulu du dabe me, dage te genuai ni silide elalubo

tigidali ni dabe,

dagego wiegi yai pemene elama, i wao.

Tigidali nai i wao, magi baso meni,

Genuai Bidigo bomo me genuai nogi

te dage Israel dabe ma sali sogo ola mawai dao.

²⁴ “Ena Genuai Bidi, ena dage tudibadu pogwalu,

te dage ma dobola sabo bidi,

eno naga eno sisilama, dage dąj ilali,

te ena hani da olama,

te dage e tọba pedalisıąbadi tama tiali.

Eno te tiwai po dageba wainu ebao.

Enaduba deligo naga eno te tigidali nai

pedela silimainu ilali.

Eno naga eno te dagalu me tɔ nigitama,
te augwali bidabo pesageba munama,
te megi elalubo dao.

²⁵ Eno te magi nai me deli te nosali pedelaibao po
wabo bidi dabego po te homu kone tuꝯ palama,
tama te augwaligo po geda mueibao.

Tama te mena sɛ aga nade konea pai bidigo po homu
kone tuꝯ palaibao.

Te po page konea pai bidigo homu kolesaga te eno
umuna palobo bidi tiwai pedalumainu ilibo dao.*

²⁶ Te eno sɛ bidigo magi sɛ yabo po me deli pusubo
sogo,
tama te sɛ nosali badu pedelaibao,
te po eno wabo sogo da,
teda eno te po mu naga pedalumainu ebo dao.

Te megi eno te tiwai po obao.

Te we bidi dabe te Jerusalemde ma bidigi pelama,
bidaibao.

Me te Juda dabego taun augwa ma nigaibao.

Te megi dolama elalubo hanu dabe
te eno ma wiegi yai nigilaibao.

²⁷ Eno te po wabo sogo, "Tamu aꝯ,
nage sula sao,' obaso da, teda aga te sula sabo dao.

²⁸ Tama eno te tiwai po wali,
ena digi eno te Sairus te Persia bagego king tiwai
nigilali,
te eno homugo emainu ebo sɛ tigidali agai emainu
homu yali.

Agai te po obaso, augwaligo te Jerusalem ma nigaibao,
me augwaligo eno be sɛ yabo sɛ gagalaibao," te po
wali.*

* 44:25: 1 Ko 1:20 * 44:28: 2 Sto 36:23; Esr 1:2

45

Genuai Bidigo Sairus king pedalumainu nigilali

- ¹ Genuai Bidigo te tiwai po wali, “Eno te Sairus sa munama, te Persia bulu t̄ kantri king pedalumainu yali, te agabolo eno te gasa bulu t̄ kantri dabe aiyaba elaluama, te gasa kingo bomo dabe silimainu yabo bomo mawai.
Ena digi eno te taun obo sunumi dala palama, te Sairus tomoba pelama, te taun somainu elali.
Te Sairusbolo eno te tiwai po wai dao,
- ² ‘Te nage pabodu ena polasa peyu, te bulu du pesage dabe me alula tagalama, te doloba pai pesage nigilaibao.
Eno augwaligo te brasgo nigai genuai hanu sunumi aluama, te boma pai ba aingo te daḡ walali sunumi te me aluama, dala saḡwaibao.
- ³ Eno te mone nageba mayu, te hani dabego te bidigo susaḡyabo pesagede dualali wiegi yai dila pai nai dabe te nageba mawaibao.
Tama tialima, te nago koneaibao, ena naga Genuai Bidi da waibao.
Te nago koneyu, te Israelgo Godigo naga te nago nogi olama, te nage i wabo da homu koneaibao.
- ⁴ Te eno seḡ bidi Israel hani tau sagasao po olama, eno nage i wali, te Jekopgo hani we bidi te ena digi sa muani.
Mu tama, nago ena konesiḡawai, tiali goli eno nage nogi olama, te genuai nogi nageba mawai dao.’ ”

⁵ “ ‘Enaduba deli naga ena Genuai Bidi da,
te gasa god me bidibeo.

Sairus, nago ena konesiawai,
tiali goli te eno naga te bomo nageba mabo dao.

⁶ Eno tama tibaso,
te tigidali tɔ habu pedai we bidigo
te tiwai konemainu yali,
ena deli naga ena Genuai Bidi,
te gasa god munu me bidibeo.

⁷ Eno naga eno te po obaso, te be posoyu,
be huliyu ebao.

Te eno naga te we bidi bugagia bidimainu ebao,
te eno augwali te genuai seḡe somainu yaibao.

Genuai Bidi eno naga,
eno te seḡ tigidali pedalumainu ebo dao.’ ”

⁸ “Dagalu, nage te dage pɔ dabe me,
dagego te wiegi yai sogo augwaliba ilibaso,
te tulubage tɔba tulumainao.

Te augwa bugagia bidimainu,
te wiegi yai doloba pai kolesaga bomo elama,
pedalumainu ebao, te tɔgo tulubage selama,
te gide nai dabe bugagia holobo tiwai emainao.

Ena Genuai Bidigo digi,
eno te seḡ dabe pedalumainu tebo dao,” te po wali.

Genuai Bidigo naga te tigidali nai tonalubao

⁹ Mena bidigo te Godigo aga nigalide
wado po wabo bidi da,
te bidigo kolesaga te umuna sai mu yali,
magi baso meni, da bidi te olo nai gagawai dao.
Da te tɔgo nigibo sene pepeda pelama,
e tɔde tedali munalua pabo tiwai elalubao.
Te tɔgo nigibo senego te nigibo bidiba

- te tiwai po hanalu,
 “Nago magi nai nigibawe?” po wagawe? Menio.
 Te tōgo te po wabo homu yaibao,
 “Nago te nai nigibo konesiawai dao,”
 te tobage po wabo usugowe? Mu menio. *
- ¹⁰ Mena bidigo te aga aya idabolo te tiwai po hanalu,
 “Te magi nai dage sigo ame nani dawe?”
 te po wabo bidigo kolesaga te umuna sai mu dao.
- ¹¹ Genuai Bidi, Israelgo Wiegi Yai Doloba Pai Kolesaga
 Mu Ebo God da,
 te God agai te Israel deli hani we bidi pedalubo sę
 ilali, agai te tama po wai,
 “Te nosali pedelabo nai po wabode
 dagego te eno ena wai puluba tonalubo sę po munu
 me wagio,
 te mena kolesaga te eno ena sę eyu,
 wali pabo po me wagio.
- ¹² Eno naga eno te tō nigali,
 te bidalubo we bidi dabe me nigali.
 Te ena digi eno te giliga, me polua,
 me hō dabe tonalubo dao.
- ¹³ Te eno digi eno te king Sairus hodolama,
 te eno ena sę wiegi yai doloba pai emainu yali.
 Te eno aga painu ebo sunumi tigidali dodolaibao.
 Te agai eno taun Jerusalem ma nigimainu yaibao.
 Te agai eno we bidi dabe kalabuside bidali
 te olo tagala palama pomainu yaibao.
 Te sę dabe ebo te bidigo aga me abeligobeo. Menio.
 Aga olo mu sę yaibao.
 Ena, te Tigidali Bomo Elalubo Genuai Bidigo,
 eno te po wai dao.”
- ¹⁴ Genuai Bidigo te po wai, “Te Isip tō kantrigo mone

* 45:9: Rom 9:20

doado bage tigidali,
me te tɔ kantri Sudango doado bage tigidali me,
te dage Israelgo saibao.

Te boi bidi dabego te tɔ kantri Seba
bobobage bidi dabe te kalabus ilama,
te augwali dageba tagala palaibao.

Tama augwaligo nogo te sen dabego dunama,
augwali dage wali asu, te augwali dagego olo sɛ ebo
bidi dabe pedelaibao.

Te augwaligo dageba kidu sugunama,
tama wi eyu, te tiwai po waibao,
'Mu tamao, God dage dali bidibao,' waibao.
'Aga deli naga te God mu,
te gasa god me bidibao,' waibao.

¹⁵ 'Nage te Israelgo God,
nago te naga we bidi dabe ma sabo God dao,
te gasa we bidi dabede nage te naga digi geme duala
selama elalubo dao.

¹⁶ Te tibo god piksa nigibo bidi dabe,
te augwali hale mu yaibao.

Awe, te augwali tigidali te hale ebo kolesaga tomoba
mu paibao.

¹⁷ Tiali goli, Genuai Bidigo dage Israel ma selama,
te sesemane sogo agai dage ugwaba igulama,
ugwa ela holomainu ilaibao.

Te dage gasa we bidi hani dabede munu ma hale me
isama,
te dage sesemane sogo bugagia bidada peyu, bidada
paibao.'

Te Seba tɔ kantri bagego te tobage po waibao,"
Genuai Bidigo te po wai.

¹⁸ Genuai Bidi naga te God.

Agai te dagalu dali, tɔ dali si nigali bomo mu pedelali.

Agai te t̄o olo elalumainu nigibeo. Menio.

Agai te t̄o page bugagia dodolama,
tama tigidali nai tede elalumainu nigali.

Agai te tiwai po obao, “Enaduba deli naga ena Genuai Bidi,

te gasa god munu me bidibeo.

¹⁹ Ena geme dualalu, digibulu me bidibeo,
ena te be hulua sai pesagede, digibulu geme me
dualalu, te eno po pusubeo.

Te eno ena we bidi dabe,
te Israel dabeba, te tiwai po weyu,
‘Dagego ena te olo bulu pesagede gegebo
s̄e odolali yao,’ wabeo. Menio.

Ena Genuai Bidi, eno te mu po naga pusubo dao,
te eno po tigidali dolo wabo dao,” wali.

Tigidali t̄ode we bidigo te Genuai Bidi dologode bidao

²⁰ Genuai Bidigo te tiwai po wali,
“Te tigidali t̄o kantri we bidi dabe, dage sisinagasīo.
Te hw̄jani sogode dolis̄ama bidalubo we bidi dabe,
dage tigidali te po t̄uba asīo.

Tama dego te tibo god piksa dali sela asobo bidi,
aga homu kolesaga mu meni ebao.

Aga te tibo godiba gedu haluasa po weyu,
aga tau somainu tiaibao,
tiali goli te god te bidigo nigo dulama naga nigali,
tama agai te bidi tau sabo usu me egobeo.

²¹ Dage tigidali we bidi, dage aselama,
dagego po te po t̄uba pusagasao.

Dagego duga haside digi hanalu, te gega suyu bolo yao,
mena god mugo te polobadu mu po wali s̄e po te
megi tama pedalubo dawē?

Ena Genuai Bidi, ena deligo naga eno
te nai dabe pedelaiba po pusali.

Tama suao. Te gasa god munu me bidibeo.

Ena te doloba pai kolesaga naga ebo God,
eno te ena we bidi dabe ma dobola sabo God da,
enaduba deli naga ena bidibo dao.”

²² “Dage tigidali bulu t̄o habu we bidi dabe,
dage enaba asīo,
te dage bugagia bidaibao, magi baso meni,
enaduba deli ena God, te gasa god munu me bidibeo.

²³ Ena Genuai Bidi, ena nogide digi
daide ugwadu mu po obao,
te eno pedauwalide wali po te me hasegelegobeo.

Eno te tama po wali, te t̄o t̄e tigidali
we bidi enaba aselama,
te enaba kidu sugunagasaibao,
te augwali tigidaligo ena dologode naga bidabo po
d̄āu waibao, te po wai. *

²⁴ Te augwaligo te tama po waibao,
‘Genuai Bidigo naga te da tau siyu,
te da d̄āu waliyu,
te doloba pai kolesaga ugwa igulama,
ugwa ela holomainu yaibao,’
te po augwaligo waibao,” wali.

Tigidali we bidi agaba asobaso,
te agaba haliga s̄e b̄e ebo hani dabe
te augwali dwai hale mu yaibao.

²⁵ Tialima, te Jekopgo bulai hani w̄āi dabe,
te augwa ugwa ela holama,
te genuai nogi elalumainu elalide,
te augwa wiegi yai pemene Genuai Bidiba yaibao.

* 45:23: Rom 14:11; Fil 2:10-11

46

Genuai Bidigo bomo naga elalubao, te tibo god dabe olo piksa dao

¹⁻² Genuai Bidigo te tiwai po wai,

“Dage Babilon dabego te Bel me Nebo si
nogi ugwaba sobao,
te si duga tibo god si elalubao,
te augwali si dagego tolasa,
te genuai lotu wabo side sabilibao.

Tiali goli, te augwali sigo genuai nogi te sia saibao,
te dagego te tiwai sueibao,
te augwa digi tau sabo bomo meni yaibao.

Te boi bidi dabego te Babilon taun dolagasobaso,
te dagego augwali si te donki dabede kęnaibao.

Te donki dabego te hobedagia,
te augwali si te kalabus dage dali
sela pabo sę dene yaibao,” te po wai.

³ “Tialima, dage dwasianu Israel te bidibo hani,
dage te Jekopgo hani, dage hani eno selama,
te bugagia negeyu tonaluali,
te dage gesi hani we bidi pedelali sogo gagalasa,
tama tiali, dagego odao.

⁴ Ena duga God dao, te eno dage tonalua pidubadi,
te dage monu dabe eboba usu nama,
te ayadeba nisi elaluaibao.

Ena digi eno dage deli hani we bidi pedalumainu ilali,
te sesemane sogo eno dage auąlu, te tonalu,
te dage ma dobola saibao.”

⁵ “De mu ena tiwai dawę?

Te dagego eno kolesaga te de dali mu dagalaibawe?
Te eno kolesaga tiwai gagawai ebo bidi deli bidiba,
agawe?

⁶⁻⁷ Tiali goli, bidi mebago te gol me

silva hauwa pesage holama,
 te augwa tibo god piksa nigainu dagalaibao.
 Tialima, te nai dabego te augwa tibo god nigali.
 Tialima, augwa te tibo god augwa nageba munama,
 te tolasa pelama, te augwa muabo
 nigilali pesageba mugi pabo dao.
 Augwa teba kidu sugunama, lotu wabo dao.
 Te tibo god te mugi pali pesage delide naga munaluali,
 magi baso meni, aga digi te gasaba bilabo usu
 isaʔwai.
 Te agai te bidi dabego aga gedu haluasa po weyu,
 i wabo wei ponabo usu meni yai,
 agai augwali te dwai sogode
 tau sabo me usu egobeo. Mu menio.”
⁸ “Dage hagoma eyu, po sela saʔbo bidi dabe,
 dagego eno te pusubo po bugagia homu kone palao.
 Tama tiyu, te dage bomo elama, dolalueibao.
⁹ Tama dagego eno te polobadu mu
 yali seʔ homu kone palao,
 magi baso meni, enaduba deli naga ena te God,
 te gasa god me bidibeo.
 Ena naga ena God, te ena tiwai god me bidibeo.
¹⁰ Te magi deli me pedalisaʔbadi,
 eno te tama seʔ pedelaibao po weyu,
 te mena tama siligi pabo po waibao.
 Polobadu digi eno te seʔ pedelabo po olama,
 tama nosali te nai dabe te eno po wali gilama pedelaibao.
 Te eno mena seʔ me deli yainogo da,
 teda te seʔ eno eyu naga yaibao.
 Te magi nai me deligo eno te seʔ yabo sunumi
 me paligobeo.
¹¹ Eno te giliga pedalubo badu bidi me deli

asao olama, i wali, *
 agai te ba kemedage bola asobo tiwai yaibao,
 te agai eno yabo homu yali sę yaibao.

Eno te sę yao po walio,
 te eno po wali tiwai gilama te tama pedelaibao.
 Te eno yaibao olama, daj ilali sę, eno te sę ebo dao.”

¹² “Dage hagoma bidi dabe, eno po odao.

Dagego homugo te eno dage sa munama,
 ma saibao wali sogo,
 te digibulu elaluba homu eba, agawe?

¹³ Menio. Te paba pedelalio.

Te eno munu ma tonalugobeo.

Te eno dage Israel dabeba boi bidi ebo
 bidi dabeba dene mu menama,
 te dage bugagia ma bidaibao.

Te Jerusalem taun me wiegi yai bugagia ma ilaibao,
 te eno ena genuai nogi me bomo te dage Israel dabe
 tomode hania pepeli diliba pedalumainu yaibao,”
 wai dao.

47

Genuai Bidigo te Babilon dolaibao po wali

¹ Genuai Bidigo te tiwai po Babilonba wali,
 “Babilon, nago genuai nogi mu elalubo,
 te kwin we aga sia kingde dugulalubo tiwai ebao.

Tama nage te gesi wegi bidigo sisawai
 bugagia mu bidibo tiwai ebao.

Tiali goli, megi da, te nage sia kingde
 bidali tagalama,
 te nage olo tọ bulude dugulalueibao.

Te nago tigi te polobadu elaluali tiwai gilama

* 46:11: Te “giliga pedalubo badu bidi wali,” te king Sairus dao. Te po te Daj 41:2-3, tede elalubo suao.

sawi yai me elalugobeo.

Tama te bidi dabego nage te au bugagia elama,
bilibo ma sugobeo.

Mu meni yaibao. *

² Te nage olo mu sę ebo we tiwai gilama sę yaibao.

Te nago tobolude ugwadu banualuali ugwa nami,
me te nago sawi yai ugwa dabe me dagala sęnama,
nago te wit halubo masigi dabe hogogo belebo sę
yao.

Tama nago gudali ugwa sugua selama,
te ąj dabe nogwaibao.

³ Te bidi dabego nago ugwa peda sęnama,
te nago habu olo elalueibao.

Te eno nageba dwai dene wei ponabo sę mu ebaso,
te mena bidigo ena me togologobeo,” te po wali.

⁴ Te Israelgo God, te ągai da tudi badu pogwalu
ma dobola sabo bidi,
ąga te Wiegi Yai Doloba Pai Kolesaga Mu Ebo God
dao.

Ągai nogi da, te Tigidali Bomo Elalubo Genuai Bidi dao.

⁵ Genuai Bidigo Babilonba te tiwai po wali,
“Babilon, nago te naga pedauwali pania selama,
te be hulua sai pesageba duagi pao,
magi baso meni, te gasa hani we bidigo nageba
te nogi munu ma wasiąyu,

‘Te tigidali bulu tų kantri kwin da,’ po me wagobe.

⁶ Eno wado po dwai mu te ena we bidi dabeba wali,
te eno ągwali te ena we bidi da
te tiwai homu kone munu ma ebeo.
Te eno nage aselama, ągwaliba dwai sę
yagasomainu ilali,
te nago ągwaliba homu dene

* 47:1: Rom 14:11; Fil 2:10-11

dwasianu me ebeo. Menio.
 Nago augwaliba dwai dene mu ilama,
 te augwaliba genuai seḡe mawai.
 Te nago monu dabeba me te augwali
 genuai seḡe mu tolomainu ilalio.

⁷ Nago homugo nage te kwin sesemane
 sogo bididuaiba homu yali,
 tama tiyu, nago te nageba nosali pedelabo se te
 bugagia homu kone palobeo.

Mu tama, tede nago homu kone palobeo.”

⁸ “Nage te wiegi yai sogo naga gegelama bidabo homu
 ebo we, te po odao.

Nago homugo nage bugagia bidaiba homu eyu,
 te dwai se nageba me pedalugobe da homu elama, te
 naga digi nago te po wali, ‘Enaduba deligo eno
 tigidali bomo elalubao,
 te ena tiwai gasa me meni,’ wali.

‘Te ena te tiwai we, te aga bidi isama,
 te aga wai puluba me isai,
 te tiwai me pedalugobeo,’ homu yalio.

⁹ Tiali goli, hobede ya, te deli sogo naga te se si
 nageba pedalaibao.

Naga bidi dali, naga wai puluba tigidali me,
 te deli sogo naga isaibao.

Nago te naga digi naga tonalubo haniani
 bomai pobi po elaluba homu yaibao,
 tiali goli te pobi pogo nage tau me sogobeo. Menio.

Te dwai seḡo isaboba kegebao.” *

¹⁰ “Nago tama homu yali, te naga dwai kolesaga
 dabego te nage daḡ walama, bidaiba homu yai.

Tama nago homugo te nago ebo se
 te bidi dabego sube da homu yai.

* 47:9: [Ped 18:7-8](#)

Te nago koneani tobage hauwa kolesagago,
 te nago homu kone tuꝯ palama,
 te nagaba digi nago te tiwai po wali,
 ‘Enaduba deligo naga tigidali bomo elaluba,’ homu yali,
 ‘te ena tiwai gasa me elalubeo,’ wali.

¹¹ Tiali goli, te dwai sogo mu nageba pedelaibao,
 te nago gedu muabo bomu meni yaibao.
 Deli sogo tama mu te dolabo genuai sꝯ nageba
 pedalubaso,
 te magi sꝯ me deligo nago te dolobo sꝯ paliabo
 usu meni yaibao.

Te dwai nai dabe te nago homugo
 nageba pedalugobe da homu yali,
 te pedaliyu, nage mu dolaibao.

¹² Wiewi yai da, nago te haniani bomu pobi usu sidu,
 te nage gesi sogo gesi tigi elalubo
 sogo usu selama, konea sali.

Te augwaligo nage tau sabo homu yali.
 Te augwaligo nago boi bidi dabe wi ilama,
 wi paibao homu yali.

¹³ Te kolesaga koneani bidi hauwago
 te nageba homu kolesaga mayu,
 te nago homu mu dꝯ walali.

Tiali goli, nago te kolesaga koneai bidi dabego
 te hꝯba tonomainu i ola suali,
 te bidi dabe te tigidali poluade nageba aselama,
 te nageba mena sꝯ pedelabo po wali.

Te augwaligo nage tau sabo homu egobewe?

¹⁴ Tiali goli, menio.

Augwali te sasia pai nosai tiwai elalubao,
 te nage dolainu ebo siago te augwali tigidali daibao,
 te augwa digi augwa tau me sogobeo.

Mu tamao, nago homugo nage te isi pꝯba duagi pelama,

sia gogo naiba homu me egobeo. Menio.
Te siago nage tigidali daibao.

¹⁵ Mu tamao, nageba te homu kolesaga mani bidi dabe,
te nage gesi tigi elalubo sogo
te bidi dabego nage tau sali bidi dabe,
te augwali homu kolesaga umuna palama,
te me deligo nage tau me sogobeo,”
Genuai Bidigo te po wai dao.

48

Bidi dabego God deliba naga genuai nogi maiqo po wali

- ¹ Dage Jekopgo hani dabe, dage we bidi nogi
Israel elalubao,
dage te Judago bulai wajgo wai dabe, dagego odao.
Dagego po daꝝ waliyu, nogo guni sisu muyu,
dagego te Genuai Bidigo nogide
mu po dao po wabo dao.
Tama dagego te tiwai po weyu,
dagego te Israelgo Godiba lotu obao po wali,
tiali goli dagego aga dologoba mu pelama,
te doloba pai me ebeo wali.
- ² Tama duga digi duga nogi ugwaba siyu, te po weyu,
dage te God aga digi sa muyu, aga da wali,
te taungo hani we bidi da, po wabo dao.
Tama dage te Israelgo Godide
tau mabo sainu tonalubo dao.
Aga nogi da, te Tigidali Bomo Elalubo Genuai Bidi dao.
- ³ Agai e tiwai po dage dali elalubao wali,
“Polobadu mu eno te po dageba pusuyu,
te nai dabe pedelaibao po wali,
tama eno polo naga tama te seꝝ dabe
pedalumainu ilali.
- ⁴ Magi baso meni. Eno te tiwai bugagia koneani,

dagego tobolu te masigi me ain dila pai tiwai elalu,
tama dagego eno po wali me pisawai dao.

⁵ Tama tialima, polobadu mu eno te dageba pedelabo
nai po hanilama pusali, tiyu dagego te po waidali,
te dagego tibo god dabego,
te piksa dabe dagego te nigo me aingo nigibo nai
dabego te nai dabe pedalumainu yali da po waidali,”
te po wai.

⁶ “Te nai dabe te eno polobadu te pedelaibao po wali,
te augwali pedalubo dagego سوالio.
Te megī dagego te tama po waiyāo, ‘Genuai Bidigo mu
po wabo da po wao.’

Tialima, megī te eno dageba te gesi noma nai pedelali
po obao,
te geme dualaluali nai dabe,
te nai po eno polobadu me wabeo.

⁷ Megī eno te po obaso,
te gesi noma nai mu pedelaibao,
te polobadu me pedalisiawai nai dabe.
Tama te nai te dagego munu me konesiawai,
tama dagego te tama po me wasiāma,
dagego te nai dabe koneai da po me wagobeo.

⁸ Eno te tama koneani, te eno gagalama,
dage te deli hani we bidi pedalumainu ilali sogo,
dage te po sela sayu,
hagoma ebo hani mu pedelali.

Tama tibaso, eno te nai dabe po
dageba hanilama, me pusubeo.”

⁹ “Eno dageba haliga şeḃe mu elama,
eno dage silabo homu yali,
tiali goli sesemane sogo eno
ena genuai nogiba homu kone palama,
te eno haliga şeḃe homu aiyaba

tamugulali, te we bidi dabego
 eno nogi ugwaba somainu tiai dao.

¹⁰ Eno dage wiegi yai pedalumainu homu yali,
 tialima eno dage te siaba me ulusiama,
 te bidi dabego silvade ebo tiwai eyu,
 te aga meda yali sela sawainu ebo tiwai ebeo.
 Menio.

Eno dageba te haniani sege pedalumainu ilali, te
 dagego dwai kolesaga ebo tagalomainu yai dao.

¹¹ Eno ena genuai nogiba homu kone palama,
 eno te kolesaga dageba yalio.

Eno homugo te bidi dabego eno nogi elaluama,
 begela dolidali homu elama,
 te gasaba genuai nogi me magobeo. Menio.

Augwaligo te ena deliba naga genuai nogi momainogo
 ebo dao,” te po wali.

*Genuai Bidigo naga te Sairus sa munama, te agai te boi bidi
 aiyaba elalumainu ilali*

¹² Genuai Bidigo te tiwai po wai,
 “Dage Israel, eno i wali we bidi dabe,
 dage Jekopgo hani dabe, dagego eno po odiao.
 Enaduba deli naga God dao.

Ena polasa mu bidai, te nosali ena sabi badu
 nosali mu elalueibao. *

¹³ Te ena nogogo digi eno nigilama,
 te to page eno dau walali,
 te eno dolo nogogo te dagalu diniginama, elalubao.

Eno te dagalu de to si i wabo sogo,
 te polo tama augwali si aselama,
 te eno geduba dolagasobo dao,” wali.

¹⁴ “Dage tigidali, dage sisinagaselama, eno po odao.

* 48:12: Ais 44:6; Ped 1:17; 22:13

Te tibo god me deligo dageba
 te tiwai po me pusai menio,
 ‘Te Genuai Bidigo godolo homu mu ebo bidi te aselama,
 te Genuai Bidigo sę yagasu, te Babilonba hwĩaibao.
 Te aga bomogo digi, Genuai Bidigo
 te Babilon dabe aiyaba elaluaibao,’
 te tibo god me deligo te po wabe.

¹⁵ Menio. Ena deligo naga eno dageba weyu,
 te bidi asaibao po wali.

Ena digi eno aga asao olama, i wali.

Te eno aga odasa aselama,
 te agai te boi bidi dabe aiyaba elalumainogo yai
 dao,” wali.

¹⁶ “Megi da, dage ena p̄ba aselama, eno po odiāo.
 Polobadu digi gagalasa asali, megi sogoba usu nagasu,
 ena te ses̄wai pesagede geme dualalu,
 augwaliba te nai pedelaibao po pusubeo. Menio.

Te sę dabe pedalisiābadi, eno te tonalu,
 te sę mena tama pedelabo te eno digi dodolobo sę
 yali,” te po wali.

God Genuai Bidigo aga bomo yai mobo bidi dali ena
 tagala palai dao. *

*Genuai Bidigo aga we bidi dabe bugagia wiegi yai ilabo
 sisilama elaluali*

¹⁷ Genuai Bidi, aga te Israelgo Wiegi Yai Doloba Pai

Kolesaga Mu Ebo God,
 aga te dage tudibadu posolalu, te dage tau sabo bidi,
 agai te tiwai po wali,
 “Ena Genuai Bidi, te duga God dao.

* 48:16: Te dago konesīwai, te dego mu te Godigo aga tagala palai da
 po wali. Bidi mebago homugo tiali te profetgo po da homu yali, te mebago
 homugo te Genuai Bidigo sę bidigo po da wali. Te Daj̄ 42:17, te mebago
 homugo te king Sairusgo po dao, te homu yai dao.

Sesemane sogo eno te doloba pai kolesaga dagego wali
peyu,
dage bugagia bidimai hagede ola mabo dao.

18 Te dagego eno po odigi sogo da,
teda dage bugagia megì bidiyu,
te sesemane sogo dagego bidabo ula te wiegi yai
pemene ebo paḡanalugi da,
te aḡ sesemane sogo sodu, te sula sisabo tiwai igi da.

Te dagego doloba pai kolesaga te bomo elama,
sesemane sogo pedaludu, te tamu aḡ
nambisde peda pabo tiwai igi da.

19 Te dagego wai dabe te hauwa mu,
te nambis aḡ masigi kemi sane tiwai pedeligi da.

Te eno augwali bugagia tonalu,
te augwa nogi te e tḡde mu sia sigi menigi da,," te
po wali.

20 Dagego te tḡ kantri Babilon tagalama,
tama te bulu we bidi dabede wi soao.
Te duga pemene elama, genuai po daḡa weyu,
te tigidali tḡ habuba po tagala palu, te tiwai po wao,
"Genuai Bidigo te aga seḡ bidi Israel ma dobola salio,"
po wao.*

21 Polobadu, Genuai Bidigo aga we bidi dabe te bulu
tḡ wa pai pesageba odasa pali,
tiali goli augwali weḡ nogonego me isibeo.
Menio.

Agai te masigide aḡ pedalumainogo ilali.
Agai te masigi dalama,
te aḡ buluba asobode te augwa tuali.

22 Genuai Bidigo te tiwai po wali,
"Te dwai kolesaga ebo we bidi dabe,
te augwa bugagia wiegi yai bidabo sogo me

* 48:20: Ped 18:4

gegegobeo,” te po wai dao. *

49

Genuai Bidigo sę bidi te tigidali tọ kantrigo ula tiwai bidaiobao

¹ Dage te bulu tọ kantri pade, me digibulu

bidalubo we bidi dabe, dagego eno po ođiāo.

Te idago ena ame nisabadi, te Genuai Bidigo ena sa muyu, daj ilama,

enaba te nogi mawai dao. *

² Te agai ena sisi ilama, te eno po bugagia miyu,

te eno pogo te we bidi dabego haligade mu enama, te bainat poai tiwai mu yaibao wali.

Te agai nogogo ena bugagia geme dualali.

Tama agai ena te poa pai ene mu tiwai te polama, muani tiwai yai dao. *

³ Te agai te tiwai po wali,

“Israel, nage eno sę bidi da.

Te nagede naga, te eno bomo,

me eno genuai nogi te tigidali

we bidiba ola mawaibao,” wai dao.

⁴ Tiali goli, eno enade digi te tiwai po obao,

“Eno sę dene mu elama, te eno bomo tigidali sia salio.

Tiali goli, te nai me pedalisiaṃa,

te ena odolali sę dene yalio.”

Tiali goli, tagalao, Genuai Bidigo te eno yali sęde koneama,

tama eno tede sabo nai aga nogode elalubao.

Awe, te eno Godigo ena te sę yalide

wei ponabo nai sisi elama, munolubao.

⁵ Genuai Bidigo ena te idago haligade sa munama,

* 48:22: Ais 57:21 * 49:1: Jer 1:5 * 49:2: Hib 4:12; Ped 1:16

te ena agai sę bidi bidimainu yali.
 Te agai te po enaba weyu, te Israel dabe sisinama,
 te augwali agaba odasa asomainu yali,
 magi baso meni,
 God eno Genuai Bidigo enaba te genuai nogi menama,
 te aga digi ena bomo mawai.
 Te megı da, Genuai Bidigo enaba te tiwai po walio,
⁶ “Hasiabolo eno nageba
 te boi bidi dabego ela musiawai Jekopgo hani dabe
 ma hodolabo sę mawai.
 Eno te Israel bage meba hagea sai dao,
 tama eno nageba te augwali sisinama,
 enaba odasa asabo sę mawai dao.
 Tialima, te sę ebogo te nago bomogo deę me sogobeo.
 Eno te gasa sę me mawaıbao.
 Eno nage te Israel hani isawai we bidi hani tıgıdalıgo
 sole ula tiwai nıgaıbao.
 Awe, nago te eno te tıgıdali bulu tı habu
 we bidi ma dobola sabo sę yaıbao,” te po wali.*
⁷ Genuai Bidi, aga te Israelgo Wıegi Yai Doloba Pai
 Kolesaga Tıgıdali Mu Ebo God dao,
 aga te Israel tudıbadu posolalu, tau sabo bidi
 elalubao,
 agai te po aga sę bidıba wali.
 Aga da te gasa we bidıgo godolo homu isiabo bidi,
 te gasa bulu tı kantri we bidıgo te aga dwai nai mu
 tiwai tonani,
 te aga te genuai bidi dabego olo sę ebo bidi tiwai
 bidali.
 Genuai Bidıgo te tiwai po wali,
 “Te king dabego nage sulama,
 te augwali dolagaselama,

* 49:6: Ais 42:6; Luk 2:32; Tpi 13:47; 26:23

te genuai bidi dabe augwa gesabidi
 te tɔba basigulama,
 te nageba genuai nogi mayu tiaibao.

Augwaligo tama tebo, magi baso meni,
 ena Genuai Bidi, te Israelgo God,
 ena te Wiegi Yai Doloba Pai Kolesaga Mu Ebo God
 da,
 nage sa muani, te eno sɛ emainu yali,
 te eno daɣ wali po te eno me bologobeo,” wali.

⁸ Genuai Bidigo aga sɛ bidiba te tiwai po wali,
 “Eno digi eno nage ma selama,
 te nage wiegi yai ilabo sogo bodolu muani,
 te sogo mu dolo eno nago i wabo odolama,
 nage tau saibao.

Te nage eno bugagia tonaluaibao,
 te nagede naga eno te tɔde we bidi tigidali dali
 bomo yai po daɣ waibao.

Tama eno te Israel tɔ kantri wiegi yai ma pedalumainu
 ilaibao,
 tama te Israel hani augwa te megɛ olo elalubo tɔde
 ma bidaibao. *

⁹ Te eno te kalabuside bidibo,
 me be hulɛ side bidibo bidi dabeba
 te tiwai po weyu, ‘Asao,’ po waibao.
 ‘Dage te kalabus tagalama, olo mu bidaibao,’ ” te po wali.
 “Tama augwa te kalabus tagalama, augwa tɔba ma
 asaibao.

Te augwali sunumidu pebelayu, me bulu dudu pabode,
 te augwa tubo nai hauwa elalueibao.

¹⁰ Te augwali nai me, wɛ me sɔɔ pogobeo,
 te posolai giligago me waligo
 te augwali tigi posolo me egobeo.

* 49:8: 2 Ko 6:2

Magi baso meni, te augwali olo mu tau mabo wiegi yai
 kolesaga ebo bidigo te augwali bugagia tonalu,
 te sipsip tonalubo bidigo te sipsip dabe
 te nosai hauwa elalubo pesageba,
 me wiegi yai wę elalubo madiba

odasa pabo tiwai gilama ebo dao.” *

11 “Te eno nigali bulu du dabe te pepedama,
 dodolaibao, te eno ena genuai sunumi
 pedalumainu yaibao.

12 Tialima, eno te digibulu bidalubo we bidi dabe,
 te not badu me, te giliga dega sigulubo badu me,
 asaibao.

Te augwali te taun Aswan badu me asaibao,” wali. *

13 Dagal, nago te wiegi yai homu pemene eyu, i wao.
 Te tų, nage pemene elama, genuai po daęą wao.
 Dage bulu du dabe, dagego me
 te pemene ebo balia wao.

Magi baso meni, Genuai Bidigo olo mu
 tau mabo wiegi yai kolesaga aga we bidiba ebo dao.
 Augwa te seęę hauwa tolali, tiali goli, megi da,
 Genuai Bidigo augwaliba wiegi yai se elama,
 te augwa haliga dua tamugulama ma bidaibao.

*Genuai Bidigo te we bidi dabe te Jerusalem taunba ma odasa
 asaibao*

14 Te Jerusalem we bidi dabego te tiwai po wali,
 “Genuai Bidigo da tudi ola mobao,
 te agai da homu kone mu gegeda palobao,” wali.

15 Tiali goli, Genuai Bidigo augwaligo

* 49:10: Ped 7:16-17 * 49:12: Tede te po wali, te Hibru pogo te po wali
 “Sinim,” wali, tiali goli te bulu te menade mu elalubo, te dago konebeo. Bidi
 hauwago te homu yai, te profetgo te taun Aswan po olama wali homu yai, te
 taun me deli te Isip tų kantri te saut badu elalui dao.

po wei ponoyu, te tiwai po wali,
 “Te idago aga digi ame nai wai homu kone ebo tagalama,
 te agai aga te ame mani wai

homu dene ebo meni da, agawe?

Te ida me deligo tama me tiabo homu yali goli,
 eno dage homu kone palobo me tagalogobeo.

Mu menio.

¹⁶ Jerusalem, eno nageba homu kone ebo me gegeda
 palogobeo.

Eno nage noma bidi piksa nigali,
 tama eno nogo sawali si daide
 nago nogi dali piksa dali si aseani.

Te sesemane sogo eno sulama,
 nage homu kone palobo dao.

¹⁷ Te nago wai dabe ma asaibao,
 te hanigo dabe nage dolali,
 te augwaligo nage tagalama, wi paibao.

¹⁸ Nago tobolu ugwaba sagulama, tonono bilao,
 te nago naga wai dabe deliba sisinama,
 te nageba asobo sueibao.

Ena Genuai Bidi, ena sesemane sogo bidibao,
 eno mu po obao,
 te nago wai dabe te nago au yabo
 nai dabe tiwai elalueibao,
 te we bidiba painu te sawi yai ugwa
 au ebo tiwai elama elalueibao.”

¹⁹ “Awe, nage mu dolobaso, olo bidali.

Nago tɔ te dwai madi pedelali.

Tiali goli, megı da, te wai dabe te nageba paḡana
 sagaselama, te nago tɔ augwali usu egobeo.

Te nage dolali hani, te nagede digibulu mu bidaibao.

²⁰ Nago te wai dabe te nago we bidi dabe kalabuside
 digibulu bidali sogo pedelali,
 te augwaligo nageba te tiwai po waibao,

‘Te t̄ dwasianu mu dao.
 Dago bidabo t̄ dwasianu mu dao.
 Dago bidabo t̄ pedai genuai t̄ sabo homu ebao,’
 waibao.

²¹ Te nago nagade digi te tiwai po waibao,
 ‘Dego enaba te tigidali wai maniwe?’
 Eno wai dabe te hagawai,
 te eno wai ma ame nogobeo homu yali.
 Te boi bidi dabego ena kalabus elama, sela pali.
 Dego mu te wai dabe ame nenama, negeduama,
 te genuai ebo ba usu naniwe?
 Enaduba deli bidai, tiali goli te wai dabe
 menadu asela wai dawe?’
 nago te po hanalu waibao,”
 God Genuai Bidigo te po wali.

²² God, Genuai Bidigo
 te taun Jerusalemba te tiwai po wali,
 “Eno te d̄aj me deli dodolama, te eno nogo me,
 te d̄aj me deli tiwai ugwaba siyu,
 te gasa t̄ kantri Israel hani
 is̄awai we bidi dabego sulama,
 te nago wai dabe ma sela asomainu yaibao.
 Te nago wai dabe te augwa nagede auwasa,
 tama sela asaibao wali.

²³ Te king dabego, me kwin dabego,
 te nago wai dabe negeyu,
 te augwa aya idago ebo tiwai yaibao.
 Augwa kidu sugunama,
 te augwa tobolu te nago s̄aḡa page t̄ba basigulama,
 te nageba genuai nogi mayu tiaibao.
 Nago te tiwai koneyu, ena tama te Genuai Bidi da
 waibao.
 Enaba homu k̄ḡ pelama,

te eno augwali tau somainu tonalubo we bidi,
te augwali odolali me tonalugobeo,”

God Genuai Bidigo te po wali.

²⁴ Te bomai boi bidigo hwiḡaselama,
te bidi me deligo hani kalabus elama, te aga wiegi
yai doado bage sali,
te aga hani dali, te aga doado bage dali, ma saiba,
agawe?

²⁵ Tiali goli, Genuai Bidigo Jerusalem te tiwai po
wali,

“Mu tama, te eno nago hani dali ma siyu,
te nago wiegi yai doado bage
te bomai boi bidi dabe me te dwai king dabego
nogode ma dobola saibao.

Eno te nageba hwiḡani bidi dabeba te hwiḡo wei
ponaibao,

te eno nago wai dabe ma saibao.

²⁶ Te eno nago boi bidi dabe augwa
haside digi tomode hwiḡmainu yaibao.

Te augwa hasi digi elebo sę umabo eyu,
te bidi dabe te wain wę tulama,
geḡ page ebo tiwai yaibao.

Tama te tḡde we bidi tigidaligo eno te ebo sę sulama,
te augwa te tiwai koneaibao,

ena naga ena te Genuai Bidi da homu yaibao.

Ena te ena we bidi ma sabo God dao,
te eno nage tudibadu posolalu, tonalu, te nage tau
siyu ebao,

ena te Jekopgo hanigo bomai God elalubo dao,”
wali.

50

¹ Genuai Bidigo te Israel we bidi dabeba te
tiwai po wali,

“Taun Jerusalem te duga ida tiwai elalubao.
 Dagego homugo eno aga tudiba mubao homu eyu,
 te bidigo we sabo kolesaga bolama,
 te sai we mu sela sãbo tiwai homu eba, agawe?
 Te dagego tama homu ebaso da,
 teda te tama po wali pepa mena elalubawe,
 eno aga mu sela sãwaniwe?
 Tama me, te eno bidi me delide negeli sali me elalubeo.
 Te tama homu dagego magi baso ebawe,
 eno wai dabe eno dage te gasa bidi dabeba te olo sę
 ebo bidi tiwai ilama, tagala paliyu,
 eno te negeli sali dodolabo mone saliwe? Mu menio.
 Te dagego dwai sę hauwa ena haliga sębę ilibaso,
 eno te Jerusalem tudiba munama,
 tama eno dage te gasa bidi dabego nogoba muai
 dao.”

² “Eno dage gegagasali sogo,
 magi baso eno te bidi me deli bidibo subewe?
 Te eno dage i wali sogo,
 magi baso dagego eno i wali wei ponobewe?
 Dagego homugo te eno dage ma sabo
 bomo meni da homu yali da, agawe?
 Odao. Eno te po obaso,
 te tamu ąi tigidali mu sula saibao.
 Eno te po obaso, te genuai soabo ąi
 te masigi sane olo elalueibao.
 Te sugu dabe isilama, kugumini dwai yaibao.
³ Tama eno te dagalu me sisi mu emainu eyu,
 te aga bidi isaide te wego homu dene ebaso
 gudubo ugwa tiwai yaibao.
 Mu tama, eno te tobage sę yabo homu
 elalubao,” Genuai Bidigo te po wali.

Te bidi dabego Genuai Bidigo sę bidiba dwai sę yali po wai

⁴ God Genuai Bidigo enabolo

te wiegi yai po wabo kolesaga ola mawai,
tama eno te wiegi yai po te bomo meni yai we bidi
dabego haliga daų walu, waibao.

Tigidali sogo kigamude agai enabolo te wiegi yai gesi sę
po ola mawainu ebo po odabo homu godolo mu
ebo dao.

⁵ Genuai Bidigo eno olo dalama,

te agai po odomainu yali, te eno agade hagoma eyu,
te agai enaba mawainu ebo sęde
te habu bulu me kilasa pabeo.

⁶ Ena te bidi dabego keloago tudide elama,
eno penane nisi gudumainu yalio.

Te augwaligo enaba dwai posobo po weyu,
eno gesabidiba pesą sayu yali,
eno ena gesabidi te augwaliba dualubeo. *

⁷ Te augwaligo dwai po wabogo

ena aiyaba me elalugobeo,
magi baso meni, God Genuai Bidigo ena tau sabo
dao.

Te ena digi ena daų walama, te ena sę yali.

Eno te tiwai koneani, eno ebo sęde
te ena hale me sogobe homu ebao.

⁸ God pađe bidiyu, te agai te po waibao,
eno dwai sę me ebeo.

Te bidi me deligo ena po tu ilabo homu eba, agawe?

Teda agai ena te po tuąba odasa pelama,
te agai ena po tu ilabo po pusumainao wali.

⁹ God Genuai Bidigo ena tau siyu,

tama dego te po weyu,
eno dwai sę me yalio waibawe?

* 50:6: Mat 26:67; Mak 14:65

Ena po kisilama wali hani bage,
 augwali te ugwa asobago togolama silibo tiwai mu
 yaibao. *

- ¹⁰ Dage te Genuai Bidi dologoba pelama,
 te agai sę bidigo po wali pabo hani dabe,
 dage wi me igimio.
 Te dage hulide biliyu, te dage ula meni yai,
 te dage konealubo homu Godiba daꝝ wao,
 te Genuai Bidigo dage tonalu, agai dage tau saibao.
- ¹¹ Tiali goli, dage te Genuai Bidiba
 konealubo homu daꝝ wasiꝑbo hani dabe,
 te duga digi isi ula ilama,
 te dage be hulia side bidibo bage,
 dagego te sole dabe domonama,
 tego duga pabo sunumidu te sole uladu pao.
 Tiali goli, Genuai Bidigo te dage bidigi pabo pesage daꝝ
 ilali, te genuai dene sabo pesage dao.

51

*Te we bidi dabego Genuai Bidigo bomode konealubo homu
 daꝝ wao wali*

¹⁻² Genuai Bidigo te tiwai
 po wali,

“Dage te eno homu kolesaga wali pabo sę dene eyu,
 te doloba pai kolesaga ebo hani dabe,
 dage eno po odiꝑo.

Dagego te Abraham de Sarai siba ma homu kone palao,
 aga te duga waꝝ aya monu,
 me duga ida auwa mosi si dao.

Augwali si te dage hani bulali waꝝ nõꝝ mu dao.

* 50:9: Rom 8:33-34

Te eno Abraham i wali sogo, aga wai meni yai,
 tiali goli eno augwali siba te wiegi yai sę bugagia elama,
 te augwa si wai elaluai,
 tama augwali sigo hani wai dabe
 te genuai hani we bidi mu pedelai dao.”

³ “Ena Genuai Bidi, eno te Jerusalemde
 homu dene mu yali,
 te taun dolai elaluali, te eno agai sęę tigidali sia
 somainu yaibao wali.

Megi te olo masigi sane pesage elaluai,
 tiali goli eno te wiegi yai sę hauwa pedalumainu
 elama,
 tama te tonobo gasa sawi mu eyu,
 te eno nigali Iden gi tonobo tiwai yaibao.

Te wiegi yai homu genuai pemene ebo
 pesage pedelama,
 te sesemane sogo aga we bidigo
 te enaba usu da wabo balia po waibao.”

⁴ “Dage eno we bidi dabe, eno po odao.
 Eno te wiegi yai bugagia bidabo
 kolesaga te tigidali hani we bidiba ola mayu,
 te eno te po tų dodolobo
 doloba pai kolesaga te tigidali bulu
 tų kantride ula tiwai elalueibao wai dao.

⁵ Te eno augwali tau siyu,
 ma sabo sogo, te pąba pedelalio.
 Te ena bomogo digi eno te tigidali
 tų kantri tonalueibao.

Te digibulu bulu pesage we bidigo
 te eno bomoba homu dąų weyu,
 te eno augwali tau sabo tonalueibao.

⁶ Dagego te dagaluba ugwaba tonoyu,
 te tųba aiyaba tonoyu yao.

Te dagalu tigidali te hano sia sabo tiwai mu yaibao,
 tama t̄ te gudubo ugwa dolobo tiwai yaibao.
 Te tigidali we bidi te dinai sibi isila pabo tiwai yaibao.
 Tiali goli, eno te we bidi tau siyu, ma sabo kolesaga,
 te sesemane sogo elalua pidubadi,
 te me sia sogobeo,” wali.

⁷ “Dage te doloba pai kolesaga bugagia koneama,
 te eno bomo yai po d̄āu ola sabo hani dabe,
 dage te bidi dabego dwai po weyu,
 dage dolobo po obaso, te dage wi me igio.

⁸ Te hani dabe te ugwa asobago tologolama,
 te silibo tiwai eyu dolaibao.

Tiali goli, eno te we bidi dabe tau siyu
 ma sabo kolesaga, te me sia sogobeo. Menio.

Te sesemane sogo elalua pidu elalueibao,” wali.

⁹ Genuai Bidi, nage hogodao.

Nage hogodama, te nage genuai bomo dali aselama,
 te da tau sagasao, te nago polobadu yali tiwai yao.

Nago tama nago te Rehap enani,
 te tamu āide bidali moni hasamani,
 te nago dwasianu dedelege miani.

¹⁰ Nago tama nago te tamu āi sula somainu ilama,
 te sunumi tomodu pedelali,
 te nago ma sali we bidi dabe soabo sunumi nigilai
 dao. *

¹¹ Te naga ma sali hani dabe tau sali,
 te augwa wiegi yai pemene elama,
 te Jerusalemba ma aselama,
 te augwa balia po weyu,

* 51:10: Te Rehap wabo po, te po digi po me deli dao. Tama te pode te Rehap da te t̄ pedai kantri Isip dao. Te Israel bage te Isip t̄ tagalali sogo Genuai Bidigo te moni āi tomode si bugua sai, tilama, augwali tedu soali.

genuai po daḡa te sunumidu ola asaibao.
 Te augwa bugagia mu bidiyu,
 te augwa pemene umabo mu yaibao,
 augwa te pemene ebo me sia sogobeo.
 Te dene me haliga seḡe augwali dali me elalugobeo.

¹² Genuai Bidigo aga we bidiba te tiwai po wali,
 “Ena digi eno dagego haliga daḡ walama,
 te dagego tigidali seḡe sia somainu ilibo dao.
 Tama magi baso dage te gasa
 bidi dabede wi ebo dawe?
 Augwa bomo me elalubeo.
 Tigidali bidi isama,
 te nosai polo sia sabo tiwai gilama ebo dao.

¹³ Te dagego Genuai Bidi, enaba homu
 kone gegeda palali homu yali.
 Eno tama eno dage nigali.
 Eno te dagalu aga pesagede muani, te eno nigilama,
 eno te toḡe page daḡ walali.
 Magi baso dage te elaluama,
 te dolainu ebo dwai bidi dabede wi ebawe?
 Te bidi dabego dageba magi seḡ me egobeo.
 Augwa haliga seḡbeḡ te odolali silaibao.

¹⁴ Te kalabuside bidali hani, augwaligo pibia selama,
 wi ebo bage, augwali te kalabus seḡo me isigobeo.
 Menio.
 Te augwali kalabuside polo silama,
 te augwali olo bidaibao.
 Te augwa tuabo nai hauwa elalueibao.”

¹⁵ “Magi baso meni.
 Ena da Genuai Bidi, duga God.
 Eno te tamu aḡ hodolama, te genuai aḡ dini pedelama,
 te genuai mumunu ebao.

Eno nogi te tiwai, Te Tigidali Bomo Elalubo Genuai Bidi dao.

¹⁶ Eno po te dageba mawai,
 te dagego pedauwalidu te po pusumainu yali.
 Te eno nogogo dage bugagia geme dualali.
 Ena Genuai Bidi, eno te dagalu diniginama, elalubao.
 Tama eno me tɔ aga bidabo pesageba munama,
 ɔɔ walama, elalubao,
 eno dage te Jerusalem we bidi dabeba te tiwai
 po wali, dage te eno we bidi hani dolo mu dao,
 wai.” Te po wali.

Genuai Bidigo te Jerusalemba haliga seḅe munu ma egobeo

¹⁷ Jerusalem, nage hogodao.
 Nage hogodama, bomonama ma dolugulao.
 Genuai Bidigo haliga seḅe te wain ɔ me deli
 te nageba mani tiwai ebao.
 Te agai nago te ɔ tulama, silainu ebo tiwai yali.
 Te naga geɔ page mu elama, umuna palali dao.*
¹⁸ Te nago ogwa dabe deli me bidisawai,
 te nago nogo tolasa,
 te nage dolo somainu ilabo te meni yai.
¹⁹ Nago seḅe genuai mu tolama,
 te dego nage homu dene elama,
 te nago haliga wiegi yai usu ma iligowe?
 Te boi bidi dabego aluama, nage dolagasali.
 Te augwaligo nago we bidi me hauwa te bainatgo elali.
 Te genuai nasi nageba pedelali sogo tiali.
 Te eno mena seḅo nage tau selama,
 nago te haliga seḅe elalubo siligowe?
²⁰ Te nago we bidi dabego bomo meni yai,
 te augwa gedu geɔ page elama, te augwa degasa

* 51:17: Ped 14:10; 16:19

dulama,
te augwali tigidali sunumi bagude pila muna muna
palio.

Augwali te hasa bade tuali tiwai elaluali.

Augwa te magi sę yabo usu me ebeo.

God, Genuai Bidigo te augwaliba wado po olama,
te aga haliga sębę ebo kabude te ąi tumainu ilali,
te augwali dodolo pelama, elaluai dao.

²¹ Odao. Jerusalem, nago te sęęę hauwa tolama,
tama nage te ąi tuai gęę page yai we bidibo tiwai
yali.

Tiali, nage te wain ąi tulama, gęę page ebeo. Menio.

Te Genuai Bidigo haliga sębęgo
naga nage gęę page yai dao.

²² Nago Genuai Bidi,
te Godigo nago te boi bidi dabe dali hwıbo
tau selama,
dage ugwa ela holobo ilali, agai te tama po wali,
“Suao. Eno te haliga sębę yali kabu
te eno nageba menama,
te nago tulama, te gęę page dwai mu elama, te
umuna sali.

Tiali goli, megi da, eno te kabu nago nogode ma sali.

Te eno nosali nage te kabude ąi ma tumainu me egobeo.

²³ Tiali goli, eno te kabu te nage dolobo
bidi dabe nogoba mueibao.

Augwaligo nage te tęde pimainu ilama,
te augwaligo nage agalama,
te nage tudi daide biliyu,
te augwa olo tę bulude bilibo tiwai yai dao,” te po
wali.

52

Genuai Bidigo aga we bidi te Jeruselemba ma odasa asaibao

wali

¹ Jerusalem, nage te God aga da olama, sa
muani hanu, nage hogodao.

Nage hogodama, bomonama dolugulao.

Nago au dobage te gasa sawi yai sawi yai munama,
te nage tonobo gasagi me mu yaibao.

Te Godigo po odisabo bidi dabe,
me te God gedude wiegi yai isabo hani bidi dabe,
te augwali nage tomoba me asogobeo. *

² Hobede ya, Jerusalem, tiali te nage hogodama,
te nago tigide to sela sayao.

Awe, Saion hanu, te nago dogonide kenani sen peda
sanama,
te naga sia kingba duagi soao.

³ Magi baso meni. Genuai Bidigo te tama po wai,
“Te bidigo ena me abelisama,
te nago we bidi te olo se bidi me
se ebo we tiwai elama, sela pali.

Te eno augwali ma sainu, te mone menama, me sogobeo.
Menio.

Te augwali eno olo mu saibao.

⁴ Magi baso meni. Ena God, Genuai Bidi,
eno te tama po wali.

Polobadu, te eno we bidi dabe
te Isipba pelama, bidigi pali sogo,
te augwa homugo digi palio.

Te nosali, te Asiria dabe aselama,
te augwali olo se ebo bidi me
se ebo we tiwai sela pali,
augwaligo ena abelama, te augwali sela pabeo.

* 52:1: Ped 21:2, 27

- ⁵ Te Babilon dabego me te tobage
 deli kolesaga nosali yalio.
 Augwaligo te eno we bidi olo mu selama,
 te augwali kalabusiba sela pali,
 te eno hanigo tobolu bidi dwai gela mu wali.
 Te eno magi nai deli me sabeo. Menio.
 Sesemane sogo te bidi dabego te posobo po weyu,
 ena nogi aiyaba elalubo sę yai dao. *
- ⁶ Te ena digi eno daj ilama,
 te ena we bidi ma saiba wabo sogo,
 te augwaligo ena nogi bugagia koneaibao.
 Augwaligo te tiwai koneyu, ena Genuai Bidi,
 eno tama te augwaliba tigidali
 pedalubo sę po polobadu wai dao.
 Suao, ena bidibao,” wali.
- ⁷ Te we bidi augwaligo bidi me deli
 te bulu du pesagedu udada asobo sulama,
 te wiegi yai pemene mu yaibao, te wiegi yai po
 Jerusalemba selasa asali.
 Agai te tiwai po waibao,
 “Saion, te wiegi yai sogo pedelalio.
 Godigo te boi bidi dabe aiyaba elaluama,
 te agai nage bugagia bidimainu ilalio.
 Megi da, nago Godigo te tigidali nai
 tonalubo dao,” agai te po waibao.*
- ⁸ Te tonalubo bidi dabe te masigigo
 nigali bobobage be taua daide bidali,
 te Genuai Bidi te Saion badu ma asobo sueinu yali,
 te augwa tigidaligo te genuai pemene dali eyu,
 te i bomonama mu waibao.
- ⁹ Dage te Jerusalem badu dolalio,

* 52:5: Rom 2:24 * 52:7: Nah 1:15; Rom 10:15; Ef 6:15

dagego te pemene elama, i waiào,
 magi baso meni, Genuai Bidigo te Jerusalem ma
 selama,
 te agai aga we bidi dabego sêgê silalio.

¹⁰ Genuai Bidigo agai bomo hania ola mayu,
 te tigidali tō kantrigo sumainu yaibao.

Dago Godigo te aga we bidi dabe ma saibao,
 tama te tigidali tōde we bidigo sueibao.

¹¹ Dage tigidaligo te Babilon tagalama, asiào.
 Te bugagia dua dao, tiyu dage te God gedude wiegi yai
 isaʷani naide pania sabuo.

Dage te hanigo te pou dis dabe, me pou dabe,
 te Genuai Bidigo bede nai sela paibao,
 dagego duga digi te God gedude wiegi yai pedalubo
 kolesaga wali pao.

Dage tigidali te magi meda meni yai bidama, asiào.*

¹² Tiali goli, dage asesa polo me te Babilon tagalama,
 me wi polo soyu,
 te dagego polobadu te Isipde yali tiwai me egobeo.
 Menio.

Te dage dua digi asaibao.

Te God, duga Israel dabego Genuai Bidi,
 te dage pabodu polasa paibao,
 te aga dage nosali badu me asaibao,
 te agai dage tonalua asiyu, odasa asaibao.

*Genuai Bidigo sê ebo bidigo te we bidi dabego dwai sê yali
 sêgê dali tolasa asaibao*

¹³ Genuai Bidigo te tiwai po wali,
 “Suao, bugagia konea sao.

Tigidali sê eno sê bidigo ebo
 te bugagia mu pedelaibao.

Te bidi dabego agaba genuai nogi mayu,

* 52:11: 2 Ko 6:17

te aga nogi ugwanu mu saibao.

¹⁴ Polobadu te bidi dabego dwai sɛ mu agaba yali,
te aga tigi me gesabidi te dwai mu tonani,
te aga bidi tigi tonobo tiwai me ebeo.

Te we bidigo aga subo, wi yai dao.

¹⁵ Tiali goli, nosali da, te bulu tɔ kantri hauwa we
bidi dabe te agade dwai noma midigi mu selama,
te king dabe pedauwali pania selama,
te bomonama tononalu,
te augwa po deli me wagobeo,
magi baso meni, te augwaligo polobadu
po odisɔwani nai suali.

Te augwa dwasianu me konesiɔwani nai
te hania koneaibao,” wali. *

53

¹ Te Israel hani we bidi dabego te tiwai po wai,
“Dego te megɛ dago odali pode konealubo homu
dɔɔ

waibawe?

Tama dego Genuai Bidigo te megɛ yali bomai sɛ tiwai
ebo suai dawe? *

² Genuai Bidigo aga sɛ bidi te olo ni me deli tiwai te
tɔ pesagede pedalumainu ilali.

Awe, aga te ni me deli te wa pai tɔdu
pedalubo tiwai pedalali.

Te sɛ bidigo nogi meni yai, magi baso meni,
te bidi dabego gedude tonobo sawi isiɔwai.

Te agade te bidi dabego godolo elama,
tonabo nai me deli elalusɔwai.

³ Te bidi dabego aga tudi ola menama,
te aga begela dolama, te aga godolo mu me isiɔwai.

* 52:15: Rom 15:21 * 53:1: Jon 12:38; Rom 10:16

Sesemane sogo agade te homu dene me
haniani seḡe paḡanaluali.

Augwaligo aga tudiba mu muanio.

Te dago aga te olo bidi me tonobo tiwai yai dao.”

⁴ “Te dago tama homu yali,

te Godigo agaba dwai dene mawainu eba homu eyu,
te dwai seḡ agaba pedalainogo eba homu yali.

Tiali goli, menio.

Te seḡ bidigo dago seḡe me dene te agai tolali dao.*

⁵ Te dago yali dwai seḡede naga aga dolali.

Te augwaligo aga dodagia mu elama,

te aga tigi tologola pali,

agai te tolali seḡede aga da usu ma ilama pedelali,

te da bugagia mu bidibo dao.*

⁶ Da tigidali te sipsip besela palama, bilibo tiwai yali,

te da deli deligo te dena digi homu wali bilali.

Tama tibaso, Genuai Bidigo daba

te dene mabo seḡ yabo usu igi da,

te dena yali dwai seḡe wei ponainu yali,

tiali goli aga te tama me tebeo. Menio.

Te dena digi tolabo seḡe te agai aga seḡ bidiba te seḡe
menama,

tolomainu yai dao.”*

⁷ Genuai Bidigo te tiwai po wali,*

“Te bidi dabego te seḡ bidiba dwai seḡ ilali,

tiali goli aga digi aga aiyaba elaluama, te dene tolali.

Te agai po me deli wabeo.

Agai pedauwali pania sali,

* 53:4: Mat 8:17 * 53:5: 1 Pi 2:24 * 53:6: 1 Pi 2:25 * 53:7: Te kolesaga koneai bidi dabego bugagia konesiayu, dego mu te ves 7-9de po wali. Mebago homugo te po Genuai Bidigo wali homu yali, te mebago homugo we bidi po udali homu yai, te mebago homugo te profetgo po wali homu yai dao.

te augwaligo sipsip wai sela pelama,
 elainu ebo tiwai eyu,
 te sipsip augwaligo te nisi poawainogo sela pabo
 tiwai yai dao. *

⁸ Augwaligo aga odolali mu kalabus elama,
 te aga po tu odoboba odasa pali,
 te po tuđe aga isimainao po wai.

Te augwaligo aga ela muai.

Tama tibaso, aga nosali pedelabo hani
 we bidi me pedalugobeo.

Agai te eno we bidi dabego pesage siyu, hasegelama,
 te augwa digi tolabo sege te agai tolama,
 te augwaligo yali dwai sege dodoliyu,
 te aga isai dao. *

⁹ Te augwaligo aga te haniani dwai kolesaga yali bidi
 dabe dali me,
 te mone doado bage hauwa elaluali bidi dabe dali,
 pubulali.

Tiali goli, te aga digi dwai kolesaga deli me isawai,
 te agai tibo po me deli me wabeo,” te po wali.*

¹⁰ Tiali goli, Genuai Bidigo digi aga se bidi aiyaba
 elaluama,

tama agai te dene selama, tolomainu yali,
 magi baso meni,

te se bidigo digi aga bidibo ula mayu,
 te we bidi dabego sege sela sabo ofa tiwai ebaso da,
 teda aga bidibo sogo te bobobage mu igi pelama,
 te aga bulai waj nu wai dabe sueibao.

Te aga yali seđe, te se bidigo te Genuai Bidigo homugo
 yao homu ebo se ebaso,
 te agai te se bugagia pedalumainu ebo dao.

* 53:7: Ped 5:6 * 53:8: Tpi 8:32-33 * 53:9: 1 Pi 2:22

11 Te aga genuai seḡe tolama da,
 nosali te aga wiegi yai nai hauwa pedalubo sulama,
 te aga wiegi yai pemene umabo mu yaibao.
 Genuai Bidigo te tiwai po wali,
 “Eno te doloba pai seḡ bidi, agai ena bugagia koneai.
 Agai te hauwa we bidigo dwai seḡ yali seḡe tolama,
 te kolesagade agai te augwali
 doloba pai we bidi pedelaibao.
 12 Te we bidi dabego aga
 te dwai bidi me deli tonobo tiwai yai.
 Tiali goli, aga bidibo ula digi
 te olo weḡ mu gelebo tiwai eyu,
 agai te hauwa we bidigo dwai seḡ yali seḡe tolalio. †
 Tama augwali dolidali weyu,
 agai te dwai seḡ ebo we bidi tau siyu,
 gedu haluasa po wai dao.
 Tama tibaso, eno agaba te genuai bidi dabe tomode
 te agaba genuai nogi mawaibao.
 Eno te bomai ami bidi dabego te boi hwɨnana,
 te sali nai dabe agaba dobolama mawaibao,” wali.*

54

Genuai Bidigo Jerusalem wiegi yai ma pedalumainu ilaibao

1 Genuai Bidigo te tiwai po wali,
 “Jerusalem, nage te hobedagia wai ame
 nesiḡbo we tiwai eyu,
 nage te wai ame nabode dene isiḡbo we tiwai ebao.
 Tiali, megī da, nago te balia po weyu,
 pemene elama, i wao, magi baso meni,

† 53:12: Bidi mebago homugo te ede wali po te tiwai begelaibao homu yali.
 “Agai te dwai seḡ yali we bidi dabego seḡe selama, te augwa digi tolabo seḡe te
 agai tolai dao.” * 53:12: Mak 15:28; Luk 22:37

te nago wai dabe hauwa mu umabo elalueibao,
 te aga bidi dali bidibo wego wai
 te aiyaba mu elalueibao. *

² Nago genuai t̄o pedai d̄aj elama,

te nago ugwa be tede s̄e yao.

Nago ugwa be ugwade eda si dedelasa pelama,

te bono bobobage tagalama,

te ni t̄ōba bomonama tulama,

te bono dabe bomonama kekelama, te nide k̄ēao.

³ Magi baso meni, nago t̄ō d̄aj te ugwa de eda si

pedegasa pelama, genuai igi pelama,

te dolo nogo badu tiyu,

te pobase nogo badu me tiao,” wali.

“Te nage hani wai dabego te gasa t̄ō

kantri hani we bidi aiyaba elalueibao,

tama augwali te augwaligo megi olo elalubo hanu

dabede bidalueibao.”

⁴ “Jerusalem, nage wi me igio.

Te nage hale munu ma egobeo.

Te bidi dabego posobo po nageba munu ma wagobeo.

Te nage gesi ogwa bidi elalubadi hale sali,

te nago homu kone mu gegeda palama,

te sogo nagaduba te bidibo we tiwai homu ebo kone
 me isīayu,

te aga bidi isai we tiwai egobeo.

⁵ Magi baso meni.

Ena, nage nigali God, ena te nago bidi tiwai bidaibao.

Eno nogi da, te Tigidali Bomo Elalubo Genuai Bidi dao.

Ena, te Israelgo God, ena te Wiegi Yai Doloba Pai

Kolesaga Mu Ebo God da,

te ena nage tudi badu posolalu tau sabo bidi,

eno naga eno te tigidali t̄ō habu tonalubo God dao.”

* 54:1: Gal 4:27

6 “Ena God, Genuai Bidi, eno te tiwai po wali,
te nage eno enaba ma asomainu i waibao.

Nage te bidigo sai gesi we tiwai
te aga bidigo tagalama, wi palio,
te aga hobolu du peda pelama,
te aga genuai homu dene dali bidalio.

7-8 Ena Genuai Bidi, te nage eno tudi badu posolalu,
tau sabo bidi,
eno nage p̄w̄adage sogo tagalali,
te eno genuai homu dene nagede elalueibao.

Tama te nage enaba ma asomainu saibao.
Te eno nageba wado po dwai mu
te p̄w̄adage sogo olama,
te eno ena gesabidi geme duala sali.

Tiali goli, sesemane sogo te eno nage dali homu dene
eyu, te nage godolo mu eyu,
te nageba wiegi yai s̄ bugagia yaibao.”

9 “Te Noa bidali sogo, eno te tiwai bomai po d̄w̄ weyu,
te eno genuai āigo te t̄o ma dologobeo wali.
Te meḡi eno te tobage bomai po d̄w̄ walaibao.
Eno mu po weyu, te eno haliga s̄b̄ ma isiama,
te nageba wado iliyu,
te nage me dene mabo s̄ egobeo wai. *

10 Te bulu du dabe pedasa pelama, degaibao,
tiali te eno nagede homu godolo ebo
te sesemane sogo elalueibao.

Te da si bugagia dugulalu,
te eno bugagia bidabo sogo maiabo
po weyu, te d̄w̄ walali bomo yai po
te eno me bologobeo.

Ena Genuai Bidi, te eno nagede homu dene mu eyu,
te nage godolo homu mu yai,

* 54:9: Gag 9:8-17

eno te seḡ dabe yaibao te po nageba wai dao,” wali.

Jerusalem te usu yai polalubo mu pedelaibao

11-12 Genuai Bidigo te tiwai po wai, “Hobede ya,
Jerusalem, nage te hauwa dolali taun,
te nage homu dene elama, tau sabo bidi meni yai.
Tiali goli, eno te wiegi wiegi yai masigi te gasagi yai
mu selama,
te nage ma nigaibao,
te nage gasa sawi yai taun mu pedelaibao.
Eno te gasagi yai tedali masigi dabe selama,
te toḡde wasilama, te ugwadu daide taun ma
nigaibao.

Te eno te haniani wiegi yai dila pai masigi selama,
nago be seḡ ebadi, te bomai obogo nage bagulama,
te obo sunumi dabe me,
te genuai masigigo nigai obo daide elaluabo taua,
te dabe nigaibao.” *

13 “Te ena digi eno nago wai dabe ola mayu,
te augwa bidabo pesage bugagia mu elalueibao.*

14 Te eno doloba pai kolesagade
te eno nage bomai pedalumainu ilaibao.

Te nage aiyaba elaluama, te dwai seḡo dolabo bidi me
menio,
te nage magi nai me delide wi me egobeo.

Te nago wi ebo tigidali silaibao.

15 Te hani mebago nage dali hwjai olama, asobaso da,
te nago te tiwai koneao,
te augwali eno tagala palobaso me asobeo. Menio.

Te augwa homugo digi asali.

Tama augwali te eno nago nogoba mueibao,” wali.

16 “Suao, bugagia konea sao.

* 54:11-12: Ped 21:18-21 * 54:13: Jon 6:45

Ena digi eno te haniani nai te aingo
nigibo bidi dabe nigali.

Augwa te ain siaba munama,
te ain dabo posolo yai sia mu nogani.

Augwa te ain selama, te hamago elama,
te bidigo hwjabo haniani nai dabe nigibo dao.

Tama eno te ami bidi dabe me nigali,
tama augwa te nai dabe selama,
te boi hwjnama, te gasa bulu tq kantri dolobo se
ebo dao.

¹⁷ Tiali goli, te hwjbo nai dabe me deligo nage me
dologobeo.

Te nage bomonama dolalu,
te bidi dabego nageba haniani po kisilama wabo po
te wei ponoyu,
aiyaba elalueibao.

Eno te kolesagade ena se bidi dabe tigidali bugagia
tonalu,
te augwali doloba pai we bidi pedelaibao.

Ena Genuai Bidi, eno te po wai dao.”

55

Godigo aga we bidi wiegi yai ilainu yali po

¹ Genuai Bidigo te po wai,

“Tega, dage te aj nogonego sabo we bidi dabe,
dage enaba aselama, dage we tuagasao.

Dage te mone meni yani hani dabe, dage enaba aselama,
te dage nai sela tuagasao,
te aselama te aj wain
me hasa bulmakaugo ame pe aj sagasao,
te monego me abeligobeo.*

² Magi baso dagego te duga mone

* 55:1: Ped 21:6; 22:17

te dage tau sisayabo nai dabede odolali silama,
te dage nai sili bidaiwe?
Magi baso dagego te tubo nai sabo sę dene elama,
tama tede sabo monego magi baso
te dwai olo nai naga abelebo dawe?
Te eno poba bugagia olo muao,
te eno wabo po tiwai gilama yao,
te dagede eno mabo haniani nai mu paęanalueibao.
Awe, dagego homugo tede wiegi yai pemene mu yaibao.”
³ “Odao, dage eno we bidi dabe dao.
Dage bugagia bidimainu eyu, enaba asięo.
Te eno dage dali bomo yai po daę walama,
tama te daę wali bomai po sesemane elalueibao.
Te sesemane sogo eno dage godolo homu mu elama,
te dageba wiegi yai sę yaibao.
Te polobadu eno te bomo yai po te king Devitba
daę wali tiwai gilama yaibao wali. *
⁴ Konea sao, eno aga genuai bidi pedalumainu ilama,
te agai gasa bulu tę kantri tonalumainu yai.
Te agade, te eno bomo augwaliba ola mawai dao.
⁵ Mu tama, te dagego polobadu konesiawai te bulu tę
kantri we bidi dabe augwali i wabo sogo,
te augwaligo me dage me konesiawai,
te augwali dageba polo udada asaibao.
Magi baso meni, ena Genuai Bidi, dage Israelgo God,
ena te Wiegi Yai Doloba Pai Kolesaga Mu Ebo God,
eno dage te genuai nogi dali bomo dali si
mu elalumainu ebao,” Genuai Bidigo te po wali.
⁶ Megi da, Genuai Bidi te dage paęe bidiyu, dage
tonalubao,
tama megı sogo te dagego agaba gedu haluasa po
weyu, te aga paęa pabo sogo dao.

* 55:3: Tpi 13:34

⁷ Te dwai kolesaga ebo we bidi dabego
te augwa ebo dwai kolesaga tagalama,
tama augwa te kolesaga me yabo
homu kone me paligio.

Te augwali augwa Genuai Bidiba ma asiào.
Agai te agaba ma asobo bidi dabeba
te olo mu tau mabo wiegi yai
kolesaga umabo mu yaibao.

Awe, Godigo augwaligo dwai sẹgẹ
tigidali mu sela sàwaibao.

⁸ Genuai Bidigo te po wai,
“Eno homu kolesaga te dagego homu
kolesaga tiwai elalubeo.

Te eno kolesaga te dagego kolesaga tiwai meni,
te gasa tedali mu elalubo dao.

⁹ Te tọ aiyadu elalubode te dagalu ugwadu mu elalubao,
te tiwai naga te eno homu de eno homu kolesagago
te dagego kolesaga me homu kolesaga te aiyaba mu
elaluai dao.”

¹⁰ “Te dagaludu tulubo tulubage, aga odolali
te dagaluba ugwaba ma hologobeo. Menio.
Agai te tọba ąı mayu, te gide nai holomainogo elama,
te bidi dabego saibao.

Me badu augwa tuyu, me badu wai selama,
ma buluyu ebo dao. *

¹¹ Te tiwai naga eno po me te enaba
odolali ma asogobeo. Menio.

Agai te eno wali po tiwai gilama pedelaibao.
Te agai eno homugo pedalumainogo homu yali sẹ
pedalubo dao.”

¹² “Te dage wiegi yai pemene elama,
Babilon taga somainu elama, te dage eno odasa

* 55:10: 2 Ko 9:10

asiyu,
 te dage wi ilabo magi sę deli me pedalugobeo.
 Te bulu du dabego wiegi yai pemene ebo tęąbi po weyu,
 te ni dabego pemene homu elama,
 augwa nogo elaibao.

¹³ Te ni wuli dabe te megi dwai ni dabe
 elalubo madi pedelaibao.

Te gasa sawi yai dwasianu ni dabe
 te megi sesane bono elalubo pesagede pedelaibao.

Tama sesemane sogo te tobage ni dabe te pesagede
 pedelama,
 te sesemane sogo te dąi ilali tiwai
 te we bidi dabego sulama,
 te Genuai Bidi, eno yali bomai sę homu kone
 palomainu yaibao,” wali.

Genuai Bidi te gesi Jerusalemde king bidaibao

56

(Dąi 56-66)

*Te tigidali we bidi aga dologoba asomainu, Genuai Bidigo be
 tų dalalubao*

¹ Genuai Bidigo te po wali,
 “Dage eno we bidi dabe, odao.
 Eno dagebolo te eno bomai po polobadu mawai dao.
 Tama eno dage dali te sesemane elaluabo
 po me dąų walai dao.

Dagego te po si bugagia wali peyu,
 te wiegi yai doloba pai kolesaga naga iyąo,
 magi baso meni, te eno dage tau selama,
 ma sabo sogo, te pąba pedelai dao.

Awe, dagego eno doloba pai kolesaga

ebo tamadi sueibao.

² Te we bidi dabego wiegi yai doloba pai kolesaga
wali peyu,
te Sabat sogode bomo yai po bugagia wali peyu,
te dwai kolesaga isaḅo we bidi,
augwa wiegi yai pemene yao.
Eno augwaliba wiegi yai sę yaibao,” Genuai Bidigo te
po wali.

³ Te gasa tḅ kantri we bidi dabe augwaligo
te agai po wali pabo homu ḁaḅ olama,
te Genuai Bidigo we bidi dali bidali,
augwade digi te tiwai po wagio,
“Te Genuai Bidigo da te agai we bidi dabe dali
bidimainu me iligobeo.”

Augwaligo te tiwai po wagio.

Te augwaligo aga domo diani bidi,
agai te tama homu me elamuo,

“Te ena wai meniama, te ena nogi meni yaibao,” wagio.

“Ena te sasia pai ni me deli tiwai da,” homu igio. Menio.

⁴ Genuai Bidigo te tiwai po wali,

“Te tobage tiwai bidi dabego
te Sabat side bomo yai po wali peyu,
te eno godolo homu ebo kolesaga wali peyu,
te eno ena we bidi dabe ḁaḅ wali
bomai po tigidali wali pobaso da,

⁵ teda eno te ḁaḅ me deli tiwai
te augwaligo nogi te eno tempel be
tomode muai elalueibao.

Tama sesemane sogo te we bidi dabego
sulama, te augwali homu koneaibao.

Te augwaligo genuai nogigo te wai dabe
ame nai elaluali bidi dabego nogi
aiyaba mu elalueibao.

Te eno augwali nogi mu silimainogo
me iligobeo,” wali.

⁶ “Te gasa tɔ kantri we bidi dabe
augwaligo te eno po wali pabo homu daɣ olama,
te eno we bidi dali bidalubo,
te augwali ena dologoba aselama,
te ena godolo homu mu elama,
te enabolo lotu po weyu,
te Sabat side bomo yai po wali peyu,
tama te eno we bidi dali po daɣ wali po
tigidali te wali pali da,

⁷ augwa wiegi yai yaibao.

Te eno bulu du Saionba te augwali eno odasa paibao,
te augwali eno bede bidiyu,
wiegi yai pemene yaibao.

Te augwa te siago tigidali domainu ebo ofa dabe eyu,
te gasa tobage ofa dabe eno altade yaibao.

Te eno augwaligo ebo ofa godolo homu yaibao,
magi baso meni, eno be da te tigidali
bulu tɔ kantri we bidi aselama,

te enaba gedu haluasa wagasabo be elalubo dao.”*

⁸ “Ena God, Genuai Bidi, eno te Israel we bidi ma
sisinibao,
te boi bidi dabego sela pelama, kalabus igi pai,
eno te tiwai po obao.

Te eno gasa we bidi dabe me selama,
te eno sisinani hani we bidi dali bidimainogo odasa
asaibao,” te po wai dao.

Godigo te Israel dabe augwa polalubo bidi dabeba wado ilali

po

⁹⁻¹⁰ Te Israel polalubo bidi dabego

* 56:7: Mat 21:13; Mak 11:17; Luk 19:46

te we bidi dabe bugagia me tonalusiãbaso,
 te Genuai Bidigo te po wai,
 “Asião, dage boi bidi dabe.
 Dage te uni hasa dabe te bulu du buside
 bidalubo asião,” wai.
 “Dage aselama, te Israel polalubo bidi dabe dolagasao.
 Te polalubo bidi dabego te t̃o kantri
 dwai sego elalagasainu ebo po
 te we bidi dabeba wabo se elalubao.
 Tiali goli, augwa se bugagia me ebeo. Menio.
 Augwali te gedu widai bage tiwai te taun
 tauade te boi bidi asobo tonalubo tiwai bidali.
 Tama augwali te pedauwali pania sai yowi tiwai
 te nai wi sabo bidi asobode
 gaãga wabo usu isaãwai bidali.
 Te augwa tobolude dwasianu kolesaga me elalubeo.
¹¹ Augwali te nai hauwa tuabo
 homu ebo yowi tiwai bidali,
 te dwasianu paããsiãbo aão yai.
 Augwali te sipsip tonalubo bidigo aga
 se ebo konesiãbo tiwai yali.
 Deli deligo te augwa homu wali pelama,
 te aga tau sabo nai naga homu koneai dao.
¹² Te augwali sisinibo sogo, augwali
 mebago te tiwai po wali,
 ‘Ae, tegobao, eno te wain aã selama,
 te da tuãdu pelama, te dena godolo
 yaliba usu nigi paibao.
 Te do da wabo sogo, da ma sisinama,
 te umabo mu ma tueibao,’ wabo dao.”

57

Te Israel dabego hagoma me idu geyu, te tibo godiba lotu ma wali

¹ Te bidi dabego te wiegi yai we bidi dabe
isibo sogo,
te augwa homu si me ebeo,
tede homu kone palobo menio.

Tama augwa te tiwai homu me sabeo,
'Genuai Bidigo te bidi dabe isimainogo ilama,
te augwaliba pedelainu yali dwai sę
te geda mumainogo ebao,' te homu egobeo.

² Te doloba pai kolesagade bilali bidi dabe,
te augwa isibo sogo, te augwa gu pagede pila muyu,
te toma nabo wiegi yai sogo sai,
magi baso meni, te dwai sę ebo sogo
augwaliba pedelabo usu egobeo.

³ Genuai Bidigo te tiwai po wali,
"Dage te dwai kolesaga haniani ebo
we bidi dabe, dage edaba asiąo,
dage te pobi bidi dabe, me penani bidi dabe,
me penani ebo we dabe te augwaligo wai dabe dao.

⁴ Dagego po dwai deba wali,
dage te hagoma ebo bidi dabe,
me te po geagano pabo bidi,
me tibo po wabo bidi te augwaligo wai dabe dawę?

Dagego gesabidi dwai eyu, te dagego
hąę hąę elama, deba wabo dawę?

⁵ Te duga haligade dwai homugo
te bomonama hodolobaso,
te genuai ni dologo te lotu wabo pesageba pelama,
te penani ebo kolesaga ebao.

Dagego te duga wai puluba dabe elama,
te ofa tiwai eyu,

te odogo tɔ pesagede te genuai
 masigi elalubo tomode ulubo dao.

⁶ Tama tede dagego te masigi dabe
 selama, te augwa god tiwai pedelali.
 Te augwali te masigi dabe duga god tiwai naga elama,
 te dagego ofa eyu, te wain geliyu,
 te wit ofa me augwaliba yali.
 Te kolesaga ebo sɛ dagego elama,
 te dagego homugo eno hasegelama,
 dageba homu dene yaibao weyu ebawe? Mu menio.

⁷ Dage te lotu wabo bulu du bageba holama,
 te ofa eyu, penani kolesaga yalio.

⁸ Dagego ena tudiba mu muanio.
 Dagego te duga tibo godigo piksa dabe
 te duga be tɔ dabo tomo badu bogo side muani.
 Tama dagego te duga abagi wali weba te mone menama,
 augwali dali piainu yali,
 tama dagego te duga nigali
 genuai bet sai daide te penani kolesaga ebo dao.

⁹ Dagego au ebo, te sanda me pauda,
 te wiegi yai denami ebo naigo au elama,
 te dage tibo god Melekba lotu wagi pali.
 Dagego te bidi dabe digibulu buluba tagala palali,
 te dagego lotu wabo god gegemainu yali.
 Tama dagego te gɔ pagede me te tibo
 god dabe gegebo kolesaga ebo dao.

¹⁰ Dage te god dabe gegebo sɛ dene mu eyu,
 te dagego bomu silibao.
 Tialima, dage tede gɛ neyu, te tiwai po me weyu,
 ‘Dago bomu te odolali silibao,’ po wabeo.
 ‘Dago te tebo kolesaga tagalino,’
 dagego te po wabeo. Menio.
 Te duga dwai homu ebo kolesaga

te bomonama mu pedaliyu,
te dage kekasa mu pobao wabo dao.”

11 “Dage dede mu wi elama,
te dagego ena ili po ola mayu,
te ena tudiba munama, te ena homu kone mu
gegeda palobawe?

Te bobobage sogo eno dageba wado po wabe,
tama tiyu dagego enaba wi ebeo.

12 Tiali goli, te eno dagego ebo
kolesaga te pebeli diliba hanilaibao,
tama dagego homugo te wiegi yai
da olama wali pabo se ebo kolesaga dabe,
te augwaligo dage dwasianu tau me sogobeo.
Mu menio.

13 Te dwai sego dage dolobo sogo,
dagego te pesage holama elalubo
godigo te dagego augwaliba i obaso,
te augwali aselama, dage tau sagasaiba, agawe?
Mu menio.

Augwa bomo me elalubeo,
te dwasianu waligo naga augwali sela paibao.

Tialima, te bidi dabe enaba aselama,
te eno augwali tau siyu, tonaluainu ebo bidi da,
augwaligo te to eno sa muyu,
te eno we bidi dabego somainu yaibao,
te augwali me eno digi te sa muani
bulu dude bidimainu yaibao,” wali.

*Godigo te we bidi dabego dwai sege sela sagna, te augwal-
iba wiegi yai sogo mawaibao wali*

14 Genuai Bidigo te tama po wali,
“Te eno we bidi dabe enaba ma asomainu yaibao.
Te augwa sunumi bugagia dodolama,
te sunumi paliabo nai tigidali sela sawaibao,

tiyu te nai dabego augwali saḡaḡade dolama,
te augwali tula muidalio,” wali.

¹⁵ “Ena digi ena God, te ena sesemane sogo bidibao.

Eno nogide te magi meda mu meni yai elalubao,
ena te Wiegi Yai Doloba Pai Kolesaga Mu Ebo God
dao.

Ena te ena wiegi yai bulude digi ugwadu bidibao.

Tiali, ena te augwa digi augwa aiyaba elaluama bidiyu,
te augwa yali dwai seḡe homu dene ebo we bidi
dali bidibao.

Te eno augwa haliga daḡ waliyu,
te augwa bidibo ula te wiegi yai
ma pedalumainu ebo dao.

¹⁶ Eno ena we bidi dabeba sesemane sogo wado eyu,
haliga seḡbe idugobeo.

Te eno tama tiyu da, eno koneani,
te augwa bidibo ula dolama, te mu silaibao,
te bidibo ula ena digi eno augwaliba mawai dao.

¹⁷ Eno wado po dwai mu augwaliba wali,
magi baso meni,
te augwa haniani dwai kolesagade te augwaligo
doado bage hauwa mu sabo homu yali.

Tama tialima, te eno augwaliba dene mayu,
te eno gesabidi augwaliba geme sesela sali.

Tiali goli, augwa me hagoma idu geḡyu,
te augwa homu kolesaga wali piduai dao.”

¹⁸ “Eno te augwaligo ebo dwai kolesaga suali,
tiali goli te eno augwali me dologobeo. Menio.

Te eno augwaligo dwai seḡe sela saḡama,
te augwa usu yai ma pedelaibao.

Te ena digi eno augwali bilibo dodoliyu,
te augwali haliga daḡ walaibao.

Tama te homu denede bidiyu, gela wabo we bidi,

¹⁹ te eno augwa te homu dene ebo tagalomainu elama,
 te augwa enaba usu da olama,
 wiegi yai pemene ebo po mimainogo ilaibao.
 Ena Genuai Bidi, eno te po obao,
 te eno nagame yai haliga ebo homu te pađe bidibo
 we bidi dali,
 me te digibulu bidalubo hani dabe dali me ebao.
 Te augwali eno usu ma ilama,
 te augwaliba wiegi yai sogo mawaibao wai dao.*
²⁰ Tiali goli, te dwai kolesaga ebo we bidi dabego,
 augwa te dwai kolesaga ebo me tagalogobeo.
 Augwali te tamu aḡ sesemane sogo
 dinigo te haniani pobebe bage me dwai nai sela asu,
 te nambis dolagasobo tiwai ebo dao.”
 Genuai Bidigo te po wai.
²¹ Eno Godigo te tama po wali,
 “Te dwai kolesaga ebo we bidi dabe,
 te augwa bugagia bidabo wiegi yai sogo
 me elalugobeo,” wali.*

58

*Te dagego nai tubo habu seliba wida, teda te dwai kolesaga
 ebo me habu selao wali po*

¹ Genuai Bidigo enabolo te tiwai po wali,
 “Nago genuai po daḡa mu olama, i wao,
 dua digi i me wagio.
 Nago bomonama i wabo, te bu wabo nai biugel
 bu wabo tiwai yao.
 Te eno we bidi dabeba weyu, te Jekopgo hani dabe,
 te augwa dwai seḡe me dwai kolesaga po wao,” po wali.
² “Mu tama, te tigidali sogode augwa

* 57:19: Ef 2:17 * 57:21: Ais 48:22

te enaba lotu wabo kolesaga eyu,
 te eno homu kolesaga osola sueinu yali.
 Te augwaligo enaba hanalu,
 te augwaliba doloba pai kolesaga yao weyu,
 te augwali pade bidibaso,
 te augwali wiegi yai pemene yaibao wali.
 Tiali goli, te hani dabego tibo po mu wai.
 Augwaligo te eno bomo yai po tudiba munama,
 te augwa dwai kolesaga naga ebo se yai dao.
³ Augwaligo enaba te tiwai po wali,
 ‘Genuai Bidi, dago te nai habu selama,
 te dena digi aiyaba elalubo nago suali,
 tiali goli magi baso nago te da
 tau sabo se isabawe?’ ”
 “Tiali goli, ena Genuai Bidi,
 eno augwaliba te tiwai po wei ponani,
 ‘Te tigidali side dagego te nai habu selebo sogo daj ilali,
 dagego te duga naide digi naga homu kone palama,
 te dagego duga se ebo bidi dabeba dwai se ebo dao.
⁴ Dagego te po weyu, te dage nai habu selama,
 enaba gedu haluasa po waibao wai.
 Tiali goli, dagego kolesaga te gasagi yai tedali mu yalio.
 Dagego te wado elama, hwiyu, nogo sugunama,
 te gasa bidi gesabidide eliyu ebo dao.
 Dagego te dwai kolesaga te dagego nai habu selama,
 bidibo sogo ebaso da,
 teda eno dagego gedu haluasa po wabo me odogobeo.
⁵ Te dagego homugo eno dagego te tigidali side
 nai habu selebo kolesaga ebode
 te eno dage godolo eba homu eba, agawe?
 Dagego te homu dene ebo ugwa munama,
 te duga tobolu te toba basigulu,
 te waligo awi dili basiasa pabo tiwai eyu,

te dage sia keli daide piyu, te duga digi aiyaba elalu,
te gasa tobage kolesaga me yali.

Tama dagego homugo dagego te tobage kolesaga ebode
eno dageba bugai haliga eba homu yaibao, agawe?
Mu menio.”

⁶ “Eno te tobage kolesaga godolo homu me ebeo.

Eno homugo dagego te haniani
dwai kolesaga mu ebo habu selama,
te gasa we bidi dabe elaluama,
te dolobo kolesaga me habu selao.

Te we bidi dabe te hobedagia kalabuside bidiyu,
dagego augwali te bono me sengo kenani,
tama augwali te bulmakau tiwai
dagego te ni nami augwa dogonide kenama,
te duga se emainu ebo tiwai eyu tonalubao.

Te dagego augwaliba wiegi yai kolesaga eyu,
te augwali olo pomainu tagala palao.

⁷ Eno godolo homu ebo kolesaga e tiwai dao.

Eno homugo dagego te nasi ebo
bidi dabeba nai mao homu ebao.

Te magi nai doado bage meni yai bidi
te dagego aga piabo be meni yai subo sogo,
eno homugo dagego augwali te duga
beba odasa pao homu ebao.

Te dagego te bidi aga tigi bea sabo ugwa meni yai
subaso,
te eno homugo dagego augwaliba ugwa maijo homu
yali.

Tama eno homugo te duga deli kaneme sibi
te augwa sege elalubo sogo,
te augwali tudiba munamo dao.”

⁸ “Te dagego eno godolo homu ebo kolesaga ebaso da,
teda polo tama te eno dagede elalubo

dwai seḡe sia somainu yaibao,
te kigamude nanobo giliga ulago
te hulua sai elaluali hola sabo tiwai yaibao.
Te eno dage usu ma ilaibao.
Te ena, doloba pai kolesaga ebo God,
ena dage asobodu polasa paibao.
Te ena dage tudibadu nosali me te eno
genuai bomo ula dali asu,
te dage bugagia tonaluaeibao.
⁹ Te dagego enaba gedu haluasa po weyu, i wabo sogo,
te ena Genuai Bidi, eno te dagego
gedu haluasa po wabo odoyu, tau saibao.
Te ena dage dali bidibo, dagego koneaibao.
Te dagego gasa bage dabe aiyaba elaluama,
te augwaliba nogo t̃ eyu, po dwai wabo tagalama,
¹⁰ te dagego suali,
te bidi dabe te doado bage me
nai dabe s̃q̃ pai elalubo subaso, te dagego augwali
homu dene mu elama,
te augwali s̃q̃ pali nai mobaso da,
teda eno dage wiegi yai bugagia ilaibao.
Te eno dageba wiegi yai sogo pedalumainu elama,
te bomo yai giliga ula tiwai eyu,
te be hulialuali hola sabo tiwai ebo dao.
¹¹ Te ena Genuai Bidi, te sesemane sogo eno dage
bugagia tonalu,
te dage bilibo dodolama,
te dagego homugo wei homu ebo
nai dabe usu nama mawaibao.
Megi dage te ã meni yai t̃de bidibo tiwai ebao,
tiali goli eno dage wiegi yai bomai
we bidi pedalumainu yaibao.
Tama dage te gi t̃ ili ã hauwa elalubo tiwai elama,

te sula sisabo ulu aji tiwai elalueibao.

¹² Tama te dolali taun dabe dagego ma nigaibao.

Dagego te be dabe te polobadu se yai
elaluali pesagede ma se yaibao.

Tama dage nogi augwaligo te tiwai waibao,

‘Te taun obo dabe ma dodolobo hani dabe’,
me ‘Te augwali te sunumi dabe me be dabe
bugagia ma dodolobo hani dabe dao,’ waibao,” wali.

Te dagego Sabat side bomai po bugagia wali pobaso da, te dage bugagia mu bidaibao

¹³ Genuai Bidigo te tiwai po wali,

“Dagego te Sabat side bomai po boligio,
te eno side ena digi daji ilali.

Te dagego duga se dabe digi te side yabo homu me igio.

Dagego te Genuai Bidi eno side,
te ena godolo homu mu elama, te duga genuai side
da homu kone palao.

Te dage me tedela pisama, te duga se me isiamu,
te haniani olo po me minamo dao wali.

¹⁴ Dagego te tobage yabo kolesaga dolo wali pobaso
da, teda te Sabat side dagego Genuai Bidi,
enade wiegi yai pemene umabo mu yaibao.

Te eno dage te polobadu te duga bulai
waji nquba bomai po daju weyu,
te bidao wali bulu du pesagede bugagia bidaibao,
te Jekop, te aga haniba dali mawai.

Te dage nai hauwa elalu, te dage bugagia mu bidiyu,
te magi nai deli me saq pogobeo.”

Te po te Genuai Bidigo pedauwalide digi asai dao.

59

Israel dabego te dwai sę ebo kolesaga bomonama wali pabo sę yali

¹ Genuai Bidigo te dage ma sabo bomoni

da,
dagego te homu me igio. Dagego te homu eyu,
te aga olo degelama, te dago gedu haluasa po wabo
odobeo homu egobeo. Menio.

² Te duga sęęęo naga tama tiyu,
te God aga gesabidi seselasa elalu,
te dagego gedu haluasa po wabo odobeo.

Te duga dwai sęęęo te duga tomode
te duga God dali te obogo dąi elalubo tiwai ebao.

³ Magi baso meni. Te dagego haniani tibo po weyu,
te wado po, me po dwai wali.

Te dagego dwai kolesaga eyu, te bidi dabe ela munama,
te augwa kaneme dagego nogode
dagana sai elalubao.

⁴ Dagego te doloba pai po tų me ebeo. Menio.

Dagego te tibo po dabe weyu,
te po tų odoboba gasa bage dabe kekasa pali.

Te dagego tibo po haniani weyu,
te po tų ebo dagego po naga odomainu elama,
te gasa bage aiyaba elalui.

Te dagego homu kolesagade te dwai sę ebo kolesaga
hauwa mu paęanalulu, te dagego dwai sę haniani
ebo dao.

⁵⁻⁶ Te dagego dwai homu kolesaga elalubo,
te dwai nabi elalubo hasamanigo ge tiwai elalubao.

Te bidi me deligo te hasamani ge tubaso da,
hobede yao, te aga isaibao.

Te tama tiwai dagego dwai homu kolesagade dagego
te haniani dwai sę pedalumainu elama,

te gasa bagego bidibo ula dolobao.
 Te ababua dabego be sę ebo da,
 te augwa te dwasianu nai dabe
 tola sabode te augwa tueinu ebao.
 Te bidi dabego te ababua be selama,
 te ugwa nigilama gudugobeo.
 Te tama tiwai naga dagego te ebo sęgo
 te gasa bage tau me sogobeo. Menio.
 Augwa te gasa bage tola selama, te augwali elaluama,
 te augwaliba dwai sę ebo dao.
 7 Sesemane sogo dagego te dwai kolesaga yabo homu
 godolo mu ebao.
 Te sesemane sogo dagego te magi dwai sę me isąwai
 bidi dabe ela muabo homu hogodali.
 Dagego te dwai sę dabe yabo homu naga ebao.
 Te dage udayu, te gasa we bidi dabego
 bidibo ula dolabo sę ebo dao.
 8 Dagego te haliga nagame elama,
 dua digi bidibo kolesaga konesiąma,
 te dagego te Genuai Bidigo godolo ebo doloba pai
 kolesaga me ebeo. Menio.
 Te dagego kolesaga dabe dolo me isąwai,
 te bidi dabego dage te bilibo sunumi
 wali pobaso da,
 teda augwali te bugagia haliga nagame elama,
 bidabo pesage me gegelama, bidabo usu me egobeo.*
Te we bidi dabego augwa dwai sę yali sęęę po pusali
 9 Tialima, te we bidi dabego te tama po wali,
 “Genuai Bidi, nago naga doloba pai kolesaga ola mayu,
 te tau selama da ma sabeo.
 Megi da, te kolesaga page dago koneani.

* 59:8: Rom 3:15-17

Da te be hulua saide bidibo we bidi tiwai elalu,
 tama dago homugo te wiegi yai sogo daba pedelama,
 te giliga bomonama nanobo tiwai elama,
 te be hulua sai silimainu homu godolo mu yali.
 Tiali goli, menio.

Da te genuai be hulua saide bilibo tiwai eyu,
 te da haniani segego gegebo dao.

¹⁰ Te sege dabego da te gedu widai tiwai biliyu bidibao,
 te da pabo sunumi gege gege bilibo dao.

Te genuai giliga nanalubode digi,
 da te be hulua saide bilibo bidi dabe tiwai bilalubo,
 te dago saḡa dani te masigiba tuḡ palobaso,
 da tula mubo dao.
 Dago homugo te da bugagia bidaiba homu yali,
 tiali goli menio.

Da te isai bidi bidibo tiwai yai dao.

¹¹ Te sege dabego da dwai dene mu ebaso,
 te dago te genuai hasa bea dabego
 gani gani wabo tiwai weyu,
 te dago gela wali te ba higo po wabo tiwai yali.

Tama dago te nageba tonalu,
 te nago doloba pai kolesaga ola mayu,
 te da tau selama, ma sabo tonalubo dao.

Tiali goli, menio.

Te nago doloba pai kolesaga dade
 digibulu elalubo dao,” wali.

¹² “Genuai Bidi, te dago dwai sege nago gedude
 hauwa mu elama,
 te sege dabego da po tu ilali.

Tama dena digi dena yali te dwai se tigidali bugagia
 koneai dao.

Mu tama, dago dago dwai se hauwa yali dao.

¹³ Dago te dena Genuai Bidi, God, nageba dwai se yali,
 te dago nage tudiba munama, nago po sela sawani.

Dago nage dologode bidibo te hagela homu yai dao.
 Dago te gasa bage elaluama,
 te haniani hagoma kolesaga yali.

Dago te gasa bage dabe tibo po ola mayu,
 po geagano bilama,
 haniani sunumi nigibo po wali.

¹⁴ Tama tibaso, dago te kolesaga
 dabego te nago doloba pai kolesaga
 te dade digibulu elaluai,
 tama tiyu, te nago da tau selama, ma sabeo.

Te dago te doloba pai kolesaga me mu po wabo,
 te da tomoba aselama, elalumainu ebeo.
 Te da sisinibo side me, te augwali si me bidagasobeo.

¹⁵ Te doloba pai kolesaga deli dade me elalubeo.
 Te bidi me deligo aga dwai kolesaga tagalobaso da,
 teda te gasa bage dabego te aga dolabo haniani
 sunumi gegebo dao,” wali.

Genuai Bidigo aga we bidi dabe bugagia bidimainu yaibao wali

Genuai Bidigo te we bidi dabego doloba pai kolesaga
 ebo me susiqbaso,
 te agai augwaliba dwai haliga yalio.

¹⁶ Te aga dwai midigi siyu, te tiwai suali,
 te gasa bagego dolali bidi dabe
 te tau sabo bidi elalubo subeo.

Tama tibaso, te aga bomogo digi,
 te aga doloba pai kolesagago digi,
 te Genuai Bidigo augwali ma selama,
 te augwali bugagia bidimainogo ilai dao. *

¹⁷ Agai te doloba pai kolesaga te kapa
 holobo ugwa mubo tiwai eyu,
 te aga hagawiade mesega sabo tiwai yali.

* 59:16: Ais 63:5

Te aga te we bidi ma sabo bomo

te hwıbo madi kapa tiwai muani.

Te aga ugwa gudubo tiwai bomonama daꝋ ola selama,

te dwai se ebo bidi dabeba dene mawainu tiaibao.

Te aga haliga sebe ebo te bobobage

ugwa aiyaba tagalalubo tiwai yaibao.*

¹⁸ Te agai haliga sebede,

te aga boi bidi dabeba dwai dene mayu,

te augwa yali dwai se dolo usu wei ponaibao.

Te agai te pade elalubo bulu to kantri we bidi dabeba,

me te digibulu to kantri dabe,

te dwai dene mabo se mu yaibao wai dao.

¹⁹ Genuai Bidi te genuai we asobo tiwai eyu,

te Genuai Bidigo ponobo sogo te

daꝋ walali we gisigilama,

te we asesa mu pomainu yaibao.

Te tigidali to asesa mu pomainu yaibao.

Te tigidali to habu we bidi dabe, te giliga pedalubo badu

gagalasa pelama,

te giliga degegi paboba usu nigi paibao,

te augwaligo Genuai Bidigo bomo

me genuai nogi koneama, te aga nogide wi

elama,

te augwali aga dologoba aselama,

bidimainogo yaibao.

²⁰ Genuai Bidigo te po wai, “Ena te dage posolalu,

te dage tau sabo God,

ena te Jerusalemba aselama,

te tigidali we bidi te Jekopgo hani te augwa dwai

kolesaga ebo tagalali bage ma sagasaibao.*

²¹ Te ena da, eno bomai po augwali dali daꝋ walama,

* 59:17: Ef 6:14; 6:17; 1 Te 5:8 * 59:20: Rom 11:26

te augwaliba eno te tiwai po waibao,
 ‘Te eno mobo noma bidi me,
 te eno dagebolo mani po me,
 te dagede bidiyu,
 te dagego pedauwaligo eno po pusaibao.
 Dagego sesemane sogo tama tiaibao,
 te nosali dagego wai dabego me
 te duga bulabo wai dabego me te tama tiyu,
 te sesemane sogo augwaligo me
 eno po elalua peyu, pusaibao,’ ” te po wai dao.

60

Godigo genuai ula me bomo te Jerusalemde elalueibao

- ¹ Genuai Bidigo te po wali, “Jerusalem, nage
 hogodama, te giliga nanobo ula tiwai yao,
 magi baso meni, megi eno genuai ula me bomo,
 Genuai Bidigo ula te nage daide ugwadu yaibao.
- ² Suao. Te sisi yai pɔ, me te genuai be huliasabogo,
 te tɔde tigidali gasa hani we bidi mesegelaibao.
 Tiali goli, ena Genuai Bidi, ena nageba aselama,
 te eno genuai ula te bomonama,
 nage daidu ula elalueibao.
- ³ Te Israel hani isawai we bidi dabego
 nago te ula sulama,
 te augwali nageba asaibao.
 Te king dabego me nago te bomai ula sulama,
 te augwali hogodama asaibao,” wali.
- ⁴ “Nago tobolu ugwaba selama, tonono bilao.
 Te naga wai dabe augwali deliba sisinama,
 asobo sueibao.
 Te nago ogwa dabe te digibulude bidai asaibao.
 Te gasa bulu tɔ kantri bidi dabego te nago wegi dabe
 augwa hagawiade munama, tolasa asaibao.

⁵ Nago te tebo sulama,
 te nago gesabidi ula umagia mu yaibao.
 Te nago hoboludu dali pua pelama,
 genuai pemene yaibao.
 Te genuai sipidu wiegi yai nai hauwa
 nageba sesaibao.
 Te nago mone hauwa mu te tigidali tō kantride saibao.
⁶ Te Israel hani isawai Midian bage me Efa bage,
 te augwaligo gesi kamel hauwa mugo
 te walu dabe nageba sesaibao.
 Augwali te tō kantri Seba teba pelama, te gol me,
 te wiegi yai hano denami ebo pauda me,
 te selasa asaibao.
 Te we bidi dabego Genuai Bidi,
 eno genuai nogi ugwaba saibao.
⁷ Te Kedar me Nebaiot dabego te tigidali wiegi yai
 sipsip hani nageba sesaibao.
 Tama ena we bidigo te sipsip dabe seselama,
 te eno alta daiba ofa ebaso,
 te ena wiegi yai pemene ebao wali.
 Te eno be te polalubo be mu pedelama,
 te genuai nogi elalueibao,” te po wai dao.
⁸ “Te magi tedela yai nai asesa mu asu,
 te dagalu pō waligo te tamu aī daidu
 selasa asobo tiwai yali,
 te ba hi dabe augwa beba ma
 bola asobo tiwai ebawe?
 Te magi nai dawē?
⁹ Te digibulu buludu asobo sip dabe dao.
 Mu tama, te digibulu bulu we bidi dabego te eno
 augwali tau sabo tonaluai.
 Augwaligo te genuai sip dabe tagala palali,
 te nago ogwa dabe nageba ma sesalio.

Te we bidi dabego te hauwa silva me gol
te sip dabego sela somainu tolali.

Augwa tama tiali, magi baso meni,
augwaligo te eno nageba wiegi yai sę bugagia eyu,
genuai nogi elalubo sulama yali,
te augwaligo Israelgo Genuai Bidi,
te ena Godiba genuai nogi mayu yali,
ena te Wiegi Yai Doloba Pai Kolesaga Mu Ebo
God dao,” te po wai.

¹⁰ “Jerusalem, te gasa bulu tọ kantri bidi dabego nago
genuai obo te masigi dabego ma nigagasaibao.

Te augwa king dabego nago sę yaibao.

Hasia eno wado po dwai nageba wali,
te eno dene nageba mawai.

Tiali goli, megi eno bugai haliga eyu,
te nageba olo tau sabo wiegi yai kolesaga ebao.

¹¹ Te nago genuai obo sunumi dabe
te giligade me hulide dalalueibao,
magi baso meni, te gasa bulu tọ kantri we bidi
dabego te augwa mone sesemane sogo
nageba sesaibao.

Te augwaligo augwa king dabe me te nageba olo mu sę
ebo bidi tiwai emainu odasa asaibao. *

¹² Tiali goli, te nage dologoba aselama,
nago sę isąbo bulu tọ kantri dabe,
te augwali dolama, mu silaibao,” wali.

¹³ “Te bidi Lebanon genuai busiba holama,
te bobage bobage sawi yai ni wuli, me saipres,
me te gasa wiegi yai ni dabe togolama,
te augwaligo nageba sesaibao.

Te ni dabe dali, te bidi dabego eno be ma sęnama,
te be gasa sawi wiegi yai mu pedelaibao.

* 60:11: [Ped 21:25-26](#)

Ena te ena duabo sia kingde dugulalu,
tama te be da eno saḡa teba manama elalubo tiwai
elalueibao.

Tama te be eno polalubo be mu pedelama,
tama aga genuai nogi elalueibao.

¹⁴ Te polobadu nageba dwai se eyu,
te nage godolo homu isaʷani hani dabe,
te augwa tobolu basiasa nageba asaibao.

Te augwa kidu sugunugulama,
te nago saḡa paḡde augwa tobolu basigulama,
te nageba genuai nogi mawaibao.

Te augwa nage nogi te tiwai weyu,
'Genuai Bidigo Taun da,' te 'Saion da,'
waibao, 'te Israel Godigo Taun,
aga te Wiegi Yai Doloba Pai Kolesaga Ebo God mu
dao.' " *

¹⁵ "Jerusalem, nage ololama, olo elalu,
te nago sunumi dabede bidi iba oba soyu me isaʷai.

Nage te we tiwai bidiyu, te aga bidigo
aga godolo isaʷama, tagalobaso, aga wi pali.

Tiali goli, te eno nage te gasa
sawi wiegi yai pedalumainu ilama,
te nage polalu, polalubo mu pedalubaso,
te we bidi dabego nageba wiegi yai
homu pemene mu yaibao.

Tama nage te tiwai naga sesemane sogo
bidada pidu, bidada paibao.

¹⁶ Te nago wiegi wiegi yai nai te gasa kantride siyu,
te king dabego augwa wiegi yai
sawi yai nai nageba mawaibao.

Tama nago te tiwai koneama,
ena naga te Genuai Bidi da waibao.

* 60:14: Ped 3:9

Ena te ena we bidi ma sabo God dao,
 ena te nage posolalu, tonalu, tau sabo God,
 ena te Jekopgo hani dabego bomai God dao,” wali.

17 “Te eno nago bras hasegelama,
 tama nago gol munolueibao.

Me nago ain hasegelama, tama nago silva munolueibao.
 Te eno nago ni nami dabe me hasegelama,
 tama nago bras elalueibao,
 me nago masigi dabe hasegelama,
 nago ain elalueibao.

Te eno wiegi yai bugagia haliga nagame homu elama,
 dugulaluabo kolesaga nigilaibao,
 te doloba pai kolesagago nage bilibo dodolaibao.

Te niwai bidi mego nage tonalu,
 nageba dwai sɛ me egobeo.

18 Te nago tonalubo tigidali tɔ habu badu
 te bidi dabe munu me ma hwiɣobeo.

Awe, nago tɔde me te doado bage alubo
 kilikili me egobeo.

Te nago genuai obo nogi te tiwai elalueibao,
 ‘Genuai Bidigo aga we bidi dabe ma salio,’ waibao.
 Te nago genuai sunumide te tiwai nogi elalueibao,
 ‘Genuai Nogi Mao,’ ” wai.

19 “Te giligago nageba te bubugade ula mayu,
 elalubo tiwai munu me elalusiayuu,
 te poluago me nageba ula mayu, me egobeo. Menio.

Genuai Bidi ena digi ena te giliga tiwai,
 me polua tiwai ula elalu,
 te eno sesemane nageba ula maduaibao.

Te ena, nago God, ena te genuai ula elalu,
 te nago au ilibo nai elalubo dao. *

20 Nago te giliga me polua iba dega sigi pelama,

* 60:19: Ped 21:23; 22:5

te be hulua siyu ebo me pedalugobeo,
 magi baso meni, ena Genuai Bidi,
 sesemane sogo ena te nago ula tiwai elalueibao.
 Tama nago seḡḡ dali homu dene ebo
 sogo me tigidali silaibao.
²¹ Te sogo te nago we bidi tigidaligo
 doloba pai kolesaga naga eyu,
 te eno augwa tḡ da olama,
 sa muani tḡ te augwa saibao,
 tama augwa tede sesemane bidada paibao.
 Te ena nogogo digi eno augwali
 te deli hani we bidi pedalumainu ilali, tama augwali
 te eno bulai ni nologo tiwai pedelali.
 Eno tama tiali, te gasa hani we bidi dabego sulama,
 te enaba genuai nogi momainogo tiai dao.
²² Jerusalem, te nagede bidibo mena bidi aga nogi me
 elalusiḡbaso,
 te tagalao, aga te genuai hani
 wai dabego aya mu pedelaibao.
 Te dwasianu mu yali hani dabe
 te augwali umabo pedalu,
 te augwali genuai bomai kantri
 we bidi tiwai pedelaibao.
 Ena Genuai Bidigo eno te po obao,
 te seḡ dabe te eno bodolu muani sogo
 polo asesa pedelaibao,” te po wai dao.

61

Te Godigo aga we bidiba wiegi yai seḡ ilabo sogo te pedelalio

¹ Tigidali Bomo Elalubo Godigo Mobo Noma
 Bidi enaba bidagasali,
 magi baso meni, Genuai Bidi aga
 digi eno toboluba wel gelali,

te ena ɗaj sa muyu,
 te aga wiegi yai po te magi
 doado bage meni yai bidi dabe selasa pomainu yai.
 Te agai ena tagala palali, te haliga seḡḡ genuai elalubo
 bidi dabego seḡḡ silimainu yai,
 te kalabuside bidibo bidi dabeba po pusu,
 te augwa kalabus tagalama,
 olo pao po omainogo yai. *

² Agai ena tagala palu, te tama po pusao wali,
 te dago Genuai Bidi, Godigo seḡ yabo
 sogo pedelalio,
 te aga we bidiba wiegi yai seḡ bugagia ilama,
 te boi bidi dabeba dwai dene mawaibao, wai.
 Te agai ena tagala palali, te homu dene eyu,
 gela wabo we bidi dabego haliga ɗaj walomainu
 tagala palai dao. *

³ Te Saionde gela udubo we bidi dabeba
 eno te nagame yai haliga dua eyu,
 pemene ebo homu me selasa asaibao,
 te augwa bomo silali bageba tama tiwaibao.
 Augwali homu dene ebaso,
 te sia keli augwa toboluba muani.
 Tiali goli, eno te nai hasegelama,
 tama dwagi yai au yabo nai augwaliba mueibao.
 Awe, eno augwaligo tigiba te wiegi yai
 denami ebo wel mawaibao,
 tama augwali homu dene ebo tagalama,
 dwagi yai homu pemene eyu bidaibao.
 Te augwa bomo ma selama,
 te Genuai Bidiba pemene ebo balia waibao.
 Augwa tigidali te doloba pai kolesaga

* 61:1: Mat 11:5; Luk 7:22 * 61:2: Mat 5:4; Luk 4:18-19

naga ebo sę bomo yaibao.
 Te gasa bidi dabego sueibao,
 augwali te Genuai Bidigo digi
 bulali ni kali tiwai elalubao,
 tama augwaligo Genuai Bidigo nogi ugwaba saibao.
 4 Te dage we bidi dabego te polobadu
 dolali taun ma nigiyu,
 tama dagego te kibu be hauwa dolai elalualai nai
 tigidali ma dodolaibao.
 5 Te gasa bulu tɔ kantri bidi dabe aselama,
 dagego sę yagasaibao.
 Te dagego sipsip dabe augwaligo tonalu,
 te augwa tɔ elama, nai bulaibao.
 Tama augwaligo te dagego wain gi me tonaluaibao.
 6 Tiali goli, duga digi dage te Genuai Bidigo pris bidiyu,
 te augwaligo dage nogi weyu,
 te dena Godigo sę bidi da waibao.
 Te duga nai hauwa elaluaibao,
 te gasa tɔ kantri bidi dabego sela asai.
 Te augwaligo wiegi yai nai hauwa dageba mobaso,
 te dage wiegi yai homu mu pemene yaibao.
 7 Polobadu te dage hale dwai mu elama,
 duga gesabidi seselalualai.
 Tiali goli, dage te duga tɔde digi bidaibao,
 te dagego nai hauwa mu siyu,
 te dagego polobadu elalualai nai mu edelaibao,
 te dage pemene umabo mu yaibao.
 Tama dagego te ebo homu pemene
 sesemane sogo elalua paibao.
 8 Magi baso meni. Genuai Bidigo te po wai,
 “Eno te doloba pai kolesaga naga godolo ebao.
 Eno te bidi elama nai wi sabo kolesaga,
 me te gasa bageba dwai sę ebo

- kolesaga, te hagela mu ebao.
 Te eno we bidi dabe te gasa bidi dabego
 augwaliba mani dwai se ebo sege hauwa tolali,
 te mu tama te megı eno augwaliba
 wiegi yai nai mu mawaibao.
 Te eno bomo yai po me deli augwali dali daı walaibao,
 tama te daı walali bomo yai po
 sesemane elalua paibao.
- ⁹ Te eno we bidigo bulai waı wai dabe
 te gasa to kantri hani we bidi tomode
 genuai nogi elalueibao.
 Te augwali subo we bidi dabe,
 te augwa te tiwai koneaibao,
 te hani dabe te eno hani dabe dao,
 Genuai Bidi, ena digi eno augwali wiegi yai ilaibao,”
 wali.
- ¹⁰ Te eno pemene ebo wiegi yai balia
 Godiba waibao, eno Genuai Bidi dao.
 Te eno pemene umabo mu yaibao,
 magi baso meni, agai ena ma sali.
 Te aga wiegi yai sogo te aga doloba pai kolesagago ena
 te bobobage wiegi yai ugwago mesega sabo
 tiwai yali,
 te ena te we sabo bidigo au ebo tiwai eyu,
 te we aga bidigo aga kebo sogode au ebo tiwai yai
 dao. *
- ¹¹ Magi baso meni. God, Genuai Bidigo
 doloba pai kolesaga dali,
 te aga nogi ugwaba sabo kolesaga dali,
 te we bidi dabe tomode pedelaibao,
 te gide bulali nai wai kulubi pedelama,
 te genuai ebo tiwai yaibao.

* 61:10: Ped 21:2

Tama te gasa Israel hani isawai we bidi dabe tigidaligo
sumainogo yaibao.

62

Jerusalem gesi nogi saibao

- ¹ Jerusalem, nage tobade te eno po hanilama,
bomo elama weyu,
te Genuai Bidigo nageba wiegi yai se yao po obao.
Te eno pedauwali me pania sogobeo. Mu menio.
Te eno Genuai Bidiba i udu,
te Genuai Bidigo te bugagia
wiegi yai doloba pai kolesaga nageba eyu,
te kigamu nanobo giliga ula tiwai eyu,
te hulide domanobo sole ula ebo
tiwai teba usu numainogo yaibao.
- ² Tama te gasa to kantri we bidi dabego
nago te doloba pai kolesaga ebo sulama,
te augwa king dabego te nago bomo
me genuai nogi elalubo sueibao.
Te augwa nage gesi noma nogi nogi yaibao,
te nogi Genuai Bidigo digi nageba mawaibao.
- ³ Nage te gasa sawi yai kingo madi
te Genuai Bidi aga nogode tolalubo tiwai yaibao.
Awe, nage te aga nogode tolalubo
wiegi yai au yabo nai tiwai yaibao.
- ⁴ Tama te bidi dabego nageba
te tiwai nogi ma nogisayu,
“Genuai Bidigo aga tagalai da,” me wagobeo.
Te nago to augwaligo te tiwai nogi me wagobeo,
“Hobede ya, te to dolama, olo elalubao,”
wagobeo. Menio.
Te augwaligo nage gesi nogi te tiwai waibao,
“Eno wiegi yai homu pemene agaba ebo dao.”

Te nago t̄ augwaligo te tiwai nogi yaibao,

“We bidigo salio,” magi baso meni,

Genuai Bidigo bugai haliga eyu, wiegi yai pemene
umabo nageba ebao.

Te nago t̄ bugagia ma elalu, te we tiwai,

te bidigo aga ma sabo tiwai yaibao.

⁵ Te naga wai dabego nage selama,

te nage dali bugagia bidibo tiwai yaibao,

te gesi ogwa bidigo te gesi wegi selama,

te augwa si bugagia mu bidibo tiwai ebao.

Te Genuai Bidigo wiegi yai pemene nageba yaibao,

te gesi noma sogo bidigo we selama,

te aga weba wiegi yai homu pemene

ebo tiwai ebo dao.

⁶ O Jerusalem, te nago masigigo nigai genuai obo

ugwadu daide eno te tonalubo bidi muai,

tama augwaligo pedauwali te giligade hulide me

pania sogobeo.

Eno augwaliba te tiwai po wali,

“Dage te Genuai Bidiba i wabo bidi dabe,

dagego toma me nogobeo. Menio.

⁷ Dagego bomo elama, agaba i ola pidu,

agai te Jerusalem bomo ma iliboba usu nao,

tama Jerusalem te tigidali t̄de we bidi gedude

polalu mu pedelaibao,” eno te po wali.

⁸ Genuai Bidigo nogo guni sisu muyu,

bomai po daḡ wali,

te aga genuai bomode agai te daḡ wali po mu

pedelaibao.

Agai po te tiwai, “Ena Genuai Bidi, te eno te boi

bidi dabego nago we bidi dabego te s̄ dene elama,

bulubo wit dabe munu ma sagasomainu me iligobeo.

Tama eno te gasa t̄ kantri dabego te nago we bidigo

nigibo wain aꝓ sagasomainogo me egobeo. Menio.

⁹ Te nago we bidi augwa digi naga
te inayu tau yali wit selama, te bret nigilama
tueibao.

Te augwaligo ena Genuai Bidi,
te enaba genuai nogi mawaibao.

Te nago we bidi dabe augwa te inawani
wain du dabe selama,
te wain aꝓ nigaibao.

Tama augwa te eno be obo tomoba sela aselama,
te aꝓ augwa tuyu,
te wiegi yai pemene enaba yaibao,” te po wai.

¹⁰ Dage te megí Jerusalemde bidibo hani dabe,
dage tigidaligo taun tagalião.

Te taun tagalama, sunumi bogoba pelama,
te sunumi bugagia dodolao,
te duga we bidi dabe ma asobao.

Te augwa sunumi bugagia sisilao,
te sunumide elalubo masigi dabe sela sayao.

Tama te tigidali tꝓ kantride bidibo hani we bidigo
suabo plak me deli nide walao.

¹¹ Nage Jerusalem, nago te tiwai koneao,
Genuai Bidigo te tigidali tꝓde we bidiba weyu,
nageba te po pusumainogo yali, “Saion, suo.

Te nago we bidi dabe ma sabo bidi, aga asobao.
Suo. Te agai aga we bidi dabe odasa asu,
te aga te boi hwɨnama,

te wiegi yai nai sali tiwai yali dao,” te po wao.*

¹² Te augwaligo nago we bidi te tiwai nogi poaibao,
“Te Genuai Bidigo tedali gasagi yai we bidi dao,” me
“Te we bidi dabe te Genuai Bidigo ma salio.”

Te augwaligo nage nogi te tiwai waibao,

* 62:11: Ais 40:10; Ped 22:12

“Genuai Bidigo godolo mu ebo taun da,”
me, te “Genuai Bidi ma aselama, bidibo taun dao,”
waibao.

63

Genuai Bidigo aga boi bidi dabeba dwai dene mawaibao

- ¹ Te king bidi tiwai bugagia mu au elama,
te taun Bosra te tɔ kantri Idom badu
tagalama asobo bidi de dawe?
Te aga genuai bomo dali wele sesa asobo bidi de dawe?
Te aga gudali ugwa tonani te mama mu yalio.
“Te ena, Genuai Bidi tama dao.
Eno te we bidi dabe ma sabo bomo elalubao,
tama eno te tiwai po obao,
te eno doloba pai kolesagade,
eno te augwaligo boi bidi dabe aiyaba elaluaibao,”
wali. *
- ² Magi elama te nago gudali
ugwa dabede mama kaneme mu yali,
te bidi te wain nigibo tomoba pali tiwai elama,
te wain wai agabo digi pabo tiwai yali da, agawe?
- ³ “Eno bulu tɔ kantri dabe agawali,
te bidigo wain du wai te masigi pou tomode agabo
tiwai yali,
te gasa tɔ kantri bidi me deligo ena tau me sabeo.
Eno augwaliba haliga sɛbɛ eyu,
wado dwai mu olama,
te eno augwali bomonama mu
agawali madi te augwa kaneme gela tagalu,
te eno gudali ugwa dabede kaneme dagana salio.*
- ⁴ Eno te ena sainu sa muani we bidi dabe sabo sogo

* 63:1: Ais 34:5-17; Jer 49:7-22; Ese 25:12-14; 35:1-15; Amo 1:11-12; Oba 1-14;

Mal 1:2-5 * 63:3: Ped 14:20; 19:13, 15

pedelalio,
tama tiyu, megi sogo te eno augwaligo boi bidi
dabeba dene mabo sogo dao.

⁵ Ena dwagila mu midiga sayu tonani,
te tiwai te ena tau sabo bidi me elalubeo.
Tialima, te ena bomogo digi te eno genuai haliga sẹ̀bẹ̀go
me,
eno te ena we bidi dabe ma siyu,
te eno augwaligo boi dabe aiyaba elaluai dao.*

⁶ Te eno genuai haliga sẹ̀bẹ̀go,
eno tigidali we bidi dabe agala salio.
Te eno haliga sẹ̀bẹ̀ ebo kabude te ẹ̀ augwa tumainao,
te augwali aiyoge page dwai mu yalio.
Te eno augwaligo kaneme tọ̀ba gelu tiaı dao,” wali.

*Te we bidi dabego Genuai Bidigo wiegi yai kolesaga homu
kone palali*

⁷ Te eno Genuai Bidigo wiegi yai olo mu tau sabo
kolesaga po pusubao.
Te eno aga nogi ugwaba siyu,
te agai da tau siyu, wiegi yai kolesaga hauwa
yalı po pusaibao.

Awe, te aga genuai olo mu tau sabo wiegi yai kolesaga,
me homu dene ebogo,
agai te Israel haniba wiegi yai sẹ̀ mu yalio.

⁸ Genuai Bidigo te po wali,
“Te hani dabe, augwali te eno hani we bidi dabe
mu da,
te augwa hagoma elama, eno po me sela sağobeo.”

Tama te aga augwali ma sali bidi pedelai dao.

⁹ Te augwali dene me sẹ̀gẹ̀ tolali sogo,
Genuai Bidi me augwali dali te dene me sẹ̀gẹ̀ tolali.
Te agai haliga augwalide homu dene ebaso,

* 63:5; Ais 59:16

te agai augwaliba te olo mu tau sabo
 wiegi yai kolesaga yali,
 tama aga digi te mobo bidi ensel tiwai pedelama,
 te augwali ma sali.

Te tobage sogo sesabi mu elama,
 te agai augwali tolalu,
 te augwali bugagia mu tonaluai dao.

¹⁰ Tialima, te augwaligo agaba hagoma eyu,
 te agai homu ogwa wai mobo te haliga seḡḡ mu
 ilali.

Tama tibaso, aga digi augwaliba boi bidi elama,
 te augwaliba hwjani.

¹¹ Tialima, nosali augwa te polobadu
 yali sogoba homu kone palali.

Augwa te Moses me aga we bidi dabeba homu kone ma
 palama,
 augwa te tiwai po wai,
 “Te Genuai Bidi mena bidibawe?

Polobadu agai te polalubo bidi aga
 we bidi dabe dali odasa asu,
 te tamu aḡ nogeali Genuai Bidi mena bidibawe?

Polobadu agai homu ogwa wai mobo
 te augwali dali bidimainu yai dao.

¹² Agai te aga genuai bomo te Mosesba mawai.

Agai te tamu aḡ si badu peda somainu elama,
 te aga we bidi dabe te aḡ nogelama,
 u badu pedaiba sabolali,

tama te kolesagade aga genuai nogi sali,
 te sesemane elalumainu yai dao. *

¹³ Te augwali asobodu aga polasa peyu,
 augwali te tamu aḡ dologo badu mu
 elalubo tɔdu pali.

* 63:12: Sai 14:21

Te augwali te bulu wa pai pesagede bidibo
 bulu uni hos dabe pabo tiwai bomonama asesa pali,
 te augwali me tula mubeo.

¹⁴ Te Genuai Bidigo Mobogo digi
 te aga we bidiba nagame yai homu mayu,
 te augwali toma nomainu ilali,
 te bulmakau dabe te nosai hauwa
 elaluboba pelama,
 nai tuyu, toma nomainu ebo tiwai yalio,”
 augwaligo te tiwai po wai.

Genuai Bidi, nago te bomai se dabe yali,
 tama te kolesagade nago te naga
 we bidi dabe pabo sunumi dodolali,
 te tigidali we bidigo nago genuai nogi
 me bomo konemainu yai dao.

*Te Israel dabego te Genuai Bidigo augwali tau sao olama,
 gedu haluasa po wali*

¹⁵ Genuai Bidi, nage te naga bulu
 pesage dagalude bidibao,
 te tedali gasagi yai mu dao,
 te bulu pesagede te nago genuai ula
 me bomo paḡanalubao.

Tiali goli, te nago aiyaba tonoyu, te da suao.
 Magi baso nage hogodama,
 te nago genuai bomo daba waselisama ebawe?
 Nago homu dene eyu, olo tau sabo
 wiewi yai kolesaga te dabolo me ola mabeo.

Te nago da godolo homu me isiḡyu ebo da, agawe?

¹⁶ Tiali, nage te dago aya dao.

Te da bulai wai monu aya, Abraham me Jekop
 augwali te da dali me bidibe,
 te augwaligo da konesiḡwai.

Tialima, nage Genuai Bidi, nage dago aya mu dao.

Tama nago nogi te tiwai elalubao,

“Te da tudibadu tonalu,
polobadu digi tau sesa asali bidi dao.”

¹⁷ Genuai Bidi, magi baso nago da
te besela palama, bilalumainu eyu,
te dago nago doloba pai sunumi wali
pisamainogo ebawe?

Magi baso nago dago haliga me homu kolesaga daꞑ
weyu,

te dago nageba wi isama,
te nago dologode bidisamainu ebawe?

Nago naga se bidi dabe da homugo koneama,
te nage ma aselama, da dali bidagasao,
te naga digi nago sa muai hani dabe dao.

¹⁸ Te peꞑadage sogo naga nago digi te sa muani be
te nago we bidi dago nogode elaluali,
te nosali dena boi bidi dabe asu, dolama,
te nago be mesegelama, agala dolali.

¹⁹ Tama megı da, da we bidi hobedagia
mu bidibo tiwai ebao,
polobadu nago tonalu, tolalusawai tiwai bidibao.

Tama da hani dabe te nago nogi augwalide musiawai
bage tiwai bidibao.

64

¹ O Genuai Bidi, dago homugo nage te dagalu
buga sanama, dulao homu ebao,
te bulu du dabe nage asobo sogo dwai midigi mu
saibao.

² Augwali te siade ulalubo sene sospende tomode
te posolo aꞑ punuguna tagalobo tiwai yaibao.

Nage te naga genuai bomo dali asobaso,
te boi bidi dabego nago nogi konemainao,

te nage augwaliba pedalubo sogo
te tigidali tɔ kantri we bidi dabe
wi elama, noma saibao.

³ Polobadu nage asobode, te gasagi yai
nai tedali mu pedelali,
tama dago te suyu, dwai noma mu sali.
Te bulu du dabe nage asali sogo,
te dwai midigi mu sai dao.

⁴ Polobadu te bidi mego te god me deli
tobage bomai sɛ yali po odobeo,
te we bidi tau siyu, te konealu tonaluabo sɛ.
Ma, bidigo aga gedugo te god me deligo
te tobage bomai sɛ ebo subeo. Menio.

Genuai Bidi, nago naga te tiwai bomai sɛ ebo dao.*

⁵ Nago pemene eyu, te doloba pai kolesaga mu elama,
nago te godolo homu ebo kolesaga
wali pabo bidi dabe tau sagasobo dao.
Tiali goli, nago daba wado po wai goli,
te dago kolesaga me hasegelebeo.

Dago te dwai sɛ yabo bomu iduai dao.

⁶ Da tigidaligo dwai sɛ eyu,
te da nago gedude meda yai mu elalubao.

Te kolesaga dabe dago homugo
doloba pai kolesaga da olama,
te kolesaga dabe te dago gawea pai nai tiwai dao,
tiali goli dago te ebo, augwali nago
gedude dwai mu eyu,
te ugwa meda dwai mu tiwai ebao.

Te dena ebo dwai sɛgo te pɛde da mu haga yabo homu
yai,
te wa pai ni yabe te waligo sela pabo
tiwai yaibao wali.

* 64:4: 1 Ko 2:9

- 7 Te nageba gedu haluasa po weyu,
 te nage nogi wabo bidi meni yai,
 te nage pāba asu,
 nageba homu kolesaga kēa pabo bidi meni,
 magi baso meni,
 nago naga gesabidi daba geme dula selama elalu,
 te nago dena sēgēgo da dodolomainu ilama,
 te da dwai mu bidibao.
- 8 Tialima, Genuai Bidi, nage dago aya dao.
 Nage te sospen sene tōgo nigibo bidi tiwai,
 tama da nago te sene nigainu sabo
 tō tiwai elalubao.
- Te nago nogogo digi da tigidali nigibo dao.
- 9 O Genuai Bidi, nago dade haliga sēbē mu idu,
 te sesemane sogo dago ebo
 dwai sēde homu kone paludigio.
 Menio.
- Da tigidali te naga we bidi da homu elama,
 te nago daba olo mu tau sabo wiegi yai kolesaga
 yao.
- 10 Te nago tedali gasagi yai taun dabe te olo bulu dwai
 tō pesage tiwai elalubao,
 te Jerusalem me mu dolama, tede bidi me bidibeo.
- 11 Tama nago tempel be da, nago te po weyu,
 da teba pelama, nageba lotu waibao wali,
 te me siago delama, tigidali dolali.
- Polobadu te be te gasa sawi yai mu elalu,
 te da bulali wāj dabe teba pelama,
 te nago nogi ugwaba sali.
- Tiali, megı da, te dolali,
 te dago godolo homu yali gasa wiegi yai pesage
 dabe,
 augwali me te dolama elalubao wai dao.
- 12 Genuai Bidi, nago te sē dabe sulama,

nago haliga hogodiyu,
 te magi sę me deli yabo homu ebo meni da, agawe?
 Te nago homugo dago te sęę hauwa
 tolodumaina homu elama,
 tama nago dago gedu haluasa
 po wabo wei ponisama eba, agawe?

65

*Godigo te hagoma ebo haniba dwai dene mayu, te aga sę bidi
 dabeba wiegi yai sę ilaibao wali*

- ¹ Genuai Bidigo te po wali, “Ena, Genuai Bidi,
 te eno augwali tau somainu
 gedu haluasa po wasiabo we bidigo
 gedu haluasa po wabo odainu,
 te tonalu sisilalubao.
 Te ena bidibo augwali enaba asobo tonalubao,
 tiali te augwaligo ena gegabo homu isałani.
 Eno te po wali, ‘Sesemane sogo ena bidibo,
 te dage tau sainu eba,’
 tiali goli augwali te enade digibulu bidiyu,
 te eno nogi augwalide musiawai hani
 bidibo tiwai ebo dao. *
² Te tigidali side eno nogo dinigalubao,
 tama eno te eno po sela sašo we bidi
 ma sainu tonalubao,
 te dwai kolesaga ebo sunumidu
 augwa homugo digi wali bilibo
 we bidi te ma sainu tebo dao. *
³ Te eno gedude augwa te eno haliga sębę elama,
 wado po wabo tobage kolesaga eba.
 Augwa te Godigo po odisašo bidi dabego ebo kolesaga
 yai.

* 65:1: Rom 10:20 * 65:2: Rom 10:21

Augwa te lotu wabo pesage te gide elalubo te sisinama,
 ofa eyu,
 tama augwa te tibo god dabego altaba pelama,
 te wiegi yai denami yabo hano ilibo pauda ulubo
 dao.

⁴ Tama hulide augwa te gụ pageba bidalugi pelama,
 te isai bidi dabede po sainogo ebo dao.

Tama augwa te kibu mi tulama,
 te gasa tobage hasa te eno gedude
 wiegi yai is̄abo sup nai ̄ı me tubo dao.

⁵ Te augwa gasa bageba te tiwai po weyu,
 ‘Dage dade digibulu bidao,
 magi baso meni, dago tigde habu selali.

Tama tibaso, dage da dali me kisalugobeo,’
 te po wabo dao.
 Eno te hani dabego te tobage kolesaga ebo te eno
 homude hagela yali.

Augwa te tama tebode te eno haliga s̄eḅe
 dwai mu augwaliba ebao.

Augwalide eno te haliga s̄eḅe ebo te mu siligobeo,
 te sia bogoli gamonama dabo tiwai ebo dao,” wali.

⁶ “Suao. Ena Genuai Bidi,
 eno te dage dwai we bidi dabego ebo
 dwai s̄eḅe tigidali te eno bukude as̄eni.

Tede eno sagia sogobeo. Menio.
 Te eno dageba dwai dene mayu,
 te duga yali dwai s̄eḅe tigidalide
 dolo mu wei ponaibao.

⁷ Te eno duga yali s̄ego s̄eḅe dali,
 te duga bulai w̄ı n̄u dabego yali
 s̄eḅe dali tolomainu yaibao.

Te duga bulai w̄ı n̄u dabe te lotu wabo
 pesage te bulu du bageba holama,

tama augwa te wiegi yai hano denami ilibo ofa eyu,
 tama augwa te haniani dwai kolesaga ena gedude yali.
 Tama eno augwa yali dwai sę tigidali usu nama,
 dolo mu te wei ponaibao,” wali.

⁸ Genuai Bidigo te po wai,

“Te bidi me deligo te bono du wain
 te du pa elalubo nogogo sęwainu ebaso,
 gasa bidigo te po wagi da,
 ‘Tonalu bolo yao,’ wai.

‘Eno te wiegi yai wain wai du meba
 te pęde elalubo suali.

Dago selama, te tuabo wain ę meba nigibaso,
 usu yaibao,’ wai.

Te tiwai tama, ena Genuai Bidi,
 eno te tigidali Israel we bidi me dologobeo,
 magi baso meni, augwali eno sę bidi dabe dao.

⁹ Te eno Juda dabeba wiegi yai sę eyu,
 te tigidali Israel haniba me tiaibao.

Eno augwali te genuai we bidi hani pedalumainu ilaibao,
 te augwali eno bulu du pesagede
 bidalumainu yaibao.

Te hani we bidi dabe eno augwali sa munama,
 te eno sę bidi bidimainogo yai,
 te tęde augwali bidimainu yai dao.

¹⁰ Te augwa sipsip dabe, te bulmakau me,
 te tęde pęęanalueibao,
 te Saron te giliga dega sigulubo
 pedai te odogo pesagede gagalasa pali,
 te Akor giliga pedalubo badu
 te odogo tęba usu nigi paibao.

Te augwa nosai hauwa elalu, te nai tuyu,
 toma neyu, bidaibao.

Eno te sę dabe ebo te ena gegebo homu elalubo we bidi

dabeba tiaibao,” te po wali. *

11 “Tiali goli, dage da, te dage ena tudiba muyu,
te eno bulu du, te Saionba asisama,
te enaba lotu wagasisabo hani dabe,
dage te dwai dene mu saibao.

Dagego te Gat me Meni, te siba nai me wain aꞑ mayu,
lotu wabo dao.

Te tibo god dabe te augwaligo dage
tau somainu ebo da homu elama,
te duga wiegi yai sogo elalueiba homu yalio.

12 Tiali goli, eno gasagi yai sogo dageba sa muai.

Te boi dabego dageba hwiꞑagaselama,
te dage augwa bainat hwaꞑ dabego ela mueibao.

Te duga kidu sugunama, te tobolu toꞑba basigulama,
te boi bidi dabego dage tobolu mage togwaibao.

Te seꞑ dabe pedelaibao, magi baso meni,
eno dage i wali, te dagego eno i wabo wei ponobeo.

Te eno po me dageba pusali,
tiali dagego wali pabeo. Menio.

Dagego eno po sela sayu, te eno gedude
dwai kolesaga naga yali,
te eno godolo homu isaꞑwai
kolesaga dabe mu ebao wali.

13 Tama tibaso, ena God, Genuai Bidi,
eno te tama po obao.

Te eno seꞑ bidi dabego te nai me aꞑ hauwa elalueibao.

Tiali, dage te ena tudiba mubo hani dabe,
te dage nai sili bidu, te tuabo aꞑ meni yaibao.

Te eno hani dabe, te augwa wiegi yai pemene yaibao,
tiali te dage dwai hale mu saibao.

14 Te eno seꞑ bidi dabego haligade

* 65:10: Jos 7:24-26

te wiegi yai homu pemene paḡaḡanalu,
 te augwa homu pemene ebo teḡabi po waibao.
 Te dagego haligade te homu dene ebo paḡaḡanalu,
 te dagego homu kolesaga kone tuḡ pelama,
 te dage gela bomonama mu waibao.

¹⁵ Te eno hani dabe, te augwa gasa
 bageba po dwai wabo sogo da,
 teda augwa te tiwai po waibao,
 ‘God, Genuai Bidigo dage dolomainu yaibao,
 te agai te dwai hani dabe dolali tiwai yao,’ waibao.

Tama te bidi dabego dage nogi
 te dwai nai homu tiwai yaibao,
 tiali goli eno te wiegi yai gesi nogi
 te ena seḡ bidi dabeba mawaibao.

¹⁶ Tama te tigidali tḡ habu pedai badude,
 te bidi dabego gedu haluasa po enaba weyu,
 te mu po naga wabo God da po weyu,
 te augwali wiegi yai bugagia ilao
 po enaba hanalueibao.

Te bidi dabego augwa po daḡ walabo homu elama,
 augwa te eno nogi delide naga te mu po
 dao waibao.

Tama augwa te polobadu elaluali haliga
 seḡe me dwai seḡ yali dabe
 te homu kone gegeda palaibao,
 te ena, Genuai Bidi, te eno augwa
 te polobadu yali dwai seḡ dabeba
 homu kone mu gegeda palaibao,” wali.

Tigidali nai te gesi Jerusalem dali bugagia elalueibao

¹⁷ Genuai Bidigo te tiwai po wali,
 “Suao, eno gesi dagalu me tḡ nigaibao.
 Te bidi dabego te polobadu pedelali

naiba homu kone me palogobeo.

Augwaligo te nai mu gegeda paibao.*

18 Dagego te eno megì nigali gesi naiba bugai haliga eyu,

wiegi yai pemene sesemane sogo yao. Magi baso meni.

Te eno nigainogo ebo gesi Jerusalem

te we bidi dabego godolo elama,

wiegi yai pemene yabo pesage pedelaibao,

te aga we bidi dabe te bugai haliga mu elama bidaibao.

19 Ena digi me eno wiegi yai pemene

te Jerusalemba elama,

te ena we bidi dabeba bugai haliga yaibao.

Te gesi nigali Jerusalemde te bidi dabe gela wabo

kulukulu munu me elalugobeo,

te genuai dene elalubo bidi dabego

te i wabo se me elalugobeo.*

20 Te dwasianu ogomani dabe me

te ogomani bidi elalubo sogo me isigobeo. Menio.

Tigidali we bidi te bobobage sogo sesabi elama,

mu bidama, te monu dabe mu pedelaibao.

Te augwa kibu be bidi sese a naga 100 yia bidali,

te tagalao, augwali te gesi tigi elalubo we bidi

bidaibao,

tiyu augwali me deli te kibu be bidi sese a naga 100

yia bidisiabadi isibaso,

te gasa bagego homugo te Genuai Bidi eno aga

isimainu yai da,

te homu yaibao,” te po wai dao.

21 “Te eno we bidi dabego te be dabe se nama, tede

bidalueibao.

* 65:17: Ais 66:22; 2 Pi 3:13; Ped 21:1

* 65:19: Ped 21:4

Te augwa te wain gi dabe bulama,
te wain du tabila tuyu, bidaibao.

²² Te boi bidi dabe munu ma aselama,
te eno we bidi dabe sela sayu, ela gudulama,
te augwaligo beba bidagaselama,
te augwa wain gi selama,
te wain du tabilama tuyu, me tegobeo.

Te eno we bidi dabe sesabi elama,
bobobage sogo mu bidaibao,
te bomai dila pai ni tiwai elalueibao.

Awe, tama augwa digi sę dene elama,
pedalubo naide wiegi yai
homu pemene elama, bidaibao.

²³ Augwa ebo sę te odolali me ela tagalogobeo.

Te augwa wai dabe me doloyu,
me egobeo, magi baso meni,
augwaliba eno te wiegi yai sę bugagia yainu,
te sa muani hani dabego wai dabe dao.

Te eno augwaliba bugagia wiegi yai sę eyu,
te augwa wai dabeba me,
te augwa nosali bulabo waj nõu
wai dabeba te tama tiaibao wali.

²⁴ Te augwa godolo homu eyu,
te sabo homu ebo nai po te enaba gedu haluasa po
weyu,
hanalusiabadi, te eno augwaligo
hanalubode wei ponaibao.

Te augwa gedu haluasa po wabo sogo da,
teda eno te nai dabe augwaliba mawaibao.

²⁵ Te bulu uni yowi dabe me te sipsip wai dabe
augwali hodobo deliba nai tueibao.

Te laion dabego te bulmakau dabego
nosai tubo tiwai yaibao.

Tiali goli, te hasamani dabego da,
 te t̄ hogomu naga tueibao.
 Te Genuai Bidi, eno buludu pesage tigidalide,
 te tigidali nai bugagia elalueibao,
 te bidi me deligo gasa bidi meba
 dwai s̄ iliyu me tegobeo.
 Ena Genuai Bidi, eno po wai dao,” wali. *

66

*Genuai Bidigo aga boi bidi dabe aiyaba elaluama, te aga
 dologoba asali haniba wiegi yai s̄ yaibao wali po*

¹ Genuai Bidigo te po wai,

“Dagalu da, te ena dugabo sia king tiwai elalu,
 te t̄ eno saḡa ugwadu mubo pesage dao.
 Tega. Te dagego eno be s̄ ebo usugowe?
 Te mena badu ena toma nabo pesage elalueibawe?*

² Genuai Bidi ena digi, eno te dagalu
 me t̄ tigidali nai nigilama,
 te augwali pedelama, megi elalubao.
 Eno te tobage bidi dabeba bugagia haliga yaibao,
 te augwa digi aiyaba elaluama,
 te augwa yali dwai s̄de homu dene eyu,
 enaba wi elama,
 te eno po dologoba aselama, bidibo bidi.”*

³ “Tiali goli, te augwa digi dobo homu wali pabo
 we bidi dabego augwa te haniani dwai kolesaga
 godolo mu eyu,
 tama augwa te enaba lotu mu obao, te homu ebao.
 Tiali goli, augwaligo enaba te ofa ebo

* 65:25: Ais 11:6-9 * 66:1: Mat 5:34, 35; 23:22 * 66:2: Tpi 7:49-50

tigidali te eno godolo mu me isawai.
 Te augwaligo bulmakau elama, enaba ofa ebo sogo,
 eno suali, augwa te bidi elali tiwai ebao.
 Te augwa sipsip wai elebo sogo,
 eno suali, augwa te yowi elama,
 te enaba ofa tiwai yali.
 Augwa te wit dabe ofa ebo sogo, eno suali,
 augwa te kibu kaneme ofa ebo tiwai yali.
 Te augwa wiegi yai denami ebo hano ebo ofa ebo sogo,
 eno suali, augwa te tibo god piksa
 me deliba ofa ebo tiwai yai dao.
⁴ Te pagede tama te augwaligo tolabo seḡe eno sa
 muani,
 augwa te wi mu ebo seḡe dao.
 Magi baso meni, eno augwaliba i obadi,
 te eno i wabo augwaligo wei ponobeo.
 Te eno po me augwaliba pusubadi,
 tiali goli augwa wali me pabeo. Menio.
 Augwa eno po sela sayu, te eno gedude
 dwai kolesaga naga yali,
 te eno godolo homu isaḡo kolesaga dabe mu dao.”
⁵ “Dage te wi elama, te Genuai Bidi,
 eno po dologoba asobo hani dabe,
 dagego te megi eno dageba pusainu ebo po odao.
 Dage ena wali asobo bomo yai,
 tama te duga deli hani dabego
 te dage godolu mu me isaḡa,
 te augwaligo dage tudiba muai.
 Te augwaligo dageba posobo po weyu,
 dageba te tiwai po wali,
 ‘Te Genuai Bidi aga genuai bomo dali asomainu eyu,
 te dage pemene ilimainao, te tebo dago sueibao.’
 Tialima, eno te po obao,

te dagego augwali dwai hale mu
sabo sueibao, te po wali.

⁶ Te taun tomode genuai i weyu,
te eno be tomode kulukulu wabo odao.
Te eno i me kulukulu weyu ebao, te Genuai Bidi dao.
Eno te ena boi bidi dabeba dwai dene mayu,
te augwa yali dwai kolesaga wei ponaibao,” wali.

⁷ “Ena, Genuai Bidi, eno te po obao,
eno taun te wego wai deli sogo polo
tama ame nabo tiwai yaibao.
Aga te wai ame nabo tigi dene isaḅadi,
tama te wai polo pedelali. *

⁸ Dagego te tobage se polobadu sulama,
odai da homu eba, agawe?
Te bulu toḅ kantri me deli te deli sogo
pedalubo da, agawe?
Te genuai hani we bidi me deli te deli sogo tama me
pedalubo homu eba, agawe?
Tiali, Saion aga te wai ame nabo
tigi dene ebo gagalobo sogo,
te polo tama aga te wai ame naibao.

⁹ Ena God, Genuai Bidi, ena digi eno
aga te wai ame nabo dene ilali.
Tama tibaso, te magi elama eno agai haliga paniamama,
eno aga wai somainu iligobe dawe?
Ena da, ena dagego God dao.”

¹⁰ “Dage te Jerusalem godolo mu ebo hani dabe,
dagego aga dali wiegi yai pemene yao.
Dage agade te homu dene elama,
gela weyu yali hani dabe,
megi da, dagego aga dali wiegi yai homu pemene yao.

¹¹ Magi baso meni. Aga bugagia bidibaso,

* 66:7: Ped 12:5

te duga wiegi yai pemene elama,
 agade te wiegi yai nai hauwa saibao.
 Aga te dagego ida me deli tiwai elama,
 tama dagego aga ame tuyu,
 te dage bugagia mu paganama,
 te haliga nagame yai bidaibao,” wali.

¹² Genuai Bidigo te tiwai po wali, “Magi baso meni.
 Eno te Jerusalem bugagia mu elalumainu yaibao,
 te sesemane sogo agai te gasa tɔ kantrigo wiegi yai
 nai dabe hauwa saibao.
 Te aga magi deli me sɔɔ pisama,
 te wɛ sesemane sogo asudu,
 te sula sisabo tiwai yaibao.
 Te dagego te nai dabe siyu, wiegi yai pemene mu yaibao,
 te waigo idago ame tuyu, pemene ebo tiwai yaibao,
 te waigo aga idago sabilibaso, pemene ebo tiwai eyu,
 te idago aga telede pilama,
 aga dali gagali ebo tiwai ebo dao.

¹³ Te eno dage bugagia mu tonalu,
 te idago aga wai bɔɔ bugagia tonalubo tiwai eyu,
 te aga waigo haliga dua nagame
 ilibo po wabo tiwai yaibao.
 Dage te Jerusalemde bidiyu,
 te duga haliga nagame elama bidaibao.

¹⁴ Eno te tama sɛ dageba ebo subaso,
 te duga haliga pemene mu elama,
 te dage genuai bomai hani mu pedelaibao.
 Te dage eno sɛ bidi dabego te duga Genuai Bidi eno
 bomo bugagia koneaibao.
 Tiali goli, eno boi bidi dabego te eno
 haliga sɛbɛ koneyu, gɛ naibao.”
 Genuai Bidigo te po wai.

¹⁵ Te dagego Genuai Bidi te sia dali asobo sueibao,

te aga karisde dugulama, bomonama,
 umagia mu udayu,
 te bomai wali asobo tiwai yaibao.

Te aga haliga sębę ebo siago te aga boi bidi dabe ulama,
 te augwali mu silaibao.

¹⁶ Magi baso meni. Te Genuai Bidigo isigo te we bidi
 uluyu,
 te agai hwą ge bainatgo te we bidi hauwa mu ela
 mueibao,
 te augwa yali dwai sę wei ponoyu, tiaibao.

¹⁷ Genuai Bidigo te tama po wali, “Te tibo godiba lotu
 wabo hani dabe, augwa te tibo godigo gedude wiegi yai
 pedalumainu ebo kolesaga wali peyu, augwa te lotu wagi
 pabo pesage giba pelama, te augwa polalubo bidi dabego
 ebo kolesaga wali pelama, augwa te kibu mi, me bolo mi
 tuali, te gasa nai dabe eno gedude wiegi yai isąbo nai tuali,
 augwa tigidali dolama, mu silaibao,” wai dao.

*Te tigidali tų kantri we bidi dabe te Genuai Bidi dologode
 bidaibao*

¹⁸ Genuai Bidigo te po wai, “Eno te we bidi dabe homu
 kolesaga sulama, tama eno konebao, te megi da, eno te
 tigidali we bidi dali sisinibo sogo dao, te mena po haniani
 wabo bage me sisinaibao. Te augwali sisinagasobo sogode,
 teda augwaligo te eno genuai ula me bomo sueibao. ¹⁹ Te
 eno augwali tomode te dąj me deli pedalumainu ilaibao.”

“Tialima, eno te hani meba, te dolisąwani hani bage, te
 digibulu tų kantri we bidiba tagala palama, te eno genuai
 nogi me bomo te eno genuai bomo ebo po odisąwani
 we bidi dabeba pusugi pomainu yaibao. Te augwali eno
 te hani dabe Tarsis, me Pul dabe, me Lidia, te haniba
 tagala palaibao, te Lidia bage augwali enesigigo ene enebo
 mu konea pai bidi dabe mu, te Tubal me Gris dabeba,
 te digibulu bidalubo gasa we bidiba me tagala palaibao.

²⁰ Tama te t̄o kantri we bidi dabego te duga deli hani dabe duga abagi te augwa bulu kantridu enaba te ofa tiwai elama, odasa asaibao. Augwa te augwali te hos dabede, me donki dabede, me kamel dabede, me karisde dugulasa asomainu ilaibao, te augwaligo augwali te eno bulu du Jerusalemba odasa asaibao. Augwaligo augwali enaba odasa asobo, te dage Israelgo te ofa yabo wit te wiegi yai pou dis te eno gedude wiegi yai yaide wit munama, te eno beba sela asobo tiwai yaibao. ²¹ Tama te augwali meba eno te pris pedalumainu ilaibao, te meba Livai hani bidimainu yaibao,” Genuai Bidigo te po wali.

²² “Ena Genuai Bidi, eno te po obao, te gesi dagalu me gesi t̄o eno nigaibao, te eno gedude sesemane bomo elalueibao, te tiwai duga wai dabe te sesemane sogo bomo elalu, te dagego nogi me sia sogobeo. * ²³ Te genuai si tigidalide, te gesi poluade nanobo side, me tigidali Sabat side, te tigidali t̄o habu we bidi te asiyu, te ena geduba kidu sugunama, enaba lotu waibao, Genuai Bidi dao. ²⁴ Te augwa eno be tagalobo sogo, te augwa hagoma elama, eno po sela saʒwani hani dabe tigi, te t̄ode pila muna muna pabo sueibao. Te dwasianu sawi dabego augwa tigi dabe tuyu, te bidada paibao. Te isigo augwa tigi deyu, te me siligobeo. Te tigidali we bidigo te bidi hani dabego tigi sueibao, te damua pai dwai nai mu tiwai yaibao,” God Genuai Bidigo te po wai dao. *

* 66:22: Ais 65:17; 2 Pi 3:13; Ped 21:1

* 66:24: Mak 9:48

Godigo dwagi yai po buku
The Holy Bible in the Dadibi Language of Papua New Guinea
Buk Baibel long tok ples Dadibi long Niugini

copyright © 1987, 2001 Wycliffe Bible Translators, Inc.

Language: Dadibi

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-22

PDF generated using Haiola and XeLaTeX on 23 Aug 2019 from source files dated 20 Jul 2017

f3fb5335-7c77-5120-883d-cc05478d7362